

**EIGHTH LEGISLATIVE ASSEMBLY OF MIZORAM  
(NINTH SESSION)**

**LIST OF BUSINESS**

FOR SEVENTH SITTING ON WEDNESDAY, THE 2<sup>nd</sup> MARCH, 2022  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **ER. H. LALZIRLIANA**, to lay on the Table of the House a copy each of the following :
- (i) Statement on Action Taken on the further recommendations of Committee on Government Assurances contained in the Fifth Report, 2021 relating to Public Works Department.
- (ii) Statement on Action Taken on the further recommendations of Committee on Government Assurances contained in the Fifth Report, 2021 relating to Animal Husbandry & Veterinary Department.

**FINANCIAL BUSINESS**

**DISCUSSION AND VOTING ON DEMANDS**

3. **PU ROBERT ROMAWIA ROYTE**, Minister to submit to the vote of the House various Demands under his charge.

<b>Demand No.</b>	<b>Purpose</b>	<b>Amount (in ₹)</b>	<i>Demand for Grants page No.</i>
<b>22</b>	Sports & Youth Services	24,22,12,000.00	195-203
<b>43</b>	Tourism	11,37,45,000.00	405-409
<b>48</b>	Information & Communication Technology	4,90,60,000.00	452-455
<b>TOTAL</b>		<b>40,50,17,000.00</b>	

4. **PU LALCHHANDAMA RALTE**, Minister to submit to the vote of the House various Demands under his charge.

<b>Demand No.</b>	<b>Purpose</b>	<b>Amount (in ₹)</b>	<i>Demand for Grants page No.</i>
<b>18</b>	Printing & Stationary	12,68,86,000.00	156-159
<b>20</b>	School Education	14,93,93,62,000.00	168-183
<b>28</b>	Labour, Employment & Skill Development & Entrepreneurship	33,33,41,000.00	268-273
<b>TOTAL</b>		<b>15,39,95,89,000.00</b>	

5. **DR. R. LALTHANGLIANA**, Minister to submit to the vote of the House various Demands under his charge.

<b>Demand No.</b>	<b>Purpose</b>	<b>Amount (in ₹)</b>	<i>Demand for Grants page No.</i>
<b>21</b>	Higher & Technical Education	2,64,80,96,000.00	184-194
<b>24</b>	Health & Family Welfare	7,20,63,59,000.00	213-247
<b>40</b>	Commerce & Industries	63,59,63,000.00	376-390
<b>TOTAL</b>		<b>10,49,04,18,000.00</b>	

**H. LALRINAWMA**  
Commissioner & Secretary

\*\*\*\*

**SPEAKER** : *Lalpa mit chu hmun tinah a awm a, Thil tha leh tha lo a enthla reng thin.*

-Thufingte 15:3

Tunah chuan *Zawhna & Chhanna* -ah kan kal ang a, Member zahawm tak Pu Lalduhoma, a zawhna no. 81 zawt turin ka sawm e.

**PU LALDUHOMA** : Pu Speaker, ka zawhna chu -

- a) Tlawnglui Nghalchawm kaia thir lei dawh hna hi tuin nge thawk?
- b) Thawh tan ni leh zawh hun tur engnge?
- c) Engzatnge a amount?

**SPEAKER** : Tunah a chhang turin Rural Development Minister zahawm tak Pu Lalruatkima ka sawm e.

**PU LALRUATKIMA, MINISTER** : Pu Speaker, member zahawm tak zawhna chhanna chu -

- a) Executive Engineer, Rural Development Department.
- b) Hna hi ni 17.11.2021 ah thawh tan a ni a, estimate ah chuan thla 5 chhunga thawh zawh tura ruahman a ni.
- c) ₹30.40 lakh.

**SPEAKER** : Zawhbelhna zawt turin a zawhna neitu member zahawm tak Pu Lalduhoma ka sawm e.

**PU LALDUHOMA** : Pu Speaker, ka lawm e.

*Zawhbelhna:* He hna hi a thawk tak tak tu chu MNF Aizawl West-I block a ni a. An rod hman hi sut thum a ni a, balu pangngai hmang lovin Phaipheng balu mai mai an hmang a. Tin, an ban khur te a thuklo em em a, mipui ngaih a tha lo a ni, a tlo lovang tih an hlauva. Hlep tam lutuk tum lo sela, tha deuh hleka tih tir dan min lo zawnpui thei ang em?

Pahnihnaah chuan, Rural Development Department hi Secretariat-ah DDO nei awmchhun an ni a. MGNREGS te, PMAYG te, SPMRM te, heng zawng zawng hi Directorate-in khawih lovin Secretariat lamin an khawih ta hlauh mai a. Hei hi MNF sorkar hmasak atanga tih niin Congress sorkar hian an chhawm chhoh zel, tun thlenga kal ta niin a lang a. Hei hi thil kalhmang niin a langlo viau mai a, Directorate lam an leh-awl der mai hi siamrem a tha zawk lo maw tih kha ka zawhbelhna pahnihna a ni e.

**SPEAKER** : Zawhbelhna zawt turin member zahawm tak Pu Lalrintluanga Sailo ka sawm e.

**PU LALRINTLUANGA SAILO:** Pu Speaker, ka lawm e. Kei chuan hrereng chungin ka zawt dawn lova, ka hriatloh ka zawt dawn ani.

*Zawhbelhna:* Ka bial Parvatui leh Phuldungsei inkara Marlui Lei, mihring kal kaina kum 2019 a chhe vek tawh leh Zopui leh Phuldungsei inkar, Marlui Lei tho, kum 2019 a tuilianin a lak chhiat vek tawh, kan BDO in vanduaithlak taka min boral san avanga a thawhna tur sorkar sum dah *lapse* ta kha hmalak thar tumna a awm em? Awm ni se, estimate engzat nge? Engtikah nge hna tan theih anih ang?

**SPEAKER** : Zawhbelhna zawt turin Member zahawm tak Pu Zodintluanga Ralte sawm ang.

**PU ZODINTLUANGA RALTE :** Pu Speaker, ka lawm e.

*Zawhbelhna:* Rural Development Department atangin thingtlangah mirethei in sak te kalpui a ni a. Kum 2020 khan mi tam tak first installment pek an ni a, thingzai te leiin bul an tan a, mahse waviin thlengin 2<sup>nd</sup> installment pek an ni lova. Kum hnih lai a liam tawh a, an khawngaihthlak em em mai a, heng te hi kan Minister zahawm tak hian installment lokal leh atang hian first installment dawnga bul lo tan tawh te kha an sak zawh theih nan priority min peksak thei ang em?

A pahnihna atan chuan, Assembly zawhnaah hian Rural Development Department hnuai hna tam tak, ‘BADP’ kan tih te zawng zawng hi departmental work vek a thawh a ni a. A hnathawktu hmingah hian ‘BDO’ tih hi rampumah hian a ni vek mai a. Hei hian sorkar official te thil dikloh eng emaw awm palhah anmahni duh vang reng nilovin an tuar theiin ka hria a. A bik takin officer-te hnenah department work anih chuan “20% in rawn dah tur a ni” tih ang chi te, official lam atangin “20% kan pek chuan hna kan thawk theilo, 15% tal hi a theih lawm ni” tih ang chi hi a lo awm phah thei ta a. Chuvang chuan, Pu Speaker, kan Minister zahawm tak hian sorkar hmasa atang emawa a kalphung hi a thalo a nih chuan, department work anga hna zawng zawng a kal hi siamrem theih dan a nei em?

**SPEAKER** : Awle, a theih ang ang chhang turin a changtu Minister zahawm tak Pu Lalruatkima ka sawm e.

**PU LALRUATKIMA MINISTER:** Pu Speaker, ka lawm e. A zawhna neitu Pu Lalduhoma, Member zahawm tak zawhna kha –

Ni e, a buaithlak khawp mai a. Kan ramah hian hun rei tak kan lokal pui tawh a, Member zahawm tak Pu Zodintluanga zawhna pawh kha a ni thova. MLA fund pawh hi Executing Agency chu Planning Department-in a rawn ruat a, *guidelines* ang khan. Mahse a tak takah chuan i dinglam leh veilama mi te hian zep thu cheng lovin kan mi duhsak zawngte kan pek chang a awm a. Hmannia ka len kualnaah Aizawl pa lar tak pakhat ka zawt a, ‘enge a thawh thin a’ ka ti a, MLA Fund-in YMA hmingin hna a thawk thin a ti a. Opposition MLA bial a ni a, khatiang kha kan ni a.

Awle, ‘sut thum an hmang’ tih kha Pu Speaker, a thlalak te chu ka han en a, Nghalchawm kai khu a pawimawh em em a, “SEDP atangin min tihsak rawh u” kan ti a, an rod hman chu a tul angin kan lo enzui ang. Tunah hian an thleng thui tawh khawp mai a, a banpui pawh an zo tawh a. Khulai velah khuan leidawh chim thin te a awm avang khan fimkhur a ngai em em a, chuvang chuan tunah hian lei lianpui mai NH44 ah an dawh a. Hun rei tak chhung lei tha an mamawh avangin ruahmanna kan siam a ni.

Tin, PMAY, MGNREGS leh SPMRM chungchangah khan, tuna kal dan hi hunrei tak atangin an lokal pui tawh a. Zawi zawiin siamthat a ngai a ni kan ti a. BADP pawh Directorate lamah kan dah pheii a, kan dinhmun a zir zelin hei hi chu kan kalpui turah ngai ila.

Tin, Member zahawm tak Pu Lalrintluanga Sailo zawhna, a bial chhunga SEDP hnathawh, 2021-2022 atana tih, nikum hmasa lama BDO a boral thut avangin kan chesual a, kha sum kha a *lapse* a, kan han dil tha leh a. Tichuan executing work order hi BDO-ah kan pe tawh a, “Foot Suspension Bridge over Marlui between Parvatui and Phuldungsei” tih a ni a. Tin, pakhat zawkah khan “Suspension Bridge over Saipui river, Zopui and Phuldungsei” tih a ni. Chuvang chuan tunah hianin hna an thawk tan tawh hialin ka ring a ni.

Member zahawm tak, Pu Zodintluanga zawhna PMAY kha, ni e, Pu Speaker, kan hriat angin tun zawhnaah pawh khan a awm a, hei hi vawiinah a chhuak hman maithei a, a chhuak lo maithei bawh a. PMAY hi a buaithlak khawp mai a, socio-economic caste census 2011-ah khanin kan han ruahman a, chutah chuan survey an han nei a, khaw tamtak an lut ve hman lova, tih hmaih an ni a.

He House zahawm takah pawh sorkar hmasa, i veilama kan thut lai pawhin kan sawi a, khatih hunlaia lo thlan tawh kha a ni a. ‘AWAASSoft’ kan ti a, thlak kan dil a, sorkar hmasaah pawh khan kan ti hleithei lova, 24,000 vel eligible beneficiaries tura kan ngaiha kha an han enchiang a, 19000 velah a tlathla a. A tlangpuiin kan zo khat tawh a, AWAASSoft-a kha.

Amaherawhchu, 2<sup>nd</sup> installment la hmuh lohte kan nei a, a chhangkhat em em a, SECC data 2011-a 1,30,000/beneficiary kha sanction a ni. Dr. BD Chakma khan, ‘ka bialah chuan officer nupuite pawh beneficiary list-ah an awm’ a ti a. A thlangtu kan ni lova, hei hi tihdanglam kan chak a ni. Kum 2018 khan sorkar in eligible beneficiaries tamtak la tih hmaih an awm avangin, “min pe ve leh rawh u,” an zuk ti a. Khatih laia sorkar khan AWAAS plus an ti a, AWAAS Plus-ah kan lut leh a, chuan chutah 17,000 bawr vela kha an lut ta a ni.

AWAASSoft hna kha district tinah kan zo deuh vek tawh a. western belt kha tlem hmaih an la awm a, AWAASplus a kan han luh takah chuan, he dinhmunah, Pathian leh mipui zara sorkarna kan han chan takah khan, kan mi leh sa te in leh lo neilo, rethei tak tak te khan, ‘kan tel ve miah lo a nia’ an rawn ti ta nuai nuai mai a. Tichuan DO letter te ziakin a hmunah Ministry lam te kan zuk dawr a, Aizawl-ah Regional workshop te an rawn nei a, chutah pawh chuan, “PMAY Gramin hi hi min thlak sak teh u, a buaithlak em mai, hmuawm taka ngaihin an hmu lova, hmulo awm taka ngaih te list-ah an tel leh sia” kan ti a, amaherawhchu an la phal chuang lova ni.

Tichuan, Pu Speaker, I ding lama mite kan sorkar hian kan la thlang hauh lo mai a, thlan an la phal tlat lo mai a. Chu chu auto-generated-a a awm avangin a intahtawlin a rawn chhuak zel a. Tichuan tunhnai-ah AWAAS Plus ah khan 6,800 vel kha min rawn pe a, mahse kha pawh kha an han enchiang leh a, ‘bedroom 3 nei’ tih te kha alo awm a, kha kha an han paih leh a, eng eng emaw criteria hrang hrang avang khan. Chungte pawh chu paihtu kha kan nilova. Tun dinhmuna virtual meeting te kan han nei a ministry lam nen pawh, kan state sorkar in kan tih tur ang zawng zawng te kan han pe vek a, SMS-ah pawh pakhatmah pekloh kan nei lova. Heng zawng zawng hi kan tih zawh vek (exhaust) hnuah khan a thar anga kalpui leh theih tur chauh a nih avangin, PMAY kha kan mu tan nasa khawp mai a, kan mang a ang khawp mai.

Tin, Pu Speaker, Member zahawm tak Pu Zodintluanga’n ‘RD department hnuaiia executing agency’ a tiha kha, khang kha departmental, a guidelines nei a ni a, a thawh tak tak theih loh a, nichina MLA fund kan han sawi ang deuh kha a ni a. MLA fund ah pawh i ding lama mi leh i vei lama mi te chuan a tihdan kalphung kan nei vek a. Kan thian pakhatina a sawi ang deuh kha a nihna chen a awma, khalaiah khan an hlawhfa rawih emaw an mistiri rawih emaw khalam kha kan hriatpui zui ta lova, khatiang khan kan la kalpui ta zel a. Chungte chu kan dinhmun a ni e. Ka lawm e.

**SPEAKER** : Starred Question No. 84, zawt turin Member zahawm tak, Pu Nihar Kanti Chakma ilo sawm ang u.

**PU NIHAR KANTI CHAKMA:** Pu Speaker, ka zawhna Starred Question No. 84, PWD Minister zahawm tak chhan atan -

National Highway 302 Lunglei - Tlabung kawng laih hna hi thawh mek a ni a, tunge a contractor nia, engzah nge a estimated amount?

**SPEAKER** : A chhang turin PWD enkawltu kan Chief Minister zahawm tak, Pu Zoramthanga ka sawm e.

**PU ZORAMTHANGA, CHIEF MINISTER:** Pu Speaker, Member zahawm tak Pu Nihara zawhna chhanna chu:

National Highway 302 Lunglei - Tlabung tuna laih mekah hian a contractor chu SRK Construction & Project Pvt. Ltd a ni a, a estimate amount, project cost hi ₹839.98 crore a ni.

A zawh hun tura ruat chu, Package-I : Ni 31.12.2022, Package-II : Ni 09.01.2023.

**SPEAKER** : Zawhbelhna zawt turin a zawhna neitu Pu Nihar Kanti Chakma ilo sawm ang.

**PU NIHAR KANTI CHAKMA:** Pu Speaker, ka lawm e.

*Zawhbelhna:*

- i) Hemi hi estimated amount-ah hian leihlawn te an telh em? A chhan chu, Lunglei – Tlabung inkarah hian leihlawn pathum lai a awm a, a chhe hlawm em em mai a ni. Leihlawn pakhat Phairuangkai ami chu a strengthening tih zawh tawh a ni a, a dang pahnih chu a chhia a ni.
- ii) Leihlawn hi estimated amount ah a tel loh chuan a hranpain siam tumna a awm em?
- iii) Hemi kawng laih hian huan tamtak a tichhia a, ka hriat sual loh chuan tunthlengin compensation hi pek an la ni lo a. Compensation hi pek tumna a awm em? Awm ta se, engtikah pek tur nge tih te a ni e.

**SPEAKER** : Zawhbelhna zawt turin member zahawm tak, Pu C. Ngunlianchunga zawt turin ilo sawm ang.

**PU C. NGUNLIANCHUNGA:** Pu Speaker, ka lawm e.

*Zawhbelhna:*

- i) Nikum October thla session kan neih khan KMMTT road compensation chungchangah Mizoram aia zau compensation claim anga sawia kha chhut dikloh a ni tih kha ka sawi a, khata an document pass claim tute leh kha area mathematical

calculation (an chhut dan) copy min pe thei ang em tiin. Khatih laia PWD changtu minister 'khan pe thei ang', tiin min chhang a, mahse vawiin ni thlengin min la pe lova. Kha kha min pe thei ang em?

ii) Vanduaithlak deuh maiin ka bial Vathuampui - Tuichawng tlang hi RCC rigit pavement thawh mek a ni a. Chutihlai chuan Tuichawngtlang khua a miten an field lai turin darkar 70 chuang zet mai an va ngen a. An niin, a kar kawng leh diesel inphurhna te a hla a, chumi avanga an la tih theih loh tur thu an lo hrilh khan, ni 21 February thleng bak hnathawh an phal ta lova, contractor-te an chhuak tlat mai a. Chu chu khawngaih takin PWD changtu Minister hian min umzui sak thei se la tih ka duh a. Hei hi, RD demand sawi khan ka phar a, min zawh tir ta si lova. Tihluhnain Tuichawngtlang khuaa mite hi *Ni 100 inhlawhna* ni 6 zet mai an cut sak nghe nghe a. Chutiang chuan hmalak a ni a, khalai kha kan Chief Minister zahawm takin sawrkar angin an lo hre tawh em? A hre lo a nih pawh in khami kha thawh zawh ngei a nih theihna turin hma min lak sak thei ang em?

iii) Nikum Budget Session laia kan sawi, Mara Autonomous District Council (MADC) in DPR an siam ve cheng vaibelchhe 4000 leh tih chuang kha State sorkarin an thawk dawn a ni tih kha a ni a. Kha kha thawh a ni ta em? Ni se, tunge a contractor? Kha Chakhei - Siasi kawnglahina kha open tender nge a niha restricted tender bawka pek? Tunge a thawktu?

**SPEAKER** : Zawhbelhna zawt turin member zahawm tak Dr. Vanlalhlana ka sawm e.

**DR. VANLALTHLANA** : Pu Speaker, ka lawm e. Kan Minister zahawm tak PWD changtu chhan atan -

*Zawhbelhna:*

i) Hei, kan hria a, 'Kamrula' kan sawi fo a, a hmingpum pawh tarlan a ngai lem lovin ka hria a. Sawrkar hnuaiah contract hna a thawk a, 'ST certificate te cancel tur a ni, cancel turin hma ka la' a ti a. Income Tax Act, 1961 Section 194 (c) naah khan, Tax deducted source a rawn lang a, chutah chuan, permanent A/C te kha Income Tax Assessee ten an thehluh a ngai a. Kan sorkar hian khatiang khan a lo ti em? A ni hian a tribal certificate neih chhuanlamin khatianga deduct lo tur khan a lo ti em?

Tin, a tribal certificate hi cancel a nih chuan, a consultancy firm sorkara a dilnaah khan he lam panga tribal anga a dil a nih chuan a contract ho kha *null & void* (hmantlak loh) a lo ni thei a. Chumiah chuan department hian a contract te enthat emaw, terminate emaw tumna a nei em?

ii) A tawp berah chuan, IT Investigation Wing, North Eastern Region changtu hnenah hian zawh tumin hma kan la mek a. Chutah chuan, han zawt chiang nghal law



law ila kan ti deuh a. PWD hian income tax a pek tura hi, a then kha an pek a ngai a, chu chu an lo pek sak em?

**SPEAKER** : Aw le, zawhnate a inkarkik khawp a, Lunglei to tlabung atangin Kamrula te, Council te, KMTTP te a ni a. A theih ang ang chhang turin Chief Minister, PWD changtu kan sawm e.

**PU ZORAMTHANGA, CHIEF MINISTER:** Pu Speaker, a inkarakik lutuk deuh hlek zawh hi, PWD-ah phei chuan a then hi a number te, a hming khawilai tak nge tih tea a kal avang hian chhan a har khawp mai a. A then chu ka chhang thei hauh dawn lo. A bik takin Pu Nihar a zawhnaah, ‘Tlabung road-ah hian leilawn dawh tur a tel em’ tih ang te, tin, ‘a pawisa hian lo daih ta lo se, pek belh tura dil theih chi a ni ang em, compensation lam eng nge’ tih te. Hei hi NHIDCL lam tih a ni a, kan hriatpui lo khawp mai a, kan inhau kan inhau ve a. Chuvangin, a baka hi chu NHIDCL ho a hrana ka zawh loh chuan ka hre bik hauh lo mai a, PWD thil a nih loh avang hian. A hmian NHIDCL ta pawh ni se la, zawhna hetia a lokal hi chuan anmahni kan lo zawt a, anmahnin min chhan ang khan PWD pawhin kan hna lo pawh kha kan pe thei mai a. Amaherawhchu, heta zawhbelhna a tlachawp tura hi chu, anmahni kha zawh leh theih a ni tawh si lova, chuvangin kha lama kha chu nakinah kan lo en ang a.

Engpawh ni se la, bridge te chu tel awm tak chu a ni a. ‘A tel e’ han ti turin an sanction leh work order inpek dan kha ka zuk hriatpui mai lova. Chuvangin leilawn tel lo chuan kawngpui (highway) chu tlang awm loh tak a ni a, tel awm takah chuan kan ngai a. Mahse, ‘a tel e’ han ti turin a order ka hmuh loh avang khan kan sawi thei mai bik lova. Tin, compensation pawh pek ngei ngei tur chu a ni a, ‘an la pe lo em, eng ang nge an pek, pek loh’ tih lam kha keipawhin ka hre bik lova. Engpawh ni se, khang kha chu pek ngei ngei tur chu a ni hrim hrim a, dan pangngaiiah chuan. Chu chu kan sawi theih ni se la.

Pu Ngunlianchunga’n, ‘a copy min pe ula’ a tih kha, ‘hemi hi ka zawha kha a ni’ tiin a note zia deuhin emaw minrawn pek tir zauh la, chutilo chu kan lo theihngilh tlang thin a, a ziaka a awm loh hi chuan, a department pawh hei hi an lo hrechiang lo thei a. (**Pu C. Ngunlianchunga:** Pu Speaker, nikumah khan zia kin ka dil a, ‘hei hi kan lo pe dawn che nia, thil har a ni lo e’ tih kha a ni a. Nikuma zawhnaah khan tarlan a ni Pu Speaker, ka lawm e.) Ni e, irawn pek chuan anni chu ka pe ngei mai a, ‘hei hi lo chhang rawh u,’ tiin. A, vawikhat i tinawn leh ang. Nikum lam thil kha chu a lehkha zawn te kha a deptt. tan pawh a buaithlak tawh si a. Minute khat lekah i zia kin zo mai ang a, min lo pe la, kan lo umzui leh dawn nia kha kha chu. Aw, a har lo e, kha kha chu.

Tin, a dang, Tuichawngtlang field laih tih kha ka lo hre lova. Khatia Tuichawngtlang field an laih sak loh vanga mi hnathawh lai tihbuaia kha chu a tha lo hrim hrim mai a. (**Pu C. Ngunlianchunga**: Lehkha an pekna, hna chawl tura an tihna lehkha copy pawh a awm a ni. a tha lo khawp mai.) Aw le, kha kha chu a dik lova, a work order-a a tel siloh chuan min laih sak tur a ni. “Min laih sak loh chuan hna in thawk thei lo ang” tih ngawta kha chu a dik lo tawp mai a. Kha kha chu kan lo enzui dawn nia.

Tin, MADC-a “Chakhei - Siasi road inchuh” tih a kha, ni e, kha kha a thawktu chu Kamrula niin ka hria a. Engpawh ni se, Pu Papuaia khan, “kan contractor te leh an thawh zat te min pe la,” a ti bawk a. Khang kha vawiin chhun lamah chuan ka rawn pe vek ang che u. “Tuin nge hnathawk tam, tam lo, a amount tunge tam, tam lo” tih pawh kha, kum 10 chhunga heta a pawimawh kha chu kan rawn telh vek ang. Khata tang khan in lo en ang a, MADC in sawi pawh ka hnenah an rawn sawi a. Lehlam an lo kal a, “e khai, an ti mai mai anih kha, engmah pawisa an seng lo” an ti ve bawk a. Kha kha ‘a ti, tilo,’ tih karah khan a buaithlak khawp mai a. Sorkar chuan a contractor hnena kan pek, hna a thawh china kha kan hriat chu a ni mai a, tih kha ka sawi duh a.

Tin, Member zahawm tak Dr. Vanlalhlana’n tribal certificate chungchang thu a sawi kha tunah hian en mek a ni a. Tute fiamthu in emaw, “tu sorkar nge maw lo pe reng reng” an tih ang deuh kha a ni a, kan sorkar pek a ni hauh lo a nia kha kha. Engpawh ni sela, a endiktu committee-in tunah hian a lekha te kha la in paih sak tur a nih leh nih loh te an lo en ang a, khamiin thutlukna a siam atang khan, “hetia a nih chuan a hma a hemi alo thawh tawh pawh a rul tur a ni/rul lo tur a ni” tih lam kha chu keini rorelna a ni lova, kha kha chu, a certificate kha an paih sak dawn em tih han chiang phawt sela, ngaihtuah lai mek a niin ka hria a, chuta tang chuan a zuitu (resultant problem) awmin “ income tax a pe tur a ni/pelo tur a ni” tih lam a kha chu nakin ah ala rawn keng chhuak ve ang chu maw le.

**SPEAKER** : Politics buaithlakna chu, hmuhdan leh hriat dan inang lo hi a ni. Nichin khan Member zahawm tak Pu Ngunlianchunga leh Pu Rokhaw hi an lo kal a, Pu Mama hovin, “niminah hun min pe tlem bik, ka nau ten an lo chhinchhiah a” an lo ti a, a bula mi Pu Rokhaw hian, “ka ka pu, i ti dik chiah, ka lo chhinchhiah,” a lo ti bawk si a. Pu Mama’n a rawn confirm a min rawn tan bawk a, a har thin khawp mai.

Awle, Starred Question No. 83, zawt turin Member zahawm tak Dr. K. Pachhunga ka sawm e.

**DR. K. PACHHUNGA** : Pu Speaker, ka lawm e. Hon. Minister for Land Resources, Soil & Water Conservation Department chhan atana ka zawhna –

- a) NABARD RIDF hnuaiah 2021-22 chhungin Land Resources, Soil & Water Conservation Department hian hnathawh a nei em?
- b) A neih chuan, cheng engzat man nge?
- c) Khawilai hmunah te nge hna a thawh, tih a ni e.

**SPEAKER** : Chhang turin a changtu Minister zahawm tak Pu R. Lalzirliana ka sawm e.

**PU R. LALZIRLIANA, MINISTER:** Pu Speaker, Dr. K. Pachhunga, MLA zahawm tak zawhna chhanna –

- a) Kum 2021-2022 chhungin Land Resources, Soil & Water Conservation Department hian NABARD RIDF XXIII hnuaiah Rubber Plantation & Development Project hnathawh a nei a ni.
- b) Kum 2021-2022 chhung hian 4<sup>th</sup> Installment thawh a ni a, a project cost chu ₹81.22 lakhs a ni e.
- c) Hna thawhna hmun hi, Rengdil leh Kanghmun, (Mamit District) ah te a ni e.

**SPEAKER** : Starred Question No. 84, zawt turin Member zahawm tak Dr. Vanlaltanpuia ka sawm e.

**DR. VANLALTANPUIA** : Pu Speaker, ka lawm e. Ka zawhna Starred Question No. 84, Public Works Department changtu Minister hnena ka zawhna chu –

- a) Haulawng - Hnahthial via Phaileng South kawnga Mat Lei hna DPR approval hmuh tawh a ni em?
- b) He hna hi eng tika zawh tur nge?

**SPEAKER** : Chhang turin a changtu Minister zahawmtak Pu Zoramthanga, kan Chief Minister zahawmtak ka sawm e.

**PU ZORAMTHANGA, CHIEF MINISTER:** Pu Speaker, Member zahawm tak Dr. Vanlaltanpuia zawhna chhanna chu –

- a) Haulawng - Hnahthial via Phaileng South Kawnga Mat Lei DPR approval hmuh a la ni lo.
- b) DPR approval hmuh a la nih loh avangin, hna zawh hun tur a la sawi theih loh a ni.

**SPEAKER** : Zawhbelhna zawt turin Dr. Vanlaltanpuia ka sawm e.

**DR. VANLALTANPUIA :** Pu Speaker, ka lawm e.

*Zawhbelhna:* Session hmasa ah khan Haulawng - Chhipphir kawng, Lunglei Road Division-a kawng chhe berte zinga mi siam thatna hi engtik nge tih a ni ang tih kha ka zawt a, chutah chuan kan CM zahawm tak PWD changtu hian min assure angin tun thal liam taah khan a then zawh tawh a ni a, Haulawng - Bualpui 'V' road blacktopping hi zawh tawh a ni a, amaherawhchu Bualpui 'V' - Chhipphir road km 7 - 8 vel hi zawh loh laklawh em em mai a awm hrih a, kha pawh kha ka zawt leh a, a hnu ah khan min assure leh a, a lawmawm khawp a. Chu chu Assurance Committee ah take up a ni a, mahse Assurance Committee-in department lam an va zawha an lo chhannaah hian, "Financial Year 2021-2022 chhungin hei hi zawh hman tum a ni e," tih a ni a, mahse hei hi tun thlenga tih ala ni ta lova. Hei hi kan Chief Minister zahawm tak, PWD changtu hian min assure leh thei em, rang taka min siam sak turin?

**SPEAKER :** Zawhbelhna zawt turin member zahawm tak Pu K.T. Rokhaw kan sawm e.

**PU K.T. ROKHAW :** Pu Speaker, ka lawm e.

*Zawhbelhna:* Niawhtlang - Chakhang PMGYS road hi a project hming a nih tak avangin 'Niawhtlang - Chakhang PMGYS road' tiin ka lo sawi ve mai a. Hei hi keini chuan 'Niawhtlang - Chakhang road' kan ti a. Hemi work balance hi nuai ₹1,615/- a ni a, October 2020 ah khan agreement contractor nen pawh hian ziah fel vek tawh a ni a, tunah hian kum 2 lai a kal tawh a, vawiin ni thleng hian km 3 - 4 bawr vel chauh pavement hi siam a la ni a, churang chuan, a contractor hian a hna hi a ngaihthah lutuk niin ka hria a.

Tin, a pahnihaah chuan, Vahia - Phura PMGSY road hi November 2017 khan tender tawh a ni a, a estimate amount hi a vaiin Rs 1,563/- a niin ka hria a. Hei, kum 5 dawn a liam tawh a, concrete pavement tur a ni a, vawiin ni thleng hian km 4 chauh pavement hi siam a ni a, churang chuan, department hian hei hi a rang lamin action min laksak thei ang em?

**SPEAKER :** Zawhbelhna zawt turin Member zahawm tak Pu L. Thangmawia ka sawm e, a phar hmasa zawk tlat.

**PU L. THANGMAWIA :** Pu Speaker, ka lawm e.

*Zawhbelhna:*

- i) Ka bial Dulte - Kawlkulh road National Highway a kal kan dawn a, Kawlkulh atanga Highway pawhna kawng hi a hranpaa tha deuh hlekin min siam sak thei ang em?
- ii) Ka bial lam ramri tawp lamah hian survey a awm a, National Highway tur emaw ti te hi an awm a, hei hi Mizoram sorkar lam hian an lo hriatpui em? Eng chen nge a thlen tawh? Hei hi survey ringawt nge, engtiang tiata laih tur leh eng policy nge?

Tin, Pu Speaker, i remtihain, kan opposition group leader zahawm tak Pu Lalduhoma khan min lo hrethiam sela, “Rural Development chiah hi Secretariat-ah DDO nei chhun” a rawn tiha kha a sawi soal palh a nih ka ring a, GAD pawhin an nei a. Chuvang chuan House record-ah tlema, ‘dawt’ han tih chu a nalh lo ang a, House ah chuan, tlema ‘belhchian dawlo’ tih kha a nalh dawn lova, amah pawhin min hriatthiam ka ring a. Chuvangin, ‘a neihte zinga mi’ tih khan kan record leh a ziaktute khan lo dah thei se, tih kha ka rawn ngen nghal a ni.

**SPEAKER** : Awle, a theih ang ang chhang turin kan Chief Minister ka sawm e.

**PU ZORAMTHANGA, CHIEF MINISTER:** Pu Speaker, a then hi chu ka chhan hleih theih loh tur a awm a, Haulawng, Hnahthial lam ka lo inbuatsaih laiin a taidarh thui si a, a *technical* ang reng bawk si a. Chuvangin, a then kha chu nakinah hriatchian leh zual duh chuan keimahina min zawh laia ka lo chhinchhiah dawn pawh khan a tawng chiang mang lo leh “km chuti zat” tih leh eng emaw kha chian loh ka nei ve a. Nakinah khangte pawh kha leh kha thema ziakin emaw min rawn pe nawn leh ula a, umzui pawh a thain ka hria a. Chutilo chu lo hriat kim loh palh a hlauhawm a.

“Bualpui V - Chhipphir kawng la zawh loh” tih Member zahawm tak sawi kha, sawlam saw ka la chian vak lohna lam, ka kal tam vak lohna lam a ni a, Pu Tanpuia khan kha kha km engzah nge la zawh loh i tih kha? (**Dr. Vanlaltanpuia:** Pu Speaker, km 8 vel a ni e.) Km 8 vel black topping la zawh loh maw? (**Dr. Vanlaltanpuia:** Pu Speaker, Aw, la zawh loh.) Aw le, kha kha kan zawh ngei ngei a ngai tawh a. Laklawh lutuk khatiangah chuan engpawh nisela, a *funding system* leh ‘hman zawh a ni tawh em’ tih leh, ‘a daih lova, pek belh a ngai’ tih thil a ni em? Aw le, tunah hian ka hre mai bik lova, engpawh nisela, a bialtu pa khan nakinah min rawn contact sela, thil harsa lutuk lo turah ngai ila.

A funding system kha, awm sa reng, eng emaw avanga hnathawh zawh loh a ni thei a. A nih loha, fund pek belh ngai te a lo nih chuan a tul angin kan ngaihtuah ang a. Entirnan, tunah pawh special assistance kan neih atang pawh khan khatiang kawng lak lawh lutuk *on going works* te kha chu umzui theih a ni a. Khang atang te pawh khan a

rem tho ang a. Min lo remind sela, khatiang laklawh lutuka kha chu zawh hram kan tum dawn nia.

Tin, Pu Rokhaw zawhna, “Niawhtlang - Chakhang PMGSY nuai 1,615 a ni a, km 3 lek siam a la ni” tiha kha, engpawhnise, a progress a kha departmentah “heti hi a ni em, engtin nge tih ka zawh hman mai bik lova. Nakinah hei hi chu kan lo zawt chiang ve ang e.

Tin, “Phura kawng nuaih 1563 man, concrete pavement tur km 3 lek siam a la ni” tih leh, “kum 5 vel kal tawh atanga tih a ni” tih kha, kha kha PMGSY bawk a ni em? (Pu KT Rokhaw: Aw, ni e, Pu Speaker.) PMGSY hi a buaithlak chu, Member tena kan hriat turah *open tender* ngei ngei tura tih kan han open tendered a, an han inchhan hniam siak tak tak a ,10% below hi chu a la ziaawm viau a, 25% below tein an han chhang a, thawh ngaihna hi a awm tawh lo reng reng a, pek loh dawnin Court-ah kal te a nia an sawi. Buai chhungin a period a lo liam a, khati reng reng khan, hei hi Delhi lamah pawh ka complain a ni a. “Kan *schedule of reaching* aia eng emaw hnuai lutuka chhan hi chu phal lovin instruction rawn pe ula, Court a an kal loha, a hna ina a tuar loh nan” kan han ti a. Pakhatin a sawi phei chu, “PMGSY hi 50% below a chhang an awm” a ti a ni; a tihngaihna hi a awm tawh lo reng reng a ni. Court kal chuan a rei bawk si a. Hei hi kan buaina ber manganthlakah chuan, *restricted tender* a nih ngawt loh chuan an inchhan hniam siak a, tikhan court ringawt buai khan kan buai thin a. Sorkar hmasa lamte pawh khan an hriat ve ngei ka ring thin a. Hei tak hi Delhi lam guideline kan buaina chu a ni. Engpawhnise, Phura kawng hi chu, ni e, ka lo zawt ang a, engati nge kum 5 lai maia mi tawh km 3 lek an la siam tih laia kha a diklo lutuk a, kan lo umzui dawn nia.

Tin, Pu Thangmawia han sawi Kawlkulh khua atanga Highway zuk pawhna kha, ni e, kan zawh chian tir mek a. Tuna fund dang atangin emaw, tuna kan State *special assistance* atangin emaw kha kha chu. Kawlkulh khua khi an dinhmun a khirh riau a, chuvangin eng emaw tihsak hram kan duh a, tih ngei kan lo tum dawn nia.

**SPEAKER** : Starred Question No. 85, zawt turin Member zahawm tak Dr. Thiamsanga ilo sawm ang u.

**DR. Z.R. THIAM SANGA:** Pu Speaker, ka lawm e. A hmasain, vawiina i incheina chu a mawi hle mai tih kha ka rawn sawi duh a ni. (Speaker: I mawi zawk alawm maw le.) Ka lawm e, Pu Speaker.

Ka zawhna, Minister, Commerce & Industries Department changtu zahawm takin a chhan atan –

- a) Indo - Myanmar Border Trade Point Zokhawthar-ah khian formal trade kalpui turin sorkar hmalakna min hrilh thei em?
- b) Kan thenawm ram (Myanmar) khian dan anga kan insumdawn tawn nan hmalakna a nei em?
- c) Bangladesh border trade atana buatsaih, *Integrated Check Post* Kawrpuichhuah atan hian eng chen nge hma lak a nih tawh?
- d) Indo - Bangladesh insumdawn tawna atana ruahman pakhat *Silsuri Border Haat* atan sorkar hian engchen nge hma a lak tawh? Bangladesh lam sorkar hian min phurpui em?

**SPEAKER** : Ngaihdam ka dil e, ka chhang lo che a ni. Hei hi Pu Thiama min pek a nia, ka lo sawi har deuh a ni.

Aw le, Commerce & Industries Department changtu Minister Dr. R. Lalthangliana chhang turin ka sawm e.

**DR. R. LALTHANGLIANA, MINISTER:** Pu Speaker, face mask hi ka han hlip ve ngawt mai ang e. Kei pawhin mawi ka ti khawp mai che a.

Hei, kan Finance Minister, kan Chief Minister zahawm takin Mizo siam ngei Bag, kan budget dahna atan a han sem te hi a lawmawm ka ti a. Tin, vawiinniah *Zo-inthuam Ni* (Nilaini) anihna anga Zo-inthuama inthuam zawng zawngte chungah lawmthu ka han sawi a ni.

Dr. Thiamsanga, kan MLA zahawm tak zawhna chhanna chu -

- a) Indo-Myanmar border Trade Point, Zokhawthar-ah khian sorkar in chak takin hma a la a. Central sorkar-a Special Central Assistance to State under Capital Expenditure atangin cheng vaibelchhe 15 hmuh a ni a, he sum hmang hian Land Customs Station, Zokhawthar chu infrastructure tichangtlun tura project siam niin, heng – Immigration Check Post te, Animal Quarantine Station te, Plant Quarantine Station laboratory te, Food Testing Laboratory atana te leh building awmsa thuum thatna atan te, weight bridge siam thatna atan te leh Ware House siam that bakah Officers & Staff Quarters te sakna tura atana ruahman a ni a. Contractor tur pawh thlan fel tawh niin *mobilization of works* kalpui mek a ni.
- b) Kan hmuh theih chinah chuan Myanmar sorkar hmalakna hi hmuh tur a tam lo khawp mai a. An politics buai, an ram buaia vang te pawh a ni mahna.
- c) India - Bangladesh Border a Integrated Check Post, Kawrpuichhuah-ah hian fencing atan *land preparation* tih zawh thawkhat a ni tawh a. Fencing post phunna tur tunah hian hmalak mek a ni a, a project pumpui design pawh peih fel tawh a ni a. Detailed Project Report (DPR) pawh Land Port Authority of India in a pawm fel tawh bawh a ni.

Tin, *forest clearance* atan Revenue Department-in hma a la mek a. Tin, hei bakah hian Tlabung ah Pu Speaker, Trade Facilitation Centre, market showroom awm theihna te, guestroom awm theihna te MNF sawrkar hmasain tunhma a kan lo sak, he department pawimawh tak i chelh lai a Bangladesh Minister nen in hawn kha i la hre rengin ka ring a, khangte pawh kha hmana kan lo inbuatsaih tawhna kha a ni.

- d) Mizoram sawrkar chuan Indo-Bangladesh Border Haat atan pilot project-ah Silsuri (Mamit District) hi a ruahman a. Lehkha pawimawh zawng zawngte pawh kan thawn thla tawh a, sorkar laipui hian Bangladesh sawrkar remtihna, *formal approval* la turin hma an la mek a. Bangladesh hi an phur khawp mai a, tin, keimah ngei pawh Pu Speaker, a hmunah Bialtu MLA Pu Lalrintluanga Sailo leh official-te nen kan zu kal a. Tin, he hmun tlawh tur hian Bangladesh Minister pawhin ruahmanna a rawn siam thin a, he kan pandemic avang hian kan la kal thei lo a ni. Chu chu ka chhanna a ni e.

**SPEAKER** : Zawhbelhna nei turin a zawhna neitu Member zahawm tak Dr. ZR Thiamsanga i lo sawm ang.

**DR. ZR. THIAM SANGA:** Pu Speaker, ka lawm e. Border Trade chungchangah khan i hun lai khan hma i lo la nasa a. I tum bawk a, i bei nasa bawk a, han zawhbelh pawh hi a chakawm khawp a, a nuam khawp a ni.

Ka bial Hnahlan leh Hmunhlui-a Myanmar Border Haat leh, Zote leh Tiau inkara Border Haat khi tunah khian chak takin hma lak a ni a. MNF sorkar hi chu kawngpuiah kher hi chuan Zoram dung leh vangah hian a phe sen sun a nih hi maw. Ka bialah pawh khian hna an thawk chak viau mai a, chulaiah pawh chuan lawmthu ka sawi a, he House kaltlang hian.

*Zawhbelhna:* Amaherawhchu, tunah khian Zote leh Hnahlan-a Border Haat kan laih mek, a khaw bul Mizoram lamah khian chhungkua eng emaw zat huan lo ram te leh grape huan te khi compensate an lo awm mumal lo niin kan hria a. Khi khi engtin emaw hma min lakpui dan a awm thei ang em?

**SPEAKER** : Member zahawm tak Pu KT Rokhaw ka sawm e, zawhbelhna zawt turin.

**PU K.T. ROKHAW** : Pu Speaker, ka lawm e.

*Zawhbehna:* Kum 2011 khan Chakhang - Ngiaphia, India lamah Chakhang, Burma lamah Ngiaphia Border Haat-a thlan a ni a. Tin, Mizoram sorkar pawh khan a



recommend a, a thlang a. Kha kha engnge a chanchin, khawngaihin kan Minister hian min hrilh thei ang em?

**SPEAKER** : Zawhbelhna zawt turin member zahawm tak Dr. Vanlalthlana kan sawm e.

**DR. VANLALTHLANA** : Pu Speaker, ka lawm e. Zawhbelhna ka zawh hmian kan Minister zahawm tak khan a rawn sawi lang a. Kan Finance Minister, kan Chief Minister ni bawkin Mizo siam bag a rawn ti a, lawmthu ka sawi tel duh a. Kha kha kan bial chhung nuho, MLA Fund-a ka tanpui ho ina an tah a ni tih kha ka tarlang tel ve duh a ni.

*Zawhbelhna:*

i) Minister zahawm tak Commerce & Industries Department changtu chhana tan - Venus Bamboo Product Pvt. Ltd, Pu Speaker, I dinglama mite an sorkar hmasak khan tan a ni a. Hetah hian session hmasaah pawh ka sawi tawh a, *authorized capital* leh *paid-up share capital* kha an hriatpawlh niin ka hria a. Authorised capital ni lovin paid-up share capital zaa 50 chuang kha sorkar hian a subscribe a. Chuti anih chuan ‘Public Enterprise’ ni tur a ni a, amaherawhchu, Private Ltd. angin a la kal a. Tin, ka zawhna chhannaah pawh Mizoram Venus Bamboo Product Pvt. Ltd atang hian *Audited Accounts* pawh hmuh a ni tawh lo a ni. Hei hi engtin nge sawrkar in kalpui a tum zel tih kha ka zawt a. A hma pawhin ka zawt tawh thin a, amaherawhchu demand sawinaah te a ni a, a rawn react remchang lo thin pawh a ni ang e.

ii) Tin, DO letter kha kan Minister zahawm tak hnenah ka thawn tawh a. Ka bialah sawn DIC Aizawl a awm a, sawtah sawn bial chhunga mite intodelh tum tam tak an awm avangin, MLA fund-in ram, 30x15 ft a niin ka hria, “min sah thlak ve mai teh u, thalai hoin vairam atanga rawn kal thinte lo mikhual nan te, meeting neihpui nan te leh thildang common facility centre atan te tihdan a awm ang em” tiin ka dil a. Kha kha engtin nge a kal tak zel? MLA ta tur pawh a ni lova, sorkar ta tur vek kha a ni tho bawk a.

**SPEAKER** : Awle, zawh belhnate a inkarkik viau hlawm a, a theih ang ang chhang turin a changtu Minister zahawm tak Dr. R. Lalthangliana ka sawm e.

**DR. R. LALTHANGLIANA, MINISTER:** Pu Speaker, zawhbelhna kha kan MLA zahawm tak, a zawhna kengtu Dr. Thiamsanga khan a nei a. Chu chu Hnahlan-Zote lai bawr kha a ni a. Khilai khi a tha dawn khawp mai a, thiltih nan kan hmang dawn a. Amaherawhchu, sawi tawh ang khan Myanmar lampang khi tlemin an boruak a la rit deuh a, chumi vangin khilamin hma an la chak theilo khi kan buaina leh duhthu

samlohna a ni. Eng pawh ni sela, hmalakpui tura min rawn ngenna kha chu keini pawhin theihtawpin, kan department lam tihtur a nih lutuk loh pawhin tih kan tum dawn nia.

Tin, Member zahawm tak Pu KT Rokhaw zawhna, Chakhang lama *Haat* chungchang kha, kan sawifo thin a. Mizoram-in heta tan hian proposal pawh kan siam thin a. Amaherawhchu, tunah hian *approved list*-ah hian a la awm chiah lova, khang te pawh kha kan la enzui turah ngai ta ila.

Indo-Myanmar hrim hrimah hian tuna kan tarlan loh te pawh a awm nual a. Kan bial Hnahthial district lamah te, Thingsai lamah te leh Saisihchhuah lamah pawh kawng kan lai tlang tawh a. Khatiang khan ruahmanna te chu khawi khawiah emaw a awm a, a hmunah te pawh kan kal nual tawhin ka ring. Kha kha ka chhanna ni ta mai sela.

Member zahawm tak Dr. Mathlana rawn zawhna kha a inperhsan deuh hlek a. Venus Bamboo Project ‘audited statement’ tih leh khami bawr kha chu duh leh chiang deuh hlekin la inchhang thei turah ngai ta ila. Transparency a awm vek turah ka ngai a, harsatna pawh a awm lo turah ngai ta ila. Tun session chung pawhin inchhan dan tur ngaihtuah ta ila a tha ang e. Khati zawng khan min lo pawm sak mai sela tih kha ka ngen duh a ni.

Tin, District Industry Centre kan tih mai chu Ramhlunah sawn a awm a, kan hre vekin ka ring a, a tam ber chuan. Han insahtlak hi a buaithlak deuh hlekna chhan chu, covid chuan min tibuai lo sela chu kan hlawhtlin tawh pawh ka ring a. Entrepreneurship training, skill development ang chi hrang hrang training-na tha hi kan mamawh khawpin kan hria a, chuta tan chuan project lian ve deuh hlek kan siam a. Han inpek tawp lai kha kan la harsat deuh a ni. Tin, a bialtu pawhin min lo hriatsak se la, kan hlawhtling a nih chuan sawlai bial tan pawh sawn development ropui tak turah ka ngai a ni. Tin, A building-te saw a chhe tawh a, churang chuan tangkai deuha hmang tur chuan ruahmanna helaiah hian kan nei a ni tih kha ka han sawi duh hrim hrim a ni.

Khati zawng kha ka chhannaah min lo pawm sak phawt ta mai la, kan vaia thatna tur atan sawlaih sawn ruahmanna kan nei a. Amaherawhchu, sum kan la hmu thei lo a ni tih kha ni ta mai se a tha ang e. Pu Speaker, ka lawm e.

**SPEAKER** : I chhang thiam hle mai. Hun pawh i hmang dik e. Zawhbelhna a awm thei lo a ni.

Awle, *Zawhna & Chhanna* hun kan hmang zo ta a. Nimin lama Manipur-a kan Police-te vanduinaw tawh thuah Home Minister-in *statement* siam a rawn dil a, kan Dan 60-na in a phal a. Tin, “*One-clear day* a ni tur a ni” tih kha, a hnuaiah hian, “Speaker-in

a hun chhung hi ama *discretion*-in a reduce thei ang” a tih angin a rawn dilna hi ka pawm a. Tunah Home Minister zahawm tak Pu Lalchamliana, *Statement* siam turin ka sawm e.

(*Statement from the hon. Home Minister.*)

**PU LALCHAMLIANA, MINISTER:** Pu Speaker, ka lawm e. Vawiinah statement siam chakawm loh tak siam a lo ngai ta hi pawl ka ti hle a. Sawi lan tawh ang khan, he statement hi tukin zing dar 1:30 vela kan police-te chuanna motor Manipur-a chesual chungchang a thi leh hliamte chungchang a ni.

MHA thupek angin Mizoram State Armed Police Force, Company-10 chu Manipur General Election vawi 12-na, a thawhkhatna ni 28.02.2022 leh, thawhnhihna ni 5.03.2022-a duty turin Mizoram sorkar chuan ni 15.02.2022 khan a tir a. Tluang taka an duty-na hmun tur chu thlengin election thawhkhatna hi ni 28.02.2022-ah khan Mizoram State Armed Police Force-te hi Dinajpur District-a duty tir an ni. 2<sup>nd</sup> phase-a duty turin Tamenglong district-ah tirh an ni leh a, kan thu dawnnain a sawi danin, Dinajpur District atanga awm hmun an sawnna Tamenglong District-a an thlenna hmun Tamenglong college hi motor lian a luh theih loh avangin motor lian thlen theihna chin atangin pick-up in an inthiar a. Last trip-ah pickup hi a brake fail-in tukin zing dar 1:30 khan a chesual ta a ni.

He chetsualnaah hian Constable No. 516, K. Lalawmpuia, 2<sup>nd</sup> IR Battalion, Champhai khua chu vanduaithlak takin a boral ta a ni. A ni bakah hian heng a hnuaia tarlante hian hliam an tuar a, an vaiin 2<sup>nd</sup> IR mi vek an ni. Hliam tuarte chu-

- 1) SI R.C. Muana
- 2) Havildar Lalbiakmawia
- 3) Havildar V.L. Dingliana
- 4) Havildar R. Lalbiaknunga
- 5) Constable Lalhlimpuia
- 6) Constable Lalmawizuala
- 7) Constable Lalbiaknunga
- 8) Constable R. Lalnunmawia
- 9) Naik Lalsawmliana
- 10) Havildar Lalsangzuala-te an ni.

An vai hian district hospital-ah dah luh an ni a, vanduaithlak takin mi 11 zingah Constable 516, K. Lalawmpuia, 2<sup>nd</sup> Battalion IR chu a hliam tuar lo in district hospital thlenpui a nih chuan a lo thi tawh a ni. Post-mortem examination (PME) hi district

hospital-ah tih theih a nih loh avangin Imphal-ah PME ti tura ruahman a ni. Hliamte hi an vaiin Imphal hospital-ah refer an ni a, helicopter-a phur an ni.

He vanduaina chungchangah hian Manipur police leh sorkar hotute a tul anga biak pawh reng an ni a. Constable No. 516, K. Lalawmpuia ruang pawh hi thlawhnaa lo thawn haw dan buaipui mek a ni. He vanduaina hi pawl kan tiin, lusun chhungte leh hliam tuarte kan thinlungin kan tawrhpuoi tak zet a ni. A tul apiang ti zel turin kan Police Headquarters leh sorkar pawh a inring reng a ni.

Kha zawng kha a ni e. Ka lawm e.

**SPEAKER** : Awle, kan Dan angin heng hi sawiho ngai a ni lo a, kan Minister zahawm takin a thawhpuite vanduaina tawh thu leh pawl a tih thu House-ah a rawn sawi a, a ti tha kan ti a ni.

Tunah chuan *Laying of Paper*-ah kan kal ang a, Er. H. Lalzirliana, Chairman, Committee on Government Assurance-in heng -

- i) Statement on Action Taken on the further recommendations of Committee on Government Assurances contained in the Fifth Report, 2021 relating to Public Works Department;
- ii) Statement on Action Taken on the further recommendations of Committee on Government Assurances contained in the Fifth Report, 2021 relating to Animal Husbandry & Veterinary Department-te House dawhkanah rawn lay se.

**ER. H. LALZIRLIANA** : Pu Speaker, ka lawm e. I phalna leh he House zahawm tak remtihna-in-

- i) Statement on Action Taken on the further recommendations of Committee on Government Assurances contained in the Fifth Report, 2021 relating to Public Works Department;
- ii) Statement on Action Taken on the further recommendations of Committee on Government Assurances contained in the Fifth Report, 2021 relating to Animal Husbandry & Veterinary Department-te hi he House dawhkanah hian ka rawn lay e.

**SPEAKER** : A copy kha han sem ula. Kan chang kim em? Awle, kan chan kim chuan Financial Business-ah kan kal ang a.

Vawiinah hian Minister zahawm tak tak pathumte - Pu Robert Romawia Royte, Pu Lalchhandama Ralte leh Dr. R. Lalthangliana-te Demand kan sawi ho ang a, pass

nghal kan tum dawn a ni. Hun kal taa kan lo tih dan thin angin Minister pathumte Demand hi a rualin kan la leh ang a.

Tunah Minister zahawm tak Pu Robert Romawia Royte ka sawm ang a, House dawhkanah a Demand te –

<b>Demand No.</b>	<b>Purpose</b>	<b>Amount (in ₹)</b>
<b>22</b>	Sports & Youth Services	24,22,12,000.00
<b>43</b>	Tourism	11,37,45,000.00
<b>48</b>	Information & Communication Technology	4,90,60,000.00
<b>TOTAL</b>		<b>40,50,17,000.00</b>

rawn submit turin kan sawm e.

**PU ROBERT ROMAWIA ROYTE, MINISTER:** Pu Speaker, Governor of Mizoram recommend-na leh i phalnain ka Demand-te No. 22, 43 leh 48-te, a vaiin ₹40,50,17,000.00 chu he House zahawm takah ngaihtuah turin ka rawn submit e. Chungte chu –

<b>Demand No.</b>	<b>Purpose</b>	<b>Amount (in ₹)</b>
<b>22</b>	Sports & Youth Services	24,22,12,000.00
<b>43</b>	Tourism	11,37,45,000.00
<b>48</b>	Information & Communication Technology	4,90,60,000.00
<b>TOTAL</b>		<b>40,50,17,000.00</b>

Ka lawm e.

**SPEAKER** : Tunah Minister zahawm tak Pu Lalchhandama Ralte, House dawhkanah hian a Demand te –

<b>Demand No.</b>	<b>Purpose</b>	<b>Amount (in ₹)</b>
<b>18</b>	Printing & Stationary	12,68,86,000.00
<b>20</b>	School Education	14,93,93,62,000.00
<b>28</b>	Labour, Employment & Skill Development & Entrepreneurship	33,33,41,000.00
<b>TOTAL</b>		<b>15,39,95,89,000.00</b>

submit turin ka sawm e.

**PU LALCHHANDAMA RALTE, MINISTER:** Mr. Speaker, Sir, on the recommendation of the Governor of Mizoram and with your permission, Sir, I move the Demand Nos. 18,20, & 28 for rupees one thousand five hundred 39 crore ninety-five lakhs eighty-nine thousand only for meeting expenses during 2022-2023 in respect of the following departments –

<b>Demand No.</b>	<b>Purpose</b>	<b>Amount (in ₹)</b>
<b>18</b>	Printing & Stationary	12,68,86,000.00
<b>20</b>	School Education	14,93,93,62,000.00
<b>28</b>	Labour, Employment & Skill Development & Entrepreneurship	33,33,41,000.00
<b>TOTAL</b>		<b>15,39,95,89,000.00</b>

Thank you, Sir.

**SPEAKER** : Tunah Minister zahawm tak Dr. R. Lalthangliana, House-ah a Demand-te –

<b>Demand No.</b>	<b>Purpose</b>	<b>Amount (in ₹)</b>
<b>21</b>	Higher & Technical Education	2,64,80,96,000.00
<b>24</b>	Health & Family Welfare	7,20,63,59,000.00
<b>40</b>	Commerce & Industries	63,59,63,000.00
<b>TOTAL</b>		<b>10,49,04,18,000.00</b>

te submit turin kan sawm e.

**DR. R. LALTHANGLIANA, MINISTER:** Pu Speaker, on the recommendation of the Governor of Mizoram and with your permission, Sir, I move the Demand Nos. 21, 24 & 40 for rupees ten thousand forty-nine crore, four lakh, eighteen thousand only for meeting expenses during 2022-23 in respect of the following Departments –

<b>Demand No.</b>	<b>Purpose</b>	<b>Amount (in ₹)</b>
<b>21</b>	Higher & Technical Education	2,64,80,96,000.00
<b>24</b>	Health & Family Welfare	7,20,63,59,000.00
<b>40</b>	Commerce & Industries	63,59,63,000.00
<b>TOTAL</b>		<b>10,49,04,18,000.00</b>

hi, he House-a ngaihtuah turin karawn submit e.

**SPEAKER** : Pass dil dawn chuan a amount kha sawifiah zawk chu a ngai dawn a nia. Awle, kan Minister zahawm tak tak ten an demand-te anrawn submit ta a, sawihona kan nei ang a. Member pakhatin minute engzat nge kan inpek leh ang le? Minute 10 hi kan tih dan a ni tlangpui a, tha kan ti leh mai em? ti mai ang aw? Minute 10 kan inpe leh ang a, minute khat a la awmah warning bell kan hmet ang a. Tichuan, tunge han sawi hmasa ber ang le? Awle, Pu Lalrinsanga Ralte, Member zahawm tak ka sawm e.

**PU LALRINSANGA RALTE:** Pu Speaker, ka lawm e.

Hei, vawiinah zahawm tak tak pathumte demand kan han sawiho dawn a ni a, sawi tur a tam khawp mai a, hun kan neih tlem avangin kan sawi vek seng dawn lova. A hmasa berah chuan Demand No. 22, Sport Department a hi han sawi ka duh a.

Kum 2021-2022 financial kal mek a kan BE aiin tun 2022-23 BE hi a tlem zawk deuh a, Sport Department-ah hian. Amaherawh chu kan Sport Minister hi chak tak leh viak tha tak mai, sum zawn chhuah thiam tak mai a ni a, a hnathawh chu supplementary demand a kan pass zawk takah khan nikum lama BE aia a let eng emaw zata a tam dan kan hmu a, churang chuan a ngaihtuahawm loh hlein ka hria a. Kan Sport Minister hi a fakawm hlein ka hria a department enkawlah.

Pu Speaker, hei Sport Minister hian ka bial Vairengte leh Bilkhawthlir-ah te, a bikin Vairengte-ah Sport Training Centre siam tur kha kan han sawi dun thin a. Nakinah wind-up naah min chhan sak thei se ka duh hle mai a. Vairengte Sport Training Centre hi project emaw siam tumna kan nei em? Tin Training Sport Centre chiah a nih loh deuh pawh a phul lem phah te ruahmanna kan nei em tih kha hriat ka duh deuh a.

Pu Speaker State Games kha ropui takin kan han nei tawh a, Covid avangin tunah hian tih hleihtheih lohin an awm a, Covid boruak te a reh leh thei te a nih chuan State Games kha ropui leh zuala neih leh nise a tha hlein ka hria.

Tin, Demand No. 43, Tourism Department-ah hian han sawi duh ka nei a. Ka bial Serlui, khumi tuikhuahah khuan Tourism Department hian project an lo nei niin ka hria a. Kha kha hmalakna engtin nge a kal chhoh dan, khulai Serlui Tuikhuaha Tourism Deptt. ina tourist te hip theihna tur te, hmun nuam taka chher tura hma an lakna te tun aia chak zawka kan kal theih kha a thain kan ring a, chu chu kan sawi duh bawk a.

Tin, Demand No. 48, ICT-ah hian hei hi department langsar lo tak ni thin tun ministry ah hian a rawn langsar ta viau mai a, a lawmawm hlein ka hria a. Helaiiah hian han sawi duh ka neih chu, Pu Speaker, khumi Phaisen Assam ramri dep kan tih khu Assam ramri dep a ni a. Phaisen-ah khuan Security duty te, Police duty te tam tak an awm a, khumi hmunah khuan eng signal mah hi a tha lova service provider Jio, Airtel, BSNL emaw ten tower dahna tur ruahmanna kan ICT Minister-in min neihsak theih chuan a lawmawm hlein kan ring a ni.

Kan kal deuh zung zung ang a, minister zahawmtak Pu Lalchhandama Ralte Demand No.18, Printing & Stationary Department-ah hian tlem sawi kan duh a. Hei hi department pawimawh tak an ni a, sorkar confidential te leh thil tam tak khawih an ni a, tun ang laiah phei chuan an buai khawp mai a, staff an indaihlo nasa hle niin ka hria a. An buai chang phei chuan daily tea chhawr an nei thin a, hei hi a fuhlo hlein ka hria a. Sorkar confidential leh eng emaw thil a awm avangin an indaihlohna puhruk sak hi tih theih dan awm se chuan a tul hlein kan hria a. Tin, Department zawng zawngte he Printng & Stationary-ah hian kan thu chhut tur pawimawh leh a dangte pawh dah turin kan infuih thin a, hei hi sorkar-a revenue let leh thei tur kan hmuh theihna te a nih avangin department tin ten kan ngaih pawimawh zual hi a thain ka hria a. Department zawng zawng te hian Printing & Stationary ah hian an thil pawimawh chhut tur an rawn dah reng em tih te, a dahlo department kan awm em tih te min chhan theih chuan ka lawm ngawt ang.

Tin, Demand No. 20, Education Department hi han sawi ka duh a. Helaiiah hian lawmthu sawi tur a tam hlein ka hria a, kan bial chhung khaw hrang hrangah zirtirtu indaihlohna nasa takin MLA ka han nih ve khan min hmuak a. Kan Chief Minister, kan Finance Minister zahawm tak ni bawk remruatna te kan Education Minister hmalaknain kan bial chhungah zirtirtu thar tam tak kan han nei ta a. A tirah MR teacher kan han lak khan kan bialah zirtirtu indaih lohna a lo nasa khawp a, MR teacher 46 kan han la a, a hnuah SSA te, tikhan boralna avang te bang an han awm avang tein min han dahkhah sak a. Kan indaih chho dawn emaw kan tih laiin pension leh boral te an lo awm chhoh zel avangin kan indaih lo chho leh zel a. SEDP teacher te min han tih sak leh a, kan lawm tak zet a ni. Single leh double teacher kan neihna sikulah te pawh zirtirtu pali leh pangnga te kan han neih tak avangin kan Education Minister chungah hian lawmthu ka sawi duh a ni.

Pu Speaker, kan bialah hian sikul kan nei tha lo hlawm khawp mai a, a building te pawh a tha lo hlawm khawp mai. Engvangin nge sorkar sikul hi kan bawh tak loha, private sikulah pawisa tam tak sengin kan kal tih hi ka ngaihtuah thin a. Sorkar sikula kal chakawm turin a hmunhma kan chei tha lova, zirtirtute an lo inthlahdah rei bawk si a, chung zawng zawng chu wawi leh khatah siam that theih loh mah se, kan Minister



zahawm tak hian theihtawp a hma lain, “kan zirtirtute an hmunhma ngeiah an awm tur a ni” a ti a, “zirtirtu an post-a awmlote lakah action lak a ni ang” tih te a han sawi takah chuan kan bialah pawh an awmna hmunah an awm tha tlangpui tawh a. Tin, sikul repair eng emaw zat min tihsak avangin kan lawm tak zet bawk a. Zirlaite leh a khaw mipuite pawh an lawm khawp mai. Sikul repair tur te a awm leh chuan kan bial kha min duhsak deuh thei se tih kha ka han sawi duh a ni.

Pu Speaker, SSA zirtirtute dinhmun leh hlawh chungchang hi kan sorkarin a ngaihtuah that leh a ngai hlein ka hria. Hun rei tak lo thawk tawh an ni a, hei aia tha zawka kan hlankai hi a tulin ka hria a. Hei hi kan Finance Minister leh kan Education Minister tein min lo hriatsak se ka duh a. Kan SSA zirtirtute hi hun rei tak lo thawk tawh si, a pangngai angin han dil leh dawn ta se kum over tawh tam tak an awm a ni. Zirtirtute hi kan la leh dawn a nih chuan kan hna lak leh zat tur atanga 50% hi SSA senior teacher te hian luah khat mai se, 50% hi general quota-ah dahin a duh apiangin an exam theihna turin hawng thung i la; kan SSA teacher te hamthatna tur hi kan ngaihtuah a tul hlein ka hria a ni.

Ka han sawi leh duh chu, school upgradation chungchang hi a ni a. Keini bial angah chuan khaw tin hi harsa tak tak an ni a. High school dah theih lohna khua te kan lo ngah a, khawtlangin *Ni 100 Inhlawhna* atang tein sikul an lo *run* ve a ni. Heng khawtlang *run* sikul te hi lumpsum aided-ah te hlangkai thei i la, tuna lumpsum aided te hi adhoc-ah, tuna kan adhoc te hi provincialised-ah te upgrade thei i la. Heng upgradation hi kan sorkar hian kalpui thei sela a tha hlein ka hria a. Covid avang leh thil hrang hrang vangin kan sum dinhmun pawh thalo mahse, tun budget-ah hian sum leh pai lamah pawh beiseina kan han neih chhoh tak avang hian, education hi kan ngaih pawimawh chho hi a tul hlein ka hria a. A bik takin, Rengtekawn-ah khuan khawtlangin an enkawl mek high school lumpsum a puih kan nei a, khung te khu adhoc a hlankai ngei ngei a tul a, kan Minister zahawm takin min lo chhinchhiah sak se a thain ka ring a. Vairengte te khu Assam nen kan ram ri te a nih angin khulaia kan Higher Secondary School te khu adhoc a hlan kai ngei ngei a ngai a ni tih kha ka han sawi duh bawk a ni.

Tin, Pu Speaker, Demand No. 24, Health Department hi han sawi lan tel ka duh a. Covid hri leng karah sorkar leh department hmalakna a ropui tak zetin ka hria a. Theihtawp chhuahin department te an buai hle mai a, An fakawm tak zetin ka hria. Health Department bikah hian kumina kan B.E. hi nikum aiin cheng nuai singkhat dawnin a pung niin ka hria a, ka lawmpui tak zet a ni. Kan Health Department Minister zahawm takin min lo hriat sak tura ka duh chu, health clinic pawimawhzia hi a ni a. Ka bialah pawh health clinic thar pangnga min hawnsak a, Thingthel-ah te, Saihapui V-ah te, North Chhimluang-ah te, Rengtekawn-ah leh Bukvannei-ah te an ni a. Tunah hian health worker indaihlohna a nasat em avangin MLA Fund-in pangnga ka chhawr mek

a, health clinic MLA fund-in pakhat kan sa tawh bawk a. Kan sorkar sum dinhmun a han that chhoh chuan, Health Department hian health worker indaihlohna te phuhruk thei tura ruahmanna an siam hi a tul hlein ka hria.

Vairengte-ah khuan CHC kan nei a. Assam nena boruak eng emaw kan neih changa ruang han inlak nan te leh hmun pawimawh tak a nih avang khuan kan CHC khu thuam that a ngai hlein ka hria a. X-ray khawl pawh khu hman tlak tawh loh a ni a, khung te khu min thuam that sak theih chuan a lawmawm hle ang. Tin, *Health & Wellness Centre* kan neihte tihchangtlun deuh deuh te hi a tulin ka hria a ni.

A tawp berah chuan, kan bial chhungah Sub-Centre neih lohna khua health clinic mamawhna pathum kan nei a, Saihapui K, North Thinglian leh State Veng Vairengte-ah te hian ruahmanna min siam sak leh theih chuan, department lam an inbuatsaih theih hma chuan MLA Fund-in health worker kan chhawr leh thei a ni tih kha ka han sawi leh duh a ni. Kan Minister zahawm tak tak pathumte Demand hi tha ka tiin pass ngei turin ka rawn support a ni e. Ka lawm e.

**SPEAKER** : Tunge sawi leh ang? Member zahawm tak Pu H. Biakzaua ka sawm e.

**PU H. BIAKZAUA** : Pu Speaker, ka lawm e. Demand pathum a ni a, rang deuha sawiloh chuan hunin a daih lo mai dawn a. Demand No. 22, Sports & Youth Services Department hi a hmasa berin han sawi ta i la.

Sport Department atang hian thalaite hmakhua kan thlir thui sak thei deuh berin ka hria a. Sum leh pai tam tak dah theih ni lo mah se, tun budget-ah pawh hian nikum aiin a tlem hretin ka hria a. Kan Chief Minister leh changtu Minister zahawm tak te hmalaknain project hrang hrangte siam a ni thin a. Chung atang chuan sum leh pai eng emaw zat te kan hmu a. PMJVK atangin chak takin hma lak a ni a, Lawngtlai District lamah phei chuan a cover area-ah PMJVK atangin nuai sing chuangin thalaite infiamna leh hmasawna tur ang chi sports complex te leh residential sports centre te buaipui mek a ni a. Mahse he scheme hian a huam zau loh em avangin Lawngtlai East, Sangau RD Block lamah khian infiam mi football lama tui tak takte an tam ve avangin artificial turf hi an mamawh ve khawp mai a. Min chhinchhiah sak ve thei se ka duh khawp mai. Thalaite hmasawna tur he department pawimawh tak mai hi sum leh pai duh angin tam loh mah se theihtawpin tan lakna tur niin ka hria a, kan Chief Minister zahawm tak hian a ngaipawimawh a. Chutiang tak chuan centrally sponsored scheme lamah pawh hian tan lak a tul dawn hlein ka hria.

Demand No. 43, Tourism Department hi sawi ve leh ta i la. He department pawh hi sum dah tam a ni thin lem lova. Kan hmel lanna a ni a, foreign atang te leh state pawn atang tein an lo kal a. Kan khualbukte leh kan hmun pawimawhte han tlawh tur leh kal ve tur hian thlen-in tak tak pawh hi kan nei chau ang reng khawp mai a. Ka biala Phawngpui tlang saw kan hriat angin Mizorama tlang sang ber a ni a. A bul hnaih bera khaw awm chu Khaltlang khua a ni a, thlen-in a awm miah lo mai a, he khuaah hian. Sum leh pai department angin dah tam nilo mahse *traveller's inn* emaw lodge pangngai deuh te awm ve thei se chuan foreigner te an lo kal a, a chang leh India ram chung hmun hrang hrang atangin an lokal a, Phawngpuitlang saw tlawhtu a ngah angreng khawp mai a. Thlen-In a mumal lo hle mai a, a bul hnaih ber khuaah sawn thlen-in buatsaih theih ni se a lawmawm hle ang tih wawiin niah hian a changtu Minister leh kan Chief Minister zahawm tak pawh hian min hriat sak se ka duh khawp mai a. Sawlai saw hmun pawimawh ve tak niin ka hre bawk a ni.

Tin, Demand No. 48, ICT department hi department te deuh angin lang mahse, tunhmaa kan hmelhriat lemloh '*smart class-room*' han tih ang chi te leh 'computer sem' tih ang chi te pawh hi thingtlang hmun hrang hrangah kalpui a ni a, a lawmawm hle in ka hria a, he department hi a lo lar thar ta deuh niin ka hria a. A changtu Minister pawh a fakawm hlein ka hria a, tunhmaah kan hriat lar leh kan hman tangkai em em pawha kan hriat lutuk loh kha alo lar tan ta viau a, a lawmawm ka ti khawp mai.

Demand No. 22, School Education-ah hian Pu Speaker, a hmasain lawmthu han sawi hmasa ta ila. Hindi Teacher eng emaw zat kan hnung lawkah khan lak a ni a, a lawmawm hlein ka hria a. Tin, Bualpui High School upgrade niin Highier Secondary School-ah hlankai a ni a. Tunah hian zirtirtute pawh lak chhoh tura ruahman mek a ni a. Heihi nikuma helai kan House zahawm taka ka ngenna te leh kan Education Minister ka request-na te a takin alo lang niin ka hria a, a lawmawm ka ti khawp mai.

Tin, Education Department hi kan sawi fo angin a pawimawh a, mihring deal tu ber an nih avang hian SEDP atangin zirtirtu kan indaihlohna te pawh kan result a chhe palh ang tih hlauin matric result kan han neih that theihna chhan te pawh hi zirtirtu indaihlohna hmunah eng emaw zat kha chhawr a ni a, a lawmawm hlein ka hria a ni. Chutiang anih lai chuan, headmaster indaihlohna erawh chu a tam khawp mai a. Tunah hian ka bial chung Sangau-ah te, Lungtian-ah te, Bualpui NG-ah te, Vawmbuk-ah te headmaster te a then an bang a, a then an pension a, an aiawh headmaster pangngai dah a ni lova. Headmaster awm lovin sikul charge la tuten an kalpui ringawt mai a, duhthu a sam thei lova. Chuvangin headmaster dik leh qualify te dah hmanhmawh a tul khawpin ka hria a.

Tin, Highier Secondary, School Lawngtlai hian mathematics teacher an neilo bawk a, science kha a awm bawk si a, hei hi a pawimawh em em bawk a ni. Tin, LDC leh group-D nei lo High School ka bial-ah an awm nual bawk mai a, LDC awmlh chuan a buaithlak khawp mai a. Tin, group-D neilo an awm a, zirtirtute'n anmahniin dar te invuak a, sikul te hawn a ngai a, khar te a ngai a, a buaithlak khawp mai a, hei hi min ngaihtuhsak a tul hlein ka hria a. Tin, zirtirtu pension an lo awm a, eng emaw zat zirtirtu pension aiawh lak anih siloh avang hian zirtirtu indaihloh a tam khawp mai.

Tin, Pu Speaker, District Council huamchhunga middle school te hi state sorkar-in a enkawl eng emaw zat a awm mek a. Tunah hian LADC-ah pawh sikul 18 state sorkar atanga enkawl a ni a. Hengte hi school building a ni emaw, repair-na a ni emaw LADC lamah khan va pek a ni si lova, state sorkar atangin enkawl a ni chiah tawh bawk si lova. Sawlaih an awm a, a thu chuan state sorkar kutah an awm, mahse a tak rama administration leh thil hrang hranga enkawltu chu district council an ni lawi si a, hengte hi District Council-ah hian hand-over theih an ni mai lawm ni? Chutiang anih loh pawhin building tha lo te, harsatna an tawh te, State sorkar hian kan hriatpui a tul hle dawnin ka hria a ni.

Tin, Pu Speaker, SSA zirtirtute hi an khawngaihthlak khawp mai a, kum upa deuh tawh, service nei tlem tawh tak tak te anni a. Hei hi an hun a liam mai dawn si a, sorkar-in a senior te seng chhoh dan hi ngaihtuah zui a tha hle dawnin ka hria a ni. (...*warning bell* ..) Pu Speaker, a ri hma angreng hlein ka hria a. Lawngtlai District-ah sawn kan mumal lo hle mai a, chuvangin district employment office saw tihchangtlun ve a ngai khawpin ka hria a. Tin, Demand No. 21, Higher & Technical Education-ah pawh hian, Lawngtlai College hian tunah hian HA pawh a nei lova, Grade-IV a nghet pawh an nei lova, kan phuisui lo angreng hle a ni. Hengte hi min hriatsak a Minister-in ngai ka ti a.

Tin, Demand No. 24, Health & Family Welfare-ah hian lawmthu han sawi duh ka nei a. PHC building leh doctor quarter te ka bial chhungah sak a ni a, Bualpui-ah te, Sangau-ah pawh building sak a ni a, tin, Health & Wellness Officer te pawh Health Sub-Centre-ah dah an ni a. Tin, Health Clinic khaw 11-ah hawn min remtihsak nghe nghe a, a lawmawm hlein ka hria a. Lawngtlai-L4, Bethel Veng, Council Veng, Electric Veng, Thaltlang leh Sentet, Fiang leh Vartek Kai, Archhuang, Tialdawngi Lung leh Vawmbuk Tlang-ah te health clinic centre hawn a ni dawn a, a lawmawm kati khawp mai a. Hengavang hian a changtu Minister hnenah pawh lawmthu ka sawi duh a.

Tin, District Hospital Lawngtlai-ah X-ray technician kan nei lova, tin, surgeon doctor a awmlo bawk a, hengte hi min hriatsaka min dahsak a tul khawp mai a. Tin, Pu Speaker, Sangau PHC hi CHC-ah hlankai kan dil a, kan sawi tawh thin a, PHC pathum

sawlaiah sawn a awma, hei hi a khaw lian ber leh hmun pawimawh anih avangin, CHC-ah min hlankai sak turin vawiinah hian kan ngen leh bawk a.

Pu Speaker, a tawp berah chuan Commerce & Industries-ah hian, hei, nichinah kan Minister zahawm takin a rawn sawi chhuak a, Saisihchhuah border amah ngei pawhin a zu tlawh thu te, khulai khu border trade hmuna tan buatsaih tum a nih thu te kan han ngaithla a. Hei hi a hma thei ang bera chak taka hma min laksak turin he House zahawm takah hian kan han ngen tel duh bawk a ni. Heng kan Minister zahawm tak tak pathumte demand kan han sawi te hi vawiinah hian ka support a, tha ka ti a, heng an demand te hi puitling taka hlenchhuah anih theihna turin pawmpui a tul ka ti khawp mai. Ka lawm e.

**SPEAKER** : Member zahawm tak, Pu Ramthanmawia i lo sawm ang.

**PU RAMTHANMAWIA** : Pu Speaker, ka lawm e. Hei, vawiinah kan Minister zahawm tak tak pathumte demand sawi a ngai a, sawi ran a ngai dawn khawp mai a. A hmasa berah kan Minister zahawm tak, Pu Robert Romawia Royte Demand No. 22, Sports & Youth Services hi, nikum lamah khan sum leh paiah kan lo indaih deuh nge kuminah an tlem lai deuh hi vaibelchhe 1,39,10,900/-in a tlem a, hei hi, kei ka bialte khi infiamna lampang uar em em mai, ngaina em em mai kan ni a.

He department hian nasa takin min pui thin a, MLA fund kan hmanna tur tamtakah te pawh football, volleyball net te kan va dil thin a, kan lawm em em a, hetia a han tlem leh ta hi pu berin a hria ang chu maw, nakinah kawng dangah la pek belh thei turah ngai ila. Sport lamah hma kan sawn nasa a, a changtu minister hi a fakawm takzet a, hmun hrang hrangah sport infrastructure tha pui pui din chhoh niin phul lem te pawh phah a ni a. Keini bial Farkawn leh Khawbung te hian hei hi kan beisei ve tlat a, kan nghakhlel em em a ni. Kan bialah hian Sport Department hian hmalakna a rawn nei nasa rih lova, kan lo nghakhlel a. Amaherawhchu kan sorkar hlim te khan Sport Academy Farkawn-ah min rawn din sak a, Samthang-ah pavilion nuaih nga man min rawn sak sak bawk a kan lawm hle a. Tunah hian Vanzau field khi inkhelh theih lohina a awm a, khingte khi hma min laksak theih chuan kan lawm khawp ang a.

*(Dy. Speaker-in Chair a la)*

Tin, Tourism Department, Demand No. 43-ah hian, Pu Deputy Speaker, Farkawn Tourist Lodge khi mi 12 chauh thlen theihna a nih avangin upgrade a ngai khawp mai a, khual tha an thleng thin a, thlenna tur tha hi kan nei lova, kan Minister hian min upgrade sak sela hei aia thahnem thlen theih turin.

Tin, kan sawi tawh thin a, Vaphai leh Khuangleng-ah hian Tourism hmalaknain khualbuk sak a ni a, an rel deh huai tawh a, mahse a fund kha a tawp tak avangin sak chhunzawm a ni lova. Hengte hi fund dangin emaw, thil dang atangin emaw min her rem saka min chhunzawm sak turin kan Minister zahawm tak hi ka han ngen nawn leh duh a ni.

Tin, ka zawhna min chhannaah khan, ka bial hi *tourist attraction* nei tha ber pawl kan ni a, chuvang chuan 15<sup>th</sup> Finance Commission hnuai hmalak tum mekna, Development of Heritage and Bordered Trust Tourist Circuit chhungah Dungtlang, Khawbung, Vangchhia, Lianpui, Vaphai, East Chawngpui, Farkawn-te atana project an siam nuai 3,000 lai mai hi kan nghakhleh khawp mai a, hei hi han hmin ve thei se kan duh khawp mai. Chubakah chuan “Development of Tourist Dormitory at Vangchhia” tih project atan nuai 400 min ngaihtuah sak bawk a, hei hi hlawhtlin hlan kan nghahhleh thu ka han sawi bawk a ni.

Minister zahawm tak Pu Lalchhandama Ralte Demand No. 18, 20, 28 ah hian, kan bial chhungah zirna nasa takin a lo tlahniam a, sorkar-na kan han chan phat atang khan Mizoram school tam zawk te chi zirtirtu indaihlohna avangin, abikin thingtlang lamah a ni lehzual a, kan bial mai nilo, ram chhungah khan zirtirtu 2 chauh awmna tamtak a awm a ni tih kan hria a. Vawiinah erawh chuan kan sorkar leh kan Education Minister chak tak hmalakna zarah kan dinhmun hi a ziaawm ta hlein a lang a, a lawmawm hle a. Zirtirtu indaihloh zual puhruk nan tun kum thum chhung khan Mizoram pumah hian CSS Hindi teacher, Middle School atan mi 762 lak niin, MR teacher, Primary School leh Middle School-a thawk turin mi 880 te lak niin kan hria a, a lawmawm hle a. Hei hian teacher indaihloh zual puhruk nan SEDP atangin High School teacher 157 lai lak a ni leh te hi a lawmawm hle mai. Ka bialah MR teacher leh CSS Hindi teacher te a vaiin 102 min pe hi kan lawm hle mai a, hei hian ka bial chhungah pawh zirna tlahniam tawh, zirlai pawh kan neih mumal lohna school-ah pawh tunah zirlai thahnem tak neiin kan result te pawh a lo tha chho a. Hei hi a bik takin kan Education Minister chungah pawh lawmthu ka han sawi a ni.

Tichuan, ka bial chhungah hianin *smart class-room* pakhat leh school panga repair-na tur NABARD atangin min pe a. Tin, Govt. Khuangleng High School-ah Art stream class min hawn sak bawk a, hengte hi kan lawm hle a ni. Tin, chumai nilovin, Govt. Bungzung High School-ah *matric Exam centre* thar min han pe bawk te hi kan lawm hle a, Khawbung Higher Secondary School-a Residential Girls Hostel, Netaji Subhash Chandra Bose Avashiya Vidhalaya atangin min han pe thar a, hei hian school naupang hmeichhe 50 free veka awm theihna a ni bawk a, kan lawm takzet a ni.

Chutihlai erawh chuan kan zirtirtute a then an lo pension a, an lo boral bawk a, indaih tak tak hi a lo awmthei lova. High School Hindi teacher 11 lai pekbelh kan ni chungin High School 5 - Vanzau, Sazep, Sesih, Vangchhia leh Lianpui High School-ah te Hindi teacher kan la neilo cheu a ni. Hei hianin kan sorkar hmaa kan school dinhmun a that tawh loh zia te pawh a ti lang awm e, Pu Deputy Speaker.

Tichuan, Headmaster neilo School te hi Primary School 22 leh Middle School 10 an ni a, Khuangthing, New Hruaikawn, Samthang, Khuangleng, Sazep, Vaphai, Chawngpui, Thekpui, Thekte, Zawngtetui, Saikumphai-ah te hian headmaster kan neilo bawk a ni. Pu Dy. Speaker, High School 7, Khuangleng, Leisen, Zosamthang, Farkawn, Vaphai, Vanzau, Dungtlang-ah te hianin headmaster kan la neilo a, hengte pawh hi min hriat sak ka ring a ni.

Tin, kan sawitak ang khan zirtirtu 102 lai min pekbelh chungin zirtirtu boral leh pension te an lo awm chho ve zel a. School 5-ah zirtirtu indaihloh avangin MLA fund-in zirtirtu kan ruai ve mek bawk a ni. Tin, ka bial chhunga High School exam centre pali - Bungzung, Khawbung, Farkawn leh Khuangleng-ah te hian LDC kan nei lo vek a, hengte hi min hriatsak turin ka ngen bawk a, Farkawn Govt. High School leh Khuangleng High School te hian 4<sup>th</sup> Grade kan neilo bawk a ni Pu Dy. Speaker.

Tin, bial chhungah Higher Sec. School science stream zirna kan la neihloh avangin kan mamawh hle mai a, Pu Dy. Speaker, SSA hnuaia Higher Secondary hawn thar a nih hunah min duhsak turin ka ngen bawk a ni.

Kan Minister zahawm tak Pu R. Lalthangliana Demand No. 24 hi ka han sawi zawk ang a. Hei, sorkar thar alo piang a, hriselna kawngah kan lo tlahniam viau mai a kan bialte pawh, tiang chuan building te pawh a lo awngrawp a, kan Minister zahawm tak, chak tak leh kan CM te duhsakna zarah Farkawn-ah PHCC leh Bungzung-ah PHCC building thar tunah hian min sak sak mek a, kan lawm hle a. Tin, chu mai ni loin, District Hospital-a an hman thin ni awm tak Khawbung PHCC-ah *life support ambulance* min dahsak te hi kan theihngihl loh tur chi niin kan hria a. Pu Dy. Speaker, ka zo tep a. Tichuan, ka bial chhung health clinic awmlohna khua Buang, Thekpui, Chawngtui, New Hruaikawn leh Saikhumphai-ah te hian health clinic min pe dawn ta a, kan lawm hle a ni.

Tin, kan mamawh belh hi han sawi zawk ila, Pu Dy. Speaker. Sesih hi kum 32 lai doctor neiloa a awm hnuin kan sorkar leh kan Minister chak takin doctor min han pe a, kan lawm khawp mai a, amaherawhchu tunah hian nurse 1 chiah kan nei a, hei hi chu min ngaihtuah belh sak kan duh a, chubakah lab technician hi kan nei lo a, tunlai hri Covid-19 hi a la reh si lova, lab technician leh nurse 1 tal chu min pekbelh se kan duh

khawp mai. Tin, Farkawn PHCC-ah hian an pension ve zel avangin nurse 2 chiah kan nei tawh a, hengte pawh hi ka han sawi lang duh a. Khawbung PHCC-ah pawh nurse 2 chiah an awm a, hengte pawh hi 1 ve ve tal chuan min ngaihtuah sak se tih kha ka han ngen a ni. Tin, Zawngtetui leh Leisenzo-ah hian health worker kan nei lo bawh a, Leisenzo clinic-ah hianin MLA fund-in health worker kan ruai a, Zawngtetui-ah hian tunah hian kan nei lo bawh a ni.

Hengte hi ka bial tana thil tamtak min tihsak tawh chungin kan mamawh dangte ka han thlen leh a, min lo hriatsak chuan a lawmawm khawp ang. Tichuan, khang Demand pathum kan han sawi tak te kha vawinah hian pass pui ngei turin ka rawn rawt a ni. Ka lawm e.

**DEPUTY SPEAKER** : A lawmawm e. Tunge kan han sawm leh ang le? Awle, Member zahawm tak Pu L. Thangmawia ilo sawm ang u.

**PU L. THANGMAWIA** : Kan Minsiter pathumte demand kan sawi dawn a, department pakua vel lai mai a ni a. Pu Deputy Speaker session hmasa lamah kan bial mamawhte kan han thlen a, chak tak mai kan Minister ten min bawhzui sak a, kan lawm hle a ni.

Vawiin chu lawmthu sawina lam a tam a. Kawlkulh-ah Fusal ground min siam sak dawn a, hna pawh tan tep a ni tawh a. Nikum khan Mizoram Boxing Association puihnain Kawlkulh-ah boxing kan han bei ve a, a hlawhtling em em a ni. Boxing hi mizote *weight category* a kan thlen san theihna pakhat a ni a, kan tih chhoh zelna turah kan Minister hian min lo hriat sak sela ka duh bawh a ni. Tin, Ngopa hi kan lar vena chu tennis a ni a, upgrade zel ngai a ni a, kan ti chho mek zel bawh a. Tin, Ngopa-ah hian Guest House pakhat kan nei a, chei that a ngai tawh khawp mai a, remchangah kan Minister hian ka bial min rawn tlawh ve se la, a hmuna en deuh ngai te a awm avangin.

Tin, IT hi department zawng zawngah hian a pawimawh vek mai a, hma an lak tawhna te lawmawm ka ti a, ka lawm em emna chu signal a han chhe deuh a, minister-in meeting a han ko a, sorkarin direct-a a enkawl nilo mahse theihtawp an chhuah nghal te kha a lawmawm hlein ka hria.

Tin, School Education-ah hian a sorkar ang pawhin challenge lian tak a awm chho mek a, chu chu “New Education Policy” tihlawhtlin chhohna turah hian a ni a, kan Minister pawh a hah em em tih ka hria a. A hma a kum 6 school luh ni thina kha kum 3 a han ni ang a, chungho accommodate-na tur ringawt pawh chu engzat nge additonal class-room sak ngai ang; tin, zirtirtu engzat nge lak belh ngai ang tih te vawikhata tih phut phut theih loh mahse, a bik takin School Education Department



chuan kan Minister hovin hma an la chho mek tih ka hria a ni. Mizo thalaite tan anih vangin hei hi ngaihtuahna min lo sen lawk sak a ngai tan hle a, an seng mek tawh pawhin ka ring a ni. Zirtirtu indaihlohna a nasa em em mai a; nikum hmasa kha a ni tain ka hria, Pu Deputy Speaker, High School zirtirtu 155 lak kha min phalsak e an ti a, ka lo lawm tawh khawp mai a, mahse an phal hnu lawkah Covid a lo leng a ka hriat soal loh chuan Serkawr high school ah chuan zirtirtu zawng zawng khan an lo pension zo vek tawh mai a ni. Chuvangin, kan Education Minister-in hei hi hriain hma chak tak maiin a han la a, SEDP atangin in bialah pawh zirtirtu indaihlohna ah chuan in neih fur ka ring.

Tin, kan Minister hi kan fak ve lawk ang a. Department staff-te kha requirement a chhut tir thin a, “hei chu ruling bial a ni a i dah hnem deuh ang” tih ang kha a awm lo a ni. “Zirtirtu neih zat list rawn la khawm rawh u” a ti a, kei pawn kan dil belh deuh thin a, “A, ngawi rawh, helai bialah hian zirtirtu tlemna zawk a awm, pali an awm hi chuan i duh tawk ang” a ti thin a, hengah hian fakawm ka ti em em a ni. Tin, a thar turah phei chuan middle school zirtirtu an lo pension leh teuh tawh bawk si a, khanga tan khan ka hriat soal loh chuan kan Chief Minsiter zahawm tak hnena a dilna chu tihhlawhtlinin a awm a, zirtirtu indaihlo zualte pawhin in neih theih dawn thu win-up na ah a rawn sawi chiang ang a. Ka hriat chin ka han sawi a nih chu. Tin, High School exam center-a LDC neilo te pawh SEDP atanga pek dan a ngaihtuah thu min hrilh a a hlawhtling chho mek a ni.

Tin, sorkar hmasa chungah pawh lawmthu kan sawi duh a, Ngopa-ah sorkar tawp dawnah khan SDEO min dah sak a, chu chu tunah hian kan Minister zahawm tak hian sum remchang te zawng khawmin SDEO Office sakna tur min pe a, tunah hian kan sa mek a, he House zahawm tak kaltlang hian min hawn sak tur pawhin kan sawm duh nghal a, a hawn niah chuan SDEO thar nen Office kan luah thei turah pawh ngai ila a tha ang e.

Tin, Demand No. 21, 24, 40-ah te hi han sawi thuk thuk ka duh a. Higher Education-ah pawh nasa takin hmasawanna kan hmu a, University thleng hian southern campus awm chho tura hmalak chhoh a ni a kan sorkar hnuah, hengte hi a lawmawm hlein ka hria a ni.

Tin, Health bika sawi loh theih loh chu, ka biala sub-centre awm lohna zawng zawngah health clinic center min dah sak vek tawh a, hemi avang hian ka bial mipuite pawh an lawm em em a ni. Changzawl leh Hriaumun te chu MLA fund hian ka la ruai ngar ngar mai a, a tir atangin. Naupaw chungin Vaccine la turin an kal a, health worker remchan loh ni anih phei chuan a tukah ruah sur hnuaijah te an kal leh te a ngai thin a ni. Chuvangin, tuna health clinic center min dahsak phei hi chu keini tan chuan thawk huaina tham a ni. Amaerawhchu, SEDP atanga ani emaw kan hotuten rem an ruat thiam

ang a, tuna hna lak phal a nih loh lai hian mahni khaw tana tlawmngai thei health worker an awm ka ring a ni. Tuna MLA fund atanga kan chawm min lo chhawk dan te a awm em tiha kha en ta ilara thain ka ring. Ka bial tan chauh pawh a ni lova, ram puma health clinic center te tan a ni. Department lamah pawh ka lawmna em em chu, MLA fund-a kan rawih te hi an department workar ang tak takin min lo chei sak a, engkimah Health Deptt. aiawhin min lo tihsak thin a, hei hian mipuite harsatna a chhawk nasa em em a ni. Chuvangin Department lamah pawh lawmthu ka sawi a ni.

Tin, Commerce & Industries lamah hian, ka bialah hnuhma a la tam lo khawp mai a, tunah hian Dawnfawh te kan han thar chhova, Bazar Shed te leh an dahthatna tur lam te pawh hi rawn hawi nasa leh zual se ka duh a ni kan Minsiter pawh.

Tichuan, a pumpui thua lakin vawiin hi chu lawmthu sawina lam ka rilruah a awm deuh a. Covid thawh thumnain min nuai lai hian harsatna tam tak chu kan tawk, mahse hemi chung department hrang hrang enkawltu kan Minister-te leh a thawhpui officer leh staff te thawhrimna hi a takin ka hmuin ka hria a. India rampum ang pawa disaster-a an puan 'Covid' donaah pawh bahlahna lutuk a awm lo a ni.

Tin, Sport lamah hi chuan kan thalaite an khawngaihthlak hlein ka hria a, inkhelh te a remchan loh avang hian. Chuti chung chuan department hmalakna erawh chu a kal mup mup reng tho te hi a lawmawm hlein ka hria a.

A tawpna berah chuan, IT lam hi ka han hawi nat hret a ngai em aw tiha kha ka han sawi duh a. A chhan a awm a; tunah hian India ram ang pawh hian nasa taka hmalak chhoh mek a ni a, department tihlen lam chu thuhran daih a ni a, kan zirlai zawng zawngte pawh hi Youtube hmang te leh thildang danga an lo tih theihna tur hian IT Department te hian chak zawka Education te pawh hi min enpui a ngaiin ka hria a ni. Central chuan a practical thleng hian an nei tawh a, pawl 10 kan zirlai khan Chemistry kan han zir a, engnge ni *litmus* pawh hrelo khan pawl 10 ka passed a ni; intihmualphona lam ni lo sela. Amaerawhchu, centralin a siam practical bu kan en chuan, animation-ah khan a Chiang em em mai a ni. Hetiang zawng hian 'kan naupang ten an chhawr tangkai thei' tia ngaihtuahna kan hman chhoh tlan a, department hrang hrang pawh kan in coordinate leh zual kha a thain ka hria a.

Pu Deputy Speaker, Demand zawng zawngte - No. 22, 43, 48, 18, 20, 28, 21, 24, 40 te hi pass ka phur tawh em em a ni tih kha ka rawn sawi duh a ni e. Ka lawm e.

**DEPUTY SPEAKER** : A lawmawm e. 'Deputy Speaker' tih hming hi lam a har hle a nih ka ring a, kan awk deuh tlangpui em aw, a tih theih a, member-ten zir nal ula a tha ang. A lam nalh deuh phei chu hun kan pe tam deuh mai thei a ni.

Kan member zahawm tak Pu KT Rokhaw i lo sawm ang u.

**PU K.T. ROKHAW** : Pu Deputy Speaker, ka lawm e.

A hmasain Pu Deputy Speaker, kan Minister-te hian kan biala kan ngaih pawimawh em em kan sawite hi chu khawngaihin min hriat sak se, tha deuhin min lo nawr sak se la, react ngei se tih hi ka duh dan a ni a, nilenga kan thutna chhan pawh a ni tih kha a hmasain ka han sawi duh a.

Demand No. 22, Sports & Youth-ah hian sport chungchang bika ka sawi duh laia chu, tunhmaa Mizoram tan sport lama theihtawpa hma lo latute kan theihngilh thin a, a lerah hian kan sawi mai thin a. Term hmasa Pu Lal Thanhawla sorkar khan sport lamah hian theihtawp a chhuah a, district headquarters zawng zawng kha artificial turf min phah sak a ni. Chu chu tuna kan CLP Leader, Sports Minister a nih lai a ni a, a thil tih kha fakawm ka ti a, hma lo latu hmasa a nih avangin, kha kha kan theihngilh tur a ni lo tih a hmasain ka han sawi duh a. MNF sorkar a lo ding ta a, Sports Minister tha tak leh chak tak kan han nei leh ta a, a lawmawm takzetin ka hria a. Dan leh hraite mumal takin min lo siam sak a, a lawmawm ka ti a.

Pu Deputy Speaker, Sports Department hi thalaite tan hian a pawimawh kan ti em em a, mahse pawisa kan dah hi nikum aiin a tlem lehin ka hria a, tunah hian nuai 24,000/- vel chauh kan dah a, nikum khan nuai 2,500/- bawr vel kan dah a. Congress kan sorkar lai khan nuai 2,500/- aia tam kan dah thei a ni. Chuvang chuan, he sorkar hian sport hi a ngai pawimawh tawh lo viauin ka hria a. Mahse, kan Minister hi kan ring a, theihpatawp a chhuah turah ngai ila. Tuna ka biala ka sawi duh bik chu, Tipa, ka bial headquarters a ni a, tunah khian Indoor Stadium kan nei lova. Pu Hiphei hun lai khan a MP Fund atangin Indoor Stadium min sak sak a, tunah chuan a tla bal tawh khawp a, a rei tawh a. Ka MLA Fund hmangin badminton khelh theihna turtein kan han repair a, mahse duhthu a sam lo hle a, rualawh a na hle a ni. Chuvangin, Tipa Indoor Stadium khi tun aia tha leh changtlung zawk, a thar emawa min sak sak turin kan Sport Minister hi ka ngen a ni. Tin, Pu Deputy Speaker, Tipa playground hi session apianga kan Minister hnena ka sawi thin a ni a, kan playground khi VC leh NGOs ten theihpatawp chhuahin kan lai fel titih tawh a, artificial turf/phul lem khawngaiha min phah sak turin ka lo ngen bawh a ni. Ka bial khi playground tha kan nei tha viau mai a, khaw hang hrang Phura-ah te khian playground tha tak mai kan nei a, gallery-te min siam sak thei se la ka lawm khawp ang. Tin, Siata playground hi a hmun a tha khawp mai a, khawngaiha min laih saka, international standard pawha siam theih a ni a, min tihhlawhtlin sak hram se la tih ka lo ngen duh a ni.

Pu Deputy Speaker, Tourism Department Demand No. 43 hi; Tourist Lodge Tipa-ah kan nei ve a, a rei tawh a, a chhe tawh lutuk a, khawngaiha a thara min sak sak turin ka ngen a. Tin, Tourist Lodge 'Castle of Beino'-ah hian, nikumah pawh khan ka sawi tawh a. Hei hi tunlai tourist-ho ina an en chak ber pakhat a ni a, Lodaw khua atang sawn hnai te a ni a, Mara pi leh pute chuan '*Saphao*' an ti a, hei hi 'Castle of Beino' tiin MTP (Mara Thyutlia Py) in an phuah a. Saw tah sawn Tourist Lodge khawngaiha min sak sak turin ka ngen bawh a ni.

Tin, ICT Department-ah hian internet facility chungchangah, Covid-19 hripui leng avangin hunrei tak regular-a zirna kalpui theih a ni tawh lova, online hmangin zirna kalpui a ni a. Hei hi keini ang thingtlang bialte chuan kan tuar nasa lehzual a. Khawngaih takin Palak bial lamah khian internet facility, heng company a bik takin BSNL te, Airtel te, Jio te khi chak zawk leh tha zawka kalpui tura hma min laksak turin ka ngen bawh a ni. Tin, ICT school scheme-ah hian kan Minister zahawm tak hian ka biala Government High School pathum - Government High School Tipa, Government High School Chakhei leh Mara High School Saikao te ICT school scheme hnuaiah min thun sak a, kan lawm hle a ni. Khawngaihin ICT school scheme hnuaiah hian a bak Government High School Zyhno, Government High School Amobyu, Government High School Phura leh Government High School Tokalo te hi min thunsak leh hram se tih ka lo ngen bawh a ni.

Pu Deputy Speaker, Demand No. 20, School Education hi, a hmasain School Education Minister hnenah hian lawmthu sawi tur a tam hlein ka hria a. Ka bial high school zawng zawngah hian teacher indaihlohna nasa tak a awm a, a thenah phei chuan school teacher pakhat chauh kan nei a, a thenah pahnih te; theihtawpin ka dil a, Minister hian SEDP kaltlangin teacher min pe tak tak a, a khaw neitute lehngal teacher 2, 3, 4 high school tinte min pe a, ka lawm hle a ni tih ka han sawi duh a.

Tin, a pahnihnaah chuan Burma refugee school naupang matric exam tur leh class 12 exam turte, Mizoram Board of School Education-a register loh chuan an exam thei dawn si lo a, chumia kan harsatna chu kan Education Minister hnenah hian ka thlen a, kan Minister hian theih tawpa hma lain, tunah hian Mizoram pumah refugee school naupang matric leh class 12 exam turte register a tihsak vek a, an exam thei dawn a, kan lawm hle a ni tih kha ka han sawi duh a ni. Chutilaiin Pu Deputy Speaker, ka bialah HSS hi pakhat chauh Tipa V-ah a awm a, chu chu Tipa-V Centenary Higher Secondary School a ni a. Tunah hian lumpsum grant-in-aid-a awmin, ka bial chhunga higher secondary school lumpsum grant-in-aid awm chhun a ni. Kan Minister chak tak hian ka bial mipui leh zirlaite mamawh ber Higher Secondary School kan neih chhun khi tun aia dinhmun tha zawk Adhoc Grant-in-Aid ah tal min hlankai saka, min upgrade sak turin ka ngen a ni.

Pu Dy. Speaker, Govt. High School, Chakhei ami hi a hma pawhin ka sawi tawh a. *Samagra* atanga Higher Secondary-ah min upgrade sak turin Session hmasaah pawh khan ka sawi tawh a. A changtu Minister pawh hian khawngaiha min lo hriatsaka, min lo tihsak hram turin ka ngen duh bawk a ni.

Pu Dy. Speaker, Higher & Technical Education chungchangah hian tlem han sawi leh ka duh chu, mihring kan lo pung chho zel a, chutiang zelin zirlai pawh kan pung chho bawk a. Kan District-ah khian college pakhat Govt. Saiha College chauh a awm a. Chuvangin khawngaiha he kan harsatna te hi hriaa, kan Minister zahawm tak hian Tipa-V ah khian RUSA Scheme kaltlangin College thar min din sak thei sela tih ka lo ngen bawk a ni.

Tin, Pu Dy. Speaker, Minister zahawm tak hian ka bial PHC pahnih – Tipa leh Phura-ah te a tharin building min sak sak a, tunah hian an zo tep tawh a, kan lawm hle a ni. Tipa PHC khi CHC-ah min upgrade sak turin wawi tam ka ngen tawh a, tunah hian ka rawn ngen nawn leh a. A dik tak chuan Tipa-ah hian PHC hospital a awmna a rei tawh khawp mai a, kum 100 a tling tawh hial a. Tunah khian PHC a la ni reng a, doctor pakhat leh nurse tlem te enkawlina hnuaiah a awm thin a, tunah khian a doctor pawh chu kan nei leh ta lova. Chuvangin, kan Minister zahawm tak hian a rang lamin doctor min pe turin ka rawn ngen a, tin, PHC atanga CHC-ah min upgrade sak turin ka ngen bawk a ni. Tin, Chapi PHC building hi a a hlui tawh hle mai a, damlote awmna tlak lovin a far nasa a, chuang chuan building thar min sak sak turin ka ngen bawk a ni.

A pathumnaah chuan medical equipment facilities hi kan nei chhe lutuk a. Min hria a, ka bial chu Myanmar border a ni a, tunah hian refugee hi ka bialah ringawt 7,000 chuang an awm tawh a ni. Chuvangin, medical equipment leh facilities a bik takin X-ray, ECC leh Ambulance te khawngaiha ka biala khuate - Tipa, Chapi leh Phura ah te min provide ve sela ka lawm hle ang.

A tawpna atan, Siaha Hospital-ah khian Specialist, a bik taka pawimawh em em Ortho leh Pathologist kan nei lo va, khawngaihin min lo dah sak se tih ka ngen bawk a ni e. Ka lawm e.

**DEPUTY SPEAKER** : Tunah chuan Member zahawm tak Pu K. Laldawngliana i lo sawm ang.

**PU K. LALDAWNGLIANA:** Pu Dy. Speaker, ka lawm e. Vawinah kan Minister ti tak tak ho – Pu Robert Romawia Royte, Pu Lalchhandama Ralte leh Dr. R. Lalthangliana te Demand sawihona hun kan nei thei hi a lawmawm ka ti hle a ni.

Pu Dy. Speaker, kan hmalaknate han thlir hian sawi tur a tam hle mai a. Demand No.22, Sports & Youth Services Minister zahawm tak Pu Robert Romawia chanah hian thla thum kal ta maiah khan thil tih theih em ni aw tih tur khawp, thenkhat pheih chuan ‘tak tak a ni loving a’ an tih kha kan Sports Minister zahawm tak hmalakna leh kan Chief Minister zahawm tak remtihna leh hriatpuinain Kawnpui Field No. 2 phul lem phahna tur ₹600/- crore chu 28<sup>th</sup> February khan Central Sorkar atangin an rawn sanction ta der mai a. Kawnpui bial mipuite leh Tuirial bial mipuite chuan kan Chief Minister zahawm tak leh Sports Minister zahawm tak chungah hian thinlung takin lawmthu kan sawi a ni.

Tin, Futsal chungchanga hmalak mek Kawnpui hmun te, Hortoki hmun leh hmun dang pawh a tam mai; chungte hmachhawp mek a ni te hi a ropui ka ti a, kan nghakhlel hle bawh a ni tih kha ka sawi lang tel duh bawh a ni.

Tin, Hortoki volleyball court hi kan tan thei tep tawh bawh a, chungte avang pawh chuan Minister hnenah lawmthu ka sawi bawh a ni. Sports budget han thlir hian a ram puma thalai rual hi kan lawm em em vek mai a ni. Covid hripui avangin duh angin kan infiam thei lo zawk a, chuti chung chuan infrastructure te leh a pawimawh ang chi te budget tam lem lo mahse nachang hria kan nei a, a ti zung zung mai a, budget a rawn tlem hret pawh hi a awm ka ti a, a tih tawh aia tha hian a rawn tih leh dawn tho avangin ka rawn sawi lang duh a ni.

Demand No. 43, Tourism-ah hian ka bial chhungah khuan bye-election neih lai khan kan sawi a, Khamrang-ah “Development of Village base Eco-tourism” atan tunah approved a ni tawh a. Kan nghakhlel khawp mai a, bial chhung leh a khua te chuan lawmthu an rawn sawi lawk tawh a, Tourism Minister hnenah lawmthu kan sawi a ni. Hei lo pawh hi lawmthu sawina tur hmachhawp tam tak a awm a, a taka thil ti mi Minister kan nei hi a ropui ka ti hle a ni.

Demand No. 48, Information & Communication Technology lam hi, ka bial chhung Serkhan - Pukpui tlang dung saw internet tower awm lo te a awm a, an rilruah a awm tho chungin ka rawn sawilang ve hrim hrim a. An rawn tihhlawhtlin hun ka nghakhlel hle mai a, hengte pawh hi bial mipui ten kan lo thlir thap a ni tih ka sawilang tel duh bawh a ni.

Demand No. 20, School Education Department chungchang hi; kan Minister hi a ti mai mai lo khawp a. Veilam atanga an rawn sawite pawh ngaihthlak a nuam khawp mai, lawmthu sawina hlir a ni mai a. Ka rawn thut ve hma pawhin kan bial chhungah khuan hmalakna – School lo siamthat te, zirtirtu indaih loh te a lo awm teuh mai a. Tichuan, tunah pawh khuan Hindi teacher leh zirtirtu indaih lohnaah te min rawn pe zel

a, min larawn pe zel dawn bawk a. Tunah hian khaw 13 Primary School-ah indaihlo zual 20 bawr vel pawh anrawn ti leh tep tawhin ka hria a, khaw pathumah Middle School lamah an indaihlo hle bawk a, chungte pawh chu kan lo nghakhlel tawh khawp mai a. Chutiang chuan kan bial chhungah pawh hian Education Department-ah hian an hmalakna leh an thil tih tawh khu a hmuh a nuam khawp mai a, a lawmawm a ni. Kan bial mipuite pawh kan lawm hle tih kha a tawi zawngin karawn sawi duh bawk a. A bikin Pukpui-ah khuan School building tha tawh lo a ni bawk a, tha takin minrawn sak sak dawn a, a thu pawh kan dawng tawh a. A lo thleng tep tawh bawk a, hengah pawh hian lawmthu ka sawi nghal duh bawk a. Tin, Lungdai-ah khuan kum 100 chuang pel tawh sikul a awm a, a tha vak tawh lo a, khu pawh khu an hre vek tawh a, anrawn tih tep kan ring a, khu pawh khu kan lo nghakhlel hle a ni tih kha ka han sawilang tel duh bawk a ni.

Sawi tur a tam khawp mai a. School Education chungchangah hian hmasawanna ropui tak, chi hrang hrangin kan hmu a ni tih kha ka han sawilang duh bawk a ni.

Tichuan, kan Minister zahawmtak, chak tak, viak tha tak mai Dr. R. Lalthangliana Demand No. 21, Higher & Technical Education-ah pawh hian, ka bial chhungah khuan Kawnpui College a awm ve a ni. Chutah chuan MLA apiang kha Chairman-ah an lo dah bawk si a, ka hovin kan thu a, mamawh ang te kan han ti nghal zung zung a. Hengte hi kan Minister zahawmtakin upgrade theih dan tur min ngaihtuhsak dawnin kan hria a. Nakinah a tul ang te anrawn survey ang a, chutah chuan theih ang tawkin khawtlangin sum leh pai thawhkhawm a college din a ni bawk a, zirtirtu Associate Professor ho an tang bawk a, zirlaite pawh an tang bawk a. Khung khu min lo hriatsak bawk dawn nia.

Demand No. 24, Health & Family Welfare-ah pawh hian kan lawm hle a. A ram pum a han thlir phei chuan hripui a leng a, kum 3 deuh thawa an hmalaknaa kan Minister-te leh a department officer lian hote thawhho thatzia te, an thawhho thatna avanga meeting an neih tam zia te, Local Level Task Force-te kan ti a, a district level angte pawhin hma an lak thatzia hi sawi ngai lo khawpin a ram mipuiten kan hria a, kan Minister zahawmtak leh a thawhpuite zawng zawng chungah bial aiawhin lawmthu ka han sawi duh bawk a ni. Kan bial chhungah harsatna kan tawh mek chungchangah pawh a tul apiang, kan mamawh apiangte min lo pek thin naah lawmthu kan sawi bawk a ni.

Midangin an sawi ang tho khan PHC kan neih Bukpui te saw an la tan lo deuh hlek a, engkim peihfel vek tawh a ni a, quarter nen tha taka sak tur a ni a, kar leh te hi chuan an tan mai dawn a, chungah chuan lawmthu ka sawi duh bawk a ni. (**Dy. Speaker:** Minute 1 i la nei e).

PHC Kawnpui hi CHC-ah anrawn hlangkai tep tawh bawk a, hei pawh hi a khaw mipuiten kan thlir thap mai a, lawmthu han sawi nghal a la ni chiah lo deuh a. Hei hi a hlawhtlin ngei theihna turin, khulaia hnathawk indaihlo te pawh MLA fund atang tein a tul angin hma kan la zel a, kan ti zel a ni tih kha ka han sawi duh bawk a.

Tin, an sawi ang khan Health Clinic Center pawh ka bial chhunga tan min phalsak a, kan la neih loh pawh tunah min phalsak leh tep tawh a, min phalsak chin tawhah pawh, kan sawi ang khan MLA Fund atangin Health Worker-te kan ruai zel a. Hengte pawh hi nakinah Session-te kan zawha kan pass hnuah minrawn tihlawhtlin sak theih zel kan beisei a, hemi chungchangah pawh hian lawmthu ka sawi bawk a ni. **(Dy. Speaker: I hun a tawp a.)**

Pu Deputy Speaker, a tawp berah Demand No. 40, Commerce & Industries hi ram pumin a reh thup emaw kan ti a, a reh thup lo a ni. Thawhhona tha tak nen hmalakna a kal mek a, tunah hian an sawi mup mup, sawrkar lo kal tawh zawng zawng pawhin an tih theih loh tur an tih, Zuangtui Estate-te pawh tunah an survey mek a, Lengpui te, Luangmual-te pawh uluk takin tunah hian an bawhzui mek a, hemi kawngah pawh hian lawmthu ka han sawi bawk a ni. Ram puma mipui eizawna bul tanna tur an tih ang chi te pawh tunah hian, sumdawnge mamawh tur te pawh subsidy-a sem theih tur te pawhin ruahmanna an siam mek hi ropui ka ti a, chungte pawh chu ka han sawilang tel duh bawk a ni.

Heng kan Minister zahawmtak takte pathum Demand kan han sawi takte hi ka support a, pass thuai a nghahhlelhawm khawp mai tih kha ka han sawi a ni e. Ka lawm e.

**DEPUTY SPEAKER** : Minute 6 vel a la awm a, hemi chhunga sawi zo thei tur tunge kan sawm ang aw? Member zahawmtak Er. H. Lalzirliana i lo sawm ang u.

**ER. H. LALZIRLIANA** : Pu Deputy Speaker, ka lawm e. Vawiinah kan Minister-te pathum demand sawiho theia kan awm hi lawmawm ka ti a, theih ang tawkin ka han sawi ve ang e. Demand No. 22, 43 leh 48, kan Minister zahawmtak Pu Robert Romawia Royte chan hian ka han sawi tan ang a.

Keini Mamit, a bik takin ka bial chhunga district hi sports-ah hian kan vannei hle a, district hnufual kan nih man te pawh a ni awm e. Tunah hian hma nasa takin lak a ni a, kan bial chung bakah Hachhek bial leh Dampa bialten naktip lawkah hian a hlawhtlinna kan hmu dawn a. Tunah pawh hma nasa taka lak a niin project a kal mup mup a ni tih kha min lo hriatsak ula, kan Minister chungah lawmthu kan sawi a.



Tin, min lo chhinchhiah sak tura ka duh chu Hmunpui, Rawpuichhip leh Dapchhuah te hi chuan football ground neih te hi chu an nei zuam lo hrim hrim a, futsal leh volleyball court emaw te hi an neih ve theih chhun a ni a, football ground grass phahna tur ang chi te, amaherawhchu, an neih ve theih chi ang hi min tihsak ve ngei se la tih kha ka han request a, min lo chhinchhiah sak se la. Tin, Rawpuichhip-a indoor stadium leh football ground tuna an neih khu min cheisak ve se la tih hi ka request bawk a ni. Dapchhuah-ah khuan an VC te pawhin an sawipui tawh niin ka hria a, hengte hi hma min laksak thei se la kan lawm hle ang a.

Tourism chungchangah hian, department lam pawhin min lo chhinchhiah sak se la ka tih chu, khulai bial tan ringawt nilo, department achievement atan pawha pawimawh leh Zoram mipui leh hmun dang atanga Mizoram rawn tlawhtute tan pawha pawimawh thil pahnih khat lek sawi ka duh chu – khulai Dampui-Zotlang ramngaw khu eco-tourism-ah emaw, bio-recreational centre ang te emawah min develop sak se la kan duh hle a. Khu lam kawngah khuan tunah chuan kan kal tawh meuh lova, a kawng hlui pawh humhalh theihin a awm nghe nghe a. Hengah hian department pawhin survey min neihsakin, hma eng emaw min laksak se kan duh hle a.

Lengpui lui khu, kan Minister pawh ka sawipui tawh a, tunlai pheih chuan Aizawl atanga picnic ho hi, nitin hi an tla thla a ni ringawt a, holiday leh Sunday-ah te pheih chuan an ri thla deuh mum mum a ni. Chei tlak tak a ni a, a hmunah te min kalsakin department-ten min survey sak se la a tha an tih ve hle pawh ka ring a.

Mamit pawh khawpui kan ni ve tawh a, kan Tourist Lodge hi a hmunhma khuan a zo lo hle a. Tin, a building a hlui tawh a, a tawp a, a sak dan hrim hrim pawh a changkang lo hle a, hostel a ang deuh ber a. Amaherawhchu, kan thlenna hmunhma neih that ve ber a ni a, khung te khu engtin emaw ruahmanna min siam theih chuan kan lawm hle ang.

Tin, hmalakna awm mek Rawpuichhip eco-tourism khu engtikah nge a function theih ang, a sanction pawisa te hi kan la nei reng em, tih te min react theih chuan a lawmawm hle ang.

Tin, Rajiv Nagar-ah khuan Tourist Lodge sak ve tawp a ni a, chowkider pawh awm lovin a ding ve tawp a, khu khu engtin nge hma min lak sak theih ang. Tin, Lengpui-ah khuan kan sorkar hlim khan eco-tourism hmun tur ban te an phun an ti a, tunah erawh chuan khang ban phun te kha a bo zo leh ta vek mai a, pamtul niin a lang a. Hei hi sorkar hriatpui vak lova hma lo lak anih hmel a, ka rawn sawilang ve hrim hrim a ni e.

Tin, Rajiv Nagar-ah khuan ICT min rawn dahsak tawh a, lawmthu sawi tur ka nei a. Kan zuk zin chang te hian internet signal kan nei thei tlatlo thin a, tlanga han lawn nal nal a signal awmna hmuna phone hman te a ngai thin a ni. Tunah erawh chuan kan nei ta a, kan lawm hle a ni. (**Dy. Speaker:** Ngawi lawk rawh aw. Kan hun hi a tawp a, chawl phawi ila kan luh hunah a sawi chhonzawm leh dawn nge, tunah a sawi tlang law law dawn? Awle, sawitlang mai rawh se aw.)

Pu Deputy Speaker, ka zo tep a nia. Dapchhuah-ah te khuan online class neih ve te a ngai a, an lainatawm khawp mai a, Phaileng kawng thing hnuaiyah te an han kheuh ve neuh neuh a. An thlalak te min rawn thawn a, kan Minister hi ka thawn chhawng vat a, aniin alo ngai pawimawh hle a, tower min rawn dah sak nghal a, kan lawm hle a ni tih kha ka sawi nghal ani.

Education Department, Pu Lalchhandama Ralte demand hi tlem han sawi ve ka duh a. Damparengpui-ah khuan HSLC exam centre min pe a, kan lawm tak tak a ni. A ham chuan Phaileng-ah an han exam a, motor mumal lo nen, motor ruih nen; tunah chuan mahni tual ngeiyah HSLC an exam thei ta hi a khaw mipui leh khulai bial mipuite te kan lawm hle a ni.

Tin, zawhnaah pawh ka zawh tawh Lengpui HSS hi khawngaiha an rilrua min lo dah saka, theih ang anga hma min lo laksaka SAMAGRA hnuaiya min thunlulh ve ngei kha ka rawn ngen a. Tin, Lengte, West Serzawl leh Tuipuibari-a Private High School kum eng emaw zah lo *run* tawh kha min upgrade/regularize sak theih chuan kan lawm hle ang tih kha lawmthu sawi pahin ka han request a ni.

Tichuan, Dr. R. Lalthangliana, Minister zahawm tak demand H&FW Department-ah hian (a khaw hming hi kan lam chhuak hial teh ang, ka bial mipui te hi an lawm dawn em mai) Nghalchawm, Saitlaw, Dilzawl, Tuirum, Khawhnai, Salem Boarding, Andermanik, Khantlang, Bawngva, Phaizau, Vawngawngo, Chilui, Khanthum, N. Tlangkhang leh Luangpawl-ah te hian Health Clinic Centre a la awm lova, khaw 15 ah hian, Mizoram constituency-ah chuan Health Clinic Centre neilo khua tam ber kan nih ka ring a. Chutah chuan Health Clinic Centre hawn min phalsak a, SEDP-ah sum leh pai mamawh ang te an hmuh theih chuan kan la neih ngailohnaah hian Health Clinic kan nei ve tur hi kan lawm hle a ni. A bik takin kan Minister kiangah hian ka sawi ngun hle a, application ka siam a, a changin English in, a achangin Mizo tawngin, phok hnih/phok thum hi data nen (**Deputy Speaker:** Minute khat ila nei e) Ani pheih chuan, ‘Pu Zir, iva han ziaak tha em em ve’ min ti a, literacy rate te, census base a population te, khang zawng zawng data nen khan ka ti a ni. ‘Iva ziaak tha em em ve’ tihah khan a tawp mai dawn emaw ka ti a, a rial rei tawh angreng bawk si a. Mahse hei, beidawn lamah hlawhtlinna kan hmu ta hi kan lawm hle a ni.

Tin, hmanni lawk khan Mamit-ah ANM School min hawn sak a, CMO Office thar te kan nei bawk a, kan lawm hle a. Naktip lawkah hian 100 bedded District Hospital thar hawn mai tur pawh kan nei dawn a, a chungah kan lawm hle a ni.

Tin, Mamit College-ah hian Geography subject hawn phalna min pe a, kan han hawng ve rawih a. (**Deputy Speaker:** I hun a tawp e.) Pu Deputy Speaker, ka zo tep e. Mamit College-ah Geography introduce a ni a, vawiin thleng hian MLA fund-in zirtirtu pahnih hlawn hi kan la pe char char a, avaiin cheng 7 lakh ka seng tawh a. Hei hi min lo chhinchhiah sak se la, engtikah nge sorkarin MLA te hi min awl theih ang tih kha. Kan ti laklawh si a, kan inpe tlah tlah mai a, khawngaih takin kan Minister hian min lo chhinchhiah sak sela.

Tin, Tuipuibari PHC hi engtikah nge kan *run* theih ang tih hi kan mutmawh hnarmawh a ni a, hei pawh hi min react theih chuan kan lawm hle ang tih kha ka sawi leh duh a. Tin, Health Clinic an hawn zingah khan Saitlaw te, Chilui te, Khanthum te, N. Tlangkhang te leh Dilzawl te hi kea kal ngai a ni a, heng hmuna kan nei tur hi kan lawm hle a. Tin, Lengpui leh Rawpuichhip PHC hi doctor leh staff quarters kan neih chhun pawh khu a tawih tawh khawp mai a, tin, kan neih khu a tlem hrim hrim bawk a. A hnenah pawh kan sawi tawh thin a, A khaw mipui tepawhin an sawi thin a, khung te khu min ngaihtuah sak theih chuan kan lawm hle ang tih kha ka sawi duh a ni.

Vawiinaa Minister zahawm tak tak pathumte demand hi he House hian pawmpui ngei turin karawn sawi ve a ni e. Ka lawm e.

**DEPUTY SPEAKER** : Awle, a lawmawm e. Kan chhun chawlh hun minute 6 dawn laiin kan pel a. Tunah kan chawl ang a, dar 2:00-ah kan lut leh dawn nia.

## **2:00 PM**

**DEPUTY SPEAKER** : Thu ang ule. Kan insawm leh hmian, vawiina Minister zahawm tak takte pathum chanpual kan sawi dawn a ni a, churang chuan, kan hun pangngaiyah hian kan zawh hmel lova. Kan chawlh huna hi kan danah chuan dar 2 atanga dar 4 a ni a. Kha kha engtin nge ni, dar 5-ah hian chawl ta mai zawk ila engnge kan ngaihdan tih kha, House ngaihdan I han la lawk teh ang u.

**PU LALRUATKIMA, MINISTER:** Pu Dy. Speaker, dar 4 aiah khan dar 5 ni mai se la tih ka han rawt a ni.

**DEPUTY SPEAKER** : Engnge kan pawm tlang thei em? Anih leh kan zawh hman loh chuan dar 5-ah i inbuatsaih ang aw. Tichuan tunge kan han sawm leh ang le?

Kan lawm viau si a kan va ding mai lo ve! Member zahawm tak Pu Nihar Kanti Chakma ilo sawm ang u.

**PU NIHAR KANTI CHAKMA:** Pu Dy. Speaker, ka lawm e.

Hei, vawiinah Minister pathum lai Demand kan sawiho mek a. A hmasa berin Demand No. 20, School Education Department chungchang sawi ka duh a. Kan hre vek a, ka bial hi *educationally backward* area a ni a. Education tel lo chuan ramte, mihringte hi hmasawn theih a ni lova.

He demand-a ka sawi duh chu, education chungchanga harsatna hrang hrang hi, a bikin ka bial hian kan nei nasa a. Chumi rualin tun sorkar-a Education Minister hnenah lawmthu kan sawi hmasa duh a ni. Ka bialah 10+2 Science stream min hawnsak a, a lawmawm ka ti khawp mai a, ka bial mipui aiawh pawhin lawmthu ka sawi hmasa a ni. Kan hre vek a pandemic vangin a bikin thingtlang zirlai ten an tuar nasa a. Kum thum lai class kal mumal theih loh a ni a. Khawpuiah chuan a zia a, online tein a tih theih a ni. Thingtlangah erawh chuan online class a kal theih miah lova, kha kha problem lian tak a ni a. Hei kum hnih lai hi kan lost a ni a, a bikin Primary level te, Middle level ho tan kumin session tharah chuan offline-in class kal theih tawh kan beisei a. Khami kum kan lost a bikin Primary leh Middle level kha engtin nge a cover theih ang tih Education Department-in ngaihtuah lo seng thei se ka duh khawp mai a. Ka bial chungchang ka sawi zing tawh a, tunlaih mihring kan pung a, zirlaite pawh an pung chho zel a, chutiingin school te pawh a pung chho zel a. Chutilaiin ka bialah exam centre pakhat chauh kan nei a, high school eng emaw zah awm naah chuan centre pakhat chauh hi kan indaih lo a ni. Chuvangin, Minister zahawm tak Tiparghat atan exam kan dil ve a, kha kha min tihlawhtlin sak thei se chu ka lawm khawp ang.

Pu Dy. Speaker, hmanni lawk khan ka bialah Minister zahawm takin Hindi zirtirtu eng emaw zat min dah sak a, a lawmawm ka ti khawp mai a, lawmthu ka sawi a ni. Amaherawhchu, chumi rual chuan problem hrang hrang kan nei a. Thingtlanga zirtirtu, a bikin Primary leh Middle level zirtirtu hi an indaih lo nasa khawp mai a. Pu Dy. Speaker, Malsury UPS-ah zirtirtu pakhat chiah a awm a, tun thlengin MLA fund atangin zirtirtu kan ruai ve a. Chuvangin, he school-ah hian zirtirtu min dah sak thei em? Zirtirtu pakhat chauhin Middle School pakhat enkawl chu thil hahthlak a, kan Minister zahawm takin hei hi min chhinchhiah sak thei se ka lawm khawp ang.

Demand No. 24, Health & Family Welfare chungchang hi tawi tein sawi ta ila. Kan hre vek a, nikum khan Tlabung khuain kum 150 a tlinna ropui takin kan lawm a. Mizoram-ah hian Tlabung Hospital a ding hmasa ber a, amaherawhchu infrastructure lamah kan harsa em em a ni. Ka sawi zing tawh a, Tlabung Sub-District. Hospital cover

area cover hi a zau mah mah a, ka bial pumpui mai bakah Pu Mama bial te, Pu BD-a bial te a cover tel bawk a, chuti chungin infrastructure lam kan nei chau hle mai a, medical equipment nei pawh ni ila operator neihloh chuan awmzia a awm vak lova. Entirnan x-ray khawl hi kum 2007 velah kan nei daih tawh a, amaherawhchu tun thlengin technician kan la nei lova, a pawh ka ti khawp mai. ECG khawl te pawh chutiang tho a ni a, operator hi tun thlengin an la dah lo bawk a. Dental Surgeon hi hmanah kan nei thin a, MNF sorkar hmasaah khan a awm ve thin a, MNF sorkar lai tho khan sawn chhuakin tun thlengin kan la nei leh lova, a pawh ka ti hle mai. A ministry chu eng party pawh lo ni se, health hi ngaih pawimawh a tha a. Chuvangin, Pu Dy. Speaker, hengte pawh hi ka sawi zing tawh a, kan hlawhtling thei lo hi chu rilru a na ve thin khawp mai a, mipui tana ding kan ni ve a. Health chu a pawimawh a, 'health is wealth' tih hial a ni a, chuti chungin Tlabung Damdawiin-a damlo case ho lam pawh ni se, Lunglei ah refer a ngai zel thin a, heng damlo tam zawkte hi mi rethei harsa te te annih avangin an tan tih ngaihna a awm lo a ni. Hei hi thil *serious* tak a ni a, khawngaihmin mamawh ka sawite hi min tihlawhtlin sak theih chuna ka lawm khawp ang. (...*Warning Bell*...) Pu Dy. Speaker, a va rei lo em, kei hi ka sawi muang si a.

Civil Hospital chungchang hi sawi zo law law ila. Tuna Tlabung Sub-Dist. Hospital dinhmun chu hetiang hi a ni a. Nurse pakhat chiah an nei a, regular nurse pahnih an awm ve a, contract basis nurse pahnih chiah awmin indaihlon a nasa hle a ni. Hei hi 50 bedded hospital a ni a, kan Minister zahawm tak hian min chhinchhiah sak sela ka lawm khawp ang.

Demand No. 40-a border trade tihchangtlunna chungchang hi kan sawina a rei tawh a, kum 10 a pel tawh a, tun thlengin hmuh tur hi a la awm lova. (Pu Dy. Speaker, minute 1 chiah min pek belh la..) Ka hriat soal loh chuan, hei Indo-Bangladesh *border haat* siam nan hmun pali an thlang a, chutah chuan kan veng Nursuri pawh telh ve a ni a, mahse, Nursuri, Tuipuibari, Silsuri leh Marpara-ah te tun thlengin hmalakna engmah ala awm lo a ni.

A tawp berah Pu Deputy Speaker, ka sawi duh chu, Higher & Technical Department chungchanghian, ST rules hi hmanni Dated 31<sup>st</sup> May, 2012 khan thlak a ni a, hei hi *discriminatory* a ni a. Chuvangin sorkar hian ngun takin ngaihtuah sela a thain ka hria. Hei hi ngun takin ka lo en ve a, keini te pawh permanent resident kan ni a, ka pa pawh Mizo District Council hun laia MDC lo ni tawh, permanent resident a ni. ST a ni a, hetiang *discriminatory rules* siam hi pawh ka ti takzet a ni. Hei, Minister hi senior a ni a, hei thil hi ngun taka ngaihtuahin min thlaksak se ka duh khawp mai.

Awle, Pu Deputy Speaker khati zawng kha ka sawi theih ni se. Ka lawm e.

**DEPUTY SPEAKER** : Tunge kan han sawm leh ang le? Awle, member zahawm tak Pu V.L. Zaithanzama ilo sawm ang u.

**PU VL. ZAITHANZAMA:** Pu Deputy Speaker, ka lawm e. Ding duh awm lo hnawhkhah nan nimin piah atang khan min hmang a, kan ding leh mai ani ang chu.

Pu Deputy Speaker, a hmasa berin Demand No. 22, Sports & Youth Department hi ka han luhkhung ve ang a. He Department hi sawi dan thiam a har dawn hlein ka hria a, tlem si, tam si, a hmaa sawi tam zawk khan an infak siak a, kan Sport Minister hi thil a ti thei viau a nih ka ring a, thil kha kan in dil siak a ni deuh ber mai baw k a, he Department hi sawi pawh a hlawh hle dawn in ka hria.

A hmasain he department-ah hian sawi tur a tam hlein ka hria a, Sport policy te kha an han duang a, kei ngei pawhin lawmthu ka sawi a. Kan lawm tehlu nen hmalakna erawh chu kan hre lem hlei lova, tun hnaia ka hriat chu, District Sports Committee din tum a ni awm e, tih vel hi Sports policy ropui taka lawmthu kan sawina ken tel kha a ni ta maiin kan hre deuh a, chu chu ka rilru ah a awm reng a ni.

Tin, National Games te kha kan sawiin ka hria a, kan Minister zahawm tak khan, “kan CM pawhin min sawipui” tih ang deuh te kha, ka hre soal a nih loh chuan ka bengah hian ala cham a. Khangte kha engnge kan thlen tak, engmah thawm kan hre zui ta lem lova. He Department hi, a budget kan sawi ngawr ngawr han en kha chuan a tlahniam nasa hle a, khalam kan sawi hma khan kan ngaihtlak tawh ang khan department dang dang atangin sum an pawt thiam a, Aizawl Smart City Project atang tein sum tam tak an pawt a, SEDP atang tein ‘sum dawng tam top 5’ ah a tel a. Pawisa hi engtin tin emaw hian an ngah em em mai a, tunah a ram pum chuan kan sawi seng lo ang a, Mamit District-ah ringawt pawh Mamit bialtu MLA zahawm tak khan lawmthu a rawn sawi a, a lawmpuiawm khawp mai a, phullem phah turin hmun ruk laiah ruahman a ni a, hmun khat Lengpui phei chu an phah zo tawh nghe nghe a. Inhnaih tak taka phullem phah hi eng vanga thlan nge a nih, eng criteria hmanga thlan nge an nih tih te hi min hrilh theih chuan ka lawm ngawt ang; hei hi min lo chhinchhiah sak sela. Phah zawh hnuah a maintenance te hi tuin nge tum dawn, Sports Department-in nge a enkawl tu tur hi kan ngaihtuah chawp dawn tih te. Heng hi thil enkawl hautak tak mai a ni a, thil tha pui pui, a enkawlna tur te kan ngaihtuah leh turah kan ngai a.

Tin, ka rilrua awm pakhat chu, phullem pakhat phah tur hian nuai 500 emaw 600 emaw a ngai a ni. Mamit District ringawt kan sawi a, phullem hmun 6 a phah nan khan nuai 3,000 aia tam (nuai 4,000 dawn mai) sen a ngai dawn a, hei hi a pawisa hi PMJVK atang leh Central fund dang atanga pawh khawm a ni a, chu chu State share ngai tur chi niin a lang a. Covid-19 avanga sum harsat lai leh pension leh Healthcare Bill tam tak

kan bat laia hengte hi chu han insum deuh chi emaw ni aw, tih te min ngaihtuah tir a ni. An phahna khua te ka lawmpui rualin harsatna tam tak thleng thei a ni. State share alo ngai ang a, maintenance alo ngai ang a, hei hi Sports develop duh vang nge ni ang a, contract duh vang tih te kha ka rilru ah a awm a, min chhan theih chuan a lawmawm ngawt ang. Pawisa hi a tam a ni tih hriattir nan restricted tender-in hna hmun 32 lai ah sem niin ka hria a, ₹26,500 lakhs chuang zet mai an pe chhuak a ni. Chuvang chuan, he department hi a mawm a, MLA zahawm tak tak ten an bial chhunga eng eng emaw ti tura an dil thawm te kha kan lo hria a, chu te chu kan sawi ri duh a.

Mizoram-ah hian Sports discipline chi hrang hrang 32 a awm a, phullem hi chu discipline pakhat hman tur kha a ni mai a. Lengpui-a kan kal tum pawhin an lo sawi phur viau a, High School Sports te inneih hunah lung khawiah nge in den ang a, fei khawiah nge in khawh ang te ka ti a, an hrethiam chiah lova. Chu chu kan dinhmun a ni a, chung discipline hrang hrang te promotional fund erawh chu a tlem tawlh tawlh mai a ni. Sports-ah hian infrastructure tha tak tak kan mamawh rualin, enkawl a hautak a, a pawimawh ber erawh chu mihring a ni. Discipline hrang hrang 32-ah khan hruaitu hrang hrang an awm a, tunah hian discipline thenkhat phei chu an hruaitu ten pawisa te an thawh khawm a, fund te an hmuh lawkloh thin avangin phaiah National level-a kal turte pawhin sum puk chawpa kal te a ngai a, kumin a kan budget hi nakumah te kan hmu a ni. A buaithlak khawp mai, chu chu an sawi dan a ni. Tunah khan Sports Association hrang hrang 32 in telkhawm USAM phei chu an mangang a, PR te min chhuah khum a, ka lo hmu nghe nghe a, inlo chhiar ve emaw, chu chu kan dinhmun a ni.

Incentive cash award hi Sports mite tiphurtu tak mai a ni a. State Games kan neih khan kan lawm hle mai a, “Christmas hma ngeiin sem a ni ang” tih kha puan a ni a, beisei taka kan nghah laiin 2021-ah sem theih a ni tawk a, tum term chhung hian vawi khat chiah kan la sem a ni; tunah a dang sem a awm ta lova. Khami tum pawh khan a hnu kum 2 dawna sem a nih kha chuan kan medalist thenkhatte phei chu nupui pasal te an lo nei hman a, fa nei duah hnu ten an va dawng a ni. Chuvangin, an rawn thlen hlim hian pek mai dan a awm lawm ni, heti taka thil kan tih theih si chuan tih kha ka rilruah a awm a. Sports chu ‘*Industry*’ ah kan puang a, a hnathawh lampang ringawt kan buaipui a, association lamte kan tihsak loh chuan sport-ah hian hma kan sawn tak tak lovang tih kha hria ila. Kha lamah khan hmasawn ila, Sports Council pawh hi tih chak deuh dan a awm lawm ni tih kha uar takin ka auchhuahpui a ni.

Pu Deputy Speaker, Demand No.18, Printing & Stationery-ah hian ka han lut ang e, sawi a hlawh vak lo riau a.

Kan kawt kai maiah sawn a awm a, khawvel khawl tha tak tak, thenkhat phe chu a aia khawl tha kha hmundangah pawh a awm chuang lova, chutiang khawl nen chuan an inchhawp a ni; ka sawi thui lovang a. Amaherawhchu, kan hmang tangkai vak lova, he House-ah pawh hian kan sawi tawh a. Department thenkhat hi chuan kan dawr tha viau a, mahse a dawr ngailote pawh kan awm a ni awm e.

Kan beisei loh deuh ka han sawi ang a. Printing & Stationery-ah hian khawl tha an nei tih kan hria a, Mizoram Calendar te hi engati nge kan chhuttir mai loh, engati nge phaiah kan chhuttir tlat mai le tih hi ka ngaihtuah a ni. Nakumah chhuttir ta ila, kumina kan calendar ai hian a lo that loh chuan a khawl a tha si a, a hnathawktute kha kan zirtir ang a, a aia tha lehzuala chhu tur khan tan kan lak tir thei a ni. Hemi ka sawi duhna chu tunah budget kan buaipui mek a, tuna kan budget hi hmanni *general discussion*-a ka sawi ang khan, a hmanna lam hi a pawimawh a. Kan pawisa neih phai lamah liam tir lovin Mizoram-ah ngei hian hmang ila, kan pawisa hlutna hi a lo pung lehzuol dawn a ni tih ngaihtuahna nen hei hi ka sawi a ni. Thildang zelah pawh hetiang ngaihtuahna hi kan hman deuh deuh chuan kan sum neih ang chhun hi a tam emaw, a tlem emaw a tangkai deuh deuh dawn a ni tih kha ka rilruah a lo awm a. Printing & Stationery thawh chhuah hi Mizoram sum bawmah a lut a, department engzatin nge dawr thin a, dawr ve lo engzat nge awm, an department hming nen te min hrilh theih chuan ka lawm ngawt ang tih kha he department sawi hlawh vak lo hi tawi tein ka rawn sawi a ni.

Demand No. 28, Labour & Employment hi tawitein ka han sawi ve leh ang a. Mizo thalaite All India leh Central Service-ah an tlin ve theih nan vaibelchhe 2.60 MYC hnuaiah dah a nih thu leh kan lawmthu kha kan sawi nak nak a. Kei pawh ka lawm a, he thil hian min tilawm hle a ni.

Kum 2020-ah khan Delhi-ah thalai 20 kan tir tawh a, vanduaithlak takin tuman IAS Preliminary Exam an rawn paltlang ta lova, sum tam tak erawh chu kan seng a, kan la ti zel dawn a. Tunah hian kan ngaihtlak tak ang khan mi 40 kan tir thla leh dawn a ni. Heta tang hi chuan hlawhtlingte pawh an awm ve tawh ngei ka beisei.

A leh pekah chuan, “Mizo thalai IAS (prelim) paltlang an awm chuan an zir zelna tur Mizoram Youth Commission-in a tum sak vek ang” te ti ta ila, kan thalai tum ruh tak takte theihna kan cho chhuah phah theih zawk ang em tia ka ngaihtuahna te ka han sawi ve a ni.

Pu Deputy Speaker, pakhat lek ka han sawi belh hram ang e. Commerce & Industries-ah hian ka han lut ang a. Commerce & Industries hi a pawimawh a, hna thawka Mizoram sorkar tan pawha sum thawk chhuak tura kan ngaih hi an budget a tlahniam nasa hle mai a, 18.52% (nuai 3,268) zetin a tlahniam a ni. A pumpuiin ka



luhchilh lovang a, *Mining* lai hi tawi tein ka sawi hlek ang a. Mining hi thawktu an indaihlo em em mai a, post sanction 73-ah regular-a thawk 48 chauh an awm a ni. Hei hi hman nia Taxation ka sawi ang khan, sum kan harsa a, a thawk chhuak theitu turte hi I duhsak ang u. Hetih lai hian a thawk chhuaktu tur te hi kan duhsak lo zawk tlat mai a, budget kan minus tir nasa hle mai a. Sum hman tur kan pe lova, kan budget en hian hnathawhna tur sum kan pe tlem hle a ni. Chuti chung chuan nuai 30 vel lek hnathawhna tur kan pek laiin, a tling mang lo lehngal a, vaibelchhe 10 thawk chhuak turin kan beisei lehngal a. Lirnging, leimin awm apiangin kan ko kual a, in sa tur leh kawng lai tur ten leilung an endik tir a, an indaih lo a ni. Mizoram pum enkawl turin mi 48 chauh an awm a, district khawiah mah office an nei bawk si lova. Champhai District-ah lir a nghing chuan an koh chho a, chutiang dinhmunah chuan an ding a. Tin, kan thumthat chuan kan thumthatna pawisa kha a luangral mai mai lo ang; hna an thawk ang a, sum an rawn thawk chhuak ang tih hi ka ring tlat a ni. Check gate hmun hrang hranga an neih te pawh hi a duty tur an indaih mang lo. Chuvang chuan, hun chep tak karah hei hi uar takin ka sawi a ni e.

Thui tak sawi theih lova, hun a awm lova, sawi chak leh sawi ngai dang a tam hle mai a. Pu Deputy Speaker, ka duh tawk mai ang e. Ka lawm e.

**SPEAKER** : A lawmawm e. Tunah chuan Member zahawm tak Pu Lalrindika Ralte i lo sawm ang u.

**PU LALRINDIKA RALTE:** Pu Deputy Speaker, ka lawm e. Vawiinah hian kan demand-te sawi pahin ka ngaih pawimawh zawngte leh ka bial mamawhte han sawi tel pah ka duh a. Lawmthu sawina turte tam tak a awm a. Niminah khan budget kan pass a, sum leh pai sorkar-in mipuite tana a hman tur kan pass a. Heng department hrang hrangin kan hmalakna te pawh hi khang hmanga kan thawh tur kha a ni a. Mipui tana sum kan sorkarin kan pass hi mipui pawisa a nih avangin mimal pawisa a ni lova, party pawisa pawh a ni lova. Mipuite hnena vote dawn let nana hman tum anga sorkar kan kal thin te hi a tha loin ka hria a, chutiang ngaihtuahna chu nei lo hram ila a thain ka hria. Mipuite pawhin kan hriattur chu, heng hmasawna, infrastructure hi sports-ah a ni emaw, health-ah a ni emaw, heng zawng zawng hi kan pawisa, mipui pawisa a ni tih hi kan hriat a thain ka hria a.

Tin, Demand No. 48, ICT-ah hian ka bialah school 9 ngawt mai Smart Classroom siamna nuai 17 theuh kan hmu a, kan lawm khawp mai a. Tin, Sports hi kan bialah pawh hmalakna a awm a, kan lawm a. Tin, thil hrang hranga hmasawna Sports-ah te a awm a. Kan bial khu district hnufual kan nihna te kan chhawr tangkai kan tilo thei lova, hmasawna tam tak a rawn thleng a, kan lawm khawp mai a. Chung chu Sports leh ICT-a ka sawi theih ni sela.

Tin, Education leh Health hi a pawimawh khawpin ka hria a. Vawiin a kan demand ho hi Education, Health, Sports te anni a. Sports hi a rawn hmasa ber a, ‘a hnuhnung berah awm se a inhmeah awm mang e aw’ tih te ka rilruah a awm a.

Education hi a pawimawh khawp mai a. Mihring hi hriatna tello chuan taksa ringawt hian awmzia a nei lova. Chuvang chuan hriatna hi a pawimawh em em a. Education hi a pawimawh a, mihring hi a nihna tur ang taka hman theiha kan awm a, midang tana tangkaia kan awm theihna tur chuan, education hi a pawimawh a ni. Chuvang chuan, education hi kan ngaih pawimawh a thain ka hria a. Zirtirtu lakte hi a ngaih pawimawh awm hlein ka hria a, a chang chuan kan zirtirtu lakte hi tun aia tha zawk, duhthusamah chuan a eng level pawh hi ni se MPSC through a lak hi tha ka ti a. Chuvang chuan zirtirtu kan lak thinte pawh hi kan ennawn a tha em aw ka ti a.

Nichin khan kan sawi tawh a, hriatna a pawimawh a, kan zirlaibute pawh hi kan ennawn a tha em aw ka ti a. CBSE hi kan zawm ve a, an zirlaibute pawh hi kan zir a thain ka hria a. Competitive-te pawh kan sawi thin a, mihring hi hriatna a inthlah miao chuan tih dan dang a vang khawp. Chuvang chuan, hriatna hi kan inelna a ni, mihring hi a tak takah chuan. Chuvang chuan, kan zirlaibute hi a pawimawh a, kan compete puite nena kan hriatna a inchen loh chuan hmalakna dang a vang khawp. Chuvang chuan kan zirna hi ennawn a thain ka hria a.

Khawvelah hian zirna uar tak tak Finland, Japan-te ina zirna an kalpui dan hi an entawntlak in ka hria a. Finland-te hian foreign atangin zirtirtute an chah lut thin a, chutiang chuan nasa takin hma an la a. Tin, Japan hote khi zirna an ngaipawimawh a, an zirna kalpui dan khi Class-IV kan tih hnuai lampang hi exam an neih tir vak ngai lo a. An ngaih pawimawh ber chu *manners* hi a ni a, *manners* hi *knowledge* aia a hmasa tur a ni. Mihring hian manners a man loh chuan hriatna nei mahse mihring hmantlak tak tak a chherchhuak zo lo an ti a ni.

Chuvang chuan, mizote pawh hian tunhma kan *values* kha vawiinah hian kan kalsan ni hian a hriat a. Chuvang chuan CI-IV an nih hma hian naupangte thiam chin kha va teh sak tul kherah an ngai lo. Nungchang tha an inzirtir a, chutiang chuan hma an la a. Japan ram khi mi 16 in noble prize an la tawh a ni. Chuvang chuan ram changkang zawkte leh state dang Delhi-te pawh tun sorkar tharah kan hria a, education-ah hma an la nasa em em a. Kan entawn a, an tih dan zawng zawng hi kan ti ve thei kher lo ang a, a rem kher lo maithei a, sum leh pai involve thil te pawh a ni a. Amaherawhchu, kan tih theih ve chin hi a awmin a hriat a. Chuvang chuan, heng kawngah hian hma kan lak a tha hlein ka hria.

Tin, Sports-ah ka han let leh lawk duh a. Kan Sports Minister hian hma a la nasa a, kan hria a. In lo ngaihtuah chhonzawm ang a; hmangaihna tak tak tel lovin thil hi a pek theih a, “thil pek tel lovin hmangaihna a lan tir theih loh” tih hi a awm a, chu chu in lo ngaihtuah chhonzawm atan nise.

Engpawh nise, hmasawn hi kan mamawh ve a, eng kawngah pawh. Sum leh pai hman tamna ber hi Health-ah hian a ni em aw tih te ka ngaihtuah a. Keini pawh kan bialah mi harsa tak tak kan awm a, an khawngaihthlak hle thinin ka hria a. District hospital-te hi chu thum chak deuh hi a thain ka hria a. District hospital-ah te hian engkim, x-ray leh MRI ang te hi a awm thei chiah lo a nih pawhin, CT-scan hi district hospital tinah hi chuan awm thei se a thain ka hria. A chhan chu, sum leh pai tam tak kan seng a, Aizawl lo thlenna sumo fare ringawt pawh nei lote an ni. Chuvang chuan, district hospital-te hi kan thum chak a pawimawhin ka hria.

Miin an ngaih pawimawh chu Education leh Health hi a ni a, chuvang chuan In lianpui pui sak te, contract te, bamboo link road tih lai velah te hian kan kual rei ang reng riau hian a hriat a kan mamawh tak tak sut ve te pawh hi a hun tawh lawm ni tihte rilru-ah a awm a. Chuvang chuan, (**Dy. Speaker:** Minute 1 i la nei e.) Health, PHC-ah te hian doctor dah thap thei ila, kan miharsa tak takte, mirethei zawkte Aizawl pan ngai kher lovin. Tin, hriat miah loh natna te kan lo nei a, a hre tan chuan awlsam tea, “chumi khami chu ei rawh” han tiha dam maithei tam tak, amaherawhchu hriat si loh kha chuan hmunpui zawkte a pan loh theihloh a. Chungah chuan kan economy, kan sum leh pai hi kan hmang nasa a ni.

Chuvang chuan, kan sorkar hian health hi ngaihpawimawh ila, zirna hi i ngaihpawimawh bawh ila, tih hi ka sawi duh a. Tunah pawh kan sawi a, “IAS-ah... chuti khati” kan ti a, heng zawng zawngah hian kan zirna hi kan siam that si loh chuan; tin, mihring tumruhna hi sum leh pai tam tak hmanga va hmuhchhuah ringawt theih pawh a ni lem lo. Chuvang chuan, kan hmalak tum dan te pawh hi, sum leh pai chu a ngai teh meuh mai, amaherawhchu, ‘sum leh pai hi a ni ber lo’ tih hi kan hriatchian a pawimawhin ka hria. Chuvang chuan, Education te, Health te hi tun aia chak zawka ngaihpawimawha kan neiha, kan ram leh hnam tan tak tak ngaihtuahna seng chungah kan kal hi a va hun ve taw hem tih te ka rawn sawi ve duh a ni e. Ka lawm e.

**DEPUTY SPEAKER** : Tunah chuan member zahawm tak Dr. ZR. Thiamsanga i lo sawm ang u.

**DR. ZR. THIAM SANGA** : Pu Dy. Speaker, ka lawm e. Vawiinah hian kan Minister zahawm tak takte 3 Demand kan han sawi ho thei hi a lawmawm khawpin ka hria a. A hmasa berah chuan Demand No. 20, Education chungchang hi.

Tunhma lam thil sawi loh theih a ni lova. Sorkar hmasaah te khan sikul naupang awmlah avangin sikul eng emaw zat kha, ka hriat sual loh chuan khar deuh thaw te kha an niin ka hria a, a thenah zirtirtu indaih lo em em mai te kha anni a. Tunah erawh chuan *Education* hi kan CM hian a ngaipawimawh em em a. Tin, Education Minister chak tak kan nei a, a department-te nen theih tawp chhuahin vawiin niah hian sikul zirtirtu indaih lohna tam takte phukrukin a lo awm ta a. Headmaster tam tak nei loten kan lo nei thei ta a, Middle school-ah te, High school-ah te. MR teacher ni se, Hindi teacher ni se hmun tinah, tu bial mah thlei lem lovin khatiang khan Mizoram education system chhe tawh tak mai kha vawiin niah hian tun din a lo ni ta hi Pu Dy. Speaker, lawmna tham a ni, hei hi. Enga tingge sorkar thil tih thatte hi kan auchhuah pui duh loh a, a eng emaw zawng hlira kan ti te hi kan inngaihtuah chian chu a ngaiin ka hria a ni.

Covid-19 hun khirh tak karah Education-ah pawh hetiang hian hmasawna ropui tak kan han hmu chho mek zel a. Online in an exam a, result tha tak tak te kan han hmu chho zel te hi fak tlak a ni. Chuvang chuan, hetiang hun khirh tak karah pawh, hetiang a nih chuan hun zalen tak ni ta sela kan education system hi chu nasa takin hma a sawn ang tih kha a hmasain ka han sawi duh a ni. Pu Dy. Speaker, ka sawi tha bawk a ka sawi sual lova, minute 5 vel hun min pek belh ang chu maw.

Mahni bial hi a sawi loh theih lova, dik tak chuan, ka bialah chuan lawmthu sawi tur tam tak a awm a, ka sawi seng dawn lo. Chutiang khawp chuan ka bial Ngur khua ah hian Middle School NABARD nena tangkawp in sikul min sak sak a, tunah hian luah theih maiin an peih ta a, a lawmawm khawp mai a. Rabung-ah Private High School din an tum a, “E khai, engtin nge in din ang, in rethei si a” ka tih chuan, “Ngawi teh, kan bialah hian khua a tam si a, khawpuiah kan kal thei lo” an ti a. Tichuan, Education Minister kan han dawr ta a, a ni chuan Samagra hnuaiyah Rabung-ah Higher Secondary School min han dinpuite hi a ropui a ni. Champhai North Constituency ho hian kan theihngihl tawh dawn lo he ministry hi. Khatiang khawp khanin ka bial chung ringawtah pawh hian hmasawna tam tak a awm a, Zirtirtu MR teacher leh thildang High School headmaster tih te, thil dang dang kha chu sawi loh tun hnai ringawtah pawh ka bial chung khaw pariat-ah hian (ka sawi lang a, min lo thik em lo ang chu maw) NABARD nena tang kawpin Sikul pariat lai mai kha thumthat an ni a. Hman niah khan a repair a thalo tih thawm te kha a awm a, kei ka bial ami khi chu a thar ang deuh thlap a ni, Pu Deputy Speaker. Tunah hianrawn pharh mah ula, “a va mak ve” in ti mai ang; tiang khawpa sa tha hi a awmlo a ni. Department nen an tangho a, chutiang chuan keini chuan hmasawn nan kan hmang a ni; a lawmawm khawpin ka hria.

Chutih karah chuan bial tan sawi loh theih a ni si lova, thil dang sawi tur a tam si a, ka han sawi zawr zawr ang a.

Champhai-a School hlun leh langsar tak tak tuna kan House Leader ngei pawhin a lo zirchhuahna Govt. G.M. High School hi min thuam that sak a, a building pawh min thuam thatsak tawh a, kan lawm hle a. Mahse khi khi la tih changtlun zel ni se kan duh a, kan beisei bawh a. Tin, Champhai hi District thangduang tak a nih bakah mihring pawh kan lo thangduang chho zel a, chuvang chuan tuna kan Govt. G.M. Higher Secondary School hi kan leng tawh lo a ni. Zirlai an tam si a 800, 900 vel an awm a, a building khian a zo tawh lova, chuvang chuan khi khi upgrade ngei turin hmana Education Minister lo kal pawh khan, “kan tum dawn nia” tih kha chu kan hmuin ka hria a, kha kha min lo hriat sak se kan duh a. Chutihruah chuan hmun hrang hrang atanga lo kal an nih avangin a hostel ang chi, Residential School ang deuh type hi a min tih sak kan beisei a. Tin, lehlahmah keini khi Hnahlan nen block I, II ang deuha inthen kan nih avangin, Hnahlan-ah khian Higher Secondary School private kan nei ve a. Chu chu lumpsum a ni a, zirlai an tam khawp mai a. Hmanah khan Education Minister min rawn tlawh khan a building hi a hma khan NABARD hnuaiah eng emaw zat min sak tawh a, kan len loh avangin room extend leh hostel kan lo dil a, kha pawh kha min la hriatsak ka ring a, min tih sak ngei pawh ka duh a ni.

Tin, Champhai-ah khian zirna sang zawh college changtlung tak kan neih avangin zirlaite hian Civil Service (Competitive Examination/ UPSC/MPSC te pawh a ni ang chu) Coaching Centre kan mamawh ve khawp mai a. A thu phung chuan, “a building tur te, a hmun tur te lo zawng ula” tih kha kan hre tawh a, a building tur pawh kan hmu tawh a, khi khi khawngaih takin min rawn tihhlawhtlin sak ngei kan beisei a, kha kha nakinah pawh min rawn chhang se ka duh a ni.

Tin, Labour, Employment, Skill Development & Entrepreneurship Department hi nikum budget session-ah khan ka lo sawi tawh a. Champhai-ah Employment Officer min dah turin ka lo ngen tawh a. Tunah Employment Officer kan han nei takah khilai bial aiawh pawhin lawmthu ka sawi a ni. Tichuan, education-ah hian lawmthu tam tak sawi tur ka nei a bawh a, mahse thildangah kal a ngai si a, kha kha ka duh tawh mai ang a, a bakah pawh khian lawmthu sawi tur tam tak ka nei a ni.

Tichuan Demand No. 22, Sport & Youth Services leh Demand No. 43, Tourism leh Information & Communication Technology ITC chung chang hi han sawi leh lawk kan duh a.

Champhai khi tun hma atang tawha sport lamah pawh mi hmingtha chhuahna a ni thin a. Sport hi kan hriat angin Mizote India ram mai nilo, khawvel hmun dangah pawh kan hming chher ve theihna, kan hming lan theihna pawimawh tak a ni a. Tunah pawh hockey-ah te, boxing-ah te Mizo chu khawvel hriat kan ni tawh a ni. Chuvang chuan, hei hi kan sorkar pawhin a promote a, Minister chak tak rem hre tak mai kan han

nei te hi tunah chuan khawvel hriatin Mizoram hi kan awm ta a ni. Chutiang chuan kan bialah pawh khian hmanah khan SAI Centre hmun tur Hmunhmeltha-ah te hmun tha tak mai kan lo nei ve a, khang te pawh kha minrawn react se ka duh a. Min tihsak tur ang deuh te pawh khan thawm kan lo hre tawh a ni a, session hmasa lamah pawh kan lo sawi tawh a. Tichuan, Hnahlan hi football thiam tak tak, talent neitha tak tak awmna hmun a ni a, kan Minister zahawm tak pawh khan a rawn tlawh tawh a, sport complex hmun tha tak mai kan neiha hi min tih puitlin sak kan duh bawk a. A bakah khinglai khua te te Selam leh hmun dang dangah te pawh khian field han tih puitlin loh deuh Rabung, Vaikhawtlang, Khuangphah, Hmunhmeltha leh North Khawbung-ah te pawh a ni ang a, hmabak tam tak kan nei a, sum tam lutuk ngai lemlo pawhin minrawn en saka min tihpuitlin sak kan duh bawk a ni.

Tichuan, Mizoram States Council hnuaiyah kumin 2022-23 plan budget-ah han lang ve ila kan duh a, Champhai khi. Tunah hian New Champhai-ah Sport Complex tha deuh mai ruahmanna a awm mek a, khi khi min tihpuitlin sak chuan badminton te, tennis te, hockey te, athletics te, wrestling te, Judo leh taekwondo tih ang chite potential area kan nih avangin training theihna tur pawh min tihpuitlin sak kan duh a.

Tin, Zotlang-ah hian sorkar hmasa khan Stadium tha deuh mai min tihsak a, a lawmawm khawp mai a. Khilai khi a that em em rualin kan khamkhawp lo deuh a. A chhanchu Zotlang Stadium-ah hian metre 40 lane siam niin, a inner lane hi metre 40 a tlinglo tlat mai a, football field pawh standard field a tling lova, tuna kan stadium ami hi. A lawmawm rual rualin sorkar hmasain a tling lova min lo tihsak hi sum tam lutuk seng lovin min tihpuitlin sak la. Tichuan, tournament lian tham district level emaw, state level emaw kan nei pawhin hei hi kan hmang ve theiin ka ring a. Tin, Chhangphut field leh a gallery tih vel te, i rawn kala min lo tiam tawh kha chu i hre mai ang chu.

Tin, Health Department hi, he sorkar-a kan CM leh Health Minister te hian an ngaipawimawh a. Mizoram Healthcare System, sorkar hmasaa lo hlamchhiah te pawh hi tunnun chhoh niin, tun Covid-19 karah pawh kan CM leh kan Health Minister ten theihtawp an chhuahna azarah leh, Health Department staff ten hetiang khawpa nasa leh mahni nunna pawh thapa an beihna avangin tun dinhmun hi kan thleng a ni. Hei hi a lawmawm hle a ni.

Tin, oxygen leh ICU chungchangte pawh a ni zel a. Tun hmaa ZMC ICU-a khum 13 chauh awm thin kha khum 48 a awm tawh a, district tin deuhthawah ICU te kan nei chho a. Oxygen plant tun hma neilote pawhin kan nei chho tawh a, 80 litres/min nei thinte kha tunah chuan 500-1000 te a ni chho tawh a, ZMC 200 litres/min nei thin kha 2000 litres/min kan nei chho ta a ni. Chutiang khawp chuan hmasawna hi a kal chho a ni.

Tin, Primary Healthcare-ah hmasawna kan duh avangin Sub-centre te pawh Health & Wellness Centre-ah upgrade an han ni chho zel a, nakum maia upgrade zawh mai tur a ni te hi a lawmawm hle a ni. Chuvangin, he sorkar hi “Miretheite sorkar, hmasawna ngai pawimawh a ni” tih hi kan chian a ngai a ni. Hmasawna tam tak hi a kal mek a, a kal zel a ni.

Cancer chungchangah pawh tunlaia cancer hemna khawl tha ber leh tunlai ber, ‘Linear Accelerator’ leh ‘Brachi Therapy’ kan han nei chho te hi a ropui a ni. Mirethei tan hmun dang kal ngai tawh lo turin khum 500 awm Cancer Speciality Hospital tur ruahmanna kan han hei mek te hi a lawmawm a ni. Hetiang khawpa thawk tha sorkar hi kan fak ve te pawh hi a phu a ni lawm ni tih kha ka han sawi a ni e. Pu Deputy Speaker, ka lawm e.

**DEPUTY SPEAKER** : A lawm em a tin a ni. Tunge kan han sawm leh ang? Member zahawm tak Pu Zothantluanga i sawm ang u.

**PU ZOTHANTLUANGA** : Pu Deputy Speaker, ka lawm e. Minute 10 chhunga Demand pakua sawi chu a huphurhawm khawp mai. Demand No.22, Sports & Youth Services-ah hian ka han tan ang e.

Ka bialah khuan futsal hi thalai ten an atchilh nasa em em a, zan rei tak tak thlengin an khel a. A khawvel level anga future tha nih lam leh a hlawk zawng lam an ngaituah lova, mahse an atchilh miao si avangin kan Sports Minister hian min lo hriatsak se la. Futsal ground siam theihna tur hi hmun hrang hrangah potential kan nei a, kan bialah khuan infrastructure siamna tur hmun tam tak kan nei a ni tih kha ka sawi duh a.

Kan sorkar hmasaah khan kan bial khu ngaihthahin kan awm a. Vawiina kan sorkar erawh chuan *opposition bial* a ni emaw *ruling bial* a ni emaw pawh ni se, duhsak bik nei lovin a awm a, Hachhek bialah chuan keini aiin sports discipline lama hmasawna tam tak a lut a ni tih hi kan hmu a. Keini biala Government Complex hmunah te khuan phul lem ringawt phah lova contact sports siamna tur hmun tha kan neih te hi kan Sports Minister hian min lo hriatsak se tih hi ka sawi duh a.

Demand No. 48, ICT chungchangah hian kan bialah hian hmasawna hi a lo kal loh rei tawh em avangin kan school-ah te computer set 7 min pekna school eng emaw zat kan han nei ve ta hi a lawmawm ka ti a. School tla bal tawh ICT lama zirlaite mawmawhna sang si te kha min lo hriatsak se ka duh a. Exam Centre hi Ch. Chhunga High School-ah kan nei a, tunah hian zirlai 200 chuangin HSLC an exam a ni. Computer an exam dawn hunah chuan an indaihlo hle dawn a, an hawh khawm pawhin tih vak

ngaihna a awm dawn lova, hun a duh rei dawn a ni tih te kha min lo hriatsak se ka duh a ni.

Demand No. 20, School Education chungchanghian ka bial chhung Primary atanga High School thleng hian school zawng zawng khu hnuchhawn ram angin kan lo awm rei tawh a. School chung rangva te a chhe tawh em em a. Govt. Tanhril Primary School-I hi kumin hi a kum 100 tlinna a ni a, MLA fund atangin school chung kan chih mek a ni. Hmalakna tur tam tak a awm a, fur a lo thlen chuan school tam tak chu kan lut thei lo ang a. Hei hi kan Education Minister-in min hriatsak a, min hriatpui avangin tun financial year-ah ngei hian school chung eng emaw zat min khuh sak dawn niin ka hria a, lawmawm ka ti em em a ni.

Kan bial, Aizawl West-I hian Higher Secondary School kan la nei ngai lova, kan Education Minister chak takin Ch. Chhunga High School-ah Higher Secondary School min din sak dawn a ni tih kan hriat hian a bial mipuite kan lawm khawp mai. Science leh Commerce-ah kan tan dawn a ni. Academic year tharah bul tan turin kan inbuatsaih a ni tih hi kan bial mipui mai ni lovin Zoram mipuite hnenah kan lawmzia min lo hriatpui turin ka han sawi duh bawk a ni.

Demand No. 21, Higher & Technical Education-ah hian sawi tur ka nei bawk a. Khawpui chhungah college kan nei a. Hei, hi zirlaite tan education atmosphere a tha lo em em a ni tih kan hre vek a. Tin, khawpui chhung a nih avangin traffic pawh a ti jam thin bawk a ni. Govt. Aizawl West College khu Luangmual West, Handloom & Handicraft rama awm turin kan Chief Minister chak tak leh zahawm tak leh kan Education Minister ten ruahmanna min siamsak mek a ni tih te ka han sawi duh a ni.

Tun hma chuan zirna kawangah hian kan hnufum em em a, wawiinah chuan Mizoram Law College pawh min han develop sak a, building te sak belhin, Law College-a zirlai tam zawk an luh theihna turin hma min lak sak avang hian lawmthu sawi tur tam tak a awmin ka hria. Tun sorkar hi chu 'Look East' tih ringawt kha kan ni ta lovin ka hria a, 'Look West' pawh a lo tel ve a ni. Zirna tan tir atanga zirna sang ber Ph. D zirna thleng awm tura Aizawl West-I chhunga education hmalaknaah hian Aizawl West-I mipuite aiawhin lawmthu ka sawi a ni.

Demand No. 24, Health & Family Welfare chungchang hi sawi leh ka duh a. Health Clinic neih lohna kan la nei nual a, nimahsela, kan Minister zahawm tak Dr. Thangtea kan hrilh a, a niin min pek tur thu te min hrilh a, lawmawm ka ti a. Chutih rual chuan Chawlhmun-ah khuan Urban Health Centre kan nei a, a hmun a remlo khawp mai a. Sorkar hmasaa lo tih nimahsela, a hmun a awm chang chang a, a kalkawng a awm tha lo a, a hmun va thlenin motor *turn* na te a awm lova. Hei hi keini tan chuan



PHC tluka pawimawh a ni a, nau neih nan te, in entir nan te, bial mipui ten kan hman tangkai em em a ni. Chuvang chuan a building khu min upgrade sak te a ngai a ni. Tin, motor-a luh a, han chhuah lehna tur han siam remna tur hmun te kan mamawh em em a ni. Tin, mipuiin kan bawr nasa tih kan sawi tawh ang khan technician-ah hian kan indaihlo deuh a, chuvang chuan kan thawktu indahlohna chungchangah te pawh hian kan Minister ten min lo chhinchhiah sak sela.

Tin, Sairang-ah PHC kan nei a, a lawmawm em em a, X-Ray khawl changkang tak mai... (Pu Deputy Speaker, tawi te a ni tawh e) X-ray khawl changkang tak min pe a vawiin niah hian, nimahsela, a dahna tur leh a technician hi kan neilo tih hi ka sawi lang duh a. Kan Minister leh kan hotuten min lo chhinchhiah saka, pawisa tamtak a ngai tawh lo niin a lang a, a khawl ber a awm tawh chuan a thawktu leh a dahna hmun tura kha min buatsaih sak theih chuan nasa takin kan tangkaipui ang tih ka ring a ni.

Tin, Demand No. 40, Commerce & Industries-ah hian lawmthu sawina tur ka nei bawk a, Pu Dy. Speaker, kan CM-in Aizawl khawpui chhungah leivung kan chhuah nasa a, kan inhmun kan lai a, sorkar ram kan lai a, private ram kan lai a. Tin, bawlhhlawhte pawh kawng sirah kan paih mai mai a ni tih chu kan hre vek mai a. Sairang kawng te kan kal chuan paih lohna tur hmunah pawh mi ina an hmuhloh chuan lo paih mai leh lo ti bawlhhlawh leh mai thin an ni a. Chutih lai chuan IGC hmunah khuan kan CM, amah ngeiin rawn enin bawlhhlawhte, leivungte an paih mai mai lohna turin khulaiah leivung paihna tur buatsaih ila tiin IGC hmunah tunah khuan buatsaih tur a ni a. Hengte hian kan khawpui thianghlimna te, kan khawpuia lei laih chungchanga kan harsatnate a phuhruk dawn a ni tih kan hria a. Chuvangchuan, kan CM ina a ngaih pawimawhna leh kan Industry Minister ngei pawh ina a ngaih pawimawh te avangin Aizawl West-I te hian hma kan sawn zel a ni tih ka sawi duh a ni.

He kan Minister pathumte demand hi pass turin ka rawn support a ni e. Ka lawm e.

**DEPUTY SPEAKER** : Tunge kan han sawm leh ang? Pu C. Lalmuanpuia, Member zahawm tak ilo sawm ang u.

**PU C. LALMUANPUIA** : Pu Dy. Speaker, ka lawm e. Hei, vawiinah hian kan Minister zahawm tak tak pathumte demand kan han sawi ho thei hi a lawmawm ka ti takzet a. Amaherawhchu, an demand te hi ka luhchilh thuk hman dawn lova, a tlangpui kan han sawi dawn a ni.

A hmasa berah chuan Demand No. 20, School Education atang hian Pu Dy. Speaker, ka han tan ve phawt mai ang a.

Hei, kan ram hi Covid-19 leh a behbawmin namen lovin min tibuai a, chutih karah sikul naupang Board exam mekte tun covid-in min tihbuai chhung khan 2020 te, 2021-ah te pawh India ram State zingah a pangngaia exam kaihruai thei awmchhun kan ni te hi a lawmawm kan ti a, a chhinchhiah tlak hlein ka hria a. A changtu Minister leh department te inpekna a ropui ka ti a, Zoram mipui pawh kan lawm viauin ka hria a. A chhan chu, kan tu leh fate an hmalam lo kal zel tur atana an inbuatsaihna pawimawh tak hi thuanawp lova he hrileng karah pawh kan han kal thei hi Pu Dy. Speaker, a lawmawm ka ti khawp mai.

A pahnih-naah chuan, inrelbawlina (administration) lamah pawh an ti tha hlein ka hria a, member zahawm tak takte pawh khan an rawn sawi tawh a. Chung zinga ka ngaih pawimawh deuh deuh - Headmaster post ruak inhnawhkhawm seniority-a kai tur tamtak awm te, Primary leh Middle School-a awm te, tunah hian headmaster post 500 chuang ruahmanna siama promotion an han ni a, an awmna tur hmun an han pan sap sap te ka han hmu a, school tam tak, hei kan han zinkual a, kan han kal velna Zokhaw lamah pawh Headmaster neilo, khaitu neilo kan hmu nual mai a ni. Chungte chuan tunah a khaitu mumal tak neia zirna a han kal tur te hi Pu Dy. Speaker, a lawmawm ka ti khawp mai. Hei hian hmasawna thui tak, rahbi thar min kaitir ngei dawnin ka hria a ni.

Tin, hei zirna kan ngai pawimawh em em a, Kan CM Pu Zoramthanga, kan House leader, head ministry kaihruaina hian he sorkar kal tirh phat atangin zirtirtu indaihlohna nasa tak mai phuhruk theihna remchang awm ang angah te, he hrileng karah pawh zirtirtu daihlohna hmun tam taka mite lak an ni te, Hindi zirtirtu te thlengin kan han la thei te hi a lawmawm khawp mai a, hma kan sawn chho zel a, a lawmawm ka ti takzet a ni. Han sawi hmaih miah loh tur, kan bial chhung te pawh han sawi lan ve ka duh a, Pu Dy. Speaker. Ka bial chhung Eden thar-ah khuan High School kan la nei lova, BSUP kan nei a, vanduaithlak takin Durtlang BSUP kha lei min leh lei che avangin luah tlakin a awm ta lova, Eden thar-a BSUP kan neihah te an rawn insuan thla a, chutah chuan mamawhna a lo sang ta em em a. Kan Minister zahawm tak hnenah High School kan mamawhna te kan han thlen a, High School min han din sak a, ruahmanna a han kal a, tunah hian school kan han tan thei te hi thinlung takin kan bial aiawhin lawmthu ka sawi a ni. Tin, zirtirtu min han siamrem sak te hi a lawmawm ka ti tak zet zet a ni.

Thil pakhat han ngen duh ka la neih chu, a building te khu kan han sa tawng tawng a ni a, hun harsa leh khirh karah duhthusam a la tling lova, Middle School nen kan han zawm a ni a, khung te pawh khu hmaah kan nei a, Eden thar-ah khuan, kan Minister-in min lo chhinchhiah sak theih chuan khungah te pawh khuan remchangah, High School khu a hranin awm thei se tih kha ka han dil duh bawka a ni.

Tin, hei, Zokhaw lamah kan han zin kual a lawmawm ka tih em em chu, NABARD hmanga School leh engkim mai ruahmanna felfai tak hnuai a school building chhe tawh leh hmantlak tawh loh kan tih ang chi te pawh thuam that an ni hi a lawmawm ka ti khawp mai a, lawmthu ka sawi duh a. Chutih rual chuan khawpui lam hi kan chil a put ve deuh a, khawpui bial tute hi NABARD hnuai a emaw remchang eng emawah hian kan school te pawh hi sak that tur kan nei ve nual tawh a ni. Hengte pawh hi remchang min zawn sak thei se ka ti khawp mai.

Demand No.18, Printing & Stationery hi department langsar lutuk si loah chuan a pawimawh khawp mai a. Vawiin nia Assembly material min chhut saktu leh engkim maiah hah takin zantai rek thleng thlenga min buaipuitu department te an ni a. He department-ah hian staff an indaihlo riauin ka hria a, kan Minister zahawm tak khan min chhinchhiah sak se ka ti a ni.

Demand No. 28-ah hian thil chhinchhiah tlak tak tak mai ka hmu a. Covid package te an han siam a, hri len harsat zual lai te khan member-te tan welfare benefit te an han siam a, khangah te khan nuai 3 an han pe thei te kha a ropui ka tiin a lawmawm ka ti khawp mai. Tin, free ration an han dawng thei te kha he department hi a pawimawh ka tiin an tilawmawm ka ti khawp mai. Tin, skill development lamah pawh hian an ti tha khawp mai a, India level-a a ti tha an ni te kha an chhuanawm hlein ka hria a ni. Tin, World .... Competition neih turah pawh hian member pahnih an kal dawnin ka hria a, khawvel level-ah pawh an thawk tha a, an chungah pawh lawmthu ka sawi a ni.

Demand No.22, Sports & Youth Department-ah hian hmasawmna ruhrel kan hmu nasa em em mai a. Mizoram dung leh vang han thlir hian hmasawmna kan hmu a, State Games pawh kha a zawngchhangthlak khawp mai a, khang te kha chhuzawm leh theih ni sela a thain ka hria a. Ka bial chhungah pawh a changtu Minister hian min tuipui khawp mai a, Edenthar ah bawkhuan field kan mamawh a, ka va request a, a tir lamah khan official pawh tir lovin, 'thil a la ni tak tak si lova' tiin midang pawh pun lovin, bike-in a hmunhma te kan zu teh dun a, hmate min lakpui a. Tunah hian Smart City project hnuai a tender a ni ta hi a lawmawm ka ti a, a bul min tanpuitu kan Sports Minsiter hnenah pawh lawmthu ka sawi a ni.

Tin, Tourism-ah hian kal i la. Covid la cham bang reng karah hian an hnathawh hi a lawmawm ka ti a, harsatna tam tak karah lodge zawng zawng Covid Care Center atan an han hmang leh department hahzia te ka hmu a, a ropui ka ti khawp mai.

Tin, ICT lamah pawh hmasawmna kan hmu a, zokhuaah pawh han zin ila tunhma signal kan neih that lohna hmuna signal tha tak tak kan nei ta te hi a lawmawm hlein ka hria.

Tin, Health Department hmalaknate a ropui ka ti a, hrileng karah hmasawna ropui tak tak kan hmu a, a lawmawm ka ti khawp mai. ZMC lamah pawh oxygen plan 1000 lpm kan han nei chho te, khum 150 atanga 268 kan hna nei chho te a ropui ka ti a. (Pu Deputy Speaker, han chul mam nan minute khat lek kan dil belh ang che.)

Tin, cancer hospital tan cheng vaibelchhe 500 ruahmanna a han awm te hi a lawmawm ka ti khawp mai. Mizoram hmun hrang hrangah cancer hian min tibuai nasa em em mai a, kan upa lam phe chu an natna han en ila ‘cancer’ tih deuh vek a ni mai a, hetiang ruahmanna awm hi a lawmawm ka ti khawp mai. Tin, Covid hri len lai khan he department hi an hah bik a ni, midang pawh an hah tho a, a khaitu an ni a, khang zawng zawngah khan kan Minsiter hian chak takin a khai a ni.

Ka sawi leh duh chu Pu Deputy Speaker, Covid an kai a, department-a thawkte kan han phone a, “symptom an nei em” an ti a, an neih leh neih loh pawh kan hre lova, “an nei lo” kan han ti thuai thuai a, Covid Care Center-ah dah tur te pawh khan he department hi kan han tibuai kha a ni a. Kan bialte tan theihtawp min lo chhuahpui a, chung zawng zawngah chuan lawmthu ka sawi a.

Vawiina kan Minsiter zahawm tak tak pathumte demand hi pass pui ngei turin karawn thlawp a ni e. Ka lawm e.

**DEPUTY SPEAKER** : Awle, tunah chuan Dr. K. Pachhunga i lo sawm ang.

**DR. K. PACHHUNGA** : Pu Deputy Speaker, ka lawm e. Vawiina kan demand sawi No. 22, 43, 48, 18, 20, 28, 24 leh 40 te hi a hranpain ka sawi lo ang a, ti hian ka sawi tawp ang a.

A hmasain Health-ah hian, kan buaizia leh harsatzia kan hre vek ang a chutih lai chuan a thawktute Health Department a kan hotute bakah doctor leh nurse-te inpekna hi a ropui tak zetin ka hria a, biang biak pawh an nuam a, mizo kristianna leh kan culture te arawn chawinung viauin ka hria a, a lawmawm hle a ni. Tin, Medical-ah hmasawna bung thar kan kai a, natna zawnhhuahna equipment-ah te, tin, oxygen-ah te tun hma chuan kan hria a, Silchar-ah cylinder-in kan phur a, tunah chuan district tinah leh hmun pawimawhah te Vellore-a an hman ang tiat kan han nei te hi a ropui tak zet a ni. Chutianganin kan bialah pawh UPHC Hrangchalkawn-ah kan hawng thei a, ka lawm hle mai. Tawipui-ah kan hria a, chhimlam National Highway te a ni a. Hetah hian PHC kan nei a, a building pawh sak kan tum a, tunah kan thiat vel mek a ni. Lunglei South hi endawng bial deuh a lo ni thin a, Lunglei khawpui chhunga veng parukte pawh kan hnufual ang reng a, mamawh kan ngah a ni. ‘Health & Wellness’ kan tih te pawh hmun hnihah min pe a, clinic te pawh min pe zel dawn niin kan hria a ni. Kan sub-Center

building te hi sawi pawh zahthlak khawpin a hluiin a chhe tawh a, theihtawpin hma chu kan la naa, kan sorkar hnu he hun thimah pawh hian hna kan thawk a, hmuhnawm kan ti a, kan lawm takzet a ni.

Tin, Hrangchalkawn-ah Polytechnic hi mamawh an ngah riau mai a, department hian a hmunah min ensak ve sela, thawm that ngaite min thawm that sela tih kha ka sawi duh a. Tin, Higher & Technical kan hria a, Lunglei Govt. High School chhuak ka ni a, science laboratory-ah Lab Assistant te kan nei lova, hna hi lak a har khawp a ni ang, eng emaw tia ngaihtuah dan awm thei se kan ti khawp mai a.

Tin, SEDP atangin sum te kan nei thei a nih chuan thingtlang chengkerh bikah te clinic pawh hawng ve ta ila kan tangkaipui khawpin ka ring a, sawi tur tam tak a awm a. MZU southern campus pawh MZU Vice Chancellor leh Registrar, Pu Nundanga te an fakawm a, Lunglei tan chauh a ni lova, North East student-te ta tur a ni a, kan neih ngei pawh ka ring a ni.

Tin, Trade & Commerce-ah hian Tlabung-ah hma tharte kan han hmu a, a lawmawm kan ti a. Industries-ah pawh kan sawi tam em em, mau kan ngah a, agarbati sticks kan han siam tan te hi a lawmawm ka ti a. State khat ve reng ruang ina production leh thawmchhuah kan han neilo ti mai ang, (kan thil siamchhuah eng emaw zat chu awm mahse) kan ropui vak lo a, kan raw material ngah ber pawh kan manage hlei thei lo a, hma kan han la te khu a lawmawm ka ti a.

Tin, Sports-ah kan hria a, kan Minister leh kan CM-te hmalaknain infrastructure tha tak tak kan han nei te hi a lawmawm a. Tunlaia kan thalaiten engkim an hmu a, technology avangin London-a inkhelh dan te, Europe-a an inkhelh dan te kan hre vek a, chutihlain kan tla bal angreng a. Chuvang chuan kan thalaite mamawh pawh la pe zo lo mahse, kan Minister-in theihtawp a chhuah a, kan lawm tak zet a. Ka bialah pawh *Leitlangpui Hockey Field* kan nei dawn a, kan tan thuai theih pawh kan ring a, a lung pawh kan phun tawh a, chutiang chuan hmasawmna tur tam tak a awm a. Tin, thalaiin futsal te kan mamawh a, mahse a hmun kan lo nei tha lova, ngaihtuahna tharte hi nei thei ila chuan, standard size lo deuh te pawh hian fund awm thei se kan duh hle mai a. Standard size hi a lo lian hle mai a, space kan nei lova, kan duh ang pawh kan ti thei lo niin ka hria a. Tin, thingtlang khuaa tam zawkin ka hria a, Mizoram-ah field kan nei ve thlaih thliah a, volleyball te, a sum tlem zawk State fund atangin emaw, SEDP atangin emaw tih ve dan te hi awm se la, field up-gradation tih te, nuai 20/30 te te pawh nise kan hlawkpui ka ring khawp mai tih kha ka han sawi duh a.

Tin, Tourism-ah hian kan hriat angin, kan ram chu a tha kan ti a, Covid avangin an lo lut hleithe lo chungin eng emaw zat chu intihhmuh pawh a tha a, a Mizote pawh

hi kal kual tam chu a tha khawpin kan ring, family ang te pawhin. Tin, kan Minister khan min react se ka duha chu, Samthang - Zopuiphul project hi tender a ni em, tih leh, tender a nih chuan a amount engzah nge, a hna in thawk zo tawh em tih te kha a wind up hunah min react sak se ka duh hle mai a.

In lo chhinchhiah em ka hre lova, open gym hi, kan Minister nen hian Delhi Nehru Park-ah zingah exercise kan la a, kan it ve lutuk a, Dengthuama Hall kawtah kan nei a, tunah MINECO-ah kan lo nei leh ta te hi kan lawm em em a. Thalai, puitling, tute pawhin kan lawmpui tak zet a ni tih te. Tin, State Games kha a boruakin a zir lova, han intlawh khawm te a rem lova. Nimahsela, hun tha a nih chuan neih leh ngei pawh a tha a, a hlu tak zet a.

Education-ah ka han lut leh ang a. Kan bial hi kan sorkar tirth khan kan kan fang ngun a. Thingtlang khaw 37 awmna bial ka ni a, kan school building-te a chhe lutuk a, “thlahrang awmna ang tluk a ni” tiin kan sawi hial a, naupang tan school kal chakna tur a awm lo reng reng a. Tin, education a fuh loh avangin kan society-ah a rawn reflect a ni tih pawh hi kan chhut hle a ngai a. Teacher chu teacher angin awm se la, kan Minister-in theitawp a chhuah a hunkhirh karah SEDP teacher min han pe a. Chutih rual chuan hrehawm em em chu, MLA-tena kan hun khawhralna tam ber chu zirtirtu transfer turin Minister-ah kan ngen reng mai a, thingtlang atanga ziritirtu chhuah vek kan tum hi a paw ka ti a. Ka bial Mamte-ah ngei pawh High School private MREGS-te nen tangkawpin kan nei ve a, kan harsatpui em em a, kan Minister hnenah leh Delhi-ah te dilin RMSA High School kan nei a. Tin, Thingfal khua, thingtlang khaw lian ve tak, mi 1100 awmnaah +2 an nei lo a, a chhehvelah a awm baw si lova, an awtin an lo buaipuina pawh a rei ve tawh a, chungte pawh chu wawinah kan sorkar, kan Minister-te hmalaknain RMSA High School kan nei a, zirtirtu recruitment kan ti mek a, kan lawm tak zet a, he sorkar chungah hian kan bial kan lawm a ni. Tin, school building eng emaw zat kan repair tawh a, NABARD atang pawhin kan repair a, kan lawm a, kan hna pawh Pathian zarah a thain ka hria a, a khua mipuite pawh an lawm a, sikul naupangte pawh school chung pawp lo, school nuam pangngaiha a thente chu an lut ve ang a. Mahse, a tla bal hrim hrim a, 50% pawh kan la ti lo deuh a ni. Tute emaw sorkar laiin, kan sawi ve duh hrim hrim a, Chawngte tlangdung khu sorkar thinte kum 50 deuh thaw an sorkar a, zu en ula, school zawng zawng khu a tla bal nasa lutuk a. Chawngte ‘L’ Middle School-te phe chu a chung pawh a nei tha bar tawh lova. **(Dy. Speaker:** Minute khat i la nei e.) Chutiingin Upper Lungrang Primary School pawh 1972-a din tawh kha hmanni ka zuk tlawh chu a lo tawih nasa a ni; school naupang an la kal ve lehngal a, hei hi chu a dik lo a ni. Khami te sorkar kha chu ka bial khulai tlangdunga mite chuan an awt tawh lo khawp mai tih kha ka han sawi ve duh hrim hrim a. Kan sorkar chungah hian an lawm tak zet a, education building-ah te leh teacher-ah te improvement nasa tak

kan nei a, kan CM leh kan Minister chungah pawh bial angin lawmthu ka sawi duh hrim hrim a ni.

Printing & Stationery-ah hian, ka bialah office pakhat a awm a, a tla bal angreng a, ruah a sur phei chuan tuite a lut thei a, hei hi chu min ensak ula ka duh tak zet a. (**Dy. Speaker:** I hun a tawp a..) Nia, ka zo deuh thuak a ni, ka lawm tak zet e.

**DEPUTY SPEAKER** : Tunah chuan Member zahawm tak Dr. F. Lalnunmawia i lo sawm ang u.

**DR. F. LALNUNMAWIA:** Pu Deputy Speaker, ka lawm e. Kan Minister zahawm tak pathumte demand sawihona hun tha tak mai kan nei thei hi a lawmawm hlein ka hria a. A hmasain ka tan nan, a hming inziak hmasa ber kan hon. Minister, Pu Robert Romawia Royte chan atang hian kan tan ang a.

Sports Department-ah hian budget kan hmuh angin a tam viau lo na a, hun kal tawha kan hmuh angin nasa takin hmalak a ni a, kan budget piah lam central scheme-te atangin thil tam tak thawh a ni a, a lawmawm hlein ka hria a. Ka bial Muallungthu-ah football leh hockey playground tha tak siam mek a ni a, Aizawl chhehvela phul lem phah a hmasa ber tur leh a awm chhun football leh hockey ground tunah hian thawh mek a ni a, a lawmawm hlein ka hria a. Tin, Under-13 Football Academy pahnih, pathum min pe dawn bawk niin kan hria a, lawmthu ka sawi a. Tin, Pu Deputy Speaker, Falkawn saw an field neih chhun ZMC tan an pek avangin kum tam tak field/playground nei lovin an awm tawh a, vantlang ram an neih chhuah sawn kan theih tawpa tang tlangin, MLA fund-te nen tunah sawn field puitling tling lo deuhin kan lai a, tihpuitlin kan duh khawp mai a. A chhan chu kan Sports Minister leh Health Minister zahawm takte hian min lo hriat sak se ka duh chu, Falkawn-ah sawn a khawchhung mite bakah ZMC-a thawk doctor zirlai leh staff-te sawn infiamna hmun an mamawh em em a, saw field saw min tihpuitlin sak theih chuan kan lawm em em ang tih kha ka han tarlang duh a ni.

Tourism Demand No. 43-ah hian kan Minister zahawm tak leh department hotute'n eng emaw zah hma min lak sak a. Ka bial chhung Samtlang rama Thlaveng Tlang saw tourist-te tlawh theih turin min chei sak an tum niin kan hria a, kan lawm a. A piah lawkah 'Lalsavunga Park' a awm a, Aizawl khawpui leh a chhehvel thalaiten an pan ber a ni a, mi an tawt thei em em a, a zauhna tur a remchang thei dawn a, chu lai chu hma min lak sak chhoh zel kan beisei a ni.

Tin, ICT hi department pawimawh tak a ni a. Covid-19 pandemic chhungin a pawimawh zia kan hmu a, online hmanga hnathawh leh meeting neihte leh chi hrang

hrang kan hmu a ni. Tam tak ka sawi hman lova, department pawimawh tak a lo ni zel ang tih kan beisei a ni.

Tin, kan Minister zahawm tak Pu Lalchhandama Ralte chan Demand No. 20, School Education hi ka lo tarlang leh ang a. Zirtirtu indaihlohna avanga kan bial chhung harsatna hrang hrang kan thlente min sut kian sak a, tunah chuan zirtirtu indaihloh vanga harsatna lutuk kan nei ta lova. Chutih rual chuan, pension leh promotion te avangin indaihlohna hi a awm leh thin a, chungte pawh chu min enpui chhoh zel ka beisei a. A bik takin Sateek High School-ah sawn mathematics leh science teacher headmaster-a an promote avangin mathematics leh science teacher kan nei ta lova. Chu chu kan Minister zahawm takin min lo hriatsak se a lawmawm hle ang.

Tin, Sialsuk Higher Secondary School-ah sawn khawtlangin zirtirtu an ruai thin a, amaherawhchu kan Minister zahawm tak hmalaknain lecturer panga min pe a, a lawmawm khawp mai a, khawtlang phurrit min chhawk sak a. Tin, Higher Socondary School building thar sa turin hma min lak sak mek bawk a, kan lawm em em a ni. Tunah hian School building chhe zual min repair sak tawh bakah a tul zual panga, paruk vel kan la nei a, hengte pawh hi min tih sak leh ngei kan beisei a ni.

Tin, SSA teacher hi Mizoram-ah tam tak an awm a. Hengho hi kum tam tak a nghet loa lo thawk tawh anni a, tlema dinhmun tha zawka han dah ve hi a tul hlein ka hria a. Kan sorkar-in a tul ang zelin kan SSA teacher-te pawh hi a ngaihsak ang tih ka ring a, ka beisei a ni.

Tin, Demand No. 28, LESDE hi department pawimawh, thalai hna neilote kaihruaia mahnia ei zawng thei tura kawng kawhhuhtu department a ni a. Tin, SEDP hnuuaia Youth Development & Entrepreneurship lama hma kan lak tumna nen pawh hian he department hi a inzul hlein ka hria a. Chuvangin, thalai eizawna neilote dawmkanna kawngah hma nasa zawka an lak ka beisei a ni.

Tin, Minister zahawm tak Dr. R. Lalthangliana chan Demand No. 21, Higher & Technical Education hi ka lo sawi leh thuak ang a. He department bik hi zirna sang, College leh University zirlaite enkawltu a ni a, zirna lamah hian theihtawpin hma an la thin a. Pu Dy. Speaker, tunah hianin India Sorkar-in National Education Policy, 2020-ah a rawn duang chhuak a, hemi hmang hian kalphung thar pawh zawh chho turin kan inbuatsaih mek a ni a. Mizoram University pawh hian National Education Policy (NEP) guidelines te a duang a, hemi kawngah hian State sorkar-a Higher & Technical Education nen hian tanrual a tul hle dawnin a hriat a. Zirna kalphung thar leh subject tharte pawh introduce tum a ni a. Entirnan, College-ah vocational studies (thiam thil), thalai lehkhathiam ten sorkar hna kher lo hna an hmuh theihna tur, Agriculture-ah te a



kaihhnawih Horticulture leh Industries lamah te leh kawng hrang hranga training an neih theihna tur vocational studies leh value based course kan tih te, a taka an practice-na tur field projects tihte leh a hrang hrang introduce tum a ni a, Higher & Technical Education-in helamah hian nasa takin hma a lak a ngai dawn a. MZU a kan hotute nen pawh thawhho that a ngai dawn hlein ka hria a. He department hian nasa taka hma a laka, nasa taka hma min sawnpui pawh kan beisei a ni.

Tin, Demand No. 24, Health & Family Welfare Department budget hi eng emaw zatin a pung a, thil lawmawm tak niin ka hria. A bikin Mizo ten kan mamawh em em Super-Speciality Cancer Hospital ken nei thei tur hi a lawmawm ka ti a. Tin, District Hospital hrang hrang tihchangtlun mekte han hmuh hian a lawmawmin ka hre bawk a. Mizoram Health Care changtlung zawk kan mamawh hle-in ka hria a, Pu Dy. Speaker, he mi lamah hian kan sorkar-in a tlin tawk leh a phak tawk ang zelin healthcare lam pawh hi tilian zelin a tih changtlun zel ka beisei a ni.

Tin, ka bialah health clinic neilo pathum kan nei a, Saikhamakawn, Chamring leh Lungsei-te; heng hmunah hian Health Clinic min pek thuai kan beisei a ni. Chutih rual chuan hmun thenkhatah health worker awm lohna te kan la nei a, hengah te pawh hian min dah sak thuai kan beisei a ni. Health hnuaiah hian ka bial chhungah Zoram Medical College a awm a. Hei hi tihchangtlun chhoh mek zel a ni a. Hei hi mipui ten kan chhawr em em a, pandemic chhungin Covid Hospital-ah hman a ni a. Chutih chhung chuanin damlo mamawh tam tak ten an pan thei lo va, chu mi lo dawngsawng tur chuanin Aizawl Civil Hospital tihchangtlun a ni hi lawmawm ka ti a. Aizawl Civil Hospital-ah ICU khum te tihpun a ni a, nasa taka tihchangtlun niin ka hria a, a lawmawm hlein ka hria a ni.

Tin, hetih rual hian Aibawk-ah sawn Rural Health Research Centre din tum a ni a. He mi kawngah hian Sorkar hmalakna a lawmawm hle-in ka hria a, tun atanga reilote-ah ZMC extension ang deuh Aibawk-ah sawn a awm kan beisei a ni.

A tawp nan chuan Demand No. 40-na Commerce & Industries Department hian nasa taka hmalak a tum a, hmachhawp tam tak a awmin ka hria a. Ka bial bikah Industries kaihhnawih puantaha eizawng mi eng emaw zat an awm a, Sailam bikah sawn puantah a eizawng chhungkaw 100 vel an awm a ni. Sawng te pawh saw an eizawna tichangtlung turin Commerce & Industries Department hian puiah an tum niin ka hria a, kan lawm em em a ni tih ka rawn sawi duh a ni.

Tin, ka bial chhungah Industries lampang kaihhnawih mistiri - thing mistiri, lung mistiri leh thir chhera eizawng te an awm a. Heng angte tan hian tanpuina engnge awm ve thei ang aw tih ka rilru-ah a awm a. A tul anga min ngaihtuah sak theih chuan ka

lawm hle ang a. Puanthua eizawng te pawh an awm a, theih ang tawkin Commerce & Industries Department hian min ngaihtuah sak ka beisei a ni.

Tichuan, kan Minister zahawm tak tak pathum - Pu Robert Romawia Royte, Pu Lalchhandama Ralte leh Dr. R. Lalthangliana Demand te vawiin-ah hian lawm takin ka support a, pass pui ngei ka rawn rawt a ni e. Ka lawm e.

**SPEAKER** : Member zahawm tak Pu Lalrintluanga Sailo lo sawm ila, chu mi zawhah Pu Lalchhuanthanga.

**PU LALRINTLUANGA SAILO:** Pu Speaker, ka lawm e. Vawiin-ah Minister pathum Demand kan han sawiho a, a ngaihnawm hle a. Keiin bul ka rawn tan duhna chu, Demand No. 40, Commerce & Industries hi a ni a. A chhan chu MNF leh India Inremna thuthlung la tihpuitlinloh tipuitling tura hma chak taka la mektu department a ni tih ka hre Chiang a. Chuvang chuan, kan ram hma lam hun thlirin hei hi kan kal zelna turah thil pawimawh tak a ni tih kan hria a, a lawmawm hlein ka hria a. A thawktute he border trade-a hmalaknaa an thahnemngaih zia te, an phur zia te a taka ka hmuh hian a lawmawm ka ti a. Theihtawpa hma la chhonzawm zel turin vawiinah hian ka rawn ngen duh bawka ni a.

Tin, chutih rual chuan Industries bikah hian kan ramah thil tam tak tih a ni tawh thin a. Vawiinah hian hmalakna thar em em han sawichhuah tur awm chiah lo mahsela, a bik takin kan chenna Luangmual-ah khuan Industrial Growth Centre Pu Zoramthanga kaihhruai Sorkar hmasa khan ram zau tak mai, pass te pawh tifelin hmun a nei a. Khu khu kan industry lama tuite tan hmun zau tak a awm a. Khutah khuan ram allotment kan pekna chungchangah erawh chuan, Pu Speaker, tlem a sorkar hi kan thanharh deuh a tha khawpin ka hria a, chu chu ka han sawi ri duh a.

Commerce section-ah hian kuthnathawktute ina an hnathawh rahte an tihralna tur atana market an buatsaihnaah tan an la nasa a ni tih kan hria a, lawmthu ka sawi a. Vawiinah hian hmalak mekna leh hmalak leh zelna turte pawh a awm a ni tih a takin kan hmu a, lawmawm hlein ka hria a ni tih ka tarlang duh a.

A dawt leh Geology & Mining bikah hian tawi te sawi ka duh a. He department hi sanctioned post pawh luah kim loa mi tlem te ina thahnemngai taka tax-te collect a, kum khata tax an hmuh tur sorkar-in a beisei te khum zak khawpa hna thawk thin an ni tih ka hria a. Chutih rual chuan, lirnging a ni emaw, leimin a ni emaw, tuilian tuar kan awm a ni emaw khatiang ang chi ah khan anni hi phungbawma kan sawm thinte an ni a, a lang lo lamah an tangkai hle a ni tih ka tarlang duh a. Hei hi sawi a hlawh lo a, an

hmalakna hi a ropui ka ti a. Indaihlo chungah kan ram tana thahnem an ngaihna te fak tlak a ni tih ka tarlang duh a.

Demand No. 18, Printing & Stationery-ah hian nichina Member zahawmtak Pu C. Lalmuanpuia'n a sawi ang khan, thawktute indaihlohna karah, Assembly Session kan neih lai pheih chuan ka office hnuai a awm an ni a, ka hria a, tlaivar thakin hna an thawk a ni. Zaninah pawh chutiang tho chuan an thawk leh ang. Sanctioned post pawh an thut kim lo a, chutih rual chuan, an han pension a muster roll pawh an indaih tawh lo a ni tih hi kan hriat a tha a. Sorkar thu pawimawh tak tak, Govt. Gazette ang chite chhuin hah takin an thawk a, anni hi *a kila lung tangkai tak* an ni tih hi kan sawrkar hian kan hriat nawn fo a tha ka ti khawp mai tih ka sawi duh a.

A dawt lehah chuan Demand No. 22, a bik takin Sports & Youth Services Department hi vawiinah hian hmalatute chawimawi tlak ka ti a. He department ina kan ram tana asset a siam zozai leh sports personnel-te tana a hnathawhte a ropui ka ti a. Nichina Member zahawmtak takte'na an sawi ang khan, vawiinah hian Pu Laldenga'n MNF Movement a siam a, khawvelin min hriatna piah lamah, khawvelina Mizo hnamte min hriatna chu he Sports Department hi a ni tih ka tarlang duh a ni. A bik takin boxing-ah te, hockey-ah te, Mt. Everest lawnhhuah chungchangah te a hmei a pa in, khatiang khan record tha tak kan nei a. An budget-te beitham deuh mahsela, kan bula thu hian a ngaihna a hre hle a ni tih ka tarlang duh a. Thenkhatte'n a contract chungchang te an rawn sawi thin a, sorkar-na la siam ngailote an ni a, contract han chhan dan kalphung te pawh an hre lo deuh a ni ang tih ka ring a.

Pu Speaker, sawrkar kal tawh zawng zawngah khan MSDP a awm a, a hming kha vawiinah PMJVK-a thlak a ni mai a. Khang hunlai khan heng sports facilities hrang hrangte leh assets siamna tur atana central sorkar-ina kha fund kha a buatsaih reng a ni. Haichhuahna chang an hre lova, vawiinah Pu Zoramthanga sorkar hnuai a, a bik takin sorkar hmasa ang lo takin kan House Leader hian a Minister-te ring tawkin Delhi lamah an kut a phuarsak lo a, thahnemngai taka an thawhnate malsawmin a lo awm ta a. Keini bialah pawh a bik takin sport infrastructure engmah nei ve ngai lo kha vawiinah chuan sports school-te khulai a khuan kan buaipui mup mup a. A bik takin hmun danga la awm ngai lo basketball ground mai bakah, pavilion-te siamna turin Phuldungsei leh West Phaileng-ah te buatsaih a ni a. Chutiang chuan volleyball court pawh Saithah, Lallen, Phuldungsei leh West Phaileng-ah te pawh buatsaih a niin, chutiang chuan hmalak a ni. Chuvang, chuan kan thalaite an harh thar hle a ni tih ka sawi duh a. Vawiinah Sports Minister chak tak kan nei a, chutih rual chuan, an thiamna leh an hawizaunate hmang tangkai thei tura kan CM zahawm takina, sorkar hmasaa Minister-te kut a phuar tlat ang ni lova, *free hand* a pe hi lawmawm ka ti lehzual a ni tih ka sawi duh a.

Amaherawhchu, chutih rual chuan han ngen ve duh ka nei a, kan Minister hian min lo chhinchhiah sak se la. Ka bial chhung Reiek tlangdungah khaw 14 a awm a, helai hi PMJVK cover area a ni lova, helaiah hian eng fund emaw hmanga hmalakna kan neih ve a tha ka ti a. Chutih rual chuan kan House Leader pawhin min lo chhinchhiah sak se ka duh a awm a. State tin tena an neih tawh District Sports Officer hmun hi district hrang hrang 11-ah hian kan neih ve a hun hle a, hei hi tunlai khawvelah kan thalaite demand a ni tih hi kan hriat a thain ka hria a, ka han tarlang tel duh a ni.

A dawt lelah chuan Demand No. 20, School Education Department hi, ka hriatsual loh chuan Mizoram sorkar hnathawk zawng zawng 27% vel awmna, thawktu tam leh department lian a ni a. Kawng hrang hrangin hna an han thawk a, nichina Member zahawmtak tak tena an sawi ang khan, high school-te, middle school-te, primary-te thlengin building chhe tawh thawm thatte, building tharte kan han nei a. Amaherawhchu, helaiah hian duh angin engineer-te an nei tawh loin ka hria a, Executive Engineer level tal hi chu department-ah hian pek chi niin ka hria a. An indaihloh dan te, plan and estimate an han siamdan te leh DPR buatsaihah te pawh harsatna an tawh thin a ni tih kan hriatpui a. Kan Minister chak tak hian a ngaihna hi a hre hle mai a, MZP hruaitu hlui anga an lo vei thin tawh te a ni a. Vawiinah zirtirtu indaihlohna kawng hrang hrangah te, a han thut phat atangin hma a la a, High school-ah te pawh thil la awm ngai lo SEDP zirtirtute kan han la a. Vawiinah hian la lak ve lohna middle leh primary school-te pawh hi engtia tih tur nge tih, nakinah a wind up-naah min lo hriatsak se la, hmalak a la ngai khawp a ni tih duhthawh thua ka han tarlang tel duh bawka a ni.

Chutih rual chuan, ka bialah pawh thil la awm ngai reng reng lo Phuldungsei-ah Samagra Higher Secondary School min dinsak a. A building-te tender niin, a thawktute pawh dan ang taka mithiam lak an ni a. Chutih rual chuan, West Phaileng High School tan ‘upgradation to Higher Secondary School for science stream’ tih te, Reiek High School, Govt Kangmun High School leh Govt Darlung High School-te Arts stream-a dah tura process mek a ni tih kan hria a, kan lawm hle a ni. Mithiamte’n an sawi angin, “education is all round development” an lo tih angin, kan Minister hian education hi a ngaipawimawh hle a, kan ram development *backbone* tak tak a ni tih hria a, a hmalakna hi a ropui a ni tih ka tarlang duh a.

Kan bial bikah hian a luh loh theih loh a, Pu Speaker, a chhan chu sorkar kal tawh zawng zawngah khan literacy percentage, state dang zawng nena kan inelna-ah hian a pawt hniamtu kan ni a, churang chuan a bik takin khu lai khu *aspirational district* kan nihna ang pawha hmalak a remchang a. Bial dangte ina min thikloh theihna tur khawpa *qualified* kan ni tih kha ka han tarlang tel duh a ni.

A dawt lehah chuan Demand No. 21, Health chungchang hi ropui ka ti thin a. A changtu minister hi senior Minister a nih bakah kohhran Upa te a lo niin, Covid-19 kan ramin a hmehhriat atangin a enkawlna tur kha kan nei mumal lo hle a ni tih kan hria a. Chungah chuan khang covid hri kai tawhte enkawlna atan kohhran hote nen thawhhona tha tak neiin hma a han la chho te kha ropui ka ti a. Chutih rual chuan, kan la hriat ngai reng reng loh, Health Sub-centre awm lohnaah vawiinah Health Clinic Centre buatsaihna turin hma chak takin a la a ni tih te kan hre bawk a, kan lawm hle a.

Tin, kan CM zahawmtak budget speech-a lo lang ta, Cancer Superspeciality Hospital buatsaihna atana cheng vaibelchhe 500 ngawt mai budget a lo lang ta te hi lawmawm ka ti a. Chumi piah lamah chuan, JICA loan hmanga helaiyah pawh hmalakna ropui tak kan han hmu chho te hi a ropuiin a lawmawm kan ti a. A tawpah han kai lo thei ka ni lova; kan bial hi *malaria concentrated area* kan ni a, zirna lama kan hniam ang chiahin, (Pu Speaker, ka zo tep e...) a bik taka min enkawl kan duh a.

Ka bial chhungah khuan PHC panga kan nei a, X-ray khawl pakhatmah kan nei lova. 100% kuthnathawk awmna kan ni a, inhliam leh intihpalh te Aizawl hmuna X-Ray turin a chhunzan zawmin kan kal thin a ni. Heng hi min hriat sak ka duh a. Chutih rual chuan a department kha ka sawi sak duh chu, technician kan indaihlo em em mai a, he sorkarah hian, heng hi ngaihpawimawh nise tih kha ka rawn tarlang tel duh a ni.

A tawp ber atan chuan Pu Speaker, Demand No. 43, Tourism-ah hian, ka bial chhungah tourist attraction hmunte kan neih avangin sawi leh ka duh a, khutiang kan neih lai khuan accommodation tha erawh kan nei lova. Hmanniah kan Chief Minister zahawm takin West Phaileng-ah Rest House repair-na min pe a, chu chu kan neih chhun tak meuh a ni. Tin, Tourism hian pakhat a nei a, a hlui tawh hle a, min thuam that sak ka duh a. (**Speaker:** I duhtawh thei tawh em?)

Pu Speaker, zawhna pakhat chauh. Hei, tunlai politics-ah hian lar tak maia rawn invawrh a awm a, “Pi Fangi Tourism Development Agency” a awm a, hei hi tunge a neitu tih ka hre duh a. A chhan chu State sum/Mizoram Finance Department kaltlang lova hnathawhna a awm a, endik pawh a harsain ka hria a. Hei hi kan Minister zahawm takin a wind up hunah min rawn hrilhfiyah se ka duh khawp mai.

Awle, Pu Speaker, kan Minister pathumte demand kan sawi ho hi fak hla siamtu in, “*I mangan a hnenah thlen la, anin a lo tanpui zel ang che*” tih ang khan, i veilama mite pawh hian an mangan hi lo sawi se, an lo tanpui zel ang; chutiang budget chu pass ngei turin ka rawn recommend a ni e. Ka lawm e.

**SPEAKER** : Awle, member zahawm tak Pu Lalchhuanthanga ilo sawm ang.

**PU LALCHHUANTHANGA:** Pu Speaker, ka lawm e. Sports Department-ah hian ka han tan ve ang a.

Sports lam hi kan tuipui deuh zawng pawh a ni ang a, kan che tha deuh nge ni Pu Speaker, i dinglana mite khan sawi nuam an ti riau a. Infrastructure pawh tha tak tak kan nei a, hei hi chu kan economics hian a umpha tawhlo deuh a ni lo maw ka ti deuh a. Hmun tinah sports facility tam tak kan nei a, chutih lai chuan kan player te hian football boot leina pawh hi an nei manglo a ni. Thalaite hmakhua kan ngai kan ti a, dik tak chuan veng tinah, khaw tinah thalai 10-a pakhat pawh sports lama tui hi kan awm lem lo a ni. Chuvangin, sports lamah hian kan kal lutuk deuh em aw ka ti a ni. Kan Minister zahawm tak pawh hian a department chan zingah hian Sports hi a uar deuh bik em aw ka ti a. Tourism leh ICT te hi a lar lo khawp mai a, Sports Department a enkawl ang hian heng te hi enkawl tel se, robeway leh skywalk tihte kha kan hluhlawn lo mai thei a ni. Sports-ah hian kan insawrbing lutuk a kan department chan dangte hi kan thlauhthla lutuk a ni lo maw tih ka sawi duh a ni. Engpawhnise, sports lama kan hmasawna hi chu lawmawm chu ka ti ve hrim hrim a ni.

A pahnihna atan chuan Health Department hi ka sawi leh duh a. Kan hriat angin Covid-19 in min tibuai hle a, kan task force duty te leh NGO te, kohhran te kan tangrual hle a, a lawmawm hle a ni. Nikum leh nikum hmasa lam te khan Chief Minister Relief Fund-ah te hian kan pe tam a ni; NGO te, Sorkar hnathawk te, kohhran te leh mimal atang tepawhin. He hrileng hi mi zawng zawngin kan buaipui em em a ni. Amaherawhchu, (ka han ti teh ang) Mizoram population tlem te awmna, khualzin pawhin min tlawhpawh em em lohnaah hian engatinge heti em ema hri hi a hluar em em mai le ka ti a ni. Tunah pawh hian ala tlem lova, kan la lawr lak a ni. North-East ah hian Assam population a tam a, inkhaikhin chi a ni lova; Manipur te, Meghalaya te, Nagaland te leh Tripura te nena khaikhin hian tunah hian kan dinhmun hi a chhe lutuk a ni. State dangah chuan *first wave*, *second wave*, *third wave* tih tein an then thei a, Mizoram chu kan ni ve lo, englai pawhin hri hi a hluar tlat; then hleih theihloh khawp hian hri hi a hluar a, thihpui erawh kan tlem deuh e. Kan thawh that hi kan sawi uar deuh hlek maithei a, vaccine te pawh ‘kan la tha’ kan ti a, chuti chung chuan engatinge hri kai kan pun zel, kai thar hi engatinge kan tam em em reng bik tih kha ngaihtuah tham niin hria a ni.

Mahni bial lam te han sawi ila. Kulikawn-ah khuan August thla atang khan DCHC hawn tan a ni a, Covid vei te dahkhawm an ni a. Hetah hian harsatna kan tawknual a, kan hmanrua, hand sanitizer dispenser te, geysers te, oxygen plant te, engkim mai

khu electric-a operate vek a ni a. Chutih lai chuan electric hi a tha lo lutuk a, khu hospital atan khuan VIP line min pawh sak ve thei ang em aw kan ti a ni.

Han sawi zau deuh ila, Kulikawn Hospital khuan ram khu kan nei zau khawp mai a, a thlang lam lui thleng khuan hospital ram a ni a, kan sorkar hian hma thar lakna tur a neih chuan saw lai ram sawrawn hmang thei sela ava tha dawn em ka ti a. Tin, a boruakte pawh a thianghlim a, hospital zauh nan leh thildang danga tan pawh tha tak tur anih avangin hmathar lak nan sorkar hian sawlai ram sawrawn hmang thei hram sela. A hmun a laili a, a kalpawhna motor kawng te a tha a, chu chu kan Health Minister zahawm tak hian min lo hriat sak sela. Chumai bakah chuan, hmanni lawk khan khawl thar te kan nei ve a, oxygen plant te pawh kan hawng kha a ni a, chutih laiin electric wiring saw a chhe lutuk a, sawrawn harsatna min siam thin a, chuvang chuan sawng te saw minrawn ngaihtuah sak sela tih kha ka sawi duh bawka ni.

Pu Speaker, a dawt leha chuan LESDE hi ka sawi leh duh a. ITI training centre hi ka bial ITI Vengah a awmin hetah hian trade 16 lai a awm a ni. Amaherawh chu ITI hi kan thalaite eizawna atana intuaihriamna tha trade 16 lai awmna a ni chungin kan sorkar hian a ngaipawimawh lo hlein ka hria a. A building te a hlui em em tawh bakah trade pali, panga ah instructor an awmla a ni. Tin, an hostel building te, workshop te, classroom te chei a ni ngai lova, hei hi ngaihtuah chian a tha khawp mai.

Pu Speaker, Printing & Stationery hi ka sawi tawh thin a, ka han sawi leh lawk ang a. Printing & Stationery hi chihnihin a kal a, *Printing* leh *Stationery* tein. Tin, a pawimawh khawp mai a, khawl te pawh khu an nei tha a, amaherawhchu, electric lampang a diklo nge, mechanic neih that tawh loh vang nge ni an khawl neih that ang hi an hmang thalo khawp mai a. Tin, Stationery hi ka sawi thin ang khan sorkar tan *Sumthuninu* hi a ni ringawt mai a. Stationery an stock teuh a, department-in an leisak leh duh silova, tichuan an dah tawl a, an auction thin a ni, man tlawm te te tein, a thente pheichu an paih thin a ni. Tin, kan stationery item tamtak hi validity awm a ni a, a validity a pelh tawh chuan a chhe mai te a ni a. Chuvang chuan he stationery hi chu tihtawpa printing lampangah hian insawrbing deuh hi ava tha ve aw, ka ti a.

**SPEAKER** : Ngawi lawk rawh aw, Pu Chhuan. Kan hun hmasa hi a tawp a, dar 4:00 a ni a, amaherawhchu ngaihdan a awm a. ‘Dar 4:00 pm-ah hian chawl lovin dar 5:00 pm-ah hian chawl zawk ila’ tih ngaihdan a awm a, chu chu House thu thu a ni a. Enge kan ngaihdan le? Kan hun hmasa dar 4:00 pm chu a tawp phawt mai a. House ngaihdan enge ni? Awle, Dar 5:00 pm ah chawl ila tih a ni a, tha kan ti tlang em? Awle, chhunzawm rawh le, ti ila, nang pawh i hun chu a tawp tawh chu a ni mai a.

**PU LALCHHUANTHANGA:** Awle, Pu Speaker, pakhat chauh ka han sawi leh ang e. Commerce & Industries Department hi, ram changkang tur chuan Industry-ah hma kan sawn a ngai a ni. Amaherawhchu hei, Commerce leh Industry hi kaihkawpin a awm a, an te tawlh tawlh mai a, industry pheih chu a te tawlh tawlh mai a, kumin budget-ah pawh hian 18.52% in nikum budget a phalo a ni. Hei hi a pawh khawp mai a, industry lampang hi kan tih uar a tul khawpin ka hria.

Pu Speaker, a tawpa kan sawi duha chu, vawiina kan demand hi a pawimawh hlawm tehlul nen, sport hi kan sawi uar em em ringawt mai a. Education lampang te hi kan sawi tlem a, Higher & Technical pheih hi chu kan sawi manglo emaw ni. Industry, a ram hnuk zawk buaipui lova a sport lampang ringawt mai kan han buaipui hi chu kan rilru hi a lang deuhin tih hmasawn tak tak tumna rilru hi chu a awmlo niin ka hria a. Chuvang chuan kan ram hnuk zawk hi kan sawi tlem mah mah ka ti a ni, Pu Speaker. Ka lawm e.

**SPEAKER** : Member zahawm tak, Dr. BD Chakma ka sawm e.

**PU B.D. CHAKMA** : Pu Speaker, ka lawm e. Hei, vawinah Minister zahawm tak tak pathumte demand kan sawiho dawn a. A hmasa berah Demand No. 22, Sports lamah hi chuan hma kan sawn zel a ni tih hi a hriat theih a, ka bial aiawh pawhin sports-ah hian lawmthu ka sawi a ni. Hman atangin ka biala Kamalanagar playground hi tih hmasawna a awm lova, tunah hian kan Minister zarah football ground pawh artificial turf phah hi kan zo tep tawh a. Chutih rual rualin most senior khawpui pahnih Lawngpuighat leh Borapansuri-ah pawh hei hi kan beiseiin kan nghakhlel ve hle a ni.

Pu Speaker, Tourism lamah hian budget bu kha kan en a, an print sual nge ka hre lova; 4 lakhs man chauh a awmin a lang a. Engatinge CSS Scheme hi pakhatmah a tel loh tih kha Pu Speaker, zawhna ka nei a. Tin, Mizoram sik leh sa chu a tha em em a, chuvangin Tourism development hi a pawimawh hlein ka hria a. Tunah chuan tourism chu department ni lovin, industry angin kan ngai ta a ni a, natural resources leh tourism hi kan pawt lut thiam anih chuan Mizoram tan revenue tamtak a chhuak thei dawn niin a lang a.

Pu Speaker, Demand No.18, Printing & Stationery hi term hmasa pawh khan kan sawi fo thin a. He department hi sorkar department dang ten sorkar stationery dawr lovin private stationery te an dawr thin hi kei ka ngaihawh zawng tak mai a ni a. Kei ngei pawh hian A4 size paper te hi sorkar stationery outlet atangin ka lei thin a, tlawm deuh zawkin a lak theih a ni. Chuvangin kan member zahawm takte hnenah pawh ka ngen duh chu, bazaar atangin lei lovin keimahni departmental stationery outlet atangin kan lei theih chuan hei hi revenue source mobilization atan pawh a thain ka hria a.



Tin, Demand No. 20, School Education-ah ka lut leh lawk ang a. Kan Education Minister chak tak kaihhruaiana hnuaiah education lamah pawh hma kan sawn zel a ni tih kha a lang a, a lawmawm ka ti a. Tin, Computer hi sikul tina pek a ni a, ka bial Borapansuri ah pawh pek a ni a, a lawmawm ka ti a. Pu Speaker, *electronic age* ah kan awm a, zirlaiten computer an thiam loh chuan phai lama zir zawm tura an kalin phai lama sikul naupangte anga computer knowledge an neih loh chuan inferiority complex hi an nei thin a ni. Chuvangin state dangah an zir pawhin inferiority complex an neihlohna turin sikul tinah computer education hi a ngai ka ti a, chutiingin computer lama kan Minister hmalakna pawh hi a lawmawm ka ti a. Chutih rual rual chuan SEDP hnuaiah thla khata ₹10,000/- hlawhin nikum lamah khan zirtirtu tamtak an la tawhin ka hria a, kha kha kuminah pawh hian chhonzawm dan a awm em tih kha ka zawt a.

Pu Speaker, School Education hnuaiah Adhoc Aided High School leh Highier Seceondary school hi Mizoram-ah tamtak awmin kan hria a, kha kha provincialised tumna a awm em tih kha ka zawt a. Chutih rualin a thawktu kan zirtirtute pawh provincialise emaw regularize emaw tih tumna hi a awm em tih kha kan zawt duh bawk a. Tin, SSA hnuaiah sorkar hnathawkte hi sorkar hnuaiah regular-a absorb tumna a awm em tih kha kan zawt duh bawk a ni.

Tin, Demand No. 28, Labour Employment & Skill Development Entrepreneurship hnuaiah hian Pu Speaker, Kamalanagar-ah hian ITI building term hmasa khan sak zawh tawh a ni a. Mahsela tun thlengin zirtirtu emaw instructor emaw, hmanrua emaw pawh awm miah lovin *Ghost Bungalow* angin a awm tawp mai a ni. Hei hi regular taka operationalise theih dan hi a awm ang em tih kha ka zawt duh bawk a. Chumi rualin LESDE hnuaiah hian ka bial atangin tumah hi in register an awm lovin ka hria a, chuvangin welfare fund atang pawhin pawisa cheng khat mah dawn theih dan a awm lova, kha kha publicity lam dikloh nge, department lam atangin mipui hnenah inzirtirna a awm theih chuan a lawmawm hle ang. Tin, cement mistiri, carpenter te, tailoring thiamte an awm ve a, hengho hi LESDE hnuaiah membership emaw, in register theih dan a awm chuan khami fund atang khan anmahni chhungkua welfare tan benefit a awm theiin ka hria a ni.

Tin, Demand No. 18, Printing & Stationery-ah zawhna ka neih chu, budget heading-a 'suspense' hi engnge ni? Suspense hnuaiah cheng nuai 100 hi nikumah pawh a awm tawh a, kumin budget-ah pawh a telin a lang a. Suspense hi engnge ni kha khawngaih takin wind-up hunah min hrilhfhiah se la.

Tin, Higher & Technical Education-ah hian ka han lut leh lawk ang a. Kamalanagar College hi Govt. College a lo ni tawh a. (*..warning bell..*) Pu Speaker, minute 5 tal min pek belh a ngai a ni, BJP ka nihna angin. Vawiiinah kan Minister

zahawm tak pawh a awm lai a ni a, chumi hisapin minute 5 tal chu min pek belh hram la.

Kamalanagar College-ah hian infrastructure deficiency a awm vangin NAAC Accreditation hi tun thlengin a la nei thei chiah lova. Infrastructure development atan scheme tam tak kan hmu a, sum dah hi khawiah mah a awm lo a ni. Chuvangin, infrastructure development a tan hian sum hi dah thei ni se. Hmanah Kamalanagar College Principal a rawn leng a, Auditorium-cum-Lecturer Hall an mamawh thu lehkhain min rawn hriattir a. Khawngaihni hei hi tanpui theih dan emaw grant theih dan emaw a awm chuan ka lawm ngawt ang. Tin, chu bakah a building luah theiha siam a la ngai a, Boys hostel leh Girls' hostel pawh tunah luah lovin a la awm a, hei hi electric connection a la awmluh vang nge, tui connection awm loh vang nge? A building hi hman miah lovin a awm tawp a, hei hi engnge a chhan tih ka zawt bawk a.

Tin, a tawp nan, Health & Family Welfare-ah ka lut lawk ang a. Doctor ka nihna angin Health & Family Welfare ka hmuh dan chuan, Urban Healthcare leh Rural Healthcare inkar gap hi a tam lutuk niin a lang a. Dik takin rural area PHC-ah hian Ambulance pakhatmah a awm lo va. Hmana National Ambulance Service atanga Ambulance an pek tawh ho pawh *off-road*-in a awm hlawm a, repair tlak pawh a ni tawh lova. Chuvangin, Ambulance thar tun tumah kan Minister, MoS zahawm takin min rawn tlawh lai khan kei pawhin ka ngen sak tawh nghe nghe a, PHC-ah hian a bik takin Ambulance hi min pe thei se. Tin, x-ray pawh hi PHC dangah chuan ka hre lova, mahse Chawngte-ah hian x-ray khawl hi vuah sa a ni a. Mahse, technician awm loh vang nge khawl chhiat vang ka hre lo a, x-ray hi a hman theih chiah lova. Tin, blood bank pawh hi nikum hmasa khan blood transfusion hi an ti tawh a, mahse, nikum atangin a tawp daih mai a. Chuvangin, Chawngte Hospital-a blood transfusion hi a revive theih dan a awm thei em tih ka zawt bawk a. Blood transfusion ti tur hian Lunglei pan a ngai thin a, mirethei tan a hau tak lutuk a ni. Chuvangin, Chawngte-ah hian x-ray khawl leh blood transfusion facility revive dan hi ngaihtuah ni thei se.

Chu zawng chu ni mai se. Kan budget hi a vaiin tha ka ti a. Chuvangin, BJP MLA mal ka nihna angin kan support a ni e, Pu Speaker. Ka lawm e.

**SPEAKER** : Member zahawm tak Dr. Vanlalhlana kan sawm e.

**DR. VANLALHLANA** : Pu Speaker, ka lawm e. A hmasa berin Pu Robert Romawia Royte Demand-ah han lut ila. Kan budget (voted) zawng zawng hi 0.35% a ni a, Pu Robert-a hian a 1% pawh a chang lo tih kan hriat kha. Tin, Sports-ah hian 5.43% in a tla hniam a, Tourism-ah 4.37% in a sang leh a, Information & Communication

Technology (ICT) ah hian 6.82% in sum pek belh a ni bawk a. A vai hian 1.92% in a pung a ni.

Thildanga ka luh hmain ka bial chhungah sawn Sports Complex a awm a. Hmundangah hma kan la nasa viau a, amaherawhchu sawlai hmuna basketball court te saw rawng kan han hnawih tha a, a chhuat tihna tur mahni sum te kan han seng a. Chutiang chuan, tennis court te pawh MLA fund-in kan han chei tha a, a chhak lampang hnim phei saw chu tlaiah zu in nan, damdawi tih nan an hmang a. Ka MLA tirh phei chuan Police-te sawlaia patrolling ti turin Home Minister-ah ka ngen nghe nghe a ni. Sawlai saw a buk khawp mai, cheithat a ngai hle a ni. A cheithat kha a hmain ka lo ngen tawh thin a, amaherawhchu hmalakna a awm lutuk lo nge ni, ngaihven se tiin kan ngen a ni a. Basketball court phei chu department-ah NOC te kan la rawn dil ang a, electric bill pawh chawi ngai lova zana eng tur solar light kha a tih dan a awm a, chu chu ka rawn dil dawn a, nakinah min lo phalsak vat se tih kha ka ngen nghal bawk a ni.

Hei, nichin khan Pu Zothantluanga MLA zahawm tak khan, “phul lem ringawt phah lo hian thildang te pawh ngaihven ve se a,” te a rawn ti a. Ni e, hei, Dr. Thangtea, Minister zahawm takin a sawi thin chu, project kan han nei a, a maintenance (a enkawl zuina tur) hi kan ngaihtuah tel a ngai a ni” a ti thin a. Ka chhinchhiah hneh khawp mai a, tunah pawh hian kan Minister hian chak takin hma a la, hei *Khello India* 100% grant te kan han nei a, a lawmawm hle. Amaherawhchu “PMJVK ah nuai 40,000/- chuang a hmu a” kan ti a, Pu Speaker, I ding lampang phei chuan dawhkan an beng ri hluah hluah a nih kha. hei 2021 actuals ah te, tin, kumin budget kan hman mekah te a rawn lang a, kum tharah chuan ala lang chiah lo naa, nuai 18,730/- a rawn lang a, khang kha residential school a ni. Sports nena kawp a nih vangin residential school a ni a, School Education khan an budget-ah khan khami a maintain na tura zirtirtu dah tur te a dah em tih kha ka en a, a awm miah lo a ni. Kan nei tawp ang a, a enkawl zui leh dan tur kha Minister khan ruahmanna a neiin ka ring a, an nei sa vek ang a, kha kha hriat a chakawm a. Kha kha engtin nge kan enkawl zel dawn tih te kan han hre chak a. Tin, infiamnaa *hlawhtling* an awm a, *hlawhtling* an awm hian kan Sports Minister te, Sports Council lam te an hmingtha thin a. Chutah chuan Sports Association te hi a lo tuai hriam tute, a tir atanga lo enkawl tute kan ni a, ‘kan’ ka han ti deuh kher ang e. Association a tel ka ni a, harsatna kan tawk thin a, mi pawisa kan puk a nuai chuang te, kum khat chuang kan puk a, a pek leh dan tur te kan ngaihtuah a. Basketball chu tlemin kan lo zia a, association thenkhat phei chu min rawn dil tawk te an awm ve leh a, “min rawn ngaihtuah pui teh u,” ti te an awm a. Hei hi kan ngaihvenpui a ngaiin ka hria a. Sum sanction a awm har thei lutuk a, kan dawng tam lo chung hian hmanna turte kan han ngah ve a, chungah te chuan Minister hian min lo ngaihven pui sela a thain ka hria a.

Tourism-ah ka han lut leh ang a, Demand No. 43 a ni a. Tourism pawh 4.37% in a pung a, Chalfilh tlang hi hriatchhuah loh theih pawh a ni lova. Engpawh nise Tourist Lodge-ah hian a ruhrel enkawl na tur *minor works*-ah 50 lakhs dah a ni, a tlem ka ti angreng a, hmun hrang hrangah kan nei a, enkawl a ngai a, a chhe tawh hlawm hle a. Chuvang chuan hei hi kan Finance Minister pawh khan nakin ah hripui te alo tawp ang a, chungah chuan mipui hip kan tum si a, hei lo deuh hlek hi awm ta sela, tih te. Tin, kan taxi driver te, kan restaurant neitute tan; restaurant neitute chu Dan te a awm a, hei hi Health Department nen eng emaw training han neih te, kan taxi driver ho training neih te pawh hi a ngaiin ka hria a, rawtna te kan rawn ti a. Kha publication-ah khan nuai 5 tih te a awm a, khang te pawh kha hman tangkai dan awm ta sela. Tin, Laipuitlang-a ‘tuizem’ kan tih mai, reservoir-ah 10 crores project thehluh niin ka hria a, kha kha engnge a thlen chin tih kha ka hre duh bawk a.

Sawi tur a tamna a, a dangah ka han kai leh ang a. ICT-ah hian ICT ka sawi apiang hian ‘synergy’ tih hi ka sawi tel deuh ziah a, a chhan chu he department hi a te na a, a thawk tha thei a ni. Corporation ang tein kalpui niin ka hria a, society ang tein, bungraw tha tak nen han thawm belh deuh a, India ram pumah pawh kan thalai lehkha thiam tak tak leh fing tak tak, thil khawih peih tak tak an tam si a, hman tangkai dan hi a awmin ka hria a. Tin, IT hub te, software technology park te kan nei chhovin ka hria a. Amaherawhchu IT hub hi chu a kalphung a dang deuh hlek a, entrepreneurs tan, “helamah video games siam thiam bik an awm ang a, helamah a monetization lam, bank nena inthlunzawm thiam bik te an awm ang a,” ti ang zawngin emaw khatiang khan developer hrang hrang hmun khatah; khu, Hyderabad pheih chu a ropui lutuk a, building khatah an awm ho a, inpuih a ngaihin an inpui tawn a, hmun hnai te te, dawhkan inhnai te tein an awm a. Dawhkan hawh man tlem te alo ni a, chutiang chuan harsatna an tawhin an inpui tawn zel thei a, eco-system lian deuh mai kha a neih theih a, hetiang lampangah te pawh hian kan kal a ngai hlein ka hria a.

Pu Lalchhandama Ralte, Minister zahawm tak Demand-ah hian rawn lut leh ta ila. Pu Chhantea hi a department chan ho Printing & Stationery leh School Education hi a minus a, tichuan LESDE lamah a rawn pung leh a, a vaia a tlakhniamna hi 3.28% a ni.

Printing & Stationery an sawi nasa tawh a, ka lut tam lo ang a. Supplies and materials hi an capital ni deuh turah ka ngai a, sum hmuhchhuah theihna tur hetah hian nuai 12 a awm a, nuai 12-in sum tam tak hmuhchhuah a ngai dawn a, ka huphurhpui khawm mai, tih changtlun a ngai a. Hei Mizoram-a press dang hian BE Printing Technology nei an awm lo maithei a, Mizoram sorkar chuan kan nei a ni. An enkawl thiam em em ang a, bungraw tha zawk te kan nei tha viauin ka hria a. An la mamawh

belh maithei a, chungte nen chuan thuam ila, sorkar department hian kan dawr tam a ngai hian ka hre bawk a.

Tin, School Education Demand No. 20-ah ka han lut ang a. Hei, MLA tam takin school zirtirtu kan rawih thu te kan sawi a, zirna hi kan ngaih pawimawh a ngai khawp mai a. Number-ah kan lut tam vak lo ang a, a policy lamah ka lut ang a. Hei, ka bial chhungah school adoption neih ka dil a, NOC kan dil a, kan dil atang khan mi pakhat hian, “fa pathum ka nei a, nitin inhlawh ka ni a, private school ah ka luh tir a, thla khat fee ₹1,500/- kha chuan ka la ti thei hram a, Rs 2,500/- ah an tisang a, a harsa ka ti tawh lutuk. I rawn adopt dawn chuan he school-ah hian ka fate ka rawn luh tir nghal ang. Thla khatah Rs 7,500/- chawi angai a mi pathum tan, school ka rawn luh tir duh a ni” a ti a. Mi harsate, khawtlangin a dawmkan ngaite, khang ho khan sorkar school-ah an luh tir a, mi harsa te kan ngai pawimawh a nih chuan school hi i ngai pawimawh tel ang tih kha kan sawi duh a. Sawi tur ka ngah khawp mai; SCERT-in intodelhna tur a kalpui dan turte rawtna ka thlen tawh ani a, ka MLA hnu hian ka han kal a, chutiang chuan intodelhna zirtir a nih theih nan NOC pawh ka dil a ni. Khalam chu duh tawk mai ila.

LESDE lamah hian han lut leh ila. Heng PMKVY te, PSDI, PITI leh chi hrang hrang tih changtlunna tur te kan nei a, kan ITI dinhmun erawh tun hi kan hriat a ni si a. Tin, Entrepreneurship Policy, 2019 kan nei a, amaherawhchu, kan la hmang lo niin ka hria a. Hei, theih ang tawkin kan han ti ve a, *Specialized Library on Entrepreneurship*, cheng nuai thum sengin Ramthar North YMA nen kan din ve a. Tunah pawh cheng singnga man lehkhabu pek tumin kan inbuatsaih leh mek a ni. Kan tih tak taka hma kan lak tel chuan Mizoram hi kan khai kang thei a ni. Amahrawhchu, India in *Registered Startup* kha Mizoram-ah 41 chauh a awm a ti a. A nei tlemte chu UT-ah Ladakh, chu pawh a buai lehngal. Chuvang chuan entrepreneurship-ah hian hma kan lak a ngai a ni.

Tichuan, thil lawmawm deuh chu, Skill Competition-ah India rampumah kan zu ti tha a, *Pakhatna Lawmman* dawng te kan zu awm a. Khawvel pum intihsiakna turah tirh chhuah turte kan han nei kha a lawmawm ka ti a, Minister pawh a fakawmin ka hria a. MYC hmalakna te, an chairman hmalakna te pawh hi kan lo ngaihven thin a, a lawmawm thin khawp mai. (**Speaker:** I hun i pel thui riau tawh mai a...)

Pu Speaker, tawi te chauh a ni tawh ang. Dr. Lalthangliana department chanah ka han lut leh lawk ang e. Minister zahawm tak hian department pathum a nei a, Higher & Technical Education-ah hian ka sawi duh chu, CM hmuh tumin appointment ka dil hlawhchham a, hei, thla khat chuang a ni ta a, Aizawl North College chungchang sawi tur ka nei a. Ramhlun Market-ah sawn classroom an nei a, khawtlangin “kan hmang ve duh tawh e” an ti a, keini pawhin kan ngenpui a. Classroom an mamawh khawp mai a,

Pu Speaker. Session hmasa lamah khan “DIET Campus-ah hmalak a ni ang” tih te a ni a. Engtin nge kha kha, hmalak chhonzawm a ni em tih kha Minister in minrawn chhan sak sela.

Tin, RUSA hi Cabinet Memorandum-ah pawh mi 72 lak nghehna tur kha a awm tawh a, September, 2019 ah khan. Engtin nge hmalak a nih zel tih kha Minister zahawm tak khan minrawn chhang sela. (Pu Speaker, ka zo dawn; Commerce & Industries-ah chiah ka lut tawh ang.)

Commerce & Industries-ah hian 18.52% in a tlahniam a. Covid vangin harsatna kan nei a, intodelh tumin mi tam takin hma an la a. Amaherawhchu, hetia kan budget a han tlahniam hi a hrehawm ka ti a. Zirna atan dawhthleng kan siam a, Commerce & Industries atangin mipuite kan dawm kan a ngai a, chuvang chuan helamah hian tan kan lak a ngaiin ka hria a. Tin, Geology & Mining pawh hi thawm that a ngai takzet a ni tih kha ka sawi duh a ni e. Ka lawm e.

**SPEAKER** : Tunge sawi leh ang? Member zahawm tak Pu Vanlalhlana ka sawm e.

**PU VANLALHLANA** : Pu Speaker, ka lawm e. Vawiinah hian Minister zahawm tak tak pathum Dr. Lalthangliana, Pu Lalchhandama leh Pu Robert Romawia Royte te demand kan sawi dawn a ni a. Anni hi Assembly mawitute pawh an niin ka hria a, lehkhathiam, doctorate degree leh master degree te nei anni a, an chhuanawm hlein ka hria a. Department pakua a ni a, pawimawh tak tak, kan sawi vek seng dawn lova. Minute sawm kan nei a, department pakhat sawi nan minute khat leh tlem hmanng ila kan sawi zo thei dawn emaw a ni chauh a. Department zawng zawng kan sawi seng dawn lova, hunin min daih chin ka han sawi ang a.

A hmasa berah chuan Pu Robert Romawia Royte demand hi ka han sawi ang a. Capital letter, italic bold in ka sawi dawn a, khawngaihtakin min lo ngaihthlak sak sela.

Durtlang North-ah khian Local Council inthlan dawn khan a lokal a. Durtlang North thalaite hmaah futsal ground a sawihmuh a, mahse vawiin thleng hian ala puitling lova. He House chhungah hian ama commitment ngei ka rawn remind leh ni se. Tin, nikum Budget Session-ah khan sorkar-in sports infrastructure siam turin khawiah te nge hmalak a tum tih, zawhnaah khan list, serial no.15-na thleng a awm a. Chutah chuan Durtlang-a artificial turf phah a tel a ni. Chu chu khawngaihtakin min lo hriatsak sela, vawiin thlengin hmalakna a la awm lova, a hmasa berin chu chu ka han remind duh a ni.

Tin, a dawt lehah ka sawi duh chu, Infrastructure Development-ah hian kan Minister hi a chak hle mai a, a fakawm ka ti a. Chutih rual chuan sportsperson training leh promotion-ah hian infrastructure-a a kal na ang bawh hian kal na se, tichuan, Mizo mipuiten a thiamna leh a finna te kan chhawr lehzuah pawhin ka ring a ni.

Budget Bu demand kan en chuan Sports budget chu nikum a pha lova, a tlahniam a, mi tam takin mak an ti maithei a, kei chuan mak ka ti lova, a aia tlem pawh la ni se a mak ka ti lo ang a. A chhan chu SEDP atanga sum pawt thei a ni tlat a ni. SEDP atangin sum duh tawh a pawt thei a, budget-ah hian sum tlem te dah pawh ni se a aia tam hi a lokalna tur hi a hre tlat a ni. Chuvang in a ngaihtuahawm lo.

Kan House Leader ngei hian a sawi a, keipawh in a sawi vawi hnih/vawi thum ka hre tawh a ni. “Pu Robert Romawia kan Sports Minister-a kan nei hi kan inchhir lo, vawi tam tak kan ngaihtuah tawh a, kan la inchhir lo, kan la inchhir lo tawlh tawlh” tih kha a comment a ni. Chuvang chuan, “anni putu connection hi eng ang nge tih pawh hriat phak a ni lo e” i ti mai ang; a rei tawlh tawlh a, a inchhir lo tawlh tawlh ang vel a ni.

Tin, a mak ka tih lohna chu, nimin Supplementary Demand vel chungchangah pawh khan, zah pawh dawn lova rawn ding chhuaka House Leader rawn chhantu kha amah chiah a ni. Chuvangin, “midang tan chuan han thik chi pawh a ni lo awm mang e” te pawh a tih theih niin ka hria. Chuvangin kan Sports Minister hi a fakawmna lai a awm a ni tih kha hre ta ila. Tourism department hi Sports Department a enkawl leh interest a lak ang hian enkawl ta se nasa tak hian hma a sawn ang tih ka ring tlat a. Tunah “Tourism Industry” te kan han ti a, kan hmabak leh kan mamawh nia ka hriat chu Tourism lampanga mipui awareness leh, hemi lampanga skill develop hi kan mamawhin ka hria a.

Chumi tur atan chuan Institute of Hotel Management hming kan sawi ri thin a, a building chu kan nei tawh ni awm tak te pawhin ka hria a. Amaherawhchu, vawiin ni thlengin a la function lova. He sorkar a lo din tirh atang khan keipawhin zawhnate ka lo zawt thin a, kan Minister-in a ngaihpawimawh thu te pawh a sawi thin. Amaherawhchu, vawiin ni thlengin hmalakna a la awm lova, a ngaihpawimawh tawh lo niin ka hria a, hengte hi ngaihpawimawh ni se. Tin, Chalfil-ah Tourist destination ropui tak, building lian zet mai 8 lai a ding a, kum hei chen hi a ding tawh tawh a, mahse hman tangkai a ni lova. Hengte hi tun hnua kan han hriat leh dan chuan, National Green Tribunal-in, ‘thiah tur’ a tih te a lo ri leh ta a. A man pawh hi 7.59 crore lai a ni a, a tlem lo khawp mai. Engatinge hei hi thiah a ngaihna chhan tih te hriat a chakawm hle mai a; environment vang ni tein hriat a ni a. Amaherawhchu, khi chen kut lo thlak tawh leh kha chen lo kal

tawh, tun hnua han thiah leh hi thil tangkai a ni tawh dawn chuangin a lang lova. Engtin nge tih zel an tum, hei hi?

Tin, central atangin scheme hrang hrang a awm a, “Swadesh Darshan tih te, ‘Prasad’ tih te, “capacity building for scheme (CBSP)” tih ang chite a awm a. Hengte hmang hian Mizoram-ah eng project-te nge kan neih ve, eng ang sum nge pawhluh ve a nih? Heng hi tourism develop-na tur atana scheme leh project-te niin ka hria a, chungte chu kan Minister hian min han hrih se ka duh khawp mai.

A dawt lehah chuan Pu Lalchhandama Ralte Demand-a ka sawi leh duh chu, ITI tih changtlun khu kan mamawh hle mai. Kan thalai ten skill kan develop theihna tur ber chu ITI hi a ni. Aizawl pawh heti khawpa a changtlun loh chuan district danga ITI phei chu a changtlung lo hle ang tih a hriat theih a, district tharte kan lo nei leh bawk si a. ITI tih changtlun hi a pawimawh hlein ka hria, kan Minister hian hma han la se hemi chungchangah hian ka duh a.

Tin, school chungchangah; vanneih thlak takin NABARD atangin school sakna turte, repair-na turte kan hmu a. School thenkhat repair thalo te a awm a, pawl ka tihpui a. Hemi chungchangah hian kan Minister hian strict leh uluk lehzualin han enkawl se, amah pawhin personal interest neiin hma han la se. Mizoram school-te hi a chhe em em a, keini biala school-te pawh a chhe em em a, repair an ngai em em a ni. Amaherawhchu, sorkar sum harsatnate kan hria a, hetiang remchang tak NABARD lam atanga a lo awmte hi hman tangkai a tha ka ti khawp mai.

Tin, “kan school-ah zirna quality a tha lo” tih sawi a awm fo a. Tawitea ka han sawi duh chu, Delhi-ah Kejriwal-ten school tha an siam thei a, public school sorkar enkawl school chu private school aiin a tha tawh zawk tih hriat vek a ni. Chuvangin khu te khu model-ah hmangin zir ni se a va tha dawn em ka ti a.

Mizo Youth Commission hi tawi tea ka sawi duh chu, Civil Service-ah te lut kan tlem ta a, sorkar-in tan a la a, pawisa pawh nikum aia tam leh zuala a dah hi a lawmawm ka ti a. Kan Chairman-te pawh mi viak tha, mi fel leh mi thiam a ni a, an hmalakna te pawh hi a tha ka ti. Ka sawi duh chu Delhi-ah tuition la turin mithiamte 20 merit-in kan thlangchhuak a. Tichuan, an zu kal a, preliminary-ah a vawikhatnaah chuan an tling lo a, an lo haw chho a, MCS exam tumin an inbuatsaih leh ta vek mai a. Kha merit-a tling ve lo tam takah khan *MCS aspirant* hi a awm ta a ni. IAS training tura tuition Delhi-a kalte nen khan midang kha an exam tlang dawn ta a ni a, chance kha a inthat hleih em aw tih te ka ngaihtuahnaah chuan a awm a. Chuvangin, Civil Service IAS nih tumte hi chu kum 3 vel tal hi chu in concentrate se, state service lama kal lovin. Tichuan, central



service kal lova state service opt law law ho kha hetilaiah competition-in kal ve ta se a tha ang em tih te ngaihtuahnaah a awm mai mai a, chungte chu ka han tarlang ni se.

A tawp berah Health Department chungchanga ka sawi duh chu, (**Speaker:** Minute khat i la nei e..) Healthcare chungchang hi niminah pawh kan House leader khan duat takin, ‘ka baby a ni’ a ti a. Nangpawh khan, ‘ka child a ni’ i ti a, i adopt ve deuh te pawh khan i sawi a. A tha ka ti, healthcare hi a lawmawm ka ti a, hetiang ang policy an ngaihtuah chhuak pawh hi, chhuang taka, ‘ka baby’ tih tlak pawh a niin ka hria. Amaherawhchu, kan kalpui danah erawh chuan, *nuhrawnin fahrawn a enkawl ang* deuh hi a niin ka hria; kan rek hlum lek lek chu a ni. 2008-2009 ah healthcare policy hi Reliance company-te nena agreement siama hman chhoh a ni a, “90% nge 95% vel pawisa pein an kalpui chho ang a, an complete hnuah 5% pek tur a ni” tih te pawh a ni a. Amaherawhchu, an agreement term a tawp hma khan an chawlhsan a, Mizo mipui pawisa tam tak hi an ba a ni. Damlo mi 1693 pawisa hi Reliance hian a la ba a ni; cheng ₹7,41,22,862 hi Reliance company-in he healthcare policy hmanga a la bat chu a ni. Reliance kha kan zuk thiamloh ngawt theih lo, heti laiah; a mawhphurtu chu Mizoram sorkar hi a ni tlat a ni. Nikumah September session-a kan han zawh khan, cheng vaibelchhe 44 bat a ni a, kumin January thla kan en chuan, ba hi cheng vaibelchhe 55 a ni tawh a ni. Chu chu healthcare-a in register damlote pawisa a ni. Chuvangin, policy tha taka an duan an chhuan em ema hi anmahni hian an ti hmingchhe dawn a ni. Tunah registraion hawn a ni leh ta a, engzat nge in register ang tih leh, Mizo mipui engzatin nge healthcare-ah hian rinna ngat ngam tih kha hriat a chakawm viau tawh a ni. Registration atan pawisa sang tel kan hmang a, bill an submit in sorkar-in pawisa a pe let leh bawk si lova, chuvangin Mizo mipui tan rin hi an har tawh viau a ni.

Point khat ka sawi leh duh chu, Covid chungchang a ni a. Arunachal Pradesh chu keimahni ang bawka tlang rama awm, tribal State a ni a, UT kan hmu tlangin State pawh kan hmu tlang a. Arunachal Pradesh-ah Covid a len ang bawkin Mizoram-ah pawh a leng a. Lailapur-ah Mizo missionary nupa tuak khat an awm a, vanduaithlak takin nikum November-ah Covid an vei ve ta hlauh mai a. Sorkar damdawi in hnaihna ber Pasighat-ah an kal a, an in admit a. Damdawi chi hrang hrangin an inenkawl a, ni 20 vel an awm hnuah an chhuak a ni. Dam taka an chhuak chu, an chhuak tawp mai a ni; naia khat pawh charge an nei lo. Tripura-ah Covid hospital a awm a, dam lo te an enkawl a, chungah chuan damlote naia khat pawh charge lovin free vekin an enkawl a ni. Mizoram-ah erawh chuan kar khat/kar hnih an inenkawl a, nuai khat/nuai hnih bill pek ngaiin an haw thin a ni. State dangin free-a an enkawl theih laia Mizoram-ah enkawl na man cheng tam tak chawi a ngai thin lai hi kan Minister hian min han hrilhfiah se ka duh viau a. (**Speaker:** A zo thei dawn tawh em, minute hnihin hun i pel tawh a ni.)

A tawp bera chuan lawmthu sawi ve ka chak em em a ni. Sports Department lam atang khan football te in sem ni khan ka lo hria a, Covid dona hmanrua, mask leh eng eng emaw te department lam atangin nangni chuan in dawngin, in sem a, lawmthu in sawi a. Keini pawhin lawmthu sawi kan chak ve khawp mai. Sem turte chu nei ve ila kan lawm ve em em ang; lawmthu te pawh kan sawi ve ngei ang. Kan MLA Fund atang tein kan lei ve a, chu chuan a lo daih zo si lova. Ka bial chu “opposition bial a ni miau a” tih kha ka rawn tarlang ve duh a ni e. Pu Speaker, ka lawm e.

**SPEAKER** : Tunge sawi leh ang le? Pu Lawmawma Tochwawng, member zahawm tak ka sawm e.

**PU LAWMAWMA TOCHHAWNG:** Pu Speaker, ka lawm e. Minute 10 hi ka hmang zo ngut ang emaw ka ti a. Vawiin chu lehlama mite mawng a rit riau mai a, “a hnunngah tih tawka a awm” an ti a, min kah nek an tum zawk nge tih te pawh ka ngaihtuahnaah chuan a awm rum rum a. An sawi leh hluam hluam ang chu a tawp lamah tih te pawh rilruah a awm rum rum a ni.

Pu Speaker, vawiiinniah kan Minister zahawm tak tak pathumte demand kan han sawiho hi a hlimawm hle a. A famkim lo lai te, a tha lo lai te pawh ti khan kan han phawrh a, hmasawn lehzelnah tur atan tea thil tangkai tak kan ramin, he rorelna In pawh hian a hman ka beisei a ni.

A hmasak berah chuan, Minister zahawm tak Pu Robert Romawia Royte demand hian sawi a hlauh hle mai a. A ni lah tak a; kan thalaite nakin lawka kan ram hruaitu tur, kohhranah pawh kan hruaitu turte, khawtlangah pawh kan hruaitu turte hmakhua neitu a ni a. Kawng tam taka a hnathawh a lan laiin Sports bikah hian a lo langsar a. Chutianga mite tan theih tawp chhuah a, hmakhaw ngai a a beih laia kan thalaite hmasawna lo langsar ta deuh, ‘a pawh ta emaw ni le’ ti a ngaimawh awm lek lek te, ‘chutiang chu kan ngaihtuah dan tur emaw ni le’ tih ngaihtuah a awl khawp mai.

Sports & Youth Services hi a pawisa lampangah hi chuan tlem tlemin kum hmasa lam kan phak lo deuh a ni ang tia sawi tur a awm a. Amaherawhchu, nichina kan ngaihthlak tak ang khan, SEDP atang chauh pawh nilo, Mizoram Budget atang pawh nilo Central fund atanga tam tak pawhchhuaha pawtchhuak theitu kan hruaitute zinga a awm hi chu tu tan pawh vanneihna a ni. Chuvang chuan, lawmna chang kan hriata, law lohna tur hlir kan zawn chuan kan hriselna te pawhin a tawrh phah ang tih a hlauhawm alawm le. Chutiang mihring, ram hruaitu tun tuma kan han nei te, sorkar kum kal mekah pawh a hnathawh ropui tak tak hmuh tur kan han nei te hi chu thil lawmawm tak a ni. Ram mipuite bakah kan thalaite hi chuan lawmin kut an beng ngei ang tih a rinawm a.

Chung tam tak karah chuan kan chenna leh kan awmna lam a ni bawk a, Lunglei lama kan hmasawwnaah tam tak sawi tur ka nei a ni. Infiam mite leh kan thalaite tun kan sorkar kum kal meka kan lawmnate, Zobawk-ah sawn Sports Complex Academy ropui tak, nichina kan ngaihthlak tak ang zirna nena inkawp tur a kal mup mup a, chumi piah lamah chuan Salem Veng-ah sawn Hockey Field puitling tur ruahman a ni a, Ramthar Veng-ah Futsal Ground neih tur a ni bawk a, Electric Veng-ah sawn Football Ground puitling artificial turf te, gallery te nen vek siam tura ruahmanna a kal mek a, Rahsi Veng-ah District Sports Complex te, sawmi khawpui chhung bial 4-ah sawn ruahmanna a kal mek a. Tunah hian Lunglei 'N'-ah hian Futsal turin ruahmanna a awm a, an teh fel mek niin ka hre bawk a, thil lawmawm tak a ni. Heng ruahmanna kalpui mek te, tan mek te leh la tan tur te nen hian lawmthu sawi nan Mizoram leh India ram pawha lang tham, infiam mi thalai tam tak chherchhuakin ram pawn atangin tangka khel chhuak thei turin rawn thawh chhuah kan tum a ni. Chung chu tawngka mai nilova, thil tiha lawmthu kan sawi tumna a ni. Tin, State Games te pawh hi nei leh dawn ta ila Lunglei-a nghat tur sawn kan inhuam tan hle a nia, Lunglei lam, chhim lam kan hawi theih chuan thil lawmawm tak a ni ang. Heng project kal mek te, la kal leh tur leh bul han tan mek te pawh chu a hma thei anga hmuh theiha a kal lehzel kan beisei a, chutiang tur chuan kan Minister, a changtu pawhin min lo hriat sak se ka han ngen a ni.

Kan budget-ah hian, nichina kan ngaihthlak tak ang khan a sum lam a tam lo anih pawhin, hun kal tawha Sports atana kan hmuh atang ringawt pawh hian, Mizoram sum tihek zawng nilo, a tipung zawngin thil a kal a, hei hi hmalakna tha tak niin ka hria a. Central atanga sum kan pawh luh tam tak hian Mizoram sum harsatna pawh a sukiang mek niin a lang a, hei hi thil lawmawm tak a ni.

Tourism-ah hian tawngkam hnih/khat lek ka sawi duh chu, kan hnufual hle tih kan hria a, a bul (basic) atanga tan leh tur ang mai dinhmunah kan ding a, tunah erawh chuan zawite tein hma kan sawn tih tur ala tam khawp mai. Tv-ah ka lo en a, hei chu khawilai ram nge aw ka ti a, a tawpawh chuan Mawmrang Kham, kan thalaite adventure club tana cho-awm tak alo lang a, hengte hian a ni hmun dang, ram dang Thailand te pawh kan ti thin a, hetiang advertisement ang chi lo lang hian a ni mi hip mai mai ni; a kal tam takte pawhin chu chu an sawi dan a ni. Chutiang kan han hmu ta te pawh hi hmasawwna chi khat bultannaah a ngaih theih a. Tin, festival ropui tak tak leh tha tak tak, ramdang mite pawhin an rawn hlut, changkang zel tur kan han ni te pawh hi Tourism-ah chuan thil lawmawm tak a ni. Ka bial chhung Zobawk-ah pawh sawn hmannah kan enho tawh a, kan House Leader zahawm tak te nen pawh. Sawtah sawn han cheibawl deuhhlekk a mi han hip tur, pawisa sorkar tan pawh a lakluhna tha tak tak hmun a awm a, sawng pawh saw sorkar sum tipung tur zawnga hmalak theih a ni.

Tin, Covid-19-in min tlakbuak a, harsatna nasa tak kan tawrh laiin Zotlang Tourist Lodge-ah chuan *make-shift* RT-PCR, eng emaw zawnga an sawi pheih chuan Lunglei bil han khawihna tur kha min pe a, RT-PCR a *make-shift* chu kan dah ran a, phal taka an hmunhma te min hawh tir avangin lawmthu kan sawi a ni.

School Education-ah hian tam tak kan sawi hman dawn lova. Bial dang ang bawkin lawmthu sawina tur kan va ngah em tun sorkar kum kal mek leh hun lo la kal leh tur atan; tuna kan budget sawi lai mek erawh hi chu thu dang ni ta se la, lawmthu sawina tur kan ngah khawp mai a. Kan Minister hmalakna hnuaiah hian Education Department hian school thar min sak sak a, min repair sak bawk a, zirlaite tan tui thianghlim in tur min chhawpchuah sak bawk a, inthiarna tha zawk leh fel fai zawk, kan lo hrisel zawk nan min siam sak bawk a, kan lawm tak zet zet a. Hmabak a la awm a, mahse vawiihah kan sawi vek seng lo ang, a rem chan dan ang zelin chipchiar zawkin, ziate pawhin kan la thlen turah ka ngai a, mamawh kan sawi kim vek seng lo a ni.

Zirtirtute pawh keini pawhin a thenah chuan MLA fund atangte pawhin kan han ruai ve nawk nawk a, mamawhna a sang a, mipui kan lo tam zel a, zirna sang zawk kan lo duh zel a, ‘*a aw b*’ leh ‘*mai a lum e*’ tih ringawt lo deuh kha hmasawna tur tam tak kan nei a, chungte chu kan hriat sa vek mah ni se, chutiang mamawhtute zingah chuan keini pawh kan awm ve zel a ni.

Demand No. 24, Health & Family Welfare-ah hian lawmthu sawina tur tam tak kan nei a. Covid dona kawnga an hmalakna kha tam takin han sel thin mah i la khatiang tak khan, fim takin, tawngtaina nen kan Health Department-te khan hma la lo se la engang tak hmachhawn ang i maw tih te pawh hi ngaihtuahnaah a awm rum rum a ni. Thil thar, ngaihtuahna a la awm ngailo hetiang hian kan ti tawha a tha, ‘hetiang hian tih a tha lo’ tih awm thei si lo kha a ni a. Harsatna tam tak karah mamawhna leh tulnaah department-te hmalaknain ram mipui thawk ho thei turin leh hma la tlang thei turin min pawtkhawm a ni. Khatiang thawh hona tha kha, ‘a tha lo e, engatinge’ ti ang zawnga ngaihtuah theih lek lek tawngkamte a awm thin a. A hunlaia tha kan tih teh lul nen tun hnua hian hetiang zawhna hi a lo pian chhuah theih aw, kan ngaihtuahnte pawh hi kan in-check nawn leh a ngai awm mang e ka ti thin. Hripui karah pawh hetiang anga min han hruai mek thei te hi thil lawmawm a ni. Lunglei-ah chuan oxygen plant hmun hnihah, kohhranah leh sorkarah kan nei ta a, Trauma Centre leh RT-PCR laboratory puitling tak kan neih theihna tur pawhin hma lak mek a ni. Sorkar hmasa atanga hma lo lak tawh hlamchhiah mai lovin doctor’s quarter leh CMO building-te, Covid vei enkawlina tur bik Civil Hospital-a dah a ni te leh ICU kan han nei ve ta te saw hmasawna ropui tak a ni a, kan lawm a ni.

Chutih karah chuan ka sawi nawn leh thin pakhat chu, Zobawk PHC saw a building leh doctor's quarter-te pawh a awm a, tlem a zawng han thawm that leh chuan anih tur ang tak a hnathawh theihna tur a ni a. Chu chu kan Minister zahawm tak hian min lo hriatsak se la. Kan sawi tawh thin a hmalakna pawh a kal mek niin ka hria.

Demand No. 21, Higher & Technical Department-ah hian lawmthu sawina tur kan neih chu, MZU Southern Campus nei tura kan inbuatsaih mek leh tunah hman tan nghal a nih theihna tura he sorkar-in hma min laksak a, ke min penpui hi lawmthu kan sawi a, kan nghakhlel tak meuh a ni tih ka sawi duh a ni. (A tawp nan, Pu Speaker, khawngaih takin, minute sawm chu kan lo hmang zo ve leh mai a)

Demand No. 40, Commerce & Industries hi sawi hlawh tak a ni. Tukinah pawh kan sawi tawh a, zawhna ah khan sawi zui zel tur a awm a, a rawn chhuak hman ta lova, chu chu Tlabung lama Indo-Bangla border trade tur chungchang hi a ni. Kan beisei aia hmian saw lai saw a rawn thleng thut dawn niin a lang a. Ram lai a nih angin a remchang bik em em a, a then chu hmar tawpah, Silchar bulah, Vairengte-ah, a then chu khawchhak tawp Champhai-ah, a then chu chhim tawpah a ni a. Saw lai border trade tur saw ram lai tak, chhim leh hmarin kan hman tangkai theih tur a ni. Tunah sawn kawngpui a kal mup mup a, laih mek a ni a. Saw saw a tlang thlak chuan intermediate lane-a kal tur a ni. Ramdang nena kan insumdawn tawna hi a kaw pup maithei a, kan inrin hma hian. Trade-ah chuan 'hralh leh lei' a ni a, tuna kan rilruah chuan, "chu chu kan lei ang a, tlawm zawkin kan lalut ang, chu chu ramdang atangin kan hmu thei ang" tih hi a ni. Chuti lo chuan lei leh hralhah reng reng, sumdawnna ni loah chuan a hralhtu hi an hlawk zawk thin. Chuvang chuan, Trade & Commerce Department hian sumdawnna lo inhawng mai tur, zawlneite pawhin an lo sawi hi lo inbuatsaih lawka lo inpuahchah a ngai khawp mai. Eng nge kan hralh anga, engnge tam zawka kan hralh theih ang, engnge kan lakluh aia tam kan hralh thei ang, khawi hmunhma hi nge kan luah theih ang tihte pawh hi kan ngaihtuah ngun a ngai hlein ka ring a.

Trade & Commerce department hmalakna hnuaiah tunhnaiah Lunglei Market sak thar a ni a, a lawmawm em em a ni. Sak turin ruahmanna a kal a, cheng vaibelchhe sawm pali leh tlem a ni a. Hmanni lawkah extension min pe tawh a, kan luah thei tep tawh bawk a. Hmanni lawkah khan Agri marketing Centre, sorkar hmasa lam atanga hma lo lak tawh hlamchhiah lova kan kalpui mek chu Minister zahawm tak hoin kan han hawng tawh bawk a. Chumi piahah chuan Cluster Handloom Training Programme min kalpui dawn bawk a kan lawm em em a, department leh a minister chungah lawmthu kan sawi a ni. Chutih lai chuan Lunglei-ah sawn Industry Office tha deuh mai kan nei a, tunhma atanga awm tawh, lianpui mai niin a thawl em em a, a luahtu lam an tam tawk lova; chu chu min hriatsak se la. Chumi piahah chuan mawi leh nalh zet maiin training centre, khawpui laili takah a awm a, tangkai lehzuaw zawka hman a nih theih

nan kan Minister leh Department-te pawhin min lo hriatsak sela kan duh hle mai. Kan sorkar leh a enkawltu department-te chungah lawmthu kan sawi rualin, he kan Minister zahawm tak tak pathumte Demand hi, “hawh u, lawm takin i pass ang u” tiin kan insawm nghal a ni e. Ka lawm e.

**SPEAKER** : Tu nge han sawi leh ang le? Group Leader-te kan sawm dawn nge kan chawl zawk dawn? Kan hriselna te a inchen lova, thil ei leh in inkar hlat lutuk tuar lo awm theih a ni a, chulai chu kan hriatthiam pawh a ngai ang a. Kan chawl mai dawn em ni ang? Awle, a nih chuan dar engzatah nge kan luh leh ang? Dar 5:30 PM aw? Awle, Dar 5:30 PM ah kan lut leh dawn a ni.

### **5:30 PM**

**SPEAKER** : Tunge sawi leh ang le? Aw, Member zahawm tak Pu C. Ngunlianchunga ka sawm e.

**PU C. NGUNLIANCHUNGA:** Pu Speaker, ka lawm e, sawitu an tam tawh a, a hmasa ber atan kan sawi duh chu Demand No. 22, Sport & Youth Services-ah hian. Lawmthu sawina a tam khawp mai a, kan bial lam te pawh lawmthu sawi tur nge sawi loh tur pawh hriatthiam a har a. Zawhnaah pawh kan zawt a, PMJVK Scheme-in a cover area kan ni a keini hi, chungah te chuan nimin lamah khan DC & MA Minister zawhna a chhan naah khan a plan kal dan tura kha district level atanga kal a, State level a kal tur a nih laiin (khami lo kal tawh a kha), hei, a hminga MLA leh PMJVK cover area MLA ka nihna angin engmah kan hre lova, churang chuan a hna awma pawh sem rual dan a mumal lo ang reng khawpin ka hria a, zawhnaah pawh ka zawt a, ‘Volleyball Court, Lawngtlai’ tih ringawt te a ni mai a. Lawngtlai-ah khian veng tam tak a awm a, khawilaiah nge dah tur a nih pawh kan hre chiah lova. Tin, phullem phah chungchangah pawh kan sorkar lai khan Central YLA field-ah pakhat kan phah a. Tunah khian College Veng, Lawngtlai Vengpui leh Mampui-ah te phah leh tur ni awmin kan hria a. Hetianga veng mal mala kan neih dawn chuan kan lawm lo ti ila, lawm loh ngawt chu a rem chiah lo mai theih a. Mahse chu ai chuan sem zai zawk ni ta sela, entirnan: Bungtlang South te, Lawngpuigath ah te awm sela chuan a cover area kha a zau dawn a ni. A mamawh, a hmangtu tura te pawh an tam zawk dawn a. Churang chuan vawiiinah hian project a siam theih avang rigawta, kan mamawhna leh a tulna hmun thlir lem lova kan ti thin erawh hi chu a lungawithlak em em lem loh a ni tih kha kan sawi duh a ni.

A pahnihaah chuan, Tourism Department hi helaiyah pawh hian ka sawi tawh a, session-ah hian kan sorkar lai khan Bungtlang South kan bial ve ah sawn Tourist Department-in tourist lodge sa a, kan sorkar lai khan hawn/commission theih mai tur, eng emaw a chhunga bungrua tlema zawng han ngaihtuah chuan hawn mai theih tura

dah tawh kha vawiin ni thlengin enzui a awm tawh lova. Hninin a to hnan a, quarter thenkhat tuten emaw an luah a, hengte khi kan Minister chak tak hian, ‘chak’ tih kan sawi uar bawh a, nikum lama kan sawi ang deuhin bawh chak tak han tih ang zawng te pawh hian, ‘a chak a ni’ tih chu a lang mai a. Bugtlang South Tourist Lodge kha sak nan khatiang zat zat sum leh pai sen ral ni tawh, hman mumal loha a awm mai khi a uihawm hlein ka hria a. Chuvang chuan, tun sorkar kumtharah chuan engtin emaw tihpuitlin hram dan awm thei sela tih kha kan sawi duh a ni.

A pathumnaah chuan Demand No. 48, Information & Communication Technology hi, keini hi Lawngtlai lama haw phei chuan telephone a biak hleitheit loh a ni a, Lawngtlai khawpuiah pawh sawn network hi a chhe em em mai a, Jio phei hi chu awm lo tluk a ni a, nikhatah darkar 12 hi awm sela, darkar khat lek that chang te, that loh chang te a awm thin a. Mobile ah hian sim card pathum a vuah hleitheit si lova, a mangang thlak khawp mai a, kha kha min hriatsak sela, Lawngtlai khawpui saw.

Chumi piah lamah khawthlang lamah kan hriat theuh angin tun laiah Covid-19 avangin School kal theih a ni lova, thingtlangah pawh online an ti a, an khua atanga km 5-ah te, km 7-ah te signal awmna bik kha a awm a, chungah te chuan kalin an ti thin a, 4G phone anih loh phei chuan thil tih an harsat khawp mai a. Chungte chu a bikin Lawngtlai District leh Lawngtlai West lam, Tuichawng area-ah hi chuan Airtel hi chu a tha leh lawi a, a bak BSNL leh Jio phei hi chu a hmantlak loh hrim hrim a. Chutih rual chuan Diltlang te, Bungtlang South (Changte Lui) chho velah khuan network a tha lo em em a ni. Thil pakhat min react atana kan duh em em chu, Thingkah-ah khian PMJVK atangin YLA Information Centre cheng 5,00,000/- a sak tur a awm a, kha kha YLA te ho hriat dan chuan, NECS Lawngtlai, Thingkah khaw bulah 5<sup>th</sup> IR Batallion hmun tur an sa a, chumi chungchangah chuan YLA ten he laia kan bial chhung, kan area-a contract lian a awm a nih chuan khawtlang tana thil han tih sak ve dan kawng a awm a ni tih hriate ina an sawi dan a ni a, “kan dil a, kan sak sak ang che u, kan sak ang che u min ti reng a, amahrawhchu tunah hian nuai 5-in sak tur min ti e” an ti a. RTI zawhnate ka han en chuan, kha kha NECS ni lovin PMJVK atangin dah a ni a. An mangang khawp mai a, “kan sa zo thei dawn lova, a chhawng kan duh v e si a,” an ti a, MLA fund min han dil a. Mahse kei chuan, “MLA fund nena convergence kha chu a remchang lo ang e, dil belh leh ngawt mai teh u” ka ti a, khang te kha engtin nge hmalak zel a nih theih ang, sak puitlin a ni thei ang em tih kha min react atan kan duh a.

Tin, Demand No. 20, School Education-ah hian MLA zahawm tak Champhai North bialtuin a bial a NABARD hnuia School repair a that zia te a sawi a, a lawmawm ka ti. Khatiang ang vek khan kan rama hnathawh hi thleng sela, a tak hmuh tur awm se a tha ka ti a. Kha kan hnung kar lama question-ah pawh kan han sawi deuh vak kha; kan Minister zahawm tak bialah erawh chuan duhthu samin a tha lova, ka bial pawh

question-ah ka siam a, lo chhuak turah ka ngai a, naktuk khi education subject hun kha a ni a. Ka bialah repair hna pakhat a awm ve a ₹8,00,000/- in a thlalak te pawh kan nei leh thlap mai a, engpawh nise kan pawisa leh an hnathawh hi inmil sela. Tunah chuan MNF ruling a ni a, MNF worker ten hmu se kan thik reng reng lo, a hna erawh chu tha ve rawh se tih hi kan duh ber a ni. Kan Minister hi a minimal tihmualpho ngawr ngawr emaw kan tum lam a ni lova, MZP leh hmun hrang hrang atang tein tun tuma NABARD hna (a vaiin a ni kan ti lo) school 174 sakah hian tha tawklo a tam a ni tih kan hriat avang hian a neitupa ber, a changtu pa ber bialah i kal ang aw tiin, kan la kal ngai reng reng lohna Palsang te, Sakawrdai te leh Darlawn te kan han kal phah ve a, chuta kan thil han hmuh, (a thlalak pawh Pu Speaker, nangmah ngei pawhin i hmuh tawh kha,) khang kha khatiang kha chuan kal tawh lo hram hram sela. NABARD sumte pawh zawhnaah khan “a interest engzat nge” kan ti a, department lam khan, “a interest lam chu kei niin kan hre lo, finance lam tih a ni e” an ti a. Kan hriat dan chuan 2.75% hi NABARD loan interest niin kan hria a, khatianga loan la chawp a thil ti kan nih laia ho lam deuha hna kan thawk a nih chuan he ramah hian hmasawna tak tak a thlenglo ang tih kan hlau hle a ni.

Tin a pahnihna atan Education lama ka sawi duh chu, Lawngtlai East bialtu zahawm tak Pu H. Biakzaua khan a sawi tawh a. Keini hi Autonomous District Council Area-a awm kan ni a, *6<sup>th</sup> Scheduled to the Constitution*-ah hian Elementary School chu Autonomous District Council hnuai a awm tur a ni a. Amaherawhchu sorkar hmasaah khan School eng emaw zat provincialization avangin Mizoram sorkar hnuai la enkawl School 18 lai a awm a. MADC-ah khian School 24 a awm a, chungah te chuan zirtirtute an awm a, an thawhna kha Mara Autonomous District Council-in a enkawl hnuai leh Lai Autonomous District Council-in a enkawl hnuai a ni a, *dual function* awm a saw a remlo a ni. “District Council-ah pek law law dan awm sela” tiin sorkar hmasaah pawh khan kan buaipui nasa a, amaherawhchu an ti fel hman ta lova, tunah pawh hian chutiang tho chuan a kal a. Chutah tak chuan waviinah hian school building sakna tur fund te District Council-in an nei baw si lova, NABARD sum cheng nuai 3,500/- lai kalah khan pakhatmah Autonomous Council-ah a lut ve leh tawh si lova, an awm dan saw an khawngaihthlak hle a ni. Chuvang chuan kan Minister zahawm tak hian District Council-a harsatna awm, elementary school an chan a nih ang sawn pe let mai se, an pe let lo ro ro a nih chuan zirtirtu saw la let vek mai se District Council tan pawh control a harin ka hria a. Hlawh pe lona na na chu hlawh pelotu tan chuan a buaithak thin a ni tih ka sawi duh a. Sawi tur a tam a, bell-in hmet leh der tawh si a a buaithlak hle mai.

LESDE chungchangah pawh hian Champhai lam bilatu khan, “kan dil a, Employment Officer min pe mai” a han ti a, keini pawh Pu Biaka nen hian kan sawi ve nasa khawp a. Lawngtlai leh Chawngte hian Lawngtlai-a Employment Office saw kan intawm a, LDC pakhat chauhin a awp a, thil tih ngaihna a awm lo em em a ni.



Chuvangin, Pu Speaker, khawngaihtakin kan minister hian hei hi (a hmasaah pawh kan sawi tawh a) min dahsak hram dan awm se kan duh khawp mai.

Health & Family Welfare chungchangah hian, a mimal tak pawhin kan Minister zahawm tak leh a puibawmtu Dr. Thiamsanga hnenah pawh hian lawmthu sawi tur a awmin ka hria a. Han biak chungchangah te an polite em em a, amaherawhchu department ang erawh chuan kan lawm lo a ni, chhimlam hi chu. RTPCR kan MLA zahawm takin a donate kha an vuah duh tlat lova, High Court-in ‘hmang rawh u’ a tih kher ngai te hi, chhimlamah hian mihring tam tak kan awm ve a, Aizawl chauh hi Mizoram a ni lova. Chutiang chuan tunah Covid-19 avangin harsatna nasa tak kan tawk a, damloh chauh tawh hnuah te Lawngtlai atangin Aizawl-a rawn inphurh vang vang a ngai a. Dik tak chuan ICU *full-fledged* te pawh hi Lunglei-ah tal hi chuan min dahsak ve sela, chutah te chuan damlote kan inenkawl ang a, kan thih lohna turah hian tam tak hi chu kan thi tlat a ni. Chuvangin Pu Speaker, a mimal ang chuan lawmthu ka sawi a, a department ang chuan kan lawm lo a ni. Tunah pawh High Court-in ‘bun rawh u’ a ti a an bun mai thei si a, a hma zawng khan min bun sak sela an bun a ni mai ang a.

Pakhat leh chiah, Pu Speaker. Health Minister-i nih laia nangma hova Health Clinic Centre min sak sak kha Pathian leh kan hotute duhsakna avangin kei pawh sorkar-ah pawh ka lo awm ve tawh a, chulai pawh chuan vawi tam tak kan Principal Director hnenah pawh ziak nen, tawngkam nen; Secretary hnenah te pawh Health Worker dahsak turin ka nawr ve thin a, mahse dah a awm mumal hleithei lova. Kan MLA thenkhatte chuan an bial pumpuiah pahnih lek an awm te an ti a, keini bialah chuan Health Worker pakhat hian khaw 5 khaw 6 te a cover a ni. Tunah pawh chu chu kan dinhmun a ni a, chuvang chuan khalai pawh kha Mizoram a ni tih hi hria ila, opposition bial a ni emaw, ruling bial a ni emaw lam ni lovin Mizoram tana roreltu kan nihna lai hi hria ila tih ka sawi duh a.

Pakhat chiah, Pu Speaker. Ka bialah hian Damdawi In pakhat a awm ve a, Lawngpuigath-ah NRHM hnuai atangin Damdawi In sak an zo tawh a, mahse vawiin ni thleng hian a la function lova. Chuta tanga hnai ber chu Bungtlang South-ah PHC pakhat kan nei a, vanduaithlak takin doctor a awm lo reng mai a. Kan sorkar lai kha chuan kan dah a, a nghet mai a. Tunah hian PG a zir dawn avangin lakchhuahin a awm a, kan minister zahawm tak hnenah pawh hian telephone pawhin ka hrilh a. Engpawhnise, a cover area a zau si a, kan retheiin ka harsa tlang si a, “healthcare chungchangah hian *khawngaihthlak* kan ni a, doctor min dahsak hram rawh” ka ti a. Vawiin ni session Demand sawi lai hian ka bial mipuite aiawh leh Pu BD-a bial mipuite aiawhin tih takzetin ka ngen a ni e. Pu Speaker, ka lawm e.

**SPEAKER** : Tunge sawi leh ang? Awle, Member zahawm tak Dr. Vanlaltanpuia ka sawm e.

**DR. VANLALTANPUIA** : Pu Speaker, ka lawm e. He House kaihrui turin rorelna dik tak i kalpui turah ka ngai a. Ka hmaa mi khan min 15 a sawi a. Pu Speaker, hei wawiinah Minister zahawm tak pathum ten an Demand he House-in a pawmpui atan an rawn pharh a, kan han sawiho a, a lawmawm hlein ka hria. Parliament nen a kan tihdan inang lo deuh hlek hi a awm a. Parliament-ah chuan Union Finance Minister-in budget a han pharh a, ni eng emaw zat an han chawl lawk a, chutah chuan Parliament-a department related standing committee 24 ten uluk takin an lo zir a. Chumi rawn pharh leh a nih ni chuan an sawi lutuk tawh ngai lova, a tha tur ang khan fel takin lo en tawh thin a ni a. Keini hi Demand an rawn pharh hian kan lo chipnawi nasa thei em em a, chuvang chuan thahnemngai takin bialtute pawhin an bial theuhte tan hma kan la thin a, sawina hun atan te pawh kan hmang a.

Pu Speaker pakhatna atana ka sawi duh chu Demand No. 22, Sports & Youth Services Department-ah hian thil lawmawm tam tak kan hmu a, Mizoram tan thil tam tak a rawn hnutchhiah a, a lawmawm hlein ka hria a. Olympian Lalremsiami, hockey discipline-ah kan han nei te hi a lawmawm em emin ka hria. Tin, tun Summer Olympic, Paris-a neih turah pawh hian mi eng emaw zat kan thawn leh thei turah ngai ta ila. Amaherawhchu he House hi kan *play* nasa mah mah thin a. Pu Speaker, wawiinah hian i vei lama mitena sports-in duhsakna zawng zawng dawng anga an han sawite kha ka lo khawngaih deuh hlek a. Ka han enchiang a, NABARD sum atang pawh hian nuai-ah cheng 2,000/- emaw chauh hi an lo la dawng a, department dangte chan ang tho kha a ni a. IT leh Tourism phei chuan pakhatmah NABARD atang hian pawisa an la dawng lova. Chuvang chuan, midangte aia tlem mah zawkin sum an dawng a ni tih kha kan hriat a thain ka hria.

Pu Speaker, ka biala mi 'Lena Stadium', ministry hmasa a kan siam hi kan minister hian khawngaih takin a wind-up naah khan rawn react se ka duh a. Lena Stadium hi Serkawn-ah din a ni a, amaherawhchu a size hi a tling lo em em mai a, cheng tam tak senga sak ni si engvangin nge hei hi tling lova sak a nih tih hi khawngaih takin kan minister khan min react se ka duh a ni. Tin, ka bial hi min duatlo lek lek ka hria a, ama hnenah pawh hian ka sawi deuh a. Lunglei area-a tuna sports infrastructure an han dah ho zingah hian tlem min la pe chau deuhin ka hria a, he House kaltlang hian ka ngen duh a. Mahse tunhnaiah hian All India Football Federation-in an approve tur ang futsal ground leh stadium-te kan dah dawn niin ka hria a, kan lawm em em a. Hei pawh hi engtikah nge tender koh a nih theih ang tih te pawh rawn react se ka duh khawp mai.

Tin, Pu Speaker, he House-ah hian Mizoram tan thahnem ngai takin ro kan rel thin a, a then pheih hi chu zun zunga kan chhuak tihloh hi chu rinawm takin kan awm nileng thap thap thin a. Tin, kan phak tawkin thu kan sawi thin a, chutah chuan official-te pawhin theih ang angin minrawn tawiawm thin a, duty angin anrawnawm thin a. Amaherawhchu, House-a kan thusawi tam tak hi, a kum lehah kan han thu leh a, engmah hmalakna awm chuang lo hian a awm fo mai a. Chung chu thahnemngaih thilah vawiiinah hian sawi leh ka duh a.

Demand No. 43, Tourism hi Mizoram-ah hian kan concept hi a diklo nge ka hre lova, tlangah tourist lodge tha pui puite kan sa a, European type commode leh thil hrang hrang kan fit a, sap thil tih dan angin. A chhan chu hei, hmanni khan *Task Force for Music & Arts*, Nagaland ho buatsaiha min sawmnaah ka han kal a, anni ho chuan engkim hi Naga tihdan dik tak ang hian an ti a, kan hriat angin hei tunah pheih chuan Hornbill Festival pheih chu *international festival* tha tak a lo ni tawh a, mi an kal nasa em em tawh a. Keini Mizoram hian kan tourism concept hi kan ti diklo nge, kan ti changkang lutuk nge ka hre lova. Chuvang chuan, Mizo zia anga kan kalpui hi a ngaiin ka hria. Chutiang kawnga tan chuan ka rawt leh duh a awm a, session hmasa pawhin ka rawt tawh a, “local tourism promotion hi i ti teh ang u” tih hi ka sawi duh a ni.

Kum liam taah khan ka bula thu Pu Chhantea, kan Minister zahawm tak nen hian South Korea, Jeju Island-ah kan kal a. Tlangkang hmun *volcanic tube*-ah te kan kal a, tin, volcanic-in a siam tlangte a hmuna te kan kal bawka, tourist tam zawk chu an mahni Korean ho vek anni. Chuvang chuan, ‘tourism’ kan tih hian vaite, sapte kan ramah lo kal hum hum turah kan ngai nghal a, ngaihloh hi thain ka hria a. Ka sawi fo thin angin, chhimpa hi hmarah zin sela, hmarpa hi chhimah zin sela, inzin pawlh nuk nuk ila, chu chuan thil tam tak a thlenin ka ring a. Tin, Festival Tourism te pawh hi, Christmas cheimawi te kan ti nasa em em a, Aizawl pawh a mawi em em a. Chuvang chuan, “festival tourism te pawh hi engati nge kan kalpui loh” tih hi ka ngaihtuah a, vawiiinah hian he House kal tlangin ka han sawi leh duh a ni e.

Tin, School Education, Demand No. 20, Pu Chhantea chan hi ka sawi leh duh a. Ka la sawi miah lova, NABARD sum hmanga school repair kha, ka bial pawh kan lawm em em a, ka bial mipui aiawh pawhin ka sawi duh a. Zotlang HSS chu ENREGA leh khawtlang mitlawmngaite thawhkhawmin kan sa a, a ruhrel tlema zawng a ban te, a beam te a lo awm tawh avangin pawisa kha estimate ang lovin, kei pheih chuan a chhawngin ka sak tir a ni. He House-ah hian a picture pawh nakinah kan peih hunah karawn pharh ang a, ‘a tha khawp mai’ tih ka sawi duh a ni. Estimate-ah chuan floor khat chauh a ni a, ka bialah chuan floor hnihin tunah hian kan sa tih te kha karawn sawi duh bawka.

Tin, Pu Speaker, SSA teacher hi Mizoram-ah tam tak an awm a, kan ram tan pawh tangkai takin an service te an hlan mek a. Heng ho hi pawisa engmah increment awmlo, *fixed-pay*-in an la nasa em em a, an mangang a ni. Tun hnaiah Tripura sorkar-ah chuan absorption an ti nasa a, hengho te hi state sorkar pawisain an lalut a, an dinhmunte pawh a tidanglam a ni. Khawngaihin SSA te (kei pawh a huhotein min lo hmu ve tawh thin a) vawiinah hian he House kaltlang hian ka han sawi sak ang a, kan state government hian a theih chuan state sorkar-ah ‘apsorption’ ka ti dawn nge, lalut ila, an hlawhte hi mumal zawka en fel a tha khawp mai.

Tin, kan Minister hnenah lawmthu, NABARD kaltlanga kan school-te min sak sak ho hrang hrangah lawmthu ka sawi rualin, ka bialah hian school chhe zual pali panga a awm a, chung zingah chuan Phaileng South Primary School te, Mausem school te, Bualpui Middle School te te hi a chhe em em a, hengte hi ka report theih chin a ni a. Tin Rawpui Middle School-ah hian zirtirtu kan indaih lo tak zet a. Tin, Pangzawl HSS leh Chhipphir HSS te hi lumpsum status-ah an awm a, hengte hi Adhoc status-ah min dah sak ve thei ang em tih te kha ka sawi duh bawka a ni.

Pu Speaker, Demand No. 28, LESDE hnuaiyah hian Mizoram Youth Commission kan awm a. He House kaltlanga ka han sawi duh chu, budget-ah pawh hian 2.6 crore lai ‘All India Service’ atana kan inbuatsaihna turin *tithe* an rawn dah a, kan CM chungah pawh kan lawm em em a. Hun hmasa nikum lamah IAS (prelims) atana kan inbuatsaihnaah hian social media-ah te an *troll* nasa a, “MCS an exam leh tho si a” tih a ni a. Nikuma kan programme kha tawi tea sawi lawk ka duh a.

Covid hran em em lai, February thlaah khan Delhi-ah kan thawn thla a, Chanakya Academy-ah leh ALS-ah kan dah thla a, 10 ve vein. Thla thum chiah kan dah hman a. Tin, khata kan dah khan Prelims 20-21 kha June thlaa exam tur a ni a, chumi inbuatsaihna atana kan tih chu a ni a. Tin, kan agreement-ah khan, “Prelims hi ka exam ngei ngei ang” tih a ni a, chutah chuan an thu thap a. Tin, “kum thum lokal tur (three consecutive years) hi engpawh ni se ka thu zel ang, ka tling lo anih pawhin” tih a ni a. An agreement angin an la thu vek dawn a, MSC lo inziak tling pawh nise All India Service-ah hian an la thu zel dawn a ni tih ka sawi duh a. Zoram mipuite mithmuhah hian, MCS exam kha November-ah an lo tih leh taka an han exam khan kan agreement an bawhchhe (violate) lo tih hi he House-ah hian ka sawi duh a ni.

A tawp berah chuan, Pu Speaker, Higher & Technical Deptt-ah hian Vice Chairman nihna kan CM hian min pe ve a, hei hi mahni chan ang deuh te a lo ni ve a. Thil pakhat he House ka ngen duh chu, tunah hian NIT hi ka sawi thin a, a buathlak em em a ni. Heti hun laia kan din rualpui NIT dang ho chu hma an sawm em em tawh a, Mizoram hian he technology institute a ropui zia hi kan la hrefiah lo niin ka hria a.

Chuvang chuan, he House kal tlangin ka ngen duh a, “NIT construction buaina te hi i ngaihtuah fel vek ang u” tih te ka sawi duh a. Mizoram University Southern Campus hi tunah hian MHRD lam hian self-financing course lamah te hian min sawipui an tum a, kan House Leader zahawm tak pawh ka ngen duh a, hon. Minister pawh. Khawngaihin hei hi politics ang pawha kan inrawlh a ngai nasain ka hria a. Tunah hian MHRD lam chuan self-financing course turin min lo bei nasa a, “chutiang chu kan state hian a tlin lo e, kan ti a ni” tih te ka sawi duh a.

Tin, NAARC assessment (third cycle) a tan Serchhip college-in Grade-A an hmu hi he House kal tlangin ka lawmpui a, hun lo kal zel turah pawh college dang kan institute te pawh hmasawn zel turin chonaah hei hi lo la se tiin hei hi ka sawi duh bawka a.

Health Demand pawh sawi a chakawm em em a, Commerce & Industries pawh, mahse ka sawi hman ta si lova. Khawngaihin, he Demand an rawn pharh te hi, “he House hian lungrual takin i pawmpui ang u” tih ka rawn sawi a ni e. Ka lawm e.

**SPEAKER** : Member zahawm tak Pu Zodintluanga Ralte tunah ka sawm e.

**PU ZODINTLUANGA RALTE** : Pu Speaker, ka lawm e. Demand No. 24-ah ka han lut nghal ang a, healthcare scheme bawka tan ka duh a.

Health Department hi healthcare scheme *nodal* niin ka hria a, thingtlang hmun hrang hrangah lo buaipuitute anni a. Amaherawh chu House-a zawhna kan zawh hian kan Health Minister hian Finance Minister, (Chief Minister ni bawkah) a kawkwawp zel mai a, responsibility a la ngam turah ka ngai a ni. Nodal department kan nih chuan central-ah pawh minister chuan counterpart department an nei a, heng laiah fund a rawn kal a, chungah chuan mawh an phur a. Chutiang chiah chuan, Healthcare Scheme pawh hi a kengkawhtu department a nih chuan a changtu minister hian mawhphurna, responsibility la ngam sela, chuti ni lova, “hei hi chu ka hriatpui lo, hei hi chu Chief Minister chairman-na hnuaiah a awm” a tih zel chuan hma kan sawn dawn lovin ka hria a. Tunah pawh miretheite’n puk chawpin he scheme-a lut turin mi pawisa te an puk a, harsa takin healthcare scheme-a an luh theihna tur atan pawisa an seng a. Khang mirethei tam takte khan an damloh inenkawlina bill vawiinah pek theih lovin vaibelchhe 40 chuang tunah leiba a awm tih hi tlang hriat dan a ni. Chutiang anih si chuan, (nimin lamah pawh he House-ah ngei kan sawi tawh a), nikum budget-ah te tun kum budget-ah te healthcare scheme atan pawisa kan dah loh tih kan finance minister khan niminah chiang takin a sawi tawh a. chutianga pawisa bat awm teuh bawka si, budget-a dah belh bawka siloh laia, vawiinah thingtlang hmun hrang hranga kan thawhpuite, kan MLA

puite pawh vawiin *recess* lai te pawhin ka zawt a, healthcare scheme buaipuiin mi harsa zawkten he scheme an avail ve theihna turin tunah hian sum an pelut mek a ni, May thla thleng hawn niin ka hria a. Sum pek tur a awmlloh chuan chungte chu tihtawp mai a tha lawm ni, mi pawisa puk chawpa healthcare scheme beiseite pawisa pek tur a awmlloh chuan? Kan Minister zahawm tak hian mi harsa zawkte an damloh inenkawl na tur sum bat hi midang puh lovin pek dan tur dap turin ka rawn ngen a ni.

Covid kan hmachhawnaah hian thil tam tak sawi tur a awm a. Kan sorkar hi he Covid kan hmachhawnaah hi chuan ‘a fail’ ti ila kan sawi sual ka ring lova. State sumte hman tum lovin mimal thawhkhawm atanga bungrua kan han lei te kha a zahthlak ka ti a ni. State danga Covid veite sorkar-in a enkawl dan an sawi tawh a, chipchiarin ka sawi tawh lo ang a. Keiniah chuan vengchhungah tu emawin virus a lo kai a, 4C-ah dah tur an ni nghal tawp zel mai a, 4C chu khawtlang enkawl tur a ni. Chutiang ang chuan thingtlangah te pawh harsa takin 4C-ah an inenkawl tir a, sorkar atangin tanpuina hmuh tur a awm lo a ni. Tin, sorkar pawhin an ring tawk lo a ni ang, *special audit* te a ngai kha a paw ka ti a. Sawi tur tam tak awm mahsela khalai a kha chu ka duh tawk phawt mai ang a, Pu Speaker.

Demand No. 43 Tourism hi, tunlai khawvelah chuan Tourism Department hi sorkar sum hnar ber, khualzinte atanga sum hnar siam hi khawvel ram hran hrangte an inelna a ni a. Keimahni ram chhung ngeiah pawh state hrang hrang ten tourist laluta state economy sum siam tha turin hma an la nasa em em a ni. Kan thenawm state Sikkim leh Meghalaya hi an tang em em mai a, an tourism/tourist policy atanga an sum lak luh hian state economy nasa takin a tanpui a ni. Kan ramah ve thung chuan Pu Speaker, han in enchhin ta ila: Kum 2019-20 MNF sorkarin budget a pharh hmasa ber kha Tourism Department tan 978.71 lakhs chu budget-ah dah a ni a. Tuna budget estimate-ah hian 137.45 lakhs dah leh a ni a, kum thum chhung hian a punna chu 16.28% vel chauh a ni. Hei hian a entir chu, Tourism Department chu Mizoram-ah chuan department thangduang lo tak a ni tih hi a tilang a ni. Kumin BE-ah khan 350 lakhs chauh mai he department atang sum thawhchhuah ve tura ruahman a ni a. Chumi awmzia chu kan sorkar ina tourism a ngaih dana hi *Sumthulinu*, sum hmang ral tur ringawt hian a ngai tlat mai a ni. Chu aia chuan he department-ah hian sorkar hian nasa zawkin sum dah sela, hmasawna tur, khualzinte hipna tur infrastructure te a ni emaw, thil tha zawk tih nan hian pawisa hi an mamawh tam a ni. Chutiang anih chuan state dang ten sum tam tak lakluh nana an hman hi keini chuan *Sumthulinu*, sum sen ralna mai, eng kut kut emaw, festival emaw kan ti a, officer leh tute emaw an lam chuai chuai a, ti khan a zo der mai a ni. Chuvangin Tourism kan kalpui dana hi, kan ramin sum tam tak kan thawhchhuah theihna tur atan sorkar hian he department hi ngaipawimawh zual sela, sum te pawh han dah tam deuh sela tih hi ka rawn au chhuahpui ve a ni.

Tin, Demand No. 20, Education hi a pawimawh zia chu kan hre vek awm e. Amarawhchu sorkar kal tawhte pawh a ni ang a, wawiina sorkar te pawh hian Education kan kalpui dan hi kan ngaihtuah chu a ngaiin ka hria. Vawiin nia Minister chak kan tihte chu central scheme atanga zirtirtu la thei te, NABARD loan atanga school sakna tur ‘chuti zat a hmu’ tih te hi Minister tha ah kan dah tlat mai a ni. Amaherawhchu, a zirtirna lam, kan fate ina an thiamna lam hi bul tan nana tan lak a ngaiin ka hria a. Khawvel-ah thil thar kan hmuh dawn chuan *education university* atangin thil tam tak a rawn chhuak a, university tha a chhuah chuan wawiin nia kan thil thar ber ber smart phone emaw, heng kan hman zawng zawngte hi an rawn siam chhuak a ni. Khang siamchhuak tute khan company an din a, mi tam tak eizawna an siam sak a, a ram economy a siam tha thin a ni. Chuvangin, kan educational policy, ‘hei hi zir tur’ tia inzirtir ngawt lova awze neia kan kal hi a hun tawhin ka hria. Tunah chuan, “kan minister chu a chak khawp mai, lock-down laiin zirtirtu tam tak a la” tih te hi kan insawi theihna te a la ni a. Tin, han en ila, Aizawl khawpui chhung leh Lunglei-ah te pawh ani ang a, khawpuiah te chuan sorkar sikul aia private sikul thlan te hi kan inenletna tur atan a pawimawh hlein ka hria. Education Department-ah chuan ka han duh tawh rih phawt mai ang a.

Demand No.18, Printing & Stationery ah hian tawi tea rawn sawi leh ka duh a. Pu Speaker, ka sawi tawh ang khan tu sorkar mai pawh hianin Printing & Stationery hi sum siam tura kan ngai hi a fuh lo hi ka ti thin a. Sorkar-a kan awm ve thin lai pawh khan, “sorkar department hi chu sumdawng tur kan nilo” tih hi ka ngaihda a ni thin a. Tunah pawh hian sumdawn tirin department hrang hrangte an mamawh te lak tir kan tum a. Congress sorkar-ah a ni emaw, MNF sorkar ah a ni emaw a hlawhtling thei tlat lo a ni. A department minister ten theih tawp an han chhuah a, officer-te an kova, Printing Deptt. dawr turin anmahni thawhpui Minister te an han ngen thin a. Hei, ka bulah Minister hlui Pu Ngunlianbunga pawh a awm a, zawhna an han zawt a, amah department ngei pawhin khatih lai khan an lo dawr a lo ni. Chuvang chuan, Printing & Stationery hi chu sumdawng tur hian ngai lo ila, khawl tha tak tak an neihte sorkar-in a mamawhna thil chhut tur Calendar te phai lama kal ngai tawh lovin an chhu thei tawh a ni. A tihtheihna hi hmang tangkai ila chuan Printing & Stationery kan enkawl dan hian hma a sawn ka ring a ni.

Demand No. 48-ah hian ka han lut leh ang a. Kan hunlai khan Pu Speaker, ICT hi ka chang ve a, khatih laia officer-te vek kha an la ni a, an fel a, an smart a, department ka chanve UD & PA Deptt. kha *paperless*-a siam tumin hma kan la a, kan ti thei a ni. ‘EU office’ kan ti a, ICT hian engkim a rawn tihsak a; mahse khatih lai khan internet te a la chak lova, harsatna chu *connectivity* a ni a. Vawiin niah chuan technology ten hma a sawn tawh em em mai a, BSNL mai hmang tawh lovin private connection bakah kan service provider-te hi an chak tawh em em a ni. Hetiang ang hian kan ICTC department

hian department dang zawng zawng pawh hi *paperless department* ni thei tur hian hma la leh turin kan rawn ngen duh a ni.

A tawp berah chuan, Demand No. 22-ah hian sawi tur tam tak a awm lain, ka hun a tawp tawh si a, minister zahawm takin a min sawifiah sak tur point hnih lek hi.

November Ni 21, 2019-a Unstarred Question-ah Sports Minister zahawm takin, “Aizawl khawpui chhungah stadium chhawng siam tum a ni” tih a sawi kha pawisa sanction a awm tawh em tih ka zawt a, a chhannaah chuan, “₹20 crores (approved/sanctioned) ni 2.9.2018 a awm tawh a ni e” tih a ni a. Ni 2.9.2019-a sanction tawh kha eng angah te nge hmalak a nih tawh, khawi khawiah nge sports stadium sak tawh a nih tih kha min hrilh turin ka ngen a. Tin, Member zahawm tak ten Aizawl West-ah kum 2019-a stadium awm mai tur lawmthu an rawn sawi te kha vawiinah eng chen nge a thlen tawh tih te leh, khelmual chhawng te kha eng chen nge bul kan tan tawh tih te min rawn react sak turin ka ngen duh bawk a.

A tawp berah chuan kan Minister zahawm tak hi, member dangte pawhin an sawi angin ‘Minister chak’ a ni a, a department, Sport budget a hniam zawnga a kal hi a paw ka tihpui a. Central atang emaw scheme dang tam tak atanga kal hi chu infrastructure pual a ni a. Amaherawhchu department chhunga Sport Association-te leh infiam mite tana hmasawna tur hi a tlem chuan, Minister tan chetna tur a awm lova. Chuvangin, a thawk chhuah tam tak, infrastructure ni lo atan hian kan sorkar hian pek belh thei se tih hi ka rawn dilpui duh a. Tin, Pu Speaker, lawmawm kan tih chu... (**Speaker:** I tawp a hun tawh e.) Kan hun lai pawha kan tih theihloh *Racing Track* siam a ni tur hi lawmawm ka ti a, ka *congratulate* duh a. Chumi atan chuan Pu Speaker, a ni chuan Finance Department atangin nuai 250 sanction a lo hmu fel der tawh hi, lawmthu a chungah kan sawi duh a ni. Ka lawm e.

**SPEAKER** : Tu nge sawi leh ang? Awle, Member zahawm tak Pu Lalduhoma ka sawm e.

**PU LALDUHOMA** : Pu Speaker, ka lawm e. Demand No. 22 atangin ka han sawi tan ang a. A hmasa bera kan sawi duh chu, Serchhip Sport Complex-ah khian hun rei taka ta kan lo nghah tawh stadium kha a lo function ve ta a, amaherawhchu vawiin thlengin enkawltu ruahman a ni lova. District Sports Committee-in anmahni bengvarin an lo enkawl ve naw naw rih a. Kan Minister zahawm tak hnenah pawh hian an hrilh tawh a, anniin an enkawl hi a tha ber a, an duat ber bawk a. Khi khi tihngheh ni thei se la tih kha ka ngen a ni.



A pahnihnaah chuan, kan sawi nawn fo mai Sports budget kiamna hi 5.43% a ni a, a chhan a awmin ka ring a, kan House Leader, Finance Department pawh hian tih tlem chhan a nei a nih ka ring a. A chhan chu, hun kal tawh kan enin SEDP atanga sum dawng hnem ber *top 5* zingah Sports Department hi a tel zel avangin, kha lama tang khan phuhruk a ni leh dawn a ni ang tih kha kan han rinpui a.

Tin, MSSC Annual Report-a thil ka chhiar, mak ka tih deuh ka rawn sawi ang a. District Council leh Minority Affairs Department hnuai hian PMJVK Scheme a awm a, hei hi minority area atan a ni ber a. Amaherawhchu MADC-in engmah chan an nei lo hi a mak ka tihpui a, ka vuipui bawk a ni. Tin, a scheme guidelines-ah hian “Education leh Health tan zaa sawm riat hman tur a ni” tih a ni. Chutiang chu a nih laiin Sports Department hian he PMJVK Scheme atang hian cheng vaibelchhe 422.03 an lo chhuh sak a ni, tlat maia na. Tin, UD&PA atang hian, Smart City leh thil dang Aizawl khawpui chan tur eng eng emaw atang khan cheng vaibelchhe 129.86 an lo pawh pen sak bawk a. Khatiang kha Sport Department hi a nih avangin, *Zero* atang pawhin tan se a ngaihtuahawm loh hrim hrim a ni. Department dang ta chhuhsak dan kha an thiam tlat mai a. Amaherawhchu an ti bawrh bawrh a, tun kum kal laiah hian kan remtihpui leh kan pass-pui ni miah lovin sum an lo hmang puk teuh mai a. Revenue Expenditure-ah nuai 65, Capital Expenditure-ah nuai 404.91, a vaiin cheng vaibelchhe 105.57 an lo hmang hem hem mai a ni. Chu chu Supplementary Demand-ah khan an rawn pulut a, awlsam takin kan lo pass sak leh mai a. Kha kha an lo ti thang laklawh tawh a, “Sports Department hi i buaipui lo ang u, an ngaihtuah awm loh lutuk” kan ti a nih chu. State Matching share-ah ringawt pawh hian Supplementary Demand-ah khan cheng vaibelchhe 129 an rawn demand ngam a ni. Kha vang kha a ni a, ‘i discuss ang u’ ka ti a in ngam tlat loh kha. Tin, chu mai ni lovin Sports Department hian restricted tender 32 contract an pe hman a. Ram hmasawna (development) hi nge kan duh a tender-ah hian kan tui zawk tih hi ka hre lova. Hei hi cheng vaibelchhe 265 man a ni. Department hmui tak a ni tlat a ni, he department hi. Tun sorkarah hian Pu Speaker, a budget nei tlem tlem hian an nei tam a, a hlawh tlem tlem hi an hausa a, cheng khat hlawhte hlei hlei hi an lo hausa a ni mai awm mang e aw, ka ti deuh a.

A dawt lehah chuan Demand No. 21 leh 22 kha ni tain ka hria, tah khan ka han lut ang a. Kan bial a Serchhip Govt. College-in NAAC-ah A Grade an hmu a, ram pumpui tana thil chhuanawm tak a ni a. Vawiinah hian ka chhuan zia leh ka lawmpui zia he House kaltlang hian ka sawi duh a ni.

Tichuan, NABARD sum kum sarikh chhunga rulh leh turin kan puk a, chumi kan hman danah chuan kan lut ang a. Firm pahnihin an thawk a, sawi a ngai lova. Heng firm/contractor pahnihte pawh hi kan Chief Minister zahawm takin a pek awm ngawih ngawih a ni te pawhin ka hriatpui a. Champhai North bialtu MLA zahawm tak kha

nichin khan a ‘*hallelui*’ lo chauh mai a, a bial chhung sikul sak that zia kha. Heihi lo ngaithla se ka duh khawp mai. Govt. GM High School hi kei pawh ka kal chhuahna a ni a. Hemi atana sanction khi nuai 73.65 a ni. Education Minister thian pathum - Hrangthansiamia Mizo, Zoherliana Hauchhum leh J. Lahmingliana te’n nuai 73 man kha nuai 50-in an la, phawt maia na; a kal ral teuh. He thian pathum te hian nuai 50 atang chuan nuai 35 in Domus Corporation-ah an hralh leh a. Tichuan, pawisa kal ral hi nuai 38 a ni a, a sakna atana an hman chu nuai 35 chuah a ni. Chu chu a bialtu MLA khan hahipin a sawi mawi a nih chu maw le! A thawktu Domus Corporation-a head mistiri pawh R. Lalawmpuia a ni. A chung hi Dyna Roof tur a ni a, nimahsela Myanmar atangin rangva chhe ber chi, a ziala zial theih chi an hmang a. Zawngtah ziahna atan pawh a tlak loh. A buaithlakna ber chu heng contact hmutute khan an hralh zel avangin, a lo leichhawng lehtute khan work order an dawng silo, headmaster te’n work order a dawng bawk silo, a drawing an hre bawk silo. Engmah hmu lovin heta engmah hrelote khan an pawng sak mawp mawp mai a ni. Ngur Middle School-ah nuai 30.20 sanction a ni. Hnahlan Middle School-a nuai 10 sanction-ah nuai 5-a sak a ni.

**DR. ZR. THIAMSANGA :** *Point of Order*, Pu Speaker. Tuna mi kha NABARD hnuai a repair a ni lo tih House zahawm tak hmaah hian ka sawi duh a ni. Tun repair-ah khan GM High School kha a tel lo tih kha ka chiang a, thu chianglo hetianganga kan han sawi hi chu Member senior tan chuan a hrehawm khawp mai tih kha ka han sawi duh a ni. Tin, a chung hrim hrim kha chu zawngtah ziah nan kha chuan a chi loh hrim hrim a, a khauh lutuk dawn a, keini ang zawngtah heh deuh tan phei chuan kan hmang lo hrim hrim ang.

**PU LALDUHOMA :** NABARD sum bawkin sorkar hmasa khan sak a ni tawh a. Tuna mi hi chu tun sorkar-in an pek liau liau a ni. A contractor hming i hre duh em? (Pu Speaker, ka hun hi an la hek ziah mai a. Hei hi min hriat sak a tha ang.) CB Engineer-te sak leh Allied concerned te sak a ni ka sawi ni. NABARD sum a ni a, Ngur Primary School 10 lakh sanctioned, 5 lakh a thawh; Hnahlan ka sawi tawh bawk. L.M. Middle School, Champhai cheng nuai 10-in Ramnghaka’n a hmu a, a bialtu thianpa a ni awm e, Kulikawn Veng a ni. An Sikul zirtirtu-te nen cheng nuai 3-in thawk turin a ti a, ‘em em a’ an ti a, an in-negotiate char char a, cheng nuai 4-in a hralh; chu nuai 4-a a hralh an thawh chuan engmah work order an hre ve si lova, an Sikul kawt leh eng ilo blacktop nan khan an lo hmang ta a. Engineer-te an lo kal a, “hei hi chu a drawing ang a ni hlei nem, a chung thlak tur alawm, rawng hnawih tur alawm” an rawn ti a, “kan hre ve lo kan hmu ve si lo” an lo ti a. Mahse, a titu ber hian, “kan MLA-in a engah pawh khan hmang ula a pawl lo a ti e, an ti” a ti a. Tualpui ka pianna...

**DR. ZR. THIAMSANGA :** Pu Speaker, *Point of Order*. Kha kha ka sawi miah loh a nia. Khatiang thu dik lo House-a han sawichhuah kha chu House hi a ti zahawm lo a ni.

**PU LALDUHOMA :** Awle, a audio record pawh ka nei e, ka nei tha khawp mai. GM High School Headmaster te hi *National Awardee* ngat an ni a, an rilru a na tih hi ka hria a ni.

Tichuan, ka pianna khua Tualpui ka han sawi ang e. Cheng nuai 10 man a ni a, zirtirtute nuai 5-in an thawh tir a ni. Khawzawl High School, Zuchhip Veng-ah cheng nuai 21 man R. Rualkhuma hnenah nuai 14-in an hralh a, tichuan, an sikul a MR-a thawk Lalhmingliana'n nuai 5-in a thawk ta a ni, nuai 21 man kha. Heti khawp hian “Zirtirtu mithiam awmkhawmna department leh Kohhrana hruaitu awmna department” tia kan lo chhal thin kha hetu khawp hian corruption hian a bual hneh tawh a ni. Dik tak chuan CBI chhui tir tlak a ni. Dulte te, ka bial te pawh sawi tur a tam mai a, mahse, Pu Speaker, ka sawi zel chuan thil dang ka sawi hman lo vang, ka duh tawh ang e.

Pakhat chauh ka han sawi leh duh chu, Inspection Report on Compliance Audit (para 14 (b)) ah chuan, minister car MZ-01/R-8295, (tu motor tak ni ang maw) Ni 21 October, 2019-ah Sakawrdai kal nan 80 ltrs a la a, chu mi ni vek chuan Ratu kal nan 80 ltrs tho a la, chu chu Audit hian a rawn point out ta chat a ni. Sakawrdai leh Ratu chu inhnaih te a ni a, a hran ve vein minister-in petrol a la a ni. Kan awh hi a te lutuk, Pu Speaker; “lui hi a hnar a nut chuan a mawng lam pawh a nu a ni” tih hi a dik mek a ni he sorkar-ah hian.

Demand No. 20 leh 21-ah ka kai chho zel ang a. Zirtirtu pathum keipawhin ka ruai mek a. Kan bial chhung Neihloh khua-ah phei chuan, hmanah chowkidar-in headmaster charge a la tawh a, chutiang khawp chu kan ni a, amaherawh chu, ka sawi peih tawh lo. Tunah hian min hrek a, tuna tanga reilote-ah hian ka bial hian malsawmna a la dawng ve ang tih hi ka ring tlat.

RUSA-ah hian engatinge kan buai em em? Member zahawm tak tak ten an rawn sawi 2019-20 ah engmah an rawn dah lova, tunah khan SMS atan ₹258/- lakh an rawn dil leh chauh a. 2021-ah ₹157/- lakh SMS-ah an dil leh a, kumin, tun kal laiah hian engmah an dah lo. Engtinge a thawktute in enkawl ang a, engtinge in-regularize tehlu ang ni? Pawisa a awm lova, pawisa in mamawh dawn tih hriat reng pawh a budget-a thun tum miah lo ten an enkawl chuan, chu mi department hnuai thawkte chu an vanduai ngawih ngawih dawn tih hi a chiang reng. Hengte hi chu *recurring nature* a ni a, kan mamawh leh dawn tih chu a hriat lutuk a ni.

Tin, Scholarship chungchangah engatinge a hunah kan naute an buai ziah? Kum 2020-21-ah khan engmah an dah lova. Pu Speaker, hmanni khan Supplementary-ah cheng nuai 2,685 anrawn dil chauh. Tichuan, 2021 kum hmasa hmasa leha tan a ni. Heitang chuan Scholarship a huna hmuh ngaihna a awm reng reng hlei nem. 2021-22-ah hian SMS tur engmah an dah lova, khati chungin engtin nge kan faten scholarship an lak theih ang? An mamawh dawn, a lo kal leh dawn tih hriat reng a ni a, kan ngaihtuah lo a ni. Thil dang eng emaw ni hian kan ngaihtuahna hi a luahlan zawk a, “an lungngaihnaa lungngaihpu” rawngbawl na ang ki hian kan ramah hian rawng kan bawl lo niin ka hria. Hei hian ka rilru a ti na thin a ni.

Tin, damdawi thalo tam tak hmuhchhuah a nih thu zawhna chhanna-ah khan kan hmu a, ah lawih tham a ni. Khatiang damdawi thalo te kha engtin nge tih a nih tak zel tih te pawh kha wind up-naah min han hrilh se ka duh a.

Tin, Demand No. 24-ah ka kai tawh ang a. Health & Family Welfare a ka luh hmain, ka bial chhunga frontline workers zawng zawngte an thawhrimnaah lawmthu ka hrilh leh a. Ka bial chhunga kan Sub-Centre neih thenkhatte chuan BP check-na pawh an nei lova, kan leisak thin; hmanni lawkah pawh ka leisak a ni. Serchhip Hospital-ah Pi Laldinpui’n nau a nei a, a fa a thi a. Magisterial Enquiry dah a ni a, Serchhip DC-in a conduct a. Ama hnen ngeiah pawh “mipuiin hriat vat vat kan duh, ti hmanhmawh rawh aw” ka ti a, “kar hnih chhungin ka zo ang” a ti a, anrawn zova, a report pawh ka chhiar ve tawh a ni. Mahse, kha khan recommendation a siam ta a. “Independent Group of Doctors from outside (Serchhip-a thawk Doctor ni lo, hmun danga mite) team-in he mia ka hmachhawp hi rawn chhonzawm teh se” tih hi a recommendation a ni a, chu chu tih a ni tawh em, vawiinah hian a result sawi theih kan nei tawh em tih kha, khilai ka bial mai nilo, district mipuite khian an nghak thuap a ni. Chu chu wind up-naah min hrilh theih chuan a lawmawm viau ang a.

Tin, Pu Speaker, ASHA ho hiAN *assured incentive* an nei ve a, hlawh tlem tea thawk an ni a. Heng hna hnuaihnuung thawkte hi he department hian a ngaihthah emaw ni ka ti a. Niminah Drivers ho chungchang ka sawi tawh, vawiinah ASHA ho. Hlawh an hmuh lohna a rei tawh a, a tlem tehreng nen. “Khawngaih takin he mite hi lo ngaihsak teh u” tiin ka rawn ngen sak duh a. Tin, contract leh provisional employee kan ngahna em em NHM leh *Samagra Shiksha* hnuai a thawkte hi absorb turin study group recommendation thehluh a ni tawh a, kha kha eng chen nge kan kal? Tin, Regularization of Contract Employee Scheme, 2008 kan nei a, chung hnuai a chuan a thawktu ten *deeds of agreement* an siamte honour a ni em, khatiang kha engtin nge an tih dawn tih hi ka zawt duh a.

Tin, Health & Family Welfare Department hi *austerity measures* hian a huap ve lo leh nghal a, an tan hian problem a tling a ni. Tin, SoP thar a lo awm a, an department hnuaiiah “COVID veite ni nga hnuah hna zawm leh vek tur a ni” tih hi a lo chhuak thar a. Health Department hnuaiia thawk an nih avangin an dam hma bik em ni tih kha ka zawhna a ni a. Hei hi order mak tak a ni a.

A tawpna berah chuan, Pu Speaker, kan Health Minister ka ngen duha chu, tuna kan healthcare scheme hi kalpui zel tlakah a ngai em tih hi min hrilh se ka duh a, nge ni, her danglam a ngai? Engatinge pawisa kan mamawh dawn tih hre reng sia kan dah tlat loh si? Tunah heti zat kan ba a, damlo leh an chhungkuate an khawngaihthlak em em a. Chutih laiin restricted tender tam tak kan chhuah reng a, kan priority hi a mak ka ti deuh a. Chuvangin, 2023-ah sorkar thar Pathian zarah a lo din ka ring a, chutah chuan he Healthcare Scheme hi chhawm zel tlakah min ngaihsak em tih kha ka han zawt bawk a ni e. Ka lawm e.

**SPEAKER** : Awle, tunah chuan Minister zahawmtak Pu Robert Romawia Royte kan sawm ang a, kan sawihonate rawn wind-up se la, sawifiah ngai a tihte sawifiahin, a demand-te House-ah pass rawn dil nghal turin ka sawm e.

**PU ROBERT ROMAWIA ROYTE, MINISTER:** Pu Speaker, ka lawm e. Vawiinah hun thawl takah hun tha tak Pathian-in min pe a, ka demand pathum sawihona pawh ngaihthlak hrehawm leh tawngkam hriam ang chite pakhatmah a awm lovin ka hria a, dawt a nih leh nih loh tih lai vel kha chu ka rawn sawi tho ang a.

**SPEAKER** : Lawk aw. *Unparliamentary Language* kan nei a. ‘Dawt’ in tih tawh zawng zawng kha kan lo chhinchhiah a, tin, ‘zahthlak’ tih te, kha kha chu kan expunge dawn a ni, kan nawt reh vek ang. ‘Dawt’ tihte kha hman tawh loh tur a ni.

**PU ROBERT ROMAWIA ROYTE, MINISTER:** Awle, Pu Speaker, ka lawm e. Kan la tithing ve lova, min hriatthiam te pawh ka han duh a, a nih ang khan ka han lam mai palh a ni kha. (**Speaker:** A hmaa sawite pawh kha kan lo hria e.)

Engpawhnise, pakhatnaa ka sawi duh chu, ka department a lian lova, ka budget pawh a lian lova. He House a ka awm ve tirh Budget Session hmasaberah pheih kha chuan a tlem zia kha an sermon tui khawp a, opposition lamte pawhin. Ka tih ngaihna hre lo khan, “awm mai mai chu kan tum bik lo e, hei, *Pu* tha tak kan nei a, *dekhenga*,” ka ti kha a ni a. Vai tawng ngat kha ka hmang a, vai tawng ka thiam em em tihna pawh a ni chiah lova. Chutianga bul tanin sorkarah nihna te kan han nei ve a, pute zarah; theihtawp chhuah a ngai tih ka hria a. Chhungkaw tawngtaina leh mimal tawngtainaah

pawh kan project leh kan budget hi zan tin (ti mai ang) kan hlanin, tawngtinaah kan chhungkua chuan kan hmang ve thin a, chutiang chuan theihtawp kan chhuah ve a.

Ka vannei em em a, department-ah officer smart tak tak, hna thiam tak tak, rinawm tak tak department pathumah ka thawhpui a. Chu mai piah lamah Sports Department phei chu a tel ve kan tam a, Sports Association hrang hrangte, keimah ang tluk a inti tatu ve, vei ve, tang ve tam tak an awm a, chungte nen chuan tha takin kan thawk ho a, sports bikah “kan budget-te tlem mah se phurloh nan i hmang hauh lo ang u, kan bul tanna hi sorkar hmasa lam budget zatve pawh tlinglo mahse, theihtawp kan chhuah ang” kan ti a. Theihtawp kan chhuah tak tak ve a ni. Kan Chief Minister rem hre tak leh thil hre tak, nachang hre takin min kaihuai a, tun hi kan han thleng ve rawih a. Chutianga khawhar ang reng taka bul tan chho chu kan ni tih kha ka han sawi lawk duh a. Tunah hian kan hlawhtling ta e chu ka la ti hauh lo, mahse, kan budget let tender kan han tichhuak ve ar ar hi chu a nuam ve khawp mai a. Tender chungchang te pawh kha ka la sawi ang a.

Pu Speaker, tun Budget Session leh ka demand kan sawi tur chungchangah hian tawng sual eng emaw te ka hlauh deuh avangin kan Budget Session leh Session hmasa lama document hluite ka han hai a, ka hmuhchhuah pakhat hi kan hriat tlan atan pawh a thain ka hria a, ka han chhiar chhuak lawk duh a. Pu Speaker, i phalnain.

Hei hi House *proceedings* a ni a, 3<sup>rd</sup> September, 2020 budget wind up-naah khan kan ZPM Group Leader, Opposition Group Leader ni bawh Pu Lalduhoma khan ti hian a sawi a, “Pu Speaker, Minister zahawmtak pahnih ngawtin peace bonus chungchang an sawi a, House hian thudik a hriat a ngai ka ti. Peace bonus hi cheng khatmah min pe lo, amaherawhchu, NLCPR-ah khan 180 crore kan dawng ve a, a dawng tlem pawl kan ni lehngal. Chu chu hetah ‘peace bonus’ tiin kan vuah chawp a, an ko mai a ni. Central atangin peace bonus cheng khatmah kan dawng lo; Zawnha ka zawhah pawh “kan dawng lo” tih chhanna ka dawng a. Chuvangin, sawi tawh lo mai ang u, thudik i sawi ang u” a ti a. Hei hi tun budget-a lar tak PM-DeVINE Scheme atanga 600 crore kan dawn tur, budget Sitharamani’n a pharh ni khan ka rilruah a rawn lang zawk bawh a, “Kan Chief Minister hian engtin nge ni aw, hetiang Chief Minister dangte tih theihloh hi a tih theih le”, tih ka rilruah a lo awm a. Ka sawi tum zawk chu, Pu Speaker, khami tuma Pu Lalduhoma, kan Opposition Group Leader zahawmtakin khatia a sawi kha ka pawm thei lova. Finance Ministry ka dawh a, Mizoram-ah pawh Planning leh Finance pawh ka dawh a. Hei a order, Pu Speaker, ‘Peace Bonus’ tih hmanga Finance Ministry-in 3<sup>rd</sup> March, 2000-a Office Memorandum a rawn tihchhuahah hian ‘peace bonus’ kha Finance Ministry-ina a rawn pek tih a chiang khawp mai a. Tin, kan Chief Minister-in ‘Peace Bonus’ tia a phuah a ni tih pawh hi a chiang em em a. Kan Chief Minister zahawmtak Pu Zoramthanga hian ‘peace bonus’ tih hming phuah chawpin cheng

vaibelchhe 182.50, kum 2000, (a rei tawh viah ti rawh u, kum 2000 chu) kum 22 kal taah khan a ni a. Tunlai pawisa value anga chhut phe chu an a sang ngawt ang. Chu chu khawi scheme atang maha lo chhuak pawh a ni lova, Pu Lalduhoma'n "NLCPR a ni" a tih kha, "a ni lo chiang a ni" (*Dawt ka han tih leh tep chu le*). Chuvang chuan, House-ah hian thudik sawi thin ang u, tih kha ka sawi duh a. Nichina a sawi tam tak kha ngaihdan kan thiam nghal maiin ka ring, helai atang hian. Pu Speaker, i duh chuan hei hi ka pe ang che. (**Pu Lalduhoma:** Kan House Leader ngeiin "hei hi chu ka phuahchawp liau liau a ni" a ti a, uar tawkin hetah a sawifiah tawh a.) "A phuahchawp a ni" ka tih zawh chiah kha, ka rawn confirm e, kei pawhin. Ministry lam ka zawh chuan, "a phuahchawp, a word hi tumahin kan la hmang ngailo, a hmain" an ti a ni. Kan Chief Minister zahawmtakin a phuahchawp hmanga sum tam tak a rawn lalut kha a lawmawm viau a ni tih kha ka sawi duh a. Tuna PM DeVINE pawh hi.... (**Speaker:** Pu Robert, nichina mi kha 'ka pe ang che' ti lovin, House property atan i pe tihna em ni? House property ah i pe thei a.) Aw, Pu Speaker, term lehah chuan kan thiam tawh deuh ang chu maw. Pu Speaker, *House property* atan ka han submit ang e.

Point 2-na a ka sawi duh chu, tunlai hian information chanve, *thudik chanve* vela thu thehdarh a, tu tute emaw bum theih zawnga tuihal hi kan tam khawp mai a, khawvelah pawh; politics kher lovah pawh, a pawh khawpin ka hria a, "he House-ah hi chuan hetiang hi chu ching lo ang u" tih hi ka duh a. Keima chungchangah pawh hian, (keima chungchang ti mai ila), kan project chungchangah pawh hian hetiang hi a ri leh zeuh thin a, hei hi *la sorkar ngailo zia* deuh emaw ni le hi ka ti deuh a.

Central sawrkar scheme hrang hrang hi ka lo zirchiang ve ngun tawh a. Hman deuh khan ka chhut a, training pawh hi vawi za chuang hi chu ka lo attend ve tawh a ni, sorkar-a kan awm ve lain. Level hniam te mah ni ila, nakinah a la tangkai ringin kan thiante training peih lo pawh training-in ka kal tlah tlah a, chutiang chuan theitawpin tan ka la ve thin a. Scheme a awm tih kan hria a, a scheme piah lamah hian kaihhruaina dang dang leh advisories chi hrang hrangte a awm a. Kha scheme pumpui kha tidanglam lem lovin, "kumin chuan helam hi priorities-ah i nei ang aw, north-east tan chuan chu lam chu priority-ah i hmang ang aw" tih te hi a scheme chhungah inziak lo mahse a awm thin a ni. Kan hriat fo tur chu, 'between the lines', a a scheme-in a thu ken hi kan ngaihtuah tel lo thin em ni aw ka ti a. Chuvang chuan PMJVK-ah chuan, "A scheme ah chuti chuan a inziak a, engatinge education, health sector leh skill development-ah te chutiang percentage tur chu anih laia chutiang chu ti lova, engatinge, Sports Department hian an tham then sak" an ti em ni? A tawngkam chiah kha ka lo hre lova. A hre ngailo chuan thu tak angah an ngai mai ang tih a hlauhawm a, a ziah kha chu a inziak ang 80% tih vel kha chu, ka bel khawp mai a, north-east ah chuan ka hre bel ber mai awm mang e ka ti. MSDP anih lai atanga ka lo buaipui ve ber kha a ni a, state dang dangah te pawh.

Ka sawi duh chu, a scheme ah khan thil tam tak a inziak a, *gap brand* emaw, innovative project anga siam theih anih dan te. CSS dang, entirnan Sports-ah chuan *Khelo India* kan nei a, a scheme-ah chuan ‘District Stadium’ an ti a, District Sports Complex nen hian a inang reng a, chutiang din theihna tur tih te a inziak a. Mahse budgetary provision, budget support kha *Khelo India* -ah khan a awm leh si lova. Kha scheme kha *Khelo India*-ah khan a inziak si a, khang tak atan khan PMJVK hi alo chhuak a ni tih hi he House zahawm takah hian ka sawi duh a ni. Chu chu *gap brand*, scheme hrang hrangte khan *gap* an neih chuan, kha *gap* hnawhkhah nan khan he scheme hi “gap filling scheme” te pawh an ti a ni. Chu chu kan training-naah pawh min hrilh dan a ni. Chuvang chuan, Sport & Youth Services Department-in project te siama sum kan hmuh chhuah hi tu sum tur emaw thal sak emaw, tu tuikhur emaw va thal kan ni lova. Dan ang thlapin, a ministry pawhin tha an tih ve em em, tunhma atangin state dang chuan Stadium te, thil chi hrang hrang an lo tih an lo tih thin tawhna a ni. Pu Rintluanga sawi ang khan, kan sorkar har avang hian bial thenkhat chuan phul lem phah te an lo nei har mai mai a lo ni. Tu tute emaw hrechiang mang lova “Pu Roberta hi a hrat lak a, chu mite chan tur chu a la a ni ang a” ti a ngaih theih lek lek tur ang te khan kan sawi a. Pulpit a kan sawi duh tur ang tho hi he House-ah hian sawi tur a ni; Upa te phei chuan chutiang chu chin a tha awm mang e aw ka ti a ni.

‘Aizawl Smart City’ pawh kha chutiang chiah chu a ni. A scheme hriatchianloh avangin Congress hunlai khan pui taka kalpui mup mup awm tak anih laiin an kalpui hlei theilo anih kha. Tumah indem tur an awm chuang lo, a scheme a inziakah chuan a funding pattern hi ‘50-50 tur a ni’ a ti tlat a ni. Kan Deputy Chief Minister zahawm tak finna leh hriatna te, (tawng mawilo nilo se,) keini takngial pawh minrawn ve a ni; a damloh lai pawh khan kan sawi dun fo thin a, kan Dy. Chief Minister zahawm tak nen hian. *Smart City* hi chu a complex riau mai a, Pu Zodintluanga pawh arawn leng a, ‘hei hi chu 50-50 a ni a, tihngaihna a awmlo’ a ti a, khang tepawh kha a la hrerengin ka ring a. Congress sorkar hun lai khan ‘50-50 sharing’ emaw an tih avangin Aizawl Smart City project lian tak mai hi project proposal an submit dawnah pawh an tim em em a. Kan han sorkar ve a, kan ngaihtuah that khan Hardip Singh Puri, Union Urban Minister a ni a, a fel em em a. Kei pawh ka va kal a, ka hmu ka hmu ve tawh a. A Joint Secretary chu Kunal Kumar, tun thlengin a la ni a, a ni rei tawh khawp mai, National Mission Director pawh ani nghalin ka hria a. Chumi leh an Director te nen pawh kan sawikhawm a, a hnuah phei chuan kan pute nen Delhi-ah kan awmho remchan lai a ni bawka, ‘va kal teh ang u, Aizawl Smart City hi a phurawm riau a nia, kan Dy. CM pawhin ‘i theih ang angin lo bawhzui rawh’ min ti a nia,” ka ti a. Kan CM zahawm tak nen Pu Hardip Singh chu kan va hmu a. Chumi tum chuan thil hrang hrang project an lo submit tawhte pawh kan sawi a. Aizawl-in Sport infrastructure kan duh thute pawh ka sawi a.



Thunawi deuh ka han sawi ang a. Aizawl FC leh Minerva Punjab FC inkhelh tuk lawk kha alo ni bawk a, Aizawl FC khan kan lo hneh kher bawk a. An inkhel a lo en ve thu leh a support thute a sawi ve luam a. “Sports infrastructure, sport stadium te hi urban infrastructure-ah chuan a pawimawh, beautification purpose atan a pawimawh, sanitation purpose atan a pawimawh, rikrum thilah leh indo nikhuaah te, lirnging atan te, stadium hi safety atan a pawimawh” kan ti a, a Dan chungchang te kan sawi tlang a, anmahni khan min phurpui zawk a ni. Dan kalh emaw, dan pawtsawi deuhin *Aizawl Smart City* hian *Sports infrastructure* hi an project-a tilut anni miah lo a ni.

Tukin zingah pawh helaia sawi ka duh avangin Urban Ministry ami, senior officer pahnih ka phone a, ‘a thlak te kan rawn thawn duh ang che em, sport stadium lian deuh deuh kan sak hi sa zo tawhte pawh an awm fur a sin’ an rawn ti a ni. Khatiang a nih lai leh Mizo thalaite, a bik takin Aizawl leh a chheh vela football field kan indaih loh em em, kei, a hminga minister ngei pawh hian khelh ve chan loh ni hi tun thleng hian ka la nei ka la nei a ni. “Lammual allotment kan hmuh saw chuan infiam mi leh footballer-te chuan nula an rim pawhin an luck sawt” an ti a, Lammual allotment order ak chung kha chuan nulate pawhin an lo ngaisang ni awm tak a ni. Chuti khawp chuan vawiin thleng hian Lammual allotment chan hi a har a ni. Chutianga kan thalai ten infiamna hmun mamawha an tuihal ngawih ngawih laia, tul vaklo leh eng emawa sawi sawi thin party pakhat tan hi chuan sorkar hi a har duh awm mang e aw ka ti deuh a ni. Infiam mi leh thalai ten kan thusawi hi an lo en ve reng a, *thudik* nge kan sawi, *thudiklo* tih te pawh hi an lo hre ve zel a ni. Chuvang chuan, PMJVK guidelines ani emaw, Aizawl Smart City guidelines ani emaw kha kha sawifiah ve deuh a ngaiin ka hria a, kan sawi a ni.

Tin, Pu Speaker, Sports Department-a kan officer-te nen chuan Ministry of Atomic Energy atang te khuan futsal guard dilchhuak thei ila kan duh, Ministry of Space atang te pawhin. Lo sawisela rilru natna atana lo hman chi a nilo tih kha kan sawi leh duh bawk a ni. (Ka tawng a hriam lutuk em aw ka hre lova, ka tang lutuk deuh thin a).

Kan MLA te thusawi kha a tawp lam atangin rawn react dawn ila a thain ka ring a. Pu Lalduhoma, Serchhip bialtu MLA zahawm tak leh Opposition Group leader zahawm tak ni bawk ina Serchhip Sports Complex a sawi kha a veiawm khawp mai a, a bialtu MLA-in min veipui hi ka lawm khawp mai. Mahse helaiah hian tlema fimkhur hret a ngai a, District Sports Committee hi tunhmain DC a ni thin a, DC active vak lo leh ngaihsak vak lo te an awm thin a. Chuvang chuan Association hrang hrang atanga inthlan nise tih ngaihdan a awm a. Tuna kan kalpui mekah chuan, DC nilovin Association atangin an inthlang chhuak mai a. Mahse, he House zahawm takah pawh hian Mizoram Sports Policy, 2019 kan sawiho tawh kha. Mizoram-a sports management leh structure hi mumal taka *streamline* leh *rationalize* a ngai a ni tih kan hria a. State

dang tihdan te pawh kan theih ang angin kan entawn a. Ka department chan hrim hrim hian dan leh hrai kan siam dawn hian state changkang zawk te tihdan entawn anih loh hi chuan ka ngaih a thalo tlat mai a, kei hi ka ti kher kher ve baw a. Kan hotute thiam tak tak, kan department officer ten an rawn draft pawh hian, “tute nge in entawn, in entawna chu khawiah nge a copy” tih hi ka lo tih ve thin dan a ni a. Chutiang chuan sport policy mumal tak a rawn awm leh a, entawn awm chi hrang hrang entawnin kan han siamchhuak a.

District level-ah hian, “District level-a committee hi *Governing Body* a nih hi a ngai” tih vawi tamtak kan inrawn khawmnaah kan sawi hova, ‘DC Chairman rawh se’ tih kha a sport policy ina a tih dan a ni a. Mahse District sports committee, *a thlana thlan ngat* lo awm laklawh tawh hruaitu tha tak tak kha an invuah fur si a, chuvang chuan transition stage-a kan awm lai hian engtin nge kan tih ang tih kan inngaihtuah a, vawi duailo kan inngaihtuah a, tunah hian sport council hnuaiah a regulation kan siam a. Chu chu Sports Council chuan government-ah kan submit chiah a, government-in ngun takin a ngaihtuah ang a, Sport Council khan amahin kha *regulation* kha a siam mai thei lova, “in consultation with government” tih a nih avangin chumi stage-ah chuan kan awm a. A ‘allotment’ lai vel kha chu khitah DFYO, DC office atanga officer pakhat kutah a awm a. Tin, District Sports Committee leh District Football Association te nen inruak khai tha takin an tiho niin ka hria a, a enkawltu erawh kha chu MR pawh ni pha lovin kan sorkar hmasa hunlai atanga an lo hman ngaia kha kan sorkar hmasa-in tha takin a lo ti a. Tunah keini chuan thil tamtak kan ti ve hman lo, kan hawng a ni mai a (ti mai ang), sorkar hmasa pawh an fakawm a, chutah chuan chumi enkawltu ngai chu kan la ring a ni. A hlawh pawh a tam lova, mahse kan sport association lam pawhin ‘a ni hi a tha’ an rawn tih kha enkawtua kan hman a ni. Enkawltu awm lova let der chu a ni chiah lo e tih kha ka han sawi duh a ni.

Tin, “SEDP sum dawng tam 5-na” han tiha kha, ka lo mur ur ur a, thisuk nei deuh chu ni ila chu ka thisuk hial ang, khatiang tawngkam hriat kha a mak ka ti hle mai a. Hmana kan session hmasa, hmasa leh nikum hmasa leh khan SEDP hi a dawng hmasaah khan kan tang a, sports hi. Tam pawh a ni lova, Dr. Mathlantea’n a rawn sawi kha, ani hi thil hre thei tak a ni a. Khatih hunlaia a dawng tamte zinga min sawi kha a dik zelah an ngai te pawh a ni maithei e. SEDP-ah hian nuaih 2000 pawh kan la dawng lovin ka hria a. Nuai 40,000 chuang kan thawhchhuah ve tawh hnu-ah pawh hian a match-na tur ang chi pawh hi.... (**Pu Lalduhoma:** Ka sawisel a ni lova, kha kha kan fak zawk a ni a, kan lawmpui zawk a ni. Hei, MNF sorkar hi a buaithlakna chhan chu, han fakin, “term lehah pawh in sorkar leh em em ang” han ti ila, an thin hi a rim tlat zel mai a. Fak hi an lawmlo tlat mai a, a buaithlak khawp mai.) Min fakna anih chuan a lawmawm e, Pu Speaker.

Engpawhnise kan sawi duh zawka chu, impression thalo leh information thalo kha tute emaw-ah a pe thei a, SEDP hi kuminah hian cheng khat tal te dawng ve ila tih te ka department pathumte hian an chak ve em em laia, dawng tam bera kan insawi chuan, ka lo ak haw ru ang a, ka lo ei ru teuh angin miin an ngai ang tih te pawh kha a hlauhawm a. Chuvang chuan, SEDP hi Tourism department-ah pawh hian sawitur kan ngahin a rinawm a.

ICT department pawh hi tunah hian ka han sawi duh a... (Ka insawi tui laklawh a, kan sawi zel mai teh ang). Mizoram sorkar atanga induhsak theih chi-ah leh in-allocate theih chi-ah hi chuan kan *nil* deuh zel chu a ni. Chu chu vui thuin ka sawi miah lova, nichin khan member zahawm tak Lunglei North bialtu Dr. Vanlaltanpuia khan, Lunglei North-ah khan project kan lo la pek tam loh vang nge ni, “NABARD sum nuai 2,000 chauh an dawng a” a ti a, NABARD sum hi *nuai dere* pawh kan la dawng miah lo a ni, ka department pathumte hian tunthleng hi chuan, chu chu kan sawi duh a. (...*interruption* ...)

**DR. VANLALTHLANA :** Nichin khan kan Minister zahawm takin “Dr. Vanlalthlana’n a rawn thehlut a” a tih kha, kei khan document kha ka rawn thehlut a, Finance department atanga ka dawn a ni a. Kan Minister zahawm tak hian, “ka rawn thehlut ve e,” a ti a, Member ho circulate tur anih lain kan dawng ta miah lo mai a, a rawn ken kha a diklo nge ni, kei chuan document tan chhanin ka rawn ti a ni a. A dawng tam tehreng baw a khatih lai kha chuan, chu chu min pe thei ang em? ‘Dawt’ a ti lehngal a, Pu Speaker, khami tum khan he thil hi, ‘dawt’ a ti a ni. Chuvang chuan, a lo ni nge nilo chu document kha rawn thehlut se ka ti. Ka lawm e.

**PU ROBERT ROMAWIA ROYTE, MINISTER:** A lawmawm e, a tul chuan ka pe thei em em ang a.

SEDP hi (ka hriat sual loh chuan) kan la dawng tam lo khawp mai a, Sport Department hian. Tourism hian nuai 10 emaw kan dawng a (ka hriat sual loh chuan), ICT hian nuai 10 emaw kan dawng a, department dang chuan nuai sing 3 chuang te an dawng a ni a, nuai sing dawn dawn hi a awm thuau a ni. Chuvang chuan, SEDP hmang hian hmasawna pawh hi a kal nasa a, beih pawh kan bei nasa a. Khatiang a nih laia midang sawi duh si lovin sports ina *dawng tam lutuk* ang deuha an sawi an sawi hi, ‘vote a paih nasa awm mang e aw’ tih hi ka rilru-ah a awm a. Engpawhnise kha lam kha chu thudang nisela.

Tin, “pawisa an lo hmang puk teuh” tih hi a awm a. Sport department hian pawisa kan hmang puk teuh reng reng lova, kan pawisa hi 2019-2020 atang khan nuai sing chuang hi finance-ah hian a awm reng a ni. Kan budget chu tlem te a ni; kan pawisa

cheng nuaih sing chuang hi finance-ah hian a awm reng a. Chuvang chuan, kan tan *hman puk teuh* pawh a ngai lo. Min pechhuak sela chuan kan che *bahadur* ve thei deuh maithei a, mahse kan sum harsatna kan hria a. Tin, a physical progress pawh a chak thei bik lo, Covid avangin contractor-te pawhin hna an thawk chak thei bik lova. Tin, thil harsatna tamtak a awm a, chuvangin ‘hman puk teuh’ tih tawngkam kha hriatsual palh anih ka ring a.

Tin, “vaibelchhe 129 state share-ah an lo demand” a tih kha, **(Pu Lalduhoma:** Pawisa ngah si chuan engatinge in lo demand aw? In hman puk lohna kha hmanni ah ...) Pu Speaker, ka sawifiah chak zawng tak a ni. Pu Speaker, Supplementary demand hi a literal ... **(Pu Lalduhoma:** ‘Expenditure’ tihna a ni a, kan pass bak in hman kha, ‘min regularize sak rawh u’ in ti a, pass in rawn dil a nih kha ...) Pu Speaker, Group Leader hian a hrethiam lo a ni. Finance department account-ah a lut vek tawh a ....

**SPEAKER** : Lo ngawi lawk rawh u, a wind-up lai a ni a.

Ni e, eng emaw zual a nihloh kha chuan intibuai lo ula. Tin, Dr. Mathlana khan “*Dawt tiin a sawi*” a tih lai kha, ka thut lai a nih loh ka ring a. Ka tisual maithei a, ka thut lai a nih loh ka ring a. Khang zawng zawng kha kan *expunge* ang (kan thaichhia ang). Chuvangin, ‘dawt’ tih hi tumahin hman tawh loh tur. Awle, sawi zawm rawh le.

**PU ROBERT ROMAWIA ROYTE, MINISTER:** Pu Speaker, ka lawm e. Zirtir zel hi kan la ngai a ni. Cheng vaibelchhe 129 state-share indaihlohna dil anga sawi pawh hi thu diklo a ni a. Pu Speaker, kan Opposition Group Leader zahawm tak hian enchiang leh sela ka duh khawp mai. Supplementary Demand for Grants lai vel pawh kha. **(Pu Lalduhoma:** MSSC annual report kha lo en rawh, nangmahni department siam a ni ka sawi ni. Ka phuahchawp a ni lo, ka phuahchawp ve ngai lo.) “Demand for Grants-ah chuti zah hman in rawn dil” tiin tun mai khan a ti a, mahse MSSC report alo ri leh a; kan lo en tho ang a, chu pawh chu.

Demand for Grants-ah kan dil nge dil lo chu MSSC report-ah kan en ang. Chuvang chuan, Supplementary demand-a sum a lan tawh hi chuan State pawn atanga sum rawn lut tura kha chu a hmian Finance department account-ah a lut daih tawh tihna a ni. Finance-in an kawl a, an lo hmang zo vek tawh maithei nghe nghe a, thil awmthei a ni. Mahse, he House-ah hian pholan ve a ngaih avangin formality angin kan rawn dah a ni. Ka department pathumte hian Supplementary Demand (state chhunga tangin nilo), state pawn atangin a tam thei ang ber, session-a kan uan ve deuh nan ti turin kan infuih sauh sauh a. Pathian zarah kan dam ang a, nakumah kan rawn *come-back* leh ang. Kumina Supplementary Demands kan neih aia tam hi rawn neih talh tumin tawngtaina nen tan lak zel kan la tum a ni tih kha ka han sawi duh a. Chu chuan ‘puk kan rawn dil

lo' tih a tichiang. Chuvangin, Supplementary Demands-a sum lo lang hi puk tur dilna lam emaw, sum indaihlohna lam emaw keimahni context-ah chuan a ni lo tih hi ka sawi duh a. Kan officer-te pawh an rilru a na deuh thin a. Chuvang chuan, (...*interruption*...)

**PU LALDUHOMA** : Pu Speaker, *Point of Order*. India Constitution Article 202, 203, 204 & 205-a Supplementary Demands, Constitution-in a define kalh thakin tunah khan kan Minister zahawm takin a sawi a ni. Chuvang chuan, hei hi a duham mah mah deuh ka ti a. He kan rorelna sangberah hian Constitutional kalh hi chuan i tang vak vak lo teh ang u. Supplementary Demands chu kan hre vek, a awmzia inhrilh inhrilh pawh a ngai lo. In dil zat pawh kan hria .....

**PU ROBERT ROMAWIA ROYTE, MINISTER:** Constitutional Demand pawh kha ka hre tho mai a, constitution zir ve ka nih avangin. Parliamentary Convention a awm a, Parliamentary Practice te pawh a awm a. Sikkim Dy. Speaker pawh nimin piah lawk khan ka bia a, Meghalaya ka bia a, Nagaland ka bia a, Manipur ka bia a; Supplementary Demands nih phung chungchang te pawh hi. Ka sawi thui lo mai ang a kha lam kha chu, ka sawi tur tha deuh deuh pawh ka theihngihl zo vek tawh. Ka lo thlang sual teuh khawp mai. Vawiina tang hi chuan a leh lam zawk hian CM tur pawh hian an duh lo mai ang tih pawh a va hlauhawm tawh ve. Engpawh ni se, fiamthu te nen a tih deuh loh chuan.

Tichuan, ka thiante han react phut tak tak pawh kha, khi, hun a kal duak tawh a, ka react thui theilo deuh a nih pawhin min hrethiam u la.

'Restricted Tender' tih erawh hi chu ka sawi duh a. Restricted Tender hi 'tute emawin an hmuh sak' tih ang lek lek leh, eng emaw tur ang pawh hian kan sawi nasa khawp mai a. Tun Covid situation leh kan ram dinhmun, State pawn lam te pawh an rawn zin theihloh lai te, Mizoram-ah pawh kan zin theihloh lai te leh khu lama UC submit a ngaih lai leh keimahni ngeiah pawh hian UC kan submit hma theihloha vanga chan te pawh hi kan nei a ni. Hei hi nakinah min beih nan pawh in hmang a nih pawhin ka pawm thlap, 'a dik alawm' ka ti mai ang. Chuvang chuan, restricted tender hi a context-a zir leh a situation-a zir te, a chhana zirin option tha ber a ni thei a ni tih hi kan hriat a pawimawh a. Tin, restricted tender loh pawhin Govt. Agency te, eng eng emaw te hi chu inthawh tir dan te pawh a awm tho a. Chuvang chuan, Dan hi a then chauh, nichina ka sawi ang khan information kimlo hmanga politic khelh emaw thil play vel hi a fuh lova. Chung chu ka han sawi leh duh bawka a ni.

Tichuan Pu Zodintluanga Ralte, Congress Group Leader zahawm takin Tourism chungchang te, ICT chungchang leh Sports chungchang a rawn sawi kha lawmawm ka ti a. Budget tlem min rawn veipui te pawh kha a lawmawm khawp mai. Tin, Sikkim

lama an tan lak dan Tourism-in an hausakpui dan a rawn sawi te kha a ralkhat atang chuan ka hre ve a. Kan hriat mai maiah, Sikkim hian 2014-15 vel khan vaibelchhe 1,500, chu chu nuai hlirin sawi dawn ta ila, ‘nuai nuai khat leh sing nga’ EAP hmangin Tourism-in project lian tak a kalpui a, an leibat pawh a tam ang tih a rinawm a. ‘Lei ba tam ber’ tih te pawh kha information pakhat ka hmuhah chuan a ni nghe nghe a. Mahse, an than khi a tha tlat mai a ni. Leiba hi tam mahse than hi a that chuan engnge ni, a lei bat chhan kha a dik chuan a pawl lo va. Mukesh Ambani pawh Jio technology an launch dawn khan leh Reliance an tih tan dawn te khan an leiba chu a tam khawp mai. Mahse reilo teah tiang khan an rawn in recoup leh dan leh a rulh dan kha a that chuan a tha a. ‘Ways & Means’ tih te kha han sawi kai law law a chakawm khawp mai a. Kha kan Demand for Grants a ‘Ways & Means’ rawn lang vaibelchhe 3,700 lai te kha, leibat emaw, eng emaw anga lo ngai tlat awm te kha a dik lova. ‘Ways & Means’ te kha chu tu emawin a ba in a la a, hlawh laka rulh turin thil a la a, January thla hlawh a lakin a rul a; February thlaah sangkhat man a ba leh a, February thla hlawhin a rul leh a; March-ah sangkhat man a ba leh a, March thla hlawh a lakin a rul leh a. Chutiang chu ‘Ways & Means’ chu a ni mai a, avoid theih chu a tha. Dik tak chuan Sports Department-in kan sum deposit avang hian Ways & Means lak ngai lo pawh hian kan sorkar hi a awm ve fo a ni.

‘Phul lem hi Covid do nan a tha’ tih te kha thawk khat lai khan nuihzat deuh khan kan ti thin a, a dik riau a nia aw. Phul lem phah nana kan sum dahkhawm hi Covid do nan khan kan hmang nasa fu niin Finance Department ten min hrilh a. Khangte kha sawina hun chu a ni lo mai thei a, kan sawi mai mai duh bawk a ni. Tichuan, Ways & Means-ah khan, khalaia lang teuh kha Mizoram sorkar bat a ni lova, debt-ah register a ni lo hrim hrim Ways & means hi ... (**Speaker:** I department-ah Minster zahawm tak kha lut tawh teh. A tawi zawng deuh hlekin, khawngaih takin.)

Awle, sawifiah ngai kha a han awm ve deuh bawk a, Pu Speaker. Min hrethiam la, tawi tein rawn tih kan tum tawh ang e.

Pu C. Ngunlianchnaga, Lawngtlai West bialtu zahawm takin a rawn sawi ... (...*interruption*...)

**PU ZODINTLUANGA RALTE :** Pu Speaker, *Point of Order* lawk. Mi kalkan a, min react tura ka tih kha. 2019 kuma 40 crore approved sanction, ‘stadium chhawng’ tih kha, kha kha in kalpel tlat mai a.

**PU ROBERT ROMAWIA ROYTE, MINISTER:** Awle, kha kha ka sawi chak deuh mai a ni a, kei pawhin tweeter-ah te pawh chhuang takin ka ti a. Zarkawt field saw field chhawnga siam kan tum a, Aizawl Smart City atangin. Phur takin kan sawihonaah

pawh ‘innovative tak a ni’ an ti ve a. Mahse Zarkawt Welfare Committee nge ni aw, kha khan an phalloh tlat avang khan kan ti thei ta lova. A hnuah khan Chaltlang te pawh kan han ti dawn uai uai a, amaherawhchu, private-a a bula awm te tan khan a hnawk thei dawn avangin kan ti thei lova. A khawtlang te ve ve phalloh avangin kan ti puitling thei lova, a vannei veng chu an awm ta nual a ni. Entirnan: DIET Complex-ah Hall lian tak kan sa dawn a, tin, Zuangtui-ah kan Deputy Chief Minister hmalaknain badminton hall, National Championship leh National Games kan thlen hunah pawh hman theih tur, court paruk awm theihna a ni.

**PU ZODINTLUANGA RALTE:** Pu Speaker, *Point of Order*. 40 crores sanction tawh ‘approved’ a tih kha, Sports & Youth Services ni lovin department dang pawisa i rawn sawi tihna em ni?

**PU ROBERT ROMAWIA ROYTE, MINISTER:** Department dang tih lemah Smart City, Aizawl Smart City atanga approved a ni a. Mahse thildangah kan hmang ta a, a daihzai ta phian a ni. Min rawn zawt a ka lawm khawp mai. Sawichhuah na remchang tak a ni. (**Pu Zodintluanga Ralte:** Pu Speaker, thildangah an hmang nge, UD&PA-in an hmang aw?) UD& PA hnuai Aizawl Smart City-in an hmang.

Dr. Vanlaltanpuia, Lunglei bialtu zahawm tak zawhna lamah kal ila. Nichin khan ka sawi tawh a, “NABARD atang pawh hian nuai 2,000 chauh an la hmu” a ti a, “dere pawh kan la hmu lo” tih kha ka han sawifiah a. A hriatsual palh niin ka hria a. Tin, “Lena Stadium-ah a tlan kawng tawi lutuk” tih kha, hei hi thildang ang lo deuh a ni a. Kan Sports Minister hlui pawh hian a hre thoin ka hria a, harsatna engnge an tawh ka hre lova. Lena Stadium-a a tlankawng saw a tawi lutuk a, a buaithlak khawp mai a. Practise nan chuan a hman theih vek a, a worksmanship chu a tha fu chuan ka hria a. Chutiang tho chuan Champhai Zotlang ami khi a tawi bawk a, buaithlak deuh mai a ni a. Athletic Association of Mizoram-in competition te an nei a, ‘World record kan siam fur mai’ an ti a. hetiang chi hi technical lam fimkhur ngai deuh mai a ni a. Chu chu hriain Pu Zoramthanga kaihhruai, MNF sorkar chuan Mizoram State Sports Council, MSSC Act amend-in technical authority a dah ta a. Tunah chuan Smart City a ni emaw, UD&PA a ni emaw, department dangin emaw sports infrastructure an rawn tih ve hian Mizoram State Sports Council *vetting* hi an rawn la ve thlap tawh thin a. Tunah chuan a size dik lo ang chi kha avoid chu kan tum viau a ni tih kha ka sawi duh a ni.

Local Tourism, Dr. Vanlaltanpuia’n a rawn sawi kha theih ang angin hma kan la a, hetah pawh a sawi tawh a, a hma khan. Tin, Futsal hi tender phalna Finance Department atangin kan nei tawh a. Futsal Ground tha tak, a chung nei thlap, a phah pawh All India Football Federation pawhin a phalsak tur ang chi phah kan tum a. Lunglei-in hetiang hi pahnih an nei dawn a. Sorkar seat thar a ni a Lunglei saw, Lunglei

Municipal Council hi MNF-in a han dinthar a, tunah chuan ‘Seat of Government’ an tih ang kha Lunglei khawpui saw a ni ve tawh a ni. Chung kan lawmpui nan te pawh a ni ang chu, Lunglei North-ah leh Lunglei Ramthar-ah sawn Futsal Ground siam kan tum a ni.

Tin, Pu C. Ngunlianchunga zawhna PMJVK leh thildang a sawi kha react lutuk a ngai lovin ka hria a. ‘Bungtlang South Tourist Lodge’ tih kha kei pawh ka lo ralkhat hriat a. Helaiah hian kan harsatna pawh min hriatpui ve a thain ka hria a. A mihring kan indaihloh chu thu hran ni sela, kan depratment hian ala take-over lo a ni, a reifu tawh a, a chhan chu a sak kha dik lo leh tha lo a awm a. A lehlam chuan an rawn sign thlap tawh a, a construction, a implementing department chuan. Kan department hian dawn chi-ah a ngai lova. Kan hun hma daih kha a ni a, (2015 vel daih emaw ni.) Repair leh tura ngenna te pawh an han siam a, chu chu repair leh a awm siloh avang khan an dawng ngam si lova, central-in a rawn inspect hunah kan department kha kan buai ang tih kan hlauh avangin. Chu chu kan hun hma mah ni se eng emaw chen chu ka hriatpui tho a. Chuvang chuan Bungtlang South saw complete lohin a la awm a, complete hram tumin bialtu MLA pawhin a vei bawk a, an khawtlang te pawhin an vei bawk a, ‘hma lo lak kan tum ang e’ tih kha ka sawi duh a. Tam lutuk lo niin a lang a, tuna community centre te pawh saw ‘amalgamate tum ila’ te kan han ti uai uai a. Mahse chu pawh chu technical audit leh inspection a awm hunah kan buai ang kan tih avangin kan ti hlawm ngam leh lo bawk a. Chung avang chuan ti sawn a lo awm a ni. **(Pu C. Ngunlianchunga: Bungtlang Tourist Lodge kha assurance min pe thei em aw? *Koi surut* kha min assure thei hram se ka duh a...)** Tunah budgetory support ka neih loh avangin assurance ka pe thei lo. *Koi surut* kha duh tawh mai rawh.

Thingkah chungchang kha an rawn sawichhuak a, a lawmawm khawp mai a. NECS-a ka awm lai thil daih kha a ni a, khang hunlai kha ka sawi kai thui deuh a ngai a. YLA conference-a thusawiah te min sawm a, *Khual Lian-ah*, (*Khual Lian* kha ka ni ta em aw ka hre chiah lova). Khangah te pawh khan ka tiam a, kut te pawh an beng ve dar dar a. Sawtah Thingkah-ah NECS in 3<sup>rd</sup> IR Battalion tur nuai sangthum dawn man In an sa a, Lawngtlai West bialtupa-in a sawi pawh kha a dik reng a. Eng emaw CSR activities ang deuh a thiltih ve te kha thildang pawh an tiam nual na chungin, kha kha keima hunlaia ka tiam a ni a. Kan naute pawhin sawlaia Project Engineer hnenah pawh khan pawisa pawh kha an thawn thlap a. Mahse “rora supply tute khan min thing nasa lutuk a, rora supply man-ah ka lo pe daih a” tiin, ani kha a bang zui ta si a. Helam NECS headquarters lam pawh khan kha sum kha YLA pe angah khan an inngai niin ka hria a. Chung avang chuan a tangkhang laklawh chho vel kha a ni. NECS account atang chuan, ‘nuai 5’ ni lovin ‘nuai 10’ niin ka hria. Ka sawi sual maithei a, nuai 5 nge nuai 10 an donation an pek tur kha chu a chhuak ngei khan ka hria a. Kan lo en tha ang a. PMJVK atang kha chuan an pe lo niin kan naute’n an sawi a, Sports Council atangin kan pe a



nih chuan thuhran a ni. Kha kha chu an daih lo deuh a nih pawhin ka lo commitment a ni a. **(Pu C. Ngunlianchunga:** Pu Speaker, PMJVK atang khan Thingkah YLA Information Centre, nuai 5 kha min tihhlawhtlin sak dawn a, a lawmawm e.) Ka hriat dan chuan PMJVK atang chuan a nih ka ring lova, State plan eng emaw *other charges* emaw, *minor works* vel atangin a ni maithei a. Engpawh nise nuai 5 an lo hmu a nih chuan a tha tho a, a bak pawh chu ngaithuah sak kan lo tum dawn nia. Chu erawh chu assurance ka pe a che. Sorkar atanga kan tih theih loh pawhin kan lo inseng double ve deuh mai ang chu.

Chuloh leh chu ‘University exam nan connection thalo’ tih kha a dik a. Kawng leh lamah chuan Airtel te, Vodafone heng ho hi direct-a kan control anni lova, tin, Telecom hi direct-a kan control a ni lo hrim hrim a, mahse “lo coordinate a, lo monitor ve tur chu in ni e” te chu min han ti ve thin a, inrawlh dan chin tawh thiam pawh a harsa khawp mai. Mahse ka hrat lak lui a, a tul leh ka ko khawm a, vawiin session pawh hi, “lo en thap ula, in organization-a lal ber vekin lo en ula, connectivity chungchang emaw, IT related an sawi emaw nangmahni chungchang a nih chuan kan review leh vat ang a, tihchak dan kan MLA zahawm tak tak ten an sawi hi tih that dan kan ngaihtuah ang, hmalak dan kan ngaihtuah dawn nia”, kan ti a. Kawng leh lamah chuan MLA-te hi an zah thiam khawp mai a, inthlahrung lova, kan MLA zahawm tak takte pawhin in area-a harsatna in tawh hi an mahni direct-a biak pawh hi a pawh miahlo ania, vai ho zia te chu kan hriat tho kha, MLA te chu an zah a. Tin, keima hnena in lo thlena, keiin ka tih pawh kha a tha tho a, 100% kan control nilo mahse, “chu chu ti rawh u” kan tih ang chi hi chu a theih chin chinah chuan comply an tum ve thin tih kha ka han sawi duh a.

‘Online a exam’ tih te hi an sawi a, online a exam lai khan North-East a state hrang hrang kha phone-in ka zawt a, University *online exam* conduct kha tumah North-East ah khan an lo awm lova, kha tih lai chho vel leh a zawh hnu daih pawh khan. Chuvang chuan MZU leh Higher Education Minister te, School Education Minister te hetiang lama an tan lakna hi a tha khawp mai a. Tin, ICT Minister pawh hian improvement chu a siam ve deuh pawh a ni maithei e, thawhpuite through-in. University *online exam theihna State* kha kan ni ve tlat a ni.

Tin, Pu Lawmawma Tochwawng, Lunglei East bialtu zahawm takin “State Games thlen te kan inhuam chho thei mai ang,” a tih kha, kha kha kan vision pakhat a ni a. State Games te hi district hrang hrangah hian kan hun theih chuan Mizo thalaite hi kan inpumkhat leh zual ang a, nakinah chuan State chhung chang nilo, *World Mizo Games* te kan la organise thei ang em aw. A chang chuan Churachanpur-ah te pawh han nghat ila, a changin Tahan-ah tih te hi kan rilru a awm a ni. MNF Party chuan Zofate zawng zawng insuihkhawm hi kan ngaipawimawh a, chu chu Insuihkhawmna, ‘Zo Kutpui’ kan organize chhan kha a ni a. State pawn atan budget pawh nuai 100 lai Chief

Minister zahawm takin min pe a, kan hmang tha ta hman vak lova, hmun hnihah hlawhtling tak erawh chuan kan nei a ni. Kha kha kan sawi belh lawk a ni.

Tin, Lunglei hotupa a ni bawk a, Lunglei ‘Thuamluaia Mual’ saw Lunglei khawpui tan chuan an ‘Wimbley Stadium’ ve a ni a. Hei, kan Sports Minister hmasain khawpui dang tih hma daihin phullem alo phah a, a lawmawm khawp mai a. Mahse alo rei tawh a, an hmang rim bawk a, a rim zia saw keipawhin ka hriat pui a. Ka va kal ve hi chuan zingah football te ka pet ve thin a, sawlaiah sawn. Lunglei khawpuiin an awh ngawih ngawih chu, phullem phah thar saw phawh that a, siam that leh a, phullem thar Thuamluaia Mual-a han phah leh saw an thlahlel hle a, ka hnenah pawh an sawi tam a. Lunglei District Football Association te, Lunglei District Sports Committee ten, leh, a MLA ang te pawhin. Tin, a bialtupa Minister zahawm tak Pu Sangtea nen pawh hian kan sawi tawh a. Vawiinah hian han puan dup dup tur hi ka nei ve si lova, kan budget pawn lam thil daih mah nise. Lunglei Thuamluaia Mual saw sorkar thar, ‘Government Seat’ thar, sorkar awmna khawpui an nih thar ve dawn avangin, campaign-na em em pawh ni chuang lovin “phullem kan phah dawn a ni” tih kha kan puang duh a ni. A sanction pawh kan neih sa atangin kan ti mai ang.

Pu Vanlalhlana Aizawl North-I bialtu zahawm takin futsal ground a rawn sawi te, Astro-turf a rawn sawi te kha kan Deputy CM zahawm tak hian a ngai pawimawh khawp mai a, Durtlang field-a Astro-turf phah khi, ama ho pawh hian kan han en tawh a, khawtlang hruaitute nen. “Phah tum a ni em, engtin nge” tih lai kha, ‘phah kan tum a ni’ tih kha kan sawi duh a, chu chu Aizawl Smart City atang bawkin a ni dawn a. Durtlang North Futsal ground hi kumin chho hi chuan bul tanin kan zawh mai ka ring a. Tunah hian CSR lam atangin beisei te kan nei a, kan budget atang hi chuan, inhmua, han insawi pawr vak thei ka nilo tih in hria a. Mahse ka la hrereng a, kha laia kan sawi kha, ‘tih hram hram kan tum ang chu’ tih kha ka sawi theih chin ni ta sela.

Tin, “State Institute of Hotel Management” tih kha, Pu Hlana’n min veipui kha ka lawm khawp mai a, ama chungah pawh lawmthu ka sawi duh a. Ka theih tawp hi ka chhuah ve a, he thilah hian. Cabinet-ah pawh kan move a, post creation te a har em em a, a hretu vek kan ni a. Kan Cabinet, Council of Ministers chuan Mizoram-a State Institute of Hotel Management, MNF sorkar hmasa hun laia a building te, a sanction te hmu a sak tan, Congress hun laia sak zawh takah khan din kan tum a. Mizoram-a management institute awm chhun tur te pawh a ni a, a post tur leh eng emaw te pawh Shillong lama an lo neih sa leh hmun danga mite pawh kan official ten an zirchiang a. Hei hi Council of Ministers-in kan approve tawh a, a post zat turte pawh kan ti tawh a. Mahse, sawi leh sawi hnu Covid restrictions, Covid avanga austerity measures khan min dang vek mai a, keini department ang chi hi chu, khang zah zah post recruitment

han siam tur chuan, chu chu kan tanna ni a. OSD pawh kan advertise tawh a, mahse recruitment erawh chu kan la ti chiah lo tih kha ka sawi duh a.

Chalfilh chungchang hi court thil a ni tawh a, thil thui tak sawi tur awm mahse, sawi ngai lovin kan hrethiam thovin ka hria a. Chalfilh khi a khawtlang Khanpui leh Lailak khawtlangte hriat lohin (anmahni sawi dan a ni a) Forest department-in an lo acquire a, khilai khi, tunhmain Forest department ta a ni ngai lova. Chu chu Tourism Department-in 2006 vel daih tawh khan hma an la a, ‘building-te pawh a awm’ an tih kha a dik a. Khi khi tunah hian Supreme Court-ah appeal mek a ni a, engtin nge kan case hi a chak ang nge, chak lo ang tih pawh keini ang mi mawl chuan kan hrethiam ve lova. Han thiah nghal rum rum khi kan khawtlangte khian tha an ti lovin an duh lova, dan bur te pawh an tum a. Chuvang chuan, Supreme Court-a appeal turin tunah hian, Law Department leh Forest Department lam chan a ni deuh mah tawh a, khalai chu, ‘an inbuatsaih mek a ni’ tih kha ka chhan theih chin ni mai sela.

Tin, Swadesh Darshan scheme chungchang kha Pu Hlana’n a rawn zawt bawk a. Swadesh Darshan Scheme-I hi chu kan hawng tawh a, sawng, golf course ang chi te saw a ni a. Union Minister-in 2021 khan (a ni tak kha ka hre ta lo) online-in a hawng a. Swadesh Darshan Scheme-II hi *ropeway*, *skywalk* tih lai vel hi a ni a, sawi tur tam tak a awm a. Hei pawh hi kan department chuan Lok Ayukta-ah kan thlen tawh a, thil nuam tak chu a ni lo mahse thil kan han thlir khan Lok Ayukta-in chiang zawka examine-a hma lak tha an ti a. Kan contractor-te hi an ni ber mai a he thilah hi chuan, contractor-ten sum tam tak an la tawh a, an ko kal hlei thei lova, thu an awih lem lova, hmalak tur vak a awm tam lova. Skywalk zawk hi social media lamah leh tv report te pawh in lo hmu maithei a. Skywalk han en khan ropeway kha an tui chilh ang reng a, khami tv report kha, a report-tu pawh ka phone a, “khalaiah khan ropeway sanction a awm reng reng lova, engatinge ropeway lam kha in va sawi tui ve” ka ti a... (*interruption*)

**PU LALDUHOMA** : Ropeway kha Lok Ayukta-ah complain an thehlut tih kan hria a, mahse kan hriat danin ho tea mizo tawnga ziaak, *accused* pawh awm lo, han proceed theih ngaihna awm lo angin thehluh niin kan lo hria a, ti tak tak lo kha in va ang ve maw le; “chhui tak tak se chuan keini pawh min kangkai awm si a” tih hlau deuh ni awm tak khan chhui tak tak tlakloh khan in thehlut niin kan lo hria a.

**PU ROBERT ROMAWIA ROYTE, MINISTER:** Han en zel ila ti raw. Chhuichhuah kan duh a, chhui pawh an chhuichhuah kan ring a. A chhan chu a chiang reng mai a, tin, dan bawhchhiatna pawh hi tam tak a awm a. A nihna takah chuan contractor-te khan dan chi tin reng an bawhchhia niin a lang a. Chuvang chuan lo in ti changtu lutuk lo awmna chiam chi pawh a ni lo he thilah hian, lo phusa lutuk leh mittel

englo khawhsak ang zuka lo phute kha kan awm em aw ka ti a, khatiang kha a ngai chuang lova.

Pawisa an bill a, a bill-tu kha contractor-te an ni. Kha khan agreement pawh a kalh tlat a, bill submit ringawt ang chi te kha, khalaiah khan thil thudik chu a rawn chhuak mai turah ngai ila. A tul a nih chuan kan la bawhzui zel ang a, central sorkar-a Union Secretary pawh uluk takin ka titipui a, kan hmalak dan te pawh min appreciate ve viau a. Minister ka nih ve pawh khan a department-te khan, “kan pe hlei thei tawh lo” an ti a, a harsa khawp mai a. Hei hi in dem nan te, politics zawng tein kan ti a, hetiang tur a ni lovin ka hria a. Kan zavaia tan tlanna tur chi, tangruala, khati zozai sum kha engtin nge kan hmuh let leh theih ang tih te kan ngaihtuah zawk tur niin a lang a.

Sakawrhmutuai Tlang-ah khian ropeway provision a awm lo a, chumi atan sum chengkhat mah sanction a awm lo niin a ziakeh hi chuan a lang a, Ministry lama ka zawh pawhin, ‘ropeway sanction a awm lo e’ an ti a. Skywalk tak khi thawh tak tak a la awm lo a ni. ‘Ropeway’ an tih khi skywalk material tur kha kawng dangah an phur hlei theih loh avangin a ropeway machine hmanga phur chhoh kha an tum niin a lang a. Chu pawh chu ka ko chhuak lui a, nasa taka tan lain ka Minister ve hnuah vawikhat chu a rawn chhuak a, khi thilah khian. Chutah chuan, ‘ka awm laiin ti rawh u’ ka ti a, a ni kha ka sawi maithei tawh lona. Cement bag 3 pawh kha ‘ropeway material’ an tih, thir lianpui eng emaw khai chhoh an tumna khan a phur zo mang lova. A nihna takah chuan an sual vang hrim hrim nge, an thei thlawt lo a ni building sak zel kha. Chutih lai chuan pawisa tam tak kha an lo la tawh si a tih kha kan sawi phawt ang e.

Tichuan, Dr. Mathlana’n ITI Hub a sawi kha kan lo chhinchhiah a. Tin, a bial tana thahnem a ngaihna te, ama sum te pawh senga basketball court leh eng emaw tih a tumna ang chi te kha kan appreciate hle a ni tih kha amah pawh ka hrilh tawh a; sawlaiah sawn potential a awm a. Tin, Ramhlun Sport Complex saw kan complex neih that a ni a, kan la sawiho zel thei turah ngai ila. Tin, helaia PMJY-a Aizawl Smart City guidelines kha chu ka sawi tawh lo mai ang e.

Tichuan, Dr. BD Chakma kha chuan ti khan lawmthu a a sawi a. Lawngpuighat leh Borapansuri-a phul lem phah kha chu, I think it’s too early to assure you of this project, Ok. Mipuite han tam phawt sela, football thiamte han tam deuh phawt sela, chuti lo chuan Lawngpuighat leh Borapansuri-a phul lem phah han intiam nghal ringawt kha chu, ka intiam lo phawt ang e. Ka sawi duh erawh chu, a area-a mite football-ah an tui em em a, keini ai mahin an khel peih emaw tih tur a ni a, kei pawhin ka va hmu a, phul lem an nei tur saw an lawm thiam khawp mai a. Chakma Autonomous Council hi kum 50, Golden Jubilee a tling dawn a, Golden Jubilee Celebration pahin football tournament, ‘Chakma League’ kan ti dawn nge, ‘Chakma World Cup’ kan ti dawn nge,

chungte chu anmahniin an rawn rawt a, tih te pawh kan tum a ni tih kha ka han sawi duh bawka a ni.

Tin, Pu Lalchhuanthanga khan thahnem ngai takin sport chungchang a rawn sawi a, ka lawm hle a. “Kan economic status mila infrastructure” tih lai kha kan sport association hruaitute leh kan sport person ho huat zawng tak a ni a, mahse an lo hre em lo turah ngai ila, a thu sawi kha. Kan economic than len kan nghaha, chumi hmaa thiltih kan tum loh chuan talent tha deuh deuh hi kan miss ang tih te a hlauhawm a. Tin vawiinah hian ka sawi duh chu infiamna lama tuilo, section YMA level pawh kal pel lo tur ang chi zawk hian infiamna an mamawh a, an ni ang chi zawk hi kan target zawk an ni tih hi vawiinah hian ka sawi duh a. Rualbanlote.... (**Pu Lalchhuanthanga:** Sport chu a kal tur a ni a, amaherawhchu, “A lehlama thalai tam zawk development (human development) kha i hre tel ang u” ka tihna a ni e.) A lawmawm e, khalam sawi tur ang chi te kha an ti ve zel a, a tih pawh an ti tha a, kan sawifiah leh zel turah ngai ang.

Pu Rintluanga Sailo ina lawmthu te min han hrilh kha, min hau ang tih kha ka hlau khawp a, ka lawm hle mai. A bialah theihtawp kan chhuah, “tun hma te khan khawng e i awm” tih ang deuh khan, tun hmate khan an lo ti mang si lova, infrastructural gap a lian khawp mai, Mamit District Lawngtlai West lam pang area saw. Chu chu tunah hian theih ang angin hma kan la a, scheme-in a cover lai te pawh a ni bawka a, chung chu ka han sawi duh a.

Tin District Sport Office hi India rama UT leh State zawng zawng kan zawt a, “District Sport Office awm lohna hi Mizoram chauh hi a ni e,” an ti a. Kan nau te hian, “State tam takah chuan District Sub-Division Office te pawh hi Sport Department hian an nei” an ti a. Heti taka National level te, International level te kan thlenphakna subject si ah hian District Office kan neilo hian min ti bahlah nasa a, kan kal a kham nasa hle mai tih hi he House zahawm tak pawh hian min hriatpui ula. Kan rawt ve mek a, Council of Ministers zahawm tak takte pawh cabinet a thlen hunah min support tur te pawhin he House kaltlang hian kan sawm duh bawka a ni.

Tichuan, Tourism chungchang te kha a zawt a, “*Pi Fangi Tourism Agency* hi tute nge an nih,” tih lai vel hi, a tak ka hre chiah lova. Hei, Pi Ruatfeli-pu (Ruatfela Nu) te hi chu a tel ve ngei mai a, ka office-ah pawh min rawn hmu a, an ni hian thahnem ngai takin hma an la ve a. Tuna fund an han dawn ang chite pawh hi chuti lutuka keimahni puihna ngai lovin NEC atangin; fund kha a zatchiah kha ka hre ta lova, awareness atan te, capacity building atan te, motor lei nan te pawh a tel deuhin ka hria, khang kha an dawng a, kan lawmpui a, hna pawh thatakin an thawk turah beisei ila. Tourism Department hrim hrim hian private players a tam thei ang ber tourism sector-a an rawn *step-in* (an rawn luh) ve hi kan duh a. Chutih mek lai erawh chuan dan leh hrai kan nei

tawh tih hi he House kaltlang hian, hetiang lama tui mi leh hetiang zawng zawng hi kan hrilh hre duh a. Dan hi 14 lai emaw hi kan department officer te thahnemngaihna zarah kan siam a, khang angchhungah khan thahnemngaih tur a ni. An ni pawh hi tha taka hnathawk tur leh Mizoram tourism hmasawna atana tangkai thei tur in i beisei phawt ang u.

Prof. Mawitea'n "Muallungthu-ah phullem pahnih min phah sak a, khawthlang lam ringawt i ti miah lo a nia" kha a rawn ti tel lova, leh, "a dang pawh Hlimen-ah te" tih te kha a rawn sawi tel lo naa, sawlaih sawn hma kan la a. Deputy CM hian Hlimen-ah phullem a ti dawn bawk a. Tin, Falkawn field a rawn sawi kha a pawimawh khawp mai. ZMC-in an field kan luahlan a, an field kha kan siam leh silo a nih chuan a dik lova, kha thil kha ka lo hre lutuk lova, "theihtawp kan chhuah ang" tih kha ka *assure* nghe nghe teh ang. Falkawn field kha chu a laih chhunzawm bakah MLA fund-a an lo tih leh khawtlangin an lo tih tawh na nana kha chu kan ti ang a. Tin, Hmuifang pawh saw chutiang deuh chu a ni a, Tourism hian an lo luahlan a, an field saw. Field kha an lo laihsak leh si lova, saw pawh saw tunah hian sum tlem kan nei a, tih belh leh ngai a ni tih kha kan sawi duh bawk a ni.

Tin, Dr. K. Pachhunga'n Zopuiphul chungchang leh Open-gym chungchang a sawi a. Open-gym hi a tha khawp mai a, a bialah pawh a ma thahnemngaihna in a ti a, ka va hmuhpui tawh a, a lawmawm khawp mai a. Kan la pui hleitheilo erawh hi chu ka inthiamlo khawp mai a, CSR funding atanga puih te pawh tum dawn ta ila a that ka ring a, kan budget-ah engmah a awm si lova. Tin, Zopuiphul, khitah Samthang khuua tlang phul nuam taka project sanction zat hi cheng nuai 359.21 a ni a, March ni 30, 2021-a sanction kha a ni a, Champhai DC hnenah direct-in sum a lut a, a sanction order-ah chuan 'open-tender tur' tih a ni a. Assembly zawhna a awm a, zawhna chhanna, "Addl. DC Champhai atanga kan dawn dan chuan tender nge a nih/nih loh tih zawhnaah khan, he project hi tender a ni lo a ni. An hawng tawhin ka hria a, hawng turin min rawn sawm a, mahse session lai te a ni a, ka hman lova. Tender lohin he project hi a kal a, department angin kan hriatpui lem lova. Allocation of Business Rules te hi kan ngaihtuah fo hi chu a ngaiin ka hria, sorkar-a kan awm chuan. Tin, a lo forward-tu lamte pawh kan awm anih pawhin, "eng subject nge, tute comment nge ngai ang" tihte hi chu tun hnuah chuan kan ngaihtuah chian deuh chu a thain ka hria. Tha taka an hawna, audit leh a chhuitu eng emaw te an lo awm palh a nih pawhin, tha taka a kal tluang a nih chuan lawmawmah ngai ila a tha awm e.

Pu Muanpuia'n, "bike-in kan vengah a lo kal" a tih te kha ka lo hre tawh lova, kan sorkar hlim, khang project kan buaipui lai kha a ni a. Edenthar-ah field tha a awm tur hi kei pawn ka lawmpui a ni. Tin, Pu Zothantluanga'n futsal-ground a sawi te, ICT

lam a sawi te kha kan chhinchhiah e. Tin, ka department ten an lo chhinchhiah zel bawh tih kha ka sawi tawh kha.

Pu Thiamsanga khan a rawn sawi deuh nual a, a sawi thiam bawh a Rabung te kha a rawn sawi a, sanction order ka whatapps tawh reng a, a lo la hmu lova, lo hmu se, vawiinah te hian lawmthu min han hrilh sela a that dawn dawn nen. Engpawh nise, ‘Rabung-ah mamawh’ in tih tak mai, ka room-ah a rawn kal a kan tihhlawhtlin sak tawh e, a dil bak te pawh kan pe deuhin ka hria a. Tin, Pu Lalrindika Ralte-in session hmasa lamah Sport Department hmalaknaa lawmthu sawina leh ‘hmalak chhunzawm zel ni rawh se’ tih kha remti lo awm chhun kha a niin ka hria a. Remti lo lamah khan a tang a, “a bial Hachhek-ah hian rawn din a tum tawh lo a ni ang a” an ti luih luih mai a. Mahse vawiinah chuan lawmthu a sawi a, ka lawm hle mai. Chu chu a tawi zawngin ka han saw mai ang e.

Tin, Pu Zaithanzama’n ‘tlem si, tam si’ a han tih lai kha chu, kan thlir dan a zir te pawh a ni ang tih ka ring a, a tam chhan te kha chu kan hriat tawh kha. Tichuan, ‘Sport policy-te hi’ tih lai kha chu, sport policy-te hi kan hmang tangkai khawp a, kan bible pakhat hi a ni ringawt a ni, sport-ah chuan. Sport Policy te hi nei lo ila PMJVK hnuaiia kan sum nuai singli leh tih te hi kan hmuh kan ring em aw, tih te hi kan ngaihtuah zawk a pawimawhin ka hria a. Foundation nghet tak neiin sports kan siam a, sports policy zulzuiin industry-ah kan puang a, eligibility support tha tak kan nei tawh a ni sports hian, *Industry* a ni ve tawh tlat a. Tin, a tak tak pawhin industry lian hi state dang leh khawvel hmun dangah phei chuan an industry lian a ni a, chu chu a takin a kal chho ve mek a. Futsal ngat phei hi chu Aizawl kher lo hmun danga Futsal siam tawh ho hi an hlawk hle ni te pawhin kan hria a. Kei pawh kumthar tir khan inkhel ve teh ang kan ti a, mahse a lo full vek tawh a. Aizawl Futsal Ground hi chutiang khawpa lun, Futsal Ground private ina an siamte pawh hi ‘sum chang thlai’ han tih chu a dik lo ang a, thlai a ni lova, mahse industry pawimawh tak a ni chho mek tawh a, a lawmawm hle a. *Expo eco-system* hian hma a sawn ve mek a, chak tak erawh chuan covid avang te leh thildang avangin kan kal la thei lova.

Tin, Er. H. Lalziriana han sawi Hmunpui leh eng emaw te kha chu a mal te te kha chu ka react vek lo mai ang a. Rawpuichhip-a an tourism hmun kha robeway velin a tihbuai zingah khan a tel avangin duh angin thil a kaltluang thei lova, pawh ka ti khawp mai. Tin, “Rajiv Nagar-ah post min pe thei em” tih kha, Tourist Lodge khu sanction pakhatmah awm lova sak a ni. Chuvang chuan post han create leh thawktu han dah pawh hi kan tim ang reng a, kei phei chuan ka melh dek dek ngam chauh a ni tih kha, eng emaw zawnga sawi ni lovin, he House-ah hi chuan thudik zel hi sawi mai ila a thain ka hria a, chu chu ka han sawi duh a.

Tichuan, Tuirial bialtu zahawm tak lawmthu sawina te kha a lawmawm ka ti a, kei pawhin ka lawmpui a. Tin, Khamrang kha nuai 80 a rawn ti hlauh a, Khamrang-ah khan kei pawh ka zuk campaign ve a, bye-election lai khan, project te kan siam anga kan ti a. Khamrang hi nuai 80 ni lovin nuai 800 a ni a, approval minute pawh kan nei thlap tawh a ni. *Mizoram Responsible Tourism Initiative*, kan policy hming ang deuha a project te pawh kal chho tur a ni. Tin, Pu KT Rokhaw khan ‘Tipa’ tih bawh kha a rawn sawi leh a, kan la ti theilo hi hrehawm ka ti a. Thenkhatin, “Mara District Council hi PMJVK hian a cover ve lova, Pu Roberta hian BJP an nih avang hian a ti tha duhlo a ni” tih te a lo awm deuh a niawm e, mahse chutiang chu a ni miah lova. Mara Autonomous District Council saw minority concentration areas-ah a tel lova, chubakah Siaha khawpui pawh saw a tel lova, Siaha khawpui pawh saw “Minority Concentration District Headquarters” an ti a MCD headquarters ah a tel lo tlat a, tihngaihna a awm rih lo a ni, PMJVK lam atang chuan. Mahse keipawh a tir te atang khan, Mizoram chu *in terms of religion* chuan minority vek, district zawng zawng hi minority concentration district area vek kan ni a. Tichuan religion hi minority tehna ber chu a ni mai a, kan hria a, hnam zawng hian an teh lova. churang chuan kan ti ve sauh sauh a, hmanni ka rawn kal chuan, “I thil dil kha a thuphung chuan cabinet chuan an phal tawh e” an ti a, churang chuan kumthar atang chuan Tipa pawh hi a cover thei maithei e, kha kha chu *maithei* thil chauh a ni.

Tin, Pu L. Thangmawia’n, “Kawlkulh” a rawn sawi a, tan a la thiam khawp mai a. Keimahni lam atanga a tih theihloh pawhin kawng dang atangin a ti thiam zel mai a, a lawmawm a. Ngopa Tourist Lodge pawh khawtlang angte pawhin an lokal a, KTP Conference thleng tur te an ni a. (**Pu KT Rokhaw:** Khami ‘maithei’ i tih kha, a theih rih dawn lo tihna em ni?) Tunah chuan, budget kha han chhiar chhin la, ‘theih e’ han tih mai ngamna chi a ni lo, nuai 2,400 chauh kan nei si a chu pawh hlawha kal vek tur kha a ni si a, cover erawh kan chak a. Tin, Siaha hi tun tuma Delhi ka kal hnuhnun ber tum pawh khan a bik taka package siam a ngai a. A chhan chu sawlam ADC area, 6<sup>th</sup> Scheduled area-a kan cover loh awm chhun a ni a. 6<sup>th</sup> Scheduled chu kei pawh ka zir ve thin a, M. Phil Degree pawh ka lakna a ni ve a, research tiin ka tlangval zual lai pawha ka va cham ve rengna kha a ni a. Churang chuan, ADC area dang anga cover kan chak em em a. An ni pawhin awm an ti a, “6<sup>th</sup> Scheduled area pathum zinga pahnih cover-a, pakhat cover loh bik hi” tih kha an ngaihdan a ni a. min hrilh dan chin chu kha kha a ni mai a. Kumin kumthar (1<sup>st</sup> April atangin) kan cover thei turah ngai ila. An ni chauh chu project-ah, PMJVK ringawt nilo project dang te pawh kan ngaihtuah nual a, submit sa, DPR tha deuh deuh te pawh kan nei a, mahse Sports atang hi chuan sum hi a tam lo em mai a, churang chuan *assurance* ka pe mai thei lova, theihtawp kan chhuah dawn a ni. volleyball court tur kha chu kan sanction-in ka hria a, tlem te.



Tin, Laki hi ka han sawi lawk ang a. Laki-a hmanni kan va kal khan (**Pu Lalduhoma**: MADC area a an tel loh dan kha engnge, a criteria engnge ni a, engvangin nge an tel loh tih leh, engtin nge an tel theih ang tih kha hriat ava tha ve) A lawmawm e, MADC an tel loh chhan hi ka chiang chiah lova, a criteria a tam mai a. A guidelines website lamah pawh khan a awm vek a. Index hrang hrang atang khan an teh a, an tel lo tlat a ni. Chu chu a ni a, an mahni saw chuan an inhrechiang khawp a. Tunah chuan tel ve turin Cabinet Committee on Economic Affairs ..... (**Pu KT Rokhaw**: Pu Speaker, *Castle of Beino* kha Lodaw khaw bula awm a ni a. Lodaw hi khaw te reuh te a ni a, tourist an tam si a, chuvangin Tourist Lodge kha min sak sak thei ang em tih kha khawngaihmin min hrilhfiyah nghal se ka va ti em).

A lawmawm e, sawlai saw khaw mawi tak mai a ni a, video chauhin ka la hmu a, ka la kal lova.... (*interruption*)

**PU ZODINTLUANGA RALTE** : Pu Speaker, *Point of Order* lawk. Thil hi ka han hre lo khawp a, PMJVK kha District Council Affairs Allocation of Business-ah khan a niin ka hria a, tuna kan zawhna leh a sawi tur zawng zawng kha District Council Affairs Minister sawi awm tak a ni a, a hna rawn chhuak kha Sports-ah an transfer mai niin ka hria a. Khalai kha min hrilhfiyah thei em le?

**SPEAKER** : Ngawi rawh u aw. *Zawhna & Chhanna* hun a ni lova. In zawt zel a, a chhang zel a, khati ngawt tur kha a ni lo. Kha lam kha chu kan awih tawh lovang aw. Eng emaw ngaihthiamloh zualpui in biala mi a awm anih loh chuan, midangin an sawi zel a, a dik thei tawh lo. Hon. Minister pawh kha tlemin confine deuh hlek the, thuawih takin.

**PU ROBERT ROMAWIA ROYTE, MINISTER**: Awle, Pu Speaker ka lawm e. An lo zawt zel bawk si a, chu chu a ni ve deuh bawka lawm maw le. minute 15 chauh sawi tum ka ni a .....

Pu KT Rokhaw sawi *Castle of Beino* kha a mawi khawp mai a, ka keng a, khulaia Ministry te pawh ka entir a, an secretary phei chuan, ‘project rawn siam rawh u, ka sanction ang che u’ a ti fiamthu a. Mahse project kan siam a, hmun thum laiah kan sem a ni. Mahse a rawn chhuah tur leh tur loh kan hre lova. Tourist Lodge mai kha a ni lova, thildang dangte pawh a tel a ni. Saw saw sap rama awm chu ni se kan pan huai huai tur a ni.

Tin, Pu Zodintluanga, MLA zahawm takin a sawi kha DoNER leh NEC te ang deuh hi a ni a. NEC project pawh a nodal department chu Planning Department a ni a, DoNER Ministry pawh a nodal department chu Planning Department a ni a, mahse

implementing department zelin heng hi chu an la a, an mawhphurhna pawh a thui khawp mai. Chuvang chuan, heng subject hi DCMA ni ta sela, DCMA subject kha chu area leh eng emaw kha chu a ni ngei mai, stadium te, volleyball tih te ang kha chu DCMA subject a ni lova, a nodal department tih a ni.

Tin, Pu Ramthanmawia rawn sawi kha, ni e, khilai khi potential area a ni chung khian hma kan la thei lova. Kan project rawn chhuak hmasa tura kan ngaiha kha tun thleng hian a rawn chhuak lova, khilai khi kan la cover tam lo khawp mai a, mahse beiseina chu kan nei a ni tih kha ka sawi theih tawk chu ni mai se. An talent tamzia pawh sport-ah kan hria a, tourism-a potential pawh eng emaw chen chu kan hria a ni. Tin, Finance Commission hian cheng vaibelchhe 200 hi min recommend a, mahse kuminah hi chuan kan hmu thei dawn lo tih, Finance Commission Secretary-te nen kan thu hova, tah chuan an sawi a ni. Amaherawhchu, kawng danga intanpui erawh chu a theih ang chu. 15<sup>th</sup> Finance Commission ber kha a ni a, kumina a rawn chhuah dawn tak lovah chuan sawi thui a har khawp mai. Nizan hmasa lawk pawh khan Union Minister pakhatin min lo phone a, kan project chungchang pawh ka lo sawi a, Farkawn chungchang a ni a, “ka recommend tawh e” te chu a han ti a. Chuvangin, eng emaw tak chu a awm emaw ni aw ka ti rilru deuh a ni.

Tin, Pu Biakzaua rawn zawhna hi thui tak chhan ngai lovin ka hria a. Ka han tih deuh vakna hi min hrethiam ula, tihloh hian ban hnuah min chhuahchhal thin vang a ni a. Budget neih tlem manah a thu lam tal hi sei sela ka han ti ve a ni hi. Tin, Thaltlang hi ka ngaipawimawh a, ka va kal tawh a. Eng engemaw chu ka va sawi a, an record emaw, record anih leh tihhlawhtlin kan tum ang chu. Travelers scheme ang chi saw chu tih ngei ngei ngai niin ka hria a ni. Tin, Smart Classroom sawichhuahna chang a hria kha ka lawm khawp mai a, Smart Classroom hi naupang Sunday sikul class lak nan te hian a tha khawp mai a, trigonometry zir nan te hian a tha dawn lutuk a, an hrethiam lo zawkin ka hria a ni.

Tin, Pu Lalrinsanga Ralte sawi Vairengte-a Sport Training Center hi kei pawh ka ngaipawimawh a, Vairengte mipuite pawh hi ka zah zozai tawh a, campaign lai khan ka zuk kal a, “ka unaupa ni bawh hi vote 600 aia a tlinna kha a tam chuan eng emaw tal chu rawn tih ka tum ang” ka ti a. Kan MLA dawn nge tih pawh hriat loh khan ka han zu ti ve tawp mai a, kut an beng hluah hluah mai a. An hre reng si a, tunah hian *recommended project list* kan neiha priority no. 1 ah chuan a tawlh chho va tawh a, ‘*a matter of time*’ ni tawh maiin ka hria a ni.

Tin, Tourism atangin ‘Chawngkhupa Island’ hi Serlui-B base-in circuit din kan tum a ni. A tak ala thleng lova, a potential area tak tak khu a ni a, tuna kan nei lai khu chu eng lutuk a ni lova. Mizoram-in kan neihloh chi kan rama vang *Dil* a ni a, a mawi

ve viau a ni. Khu khu promote zel tlak, tourist-te tan pawh thil tha a ni a, ‘kan lo umzui zel dawn nia’ tih kha ka han sawi duh a ni.

Kum 2019-2020-a Supplementary Demand kha Pu Zodintluanga hian min hnutchhiah vak lova, kum 2020-2021-ah chuan theihtawp kan han a chhuah a, ‘supplementary tam thei ang ber i chung lut ang aw’ kan ti a, 2020-2021 khan cheng nuai 11,793.99 kan chhunglut a, 2021-2022-ah cheng nuai 1,557.85 kan chhunglut thei a, kan indaihlohna dil anga min lo ngai kha chu a fuh chiah lo a ni. Tunah hian he laia rawn lang pawh hi eng emaw zat a awm a ni. Ka han sawi mai mai duh chu, Finance Department-a submit ngailo chu direct-a lokal chi *Khelo India* scheme CSR funding ang chi te hi Finance Department ah kal tlang a ngai lova, Finance Ministry-in circular a siam vek a. Central Sector Scheme tan hian state strategy-a sum kha a luhchhawn leh chuan a counting record kha a buai thei a, churang chuan chutianga kan tih loh loh chi hi, heilaia kan sawi tel lem loh, ‘engatinge a va lang lo ve’ tih zawhna te a awm takin. Entirnan, Muallungthu phul lem tih te, Armed Veng field chhawng kan sak mek ang chi te, Lengpui field kan hawn mai tur ang chi te leh hmun hrang hranga mi hi supplementary demand-ah hian a rawn lang ve lova, mahse central sorkar atanga kan sum dawn tho agency-a Sports Council rawn hmangte atanga kan sum dawn a ni.

Ngaih pawimawh zual pahnih/khat ka han sawi ve leh ang a. Pakhatnaah chuan ‘National Policy on Education’ hi ka sawi duh a, a pawimawhin a interesting bawk a, kan Education Minister-in a la sawi dawn naa ka sawi khalh duh a. ‘National Policy on Education’-ah hian sports hi a dah pawimawh khawp mai a, hmanni Guwahati-a North-East Sports Conclave-ah minister-te leh Assam sorkar leh *Times of India* nge *Hindustan Times* ten conclave an nei a, panel-a thu ve turin min ti a, chutah pawh chuan ka sawi a, min zawt bawk a. “2020 hmalam kha chuan naupangin fai deuha school a kala, fai deuha a rawn haw leh hian, ‘good boy’ a ni a, 2020 National Education Policy kan hman hnuah chuan naupangin fai deuhin school a kal ang a, thlan tla phungin a rawn haw tur a ni, chu chu ‘good boy’ lo tih tawh tur” ka ti a. A chhan chu naupangin thlan tlak, physical activity-an neih hi a pawimawh em em a. Kan policy-ah chutianga nih avang chuan, “tunah in va siam tam em em ve, infrastructure in va ti nasa ve” tih te hi, school panga-in an la intawm dawn a, school ten an la intawm dawn a. A chhan chu school hian nitin physical activity leh sports hi an neih ziah, kan policy thar ang hian a ngai dawn a, kan la adopt chho ve zel ang a. Tunah hian filed, infiamna hi chu a school context atang ringawt pawhin (college leh university kha ka la sawi lova) kan la mamawh nasa dawn a ni.

West Phaileng-ah phul lem kan phah dawn a, kan ti mek a, school leh Higher Secondary School awm zat atang hi chuan an indaih lo nasa dawn tih ka hria a, school pakhatah chauh kan phah thei leh si a. Churang chuan, khatiang zawng khan

ngaihtuahna kan hman a tul a ni. “*co-curricular activity* ni tawh lovin, sports hi *curricular activity* a ni tawh” tih kha kan hriat a tha awm e.

Tin, ‘talent neilo’ tih lai kha nichin khan ka sawi hmanhmawh lutuk deuh a, talent neilo, tui pawh tui lo, infiamna haw tlat naupangte hi department pawh hian kan ngaih pawimawh hlei hlei a ngai a. Chu mite chu engtin nge kan hruai luh ang, engtin nge sports-ah an tui ve loh pawhin an thlan tal a tlak a ngai a ni. Thlan tla lova *kheuh neuh neuh* lam ringawta kan thalaite an tui chuan a dik lo ang.

Tin, tunhnaiah TATA Trust-te nen agreement kan sign a, district zawng zawng cover-in football centre 60 kan hawng dawn a, *spot interview* pawh kan ti tawh tih ka han sawi duh a. Tin, sports promoton lam hi uar ila, infrastructure ringawt in ti a. Ka minister tirh khan ka thusawina pakhatat chuan sports promotion, hemi training leh participation/competition lam chi hi, “Kei chu kut pahnih ka nei a, ka kut thiam lam, ka kut dinglam hian sports promotion theih tawpin a chhuah ang a, a veilam, ka thiamloh lam hian sports infrastructure development a ti ang, chumi awmzia chu sportsman-te luhchilha, an thleng phaka hna thawh hi ka tum a ni” ka ti a. Sportsperson-te pawh an lawm viau a ni. Mahse kan hriat angin Covid hripui avangin a entu awma infiam chu sawiloh practice tak ngial pawh kum hnih chhung hian kan nei tlem khawp mai. National competition-a kal tur pawh keimah mawi lo khawpa ka intervane hnuah training an phal chauh a ni. Chutiang a nih avang chuan sports promotion lamah hian na takin kan kal thei hrih lo.

Tin, Pu Zaithanzama, Aizawl West-III bialtu zahawm takin “budget-te hi sports promotion lamah a tlem” tih hi a hre diklo niin ka ring a, kan sorkar hnu hian budget tlem chung chung hian engtin tin emaw ka han her a, association lam chante pawh hi kan tilian a. Mahse kan hriat tur chu, heng sum hi a hmanna turah lo chuan a hman theihloh a. National competition-ah te an tel loh chuan sum kha an draw chhuak ngawt thei lova, system fel tak kan hotu hmasate’n an lo duan angin kan kal a ni.

Tunah hian hockey-a kan hmalaknate, Hockey Mizoram ten tan an lakna hi a chhuanawmin ka hria a. Mizoram Weight Lifting Association te an che tha em em a, Paris Olympic-ah hian Jeremy Lalrinnunga hi kan hmu lo ang tih a sawi theihloh a; Tokyo-ah khan inhliam lo sela chuan Remsiami te ang bawk khan kan hmu turah kan ngai a. Mahse a inhliam deuh bakah, sports hi chu a sawi lawk theihloh a, a tel ta lo hlauh a. Boxing chu kan hria a, National School Games-ah pawh ro kan rel a, professional boxing-ah pawh kan che tha chho tan viau a, boxing hmang hian Mizoram leh Las Vegas hi a la indawhzawm lo ang tih a sawi theihloh a ni. Tin, Chepauk Takraw-ah te pawh kan che tha, basketball-ah pawh sawi a ngai lo, kan tawng a, kei phei chu ka lawm khawp mai a, Dr. Mathlana kha a awm lova, an ni kha a tangte anni a.

Cricket-ah pawh kan che tha khawp mai; “hetiang hian Mizo hian cricket hi kan thiam ve dawn emaw ni le” ka ti a, mahse tunah chuan *khitah* an awm a. Cricket Association of Mizoram hian Mizoram sorkar-ah GST-an chhunluh pawh hi cheng nuai 780 chuang a ni, tun kum hnih khatah hian. Chuvang chuan, cricket hi a nep lo tan viau a ni; an chhuanawmin ka hria anni pawh. Cheng nuai 780 chuang GST pelut thei hi kan sorkar company-ah te hian an awm em, an income zawng zawngte pawh hi a ni pha em tih tur te pawh a nih laiin. Chutiang chu sports dinhmun a ni a.

Tin, *Adventure Sports*-ah kan thang nasa a, a lawmawm ka ti a. Ka biala mi, Pu C. Lalawmpuia, Pu C. Thangkima, HMT neitu fapa kha Mizoram chhungah pawh hian pui deuhin a lo che fo tawh a, North-East leh India ramah pawh hriathlawh a ni. Hmanni lawk khan Aizawl atangin Kolkata-ah pedal cycle-in a tlan thleng a ni. A ropui ka ti khawp mai a, kha khan thu tam tak thalaiteah a pe a, adventure sports-ah pawh hian Mizo hi kan lo duai lo a ni. Ka biala mi a nih vang pawh ni chuang lovin hetiang sap hote chauhin an tih theih tur anga kan ngaih hi Pu C. Lalawmpuia hian a lo tithei ve reng mai. Nupui fanau nei tawh a ni nghe nghe a, a chhuanawm ka ti a. Adventure Sports lamah pawh kan kal zel ang tih ka ring a.

Tin, Adventure Training Centre Vaipuanpho-ah Tribal Ministry atangin Dr. K. Beichhua nena tang hovin kan ti mek a. Nimin piah lawk khan an Joint Secretary-in min rawn phone a, ‘kan approve e’ tih te, a continuation na tur te min rawn hrilh a, kan lawm khawp a. Adventure sports lamah pawh hian tan kan la zel dawn a ni tih ka han sawi duh bawka a ni.

A tawp nan, kan budget atlem ang ang hian rawn inthlahrung chuang lo ula, tihtheih kan neihloh pawhin tha deuhin ka lo chhang ang che u. Chuvang chuan, i tang ho ang u, kan thalaite hian puih an mamawh, kan thalaite hian support an mamawh. Sports kan ngaihtuah hian medal nen hian kan thlir kawp a, hei hi kan sim hmak a ngai. Sport kan ngaihtuah lai hian damdawiin te hi ka mitthla daih tur a ni. Japan-in, *Health for All* movement kum za kal taa an tih khan, Japan Cabinet-a an rorelkhawm, mifing ho an han thutkhawm khan hospital din an rel reng reng lo; sports indoor stadium din, football field din a ni *Health for All* atana an hmalakna kha. Chuvang chuan, hetiang zawng hian kan ngaihtuah a ngai niin ka hria a. Sports hi mi zawng zawng huapzo a ni a. Tin, kum sawmthum lek leka kan retire pawh hi a fuh chiah lo. Pavalai Club te pawh hi organize ila, MHIP tournament tih ang zawng hian mass movement, way of life anga sports hi kan siam ve hunah kan zunthlum te a reh ang a, kan dulkiar te a reh ang a, kan hrisel lo leh kan thisen sang te a reh ang. Chuvang chuan, hman deuh khan doctor thenkhat hnenah, “in budget nuai sang khat tal min pe ula Sports hian Health Movement kan rawn ti ang” ka ti a, an nuih a za angreng a. Mahse ka rilru tak tak kha mi tum pawh khan ka sawi a ni.

Pu Speaker, ka sawi thui ta viau a. Hetiang vel hi kan senior-te pawhin an tihbo ve phat phat tho kha maw. Pu Speaker, term thumna, term lina velah chuan kan thiam deuh tawh ang chu maw. Pu Speaker, ka sawi rei ta khawp mai a, min hrethiam th in ka hria a, ka lawm hle mai.

Tichuan, Pu Speaker, heng ka Demand-te: -

<b>Demand No.</b>	<b>Purpose</b>	<b>Amount (in ₹)</b>
<b>22</b>	Sports & Youth Services	24,22,12,000.00
<b>43</b>	Tourism	11,37,45,000.00
<b>48</b>	Information & Communication Technology	4,90,60,000.00
<b>TOTAL</b>		<b>40,50,17,000.00</b>

A vaiin cheng nuai 4,050.7 te hi, kum 2022 - 2023 atana hman turin he House zahawm tak hian min pawmpuina ka rawn dil e. Ka lawm e.

**SPEAKER** : Awle, tunah chuan Minister zahawm tak Pu Robert Romawia Royte in heng a Demand te –

<b>Demand No.</b>	<b>Purpose</b>	<b>Amount (in ₹)</b>
<b>22</b>	Sports & Youth Services	24,22,12,000.00
<b>43</b>	Tourism	11,37,45,000.00
<b>48</b>	Information & Communication Technology	4,90,60,000.00
<b>TOTAL</b>		<b>40,50,17,000.00</b>

House-ah pass a rawn dil ta a, kan buk ang a. Remti apiangin, ‘remti’ ti rawh u le. Remti lo kan awm em? Kan awm chuan, ‘remti lo’ ti ula. Awle, tunah chuan Pu Robert Romawia Royte Demand zawng zawngte lungual takin House in a pass ta a ni.

**PU ROBERT ROMAWIA ROYTE, MINISTER:** Ka lawm hle mai. Mahse Tourism kha ka sawi theihngihlh daih mai a, han sawi leh chu a chakawm khawp mai a, sawi tur ka neih thatna ber a ni leh nghal a. Ka lawm e.

**SPEAKER** : Kan Minister hi a *men* a, a zau a, a lawmawm khawp mai. Tunah chuan Minister zahawm tak Pu Lalchhandama Ralte kan sawm ang a. A demand sawi te rawn wind-up turin leh sawifiah ngaite rawn sawifiah turin, tin, a demand-te House-ah pass rawn dil se. Kan sawm e.

**PU LALCHHANDAMA RALTE, MINISTER:** Pu Speaker, ka lawm e. Ka hmaah khan kan Minister zahawm takin a demand a sawina ah khan, “ka demand hi a tlem ber a, churang chuan ka sawi rei deuh dawn a ni” a ti a. Ka demand hi Chief Minister demand tih lohah chuan a tam ber a, ka sawi tawi mai a ngai dawn em maw ni chu aw tih ka ngaihtuah deuh a. Kan meber zahawm tak te react ngai kan react bakah a tul bik a awm anih chuan min han hrilh ang a, a tul lemloh chuan a tawi thei ang berin han tih ka tum dawn a ni.

Demand-wise a rawn sawi ka duh a, a hmasa berin Demand No. 18, Printing & Stationery kha member zahawm tak tak pakua-in min sawipui a, a lawmawm khawp mai. Vawiinah hian minister pathum demand kan sawi avangin min ngaih pawimawh pui tak takte pawhin an sawi kim hman lova. An sawi thenkhatteah khan thawktu kan indaih tawk lohna min veipuina kan dawng a. Printing & Stationery Department-ah hian sanction post 284 kan nei a. Chung zingah chuan 121 chiah a tak a thawktu tunah hian kan awm avangin kan hna hautak tak takah te kan indaih tawk lova. Provisional Employee sawm pali kan neihte nen, chung chuan kan dpartment min enkawl a. Heng ang hunpui bikah chuan tlaivar thak thak in an thawk thin a. Tin, anmahni indaih tawk loh avangin pawnlam mi engemaw zat hi *daily wage* base-a thawk angin hlawhfa te kan chhawr a. Confidential thil khawih laia sorkar-a awm chiah lote han tih hi lehlamah chuan sorkar confidential chungchangah eng emaw harsatna a awm ang tih kan hlau khawp mai a. Kan member ten an sawi ang khan kan sorkar hotute pawhin remchang hmasa ah post-te pawh hi min hnawhkhah sak theih chuan kan lawm hle ang.

Tin, Printing & Stationery Department-ah hian press kan neih piallamah Govt. approved press 29 kan nei tel a, department hrang hrangin print tur min pekte keimahniin kan chhut mai piah lamah hian chung Govt. approved press-ah te chuan an inhlawhna turin kan lo pechhawng ve fo thin a ni tih kha kan sawi tel duh bawk a. Tin, ‘Stationery’ tih kan hmingah a tel angin sorkar department hrang hrang ten min dawr theihna tur atan a bulk-in stationery materials tam tak kan la a, chungte chu department hnenah tlawm zawkin kan pechhuak thin a. Entirnan A4 size paper cheng 300/- in bazar-a an lei ang te hi keimahni outlet atang chuan cheng 264/- in kan pe thei a.

Department-in sum an renchemna tur atan leh kan hlawkna awmchhun ang ang kha sorkar revenue-ah a awm theihna turin department ‘min rawn dawr rawh u’ kan tih lawm lawmna chhan a ni a. Vawiin a zawhnaah te pawh ‘department hi an dawr tha em’ in tih te pawh kha ‘Sorkar Department’ han tih hianin department sorkar-a kan neih zat ai hian a wing hrang angin han kal a ngai ve thin a. Churang chuan, Sorkar Department 45-in kan record dan chuan tunah hian min dawr a, 13 min la dawr ve lo an awm a. A department hming han chhiarchhuah kan chak viau a, amaherawh chu kan chhiar lo mai ang a, kan department chuan kan chhinchhiah khiau a ni. Hengte hi kan session zawh

hnu lawkah department lam atang pawhin kan kal zel turah minrawn dawr turin kan lo ngen zui dawn a ni tih kha ka sawi leh duh bawka ni.

Tin, Stationery approved 67 kan nei a. Karawn sawi leh duh chu, nichina zawhna awm zinga mi kha ka chhang tel nghal bawka ang a. Aizawl West III bialtu zahawmtak Pu VL Zaithanzama khan Mizoram calendar kan chhut loh chungchang kharawn sawiin a. A dik khawp mai a, *Allocation of Business*-ah khan I&PR chan a ni a, anni hian a remchan dan angin an tender a. Chutih rual chuan kan department-ah hian lo chhana lo tih ve dawn pawhin thawktu kan indaih tawka loh avang te, time-bound thila hengte hi mamawh a nih thin avangin kan chhang lutuk lo thin a. Hengte hi a awmzia dik takah chuan AOB-ah hian Printing & Stationery-ah awm ni sela chuan keimahni hian kan calendar milin kan chhu ve thei ang tih ka sawi duh a ni.

Tin, Pu Lalchhuanthanga, Aizawl South-II bialtu zahawmtakin a lo sawi pakhat, Stationeries material a hlui eng emaw zat awm chungchang arawn sawi a, kha kha chu tunhma lam thil a ni tih kha min hriat sak se la. Pu Zoramthanga Ministry-ah hi chuan Stationery thil hi lakkhawl vak vaka, sum siamna atan emaw, hman leh mang loh tur tihchhiat ang chi hi kan nei ve lova, a awm sa, a hlui dispose hi kan buaipui zawka a. Keini hi chuan House kawt maiah hian outlet pawh kan nei a, hralh nghal mai theih tur leh awlsam zawka tih theih ang turte hi kan buaipui a. Keiniah chuan khang thil hlui ang chi, khawiah emaw remchanga thil han siam theih tur ang chi kha kan kalpui lo a ni tih kha ka sawi duh bawka ni.

Tin, kan Member zahawmtak Pu B.D. Chakmarawn sawi pakhat suspense chungchang kha, “₹100/- lakh a awm a, eng emaw a awmzia min han sawifiah sak se” arawn tih kha han sawifiah thiam pawh a har a. Chutih rual chuan kan department hian pawisa minrawn pek hmangin bungrua kan lei a, chu chu kan hralh leh a. Chu mi revolving chu, keimahni leh keimahni revolving fund ang deuh hlek khan sales proceed-ah kan deposit ve leh mai a. Chulai chu ‘suspense’ an han tih, an hmanna lai kha a ni mai a, a tawi zawngin ka lo sawi mai e. Revolving fund ang deuha kan hman sawina ang deuh a ni. Kha kha Printing & Stationery chhunga mi, kan Member zahawmtak tak ten min han sawilan sak ka react-na ni se. Kan Budget-ah hian ₹12,68,86,000/- kan nei a, hei hi thawktu hlawh leh hma kan lakna tur tam takah hian kan indaih tawka lohna pawh a awm mai thei a. Amaherawh chu, kan Finance enkawltute hi an fel thin khawp mai a, indaihlohna kan neih pawhin kan han sawi hian min han duhsak leh thin a. Kuminah pawh hian engnge kan boruak tur kan hre lo va. Kan hma lamah hian department hrang hrang ten printing works a ni emaw, thil dang a ni emaw min pek hnema thawh tur kan ngah chuan kan indaih lo mai thei. Chu chu kan boruak chu a ni. Chutih rual chuan revenue target pawh min pe ve a, pawisa pawh eng emaw zat chu kan la lut chho ve zel a. Kan department-a thawktute inpekna a ropui a, thawktu kan nei



tlem viauna chungin a hun takah kan Session chhunga kan materials pawimawh tak tak te, Govt. Gazette te leh thil pawimawh tak tak te mihring tlem zawk hian an manage a. Chutih rual chuan reiloteah hian kan thawktu hi kan intihpun belh loh chuan hna thawk hlei thei lova kan awm dawn avangin chhanchhuah ngai tak, en bik ngai tak kan ni tih hi Printing & Stationery bikah chuan ka han sawi duh a ni.

Demand No. 28, LESDE kan sawihonaah khan sawitu 11 kan awm a. Kan hotute khan thahnemngai takin in han sawi a, han react tur chint e pawh ka chhinchhiah a, a mal te te chuan ka react lo mai ang a, thahnemngaihna thilte anih avangin, kan ziak tho a, a tawi zawnga tih ka han tum ang a. Eng emaw bik zawh duh a awm chuan min lo zawt mai turah ka ngai a.

Dr. Thiamsanga, member zahawm tak khan, “Champhai-ah Civil Service Coaching Centre min tih sak ve thei tawh em” a tih ang chi, MYC hnuai hmalakna te pawh kha, Ni e, Champhai North leh South bialtu zahawm tak leh kan zirlai hruaitute pawh khan an sawi thin a, MYC hotute nen pawh indawrin a hmun turte lo ngaihtuah nise kan ti a. Kan boruak te a that chhoh chuan kan sum neih remchan ang ang hian Champhai-ah Coaching Centre neih ngei kan tum a ni tih kha ka sawi duh bawka ni.

Tin, Pu Lalchhuanthanga, Aizawl South-II bialtu khan ITI Aizawl chungchang a rawn sawi kha han sawi belh ngai tlem ka nei a. ITI Aizawl-a thawktu eng emaw zat, trade hrang hrang 16-ah khan thawktute an lo pension a, kan indaih ta si lova, ‘heng chungchang hi engtin nge ni ang’ tih kha, ni e, thawktu kan lak theihlohnaah pawh khan guest faculty te kan ruai a, engtin tin emaw trade hrang hrangte kha kan han kalpui a. Kan ITI building a chhe zualpui te thawm thatna turin Skill Strengthening for Industrial Value Enhancement (STRIVE) project-ah hian cheng nuai 80 tunah kan nei a, tunah finance-ah a awm mek a, rei vak lovah a lo chhuah theih kan beisei a, hei hi Pu Hlana pawh khan a rawn sawi a ni. Kan ITI te cheibawla tuai thar hi ngaih pawimawhah neih kan tum a ni.

Tin, member zahawm tak Aizawl North-II bialtu MLA, Dr. Vanlalhlana khan entrepreneurship lam uar a duh thu a sawi te kha a lawmawm khawp mai a. Ani hi skilled development te, entrepreneurship lamte min tuipuitu, inhmuh nikhua pawha sawi fo thin a ni a. Amaherawhchu, entrepreneurship chungchang hi a hma khan Planning Department-in a keng char char, tun January 28, 2022-a Allocation of Business thar a lo chhuah khan kan department-ah min pe chauh a ni. Chumi avang chuan thla khat vel chauh ka department hian kan la enkawl avangin hmalakna turte pawh kan han chhawp chho dawn a ni tih kha ka han sawi duh a ni.

Lawngtlai bialtu MLA zahawmtak Pu C. Ngunlianchunga leh Pu H. Biakzaa ten Lawngtlai-a LESDE office awm ve han tihphuisuina tura rawtna te pawh kha, department chuan kan thawktu neih ang ang te han semzai leh hman tangkai dan tur kan lo ngaihtuah mek a. Kan staff dinhmunte enchungin helai hi district hrang hrangah tihphuisui hi kan tum mek a ni tih kha khalai kan han sawi ka react-na nise la.

Chutih rual chuan tlem a zawng keimah hian .... (**Pu BD Chakma:** Chawngte ITI kha engtikah nge hman theih a nih ang? Building chu engkim sanction zawh vek a ni tawh a, quarter nen.) Ka lo sawi theihngihl palh a ni, Pu Speaker. Member zahawmtak Pu BD Chakma sawi, Chawngte ITI chungchang kha thil hi hriatsual palh leh hmuh fuh loh palh awm ve thei a ni a. Chawngte ITI saw kan department hmalakna atanga sak leh ruahman a ni lova, hun hmasaa MSDP lam atanga sak a, DC Lawngtlai kaltlanga sak a ni a. Kan department-ah min la hand-over tlat lo mai a, tun dinhmunah hian. Chutiang ang scheme hmanga an sak chu West Phaileng khu a ni bawk a, khu khu chu nikum lawk khan min hand-over tawh a, tihpuitlinga trade pahnih, pathum function dan turte, tin, tools procurement-te pawh kan buaipui mek a. Chawngte ITI tak saw chu a satute, a kawl mektute hian kan department min la hand-over loh avangin sawi thui theih kan nei rih lo a ni tih kha member zahawmtak ka chhanna ni se la.

Chu baka ka han sawi duh chu, kan department 'LESDE' kan tih hi kan hriat tlan angin Labour Department Ministry leh Skilled Development Ministry tangkawp, India sorkar leh khawvel pawhin a ngaihpawimawh Ministry lak kawp kan ni a. Chungah chuan, kan theih ang tawka hma kan laknaah hian Labour Law-in a phal ang, kuthnathawktute thlavang hauhna tur leh hamthatna tur rules 18 huangchhung atangin theih ang tawkin hna kan thawk a. Kan tih ang te hi kan duhthusam chu a nih loh rualin, Labour Law hnuaia kan hnathawhnaah Mizo mipuite'na kan han hriat tam deuh ber pakhat chu, Mizoram Building and Other Construction Workers Welfare Board (MBOCWWB) hnuaia kan hnathawh hian mi tam takte min cover avangin, member 87,607 te in register-in, valid member 70,354 kan nei mek te a ni. Ka han sawi kherna chhan chu, construction work rau raua kan hnathawhna atanga cess 1% tlingkhawm atanga kut hnathawktu (construction workers) te hamthatna tura tana kan hnathawhna hmun a nih avangin, helai hi ka han sawichiang duh deuh hlek a ni. 2021-2022 chhung hian cess pawh hi cheng 19,19,73,339 a lut a, a lut ai hian kan hmanchhuah hi a tam zawk hret a, cheng 19,76,75,543 kan hmang tawh a. Chutih rual chuan, hun hmasa lama cess kan hmuhkhawm tawh, la tlingkhawm kha kan neih ve bawk avangin, chungte avangin tun dinhmunah hian eng emaw zat chu kan la kawl a ni tih kha ka han sawi duh a ni.

Tin, construction worker, kan member-teah hian a theih chen chenah Covid-19 hrileng karah hian chhawmdawlina policy kan kalpui a, Board meeting-in ruahmanna

min siamsak angin. Chutah chuan, a bik takin kan member-te zingah “Covid-19 avanga boral an awm chuan cheng 3,00,000/- in kan ral ang” kan ti a, board-in. Chutiang chuan vanduaithlak takin boral pathum kan nei tawh a, chungte chu cheng 3,00,000/- in kan ral a.

Tin, kan member-te zingah Covid-19 hri kai enkawl, 4C ah a ni emaw, hospital emawa awm (hospitalized) te hi, “an damdawi inenkawl na senso i pui ve ang u, mi pakhat cheng 10,000/- in pui ni se” kan ti a. Chutiang chuan mi 1260, hnenah tanpuina cheng 10,000/- theuh kan pe tawh a, kan sum leh pai tam tak kan hmangral tawh a. Kan hriat angin Covid-19 a lo len hlim 2020-ah khan kan Workers Welfare-ah hnathawk theilote tanpuina atan member pakhat cheng 3,000/- diat diatin kan pe a. Mizoram pumah mipui tam tuarte, ‘ration khulhna tur neilote tan’ tiin buhfai free ration te pawh kha kan lo sem tawh a. Heng covid package hrim hrimah hian cheng 25,05,76,620 ngawt mai, mipuite’n construction works kan thawh atanga kan cess tlingkhawm atang hian covid package hi kan lo hmang tawh a ni tih pawh kha he House zahawmtakah hian ka han sawi tel duh bawk a ni.

Chutih rual chuan, nimin piah lawka Private Member’s Bill kan ngaihthlaka ka sawi tel tawh kha, MBOCWWB hian construction workers-te chauh a huam avangin in register duh tam takte, vawiinah hian kan labour tam tak hna hnuaihngung zawk thawkte tam tak a huam tel lo kan tih kha. Chutah chuan Unorganised Workers Social Security Act, 2008 hmang khan nikum 2021 August thlaah Prime Minister of India-in programme thar a launched ta a, E-Shram portal common service centre kaltlanga inziak lutte hnenah heng kuthnathawktu hrang hrangte, driver an ni emaw, *Ni 100 Inhlawhna-* a thawk an ni emaw, loneitute pawh an ni ang chu, chutiang ang huam vek chuan inziahlul theihna, unorganised workers-te tan, an social security tur kha pek theihin a awm ta a. Chungte chu vanduaithlak taka an lo boral pawhin cheng 2,00,000/-, death benefit an neih theihna tur scheme pawh kha a lo awm ta a.

Mizoram tan hian member nuai 3 target minrawn siamsak a, tunah hian member 26,000 chauh kan la ni a. Kan MLA zawng zawngte pawhin kan bial chhung theuhah heng unorganized workers member ni thei awmte chu Common Service Centre-a kala a thlawna in register theih a ni a, anmahni ngei kal zel kha security tan pawha thil tha a nih avangin heng kawngah hian zirtir tel hi kan mawh a ni tih kha ka han sawi duh a ni.

Vawiin chu sawi tur a tam hle naa ka short cut mai ang ka tih kha. Skill Development lampangah nasa takin hma kan la a, thuang thumin - Government Training Scheme te, PMKVY te, ATS atang tea training hrang hrang kan pek te, programme kan cover te a awm a. A detail a sawi a chakawm hle naa, hun ka ren avangin kha chauh kha ka sawi ang a.

Chung huang atang chuan nikum khan programme pakhat ITI Aizawl-ah khuan kan siam a, kan department hotute an fakawm ka ti khawp mai a. Hming pakhat an phuah chu, ‘Pum Innovative Fair, 2021’ an ti a. ‘Pum’ chu kan hriat vek ang chem te, tuthlawh te an chher a, an tih hriamna a nih kha. Creative idea, skill nei thate intihsiakna tur khan a hming an phuah a. Mizo thalai tam tak talent leh skill tha tak tak te an rawn phochhuak a. Intihsiakna ah an idea tha tak tak te, kut themthiam tak tak te kan hmu a, a lawmawm takzet a ni.

Tin, vawiina Aizawl North-III bialtu zahawm leh Aizawl North-II bialtu zahawm tak ten World Skill Competition-a kan tel tur chungchang an rawn sawiah khan tlem han sawi tel ka duh chu, a bul tannaah khan State Level Skill Competition kan nei a, kum 21 hnuailam tan he skill competition hi tih a ni. A hmunah khuallianah ka zuk tang a, an thiltihte a hmunah ngei a takin an siam a ni, siamsa keng nilovin. Anmahni ngeiin practical-in hun bituk chhungin an siam a. Chutiang chu Mizoram level-ah kan nei a, chuta tithate chu India Skill Eastern Zone Competition, ni 21 - 22.10.2021 khan Patna, Bihar-ah Mizoram aiawha intir lehin, chutah chuan Gold medal 3 leh Silver medal 6 kan dawng a ni. Mizoram atangin participants 12 an kal a ni. Chungcho chu India Skill Competition, Eastern Zone (India ram pum intihsiakna) Delhi-a neihah an zuk tel leh a, Gold medal pakhat leh Bronze medal pakhat kan zuk la a ni.

Tichuan, chuta tlingte chu India ram aiawhin World Skill Competition Sanghai, China-ah October thla khian kal tura tih an ni a. Chuta tlingte hming he House-ah hian han chhiarchhuah ve hrim hrim thain ka hria a, chawimawi an phu avangin –

1. Shoe making - Vanlalbiakdiki (Gold Medalist) hian citation bakah ₹100,000/- a dawng a ni.
2. Floristry - Maximus Lalruatkima (Bronze Medalist), citation bakah ₹50,000/- a dawng a

Anni pahnih hi India aiawhin China-ah an kal dawn a, hetiang mi chhuanawm talent/skill nei tha Mizo thalai kan nei hi a ropui a, “an chhuanawm a ni” tih kha he House-ah hian ka sawi duh a ni.

A dawt lehah chuan LESDE hnuaiyah hian Mizoram Youth Commission a awm a, House-a Dan kan pass hnuaiyah khan. Anni hi Mizo thalai te target-a hnathawktu an ni. Thahnemngai takin MYC Chairman hnuaiyah hna an thawk a, an hnathawh hrang hrangte vawiinah pawh khan kan sawi nual a. A bik takin Mizoram mipui ten kan mamawh, All India Service lamah kan senior-te an pension zel a, hun lokal zel turah All India Service-ah hian Mizote kan kangchat mai theih avangin kan Chief Minister zahawm tak hian min veipui a, budget-ah pawh cheng vaibelchhe 2.5 aia tam hret MYC tan min pe te kha a ropui em em a ni. Chung kaltlang chuan a hma pawha kan tih tawh

‘Super IAS-20’ te, ‘Super IAS-40’ kan tih te kan nei dawn a. Mizo thalai mahni sum leh paia coaching centre thaa kal theilo tur, thluak tha si te kha helaiah fair takin intihsiakna kan nei ang a, a thazual 40 te hi India rama coaching centre thaah State Sorkar sensovin an kal dawn a ni. Nikuma mi 20 kan tirh te kha vanduai thlak takin Covid avangin thla thum bak an kal thei lova, an coaching centre zawng zawng kha khar anih avangin an lo hawng a. Pathian khawngaihna a zarah boruak te a tha chho ang a, mi tam zawk kan sorkar in *full-sponsorship* a pek hmangin an kalchhuak ang a, kan ram leh hnam mamawh, kan kal zelna tura mi pawimawh tak tak ni turte hi engtik niah emaw an la rawn chhuak ngei a ni tih ka ring a. Kan hmanhmawh deuh hlek thin a, an rawn hlawhtlin nghal mai loh hian a buaipui tute thlenga dem mai te a awm fo thin. Hetiang ni tur hian a inzial chhung te hi a rei ve deuh a ni tih kha kan sawi tel duh bawk a ni.

Tin, MYC kaltlanga kan hmalaknaah hian zirna lama mithiam bikte chauh nilo, mi talented, kawng hrang hranga talent nei thate hi an tana Youth Commission anih ang hian an address a. Zaithiamte pualin MYC Perkhuang, 2021 pawh an siam a, mi tam tak in an hlut a, tam takin fiamthu thawh nan an hmang a ni. “Engatinge zaithiam te cable tv-te pawhin an thlang a, engatinge Youth Commission hian an thlan ve” te pawh an ti mai thei. Hei thil hi awmzenei takin Youth Commission hian a buatsaih a, henga kan zaithiam thlan chhuahte hi India ram chhung hmun hrang hrangah emaw, abroad lam emaw thlengin zaia eizawna an neih theih dan turte a buaipui a. A programme-ah pawh khan music lama sulsutu langsar tak tak, North-East Wave te, Music connect Asia te, ICC te bakah Bollywood film producer-te pawh Mizoram-ah lokal in kan zaithiam te talent te, an performance te an rawn thlir a, thawhhona thuthlung pawh MYC nen an ziak hial a ni. Engtik niah emaw chuan zai lama talent nei tha ten Pathian-in Mizote talent min pek zai lamah thui zawk, eizawna nei thei te pawh an chherchhuah kan ring a.

Tin, sipai lama tui mite tan pawh Army training pawh an siam a. Chutiang nilo, ordinary deuh zawka kan hriat general youth inhlawhfa duh te tan *online job portal* siam a ni bawk a, chu chu internet android hmangin IOS application-ah mi hnathawh duh, inhlawh duhte, tin, hlawhfa mamawh te intawhkhawmna tur *job portal* a ni a, chutah chuan mi sing 2 chuang zawm tawh awmin chumi kaltlang chuan hlawhfa an duh te nena inbia in an in zawng thei tawh a ni. Chutiang chu kan Youth Commission kaltlanga kan hmalakna te a ni tih pawh kan sawi tel bawk a ni.

Chu mai bakah vanduaithlak taka Covid-19 avanga harsatna kan tawh khan *reverse migrant workers* te, state danga kan tlangval rual eizawnga kal lo haw te kha MYC kaltlangin kan sorkar hian kan lo ngaihsak a, kan lo buaipui a, MYC hnuaiah inzialhuna te kan siam a. Mi 2632 zet an in ziak lut a, chungte chu kawng chihrang hrangin skill an neih ang angte, an talent te tipunga eizawna kawng te buatsaih sak

turin NEC atangin scheme vaibelchhe tel kan siam a, ka nei a, chung hmang chuan skill training te pawh kan siam a, kan buaitsaih a ni. Tin, district hrang hrangah chungho enzuina kawngte pawh chu kan ti a. Tin, kan Deputy Chief Minister ho hian Bank lama hotu hrang hrangte ko khawmin reverse migrant workers te tanah *soft loan* an pek theih leh theih loh te, anmahni tanpui tur tein Bank te pawh kan ngen sak a ni. Chutiang chuan heng hun harsaah pawh nasa takin kan thalaite address in he department hian hma alo la a ni tih kha kan sawi leh duh bawk a ni. Sawi duh tamtak awm mahse khalai bik kha LESDE-a ka sawi ni ta sela.

A lian ber, School Education-ah ka kal tawh ang a, Pu Speaker. School Education pangngaia ka luh hma hian nichin deuh khan kan hotu thenkhatte han sawiah khan han sawifiah tel zawk, thildang ka sawi hmain tul a awm a.

Kan Oppositon Group Leader zahawm tak, Pu Lalduhoma han sawiah khan han sawifiah ngai deuh a awm a. Mipui a lo hriate khan ngaihtuahna hman dikloh palh awm thei a, a ni pawhin a hriat dan atang khan a rawn sawi mai kha a ni a.

Minister motor pakhat Ratu-ah a kal a, a piah lawk Sakawrdai a ni mai sia, ‘POL laka kha a tam angreng si a’ tih a rawn sawia kha, eng emaw han tihfiah ngai lai awm kha department te kan han zawh tir nghal a, an rawn sawi nghal vat a. Kha motor a rawn sawi kha Director, School Education hminga register a ni a. An minister hi khilam pang biala bialtu ka nih miau avangin bialah ka kal a, ni 16.10.2019 ah khan Sakawrdai ka kal a, chutah chuan support car-in an lokal a ni. Tin, 22.10.2019 ah Kolasib-ah ka kal leh a, chu motor pawh chu a kal leh a. Tichuan ni 23.10.2019 ah Ratu-ah chuan ka kal leh bawk a, chu motor bawk chuan min zui leh a ni. Tum 3 chu motor tlan chhuak detailment awm thlapa kalte POL an pekna a kha a ni a. Engtin emaw an lo dah hlawm deuh nge ni, chulai te chu, ‘Sakawrdai leh Ratu a inhnaih si’ a han tiha POL uchuak lutuka bill anga han tih kha hriatsual palh awm thei anih avangin khalai kha kan sawifiah lawk a ni.

Tin, chulo leha kan House-a lar ta viau pakhat chu, NABARD hmanga kan hnathawh chungchang a ni a. Hmanni-ah khan House ah kan sawi a, Minister-in ka commitment te pawh ka sawi tawh a, “hna tha taka an thawh loh chuan bill hi an la dawn lo a ni; nasa takin mahni bial theuh pawh min lo monitor pui rawh u,” kan ti a. Amaherawhchu kan han sawi hian mipuite hrilhfiah hret ngai lai awma chu, “nuai 70 man sikul sak tur a ni a, nuai 52 velin an sa si a, nuaih 20 vel a bo” han tih ang chia te kha a awm thwak thwak a, politics tawngkamah hi chuan han sawifiah lutuk loh, a ruaia han sawi te hi a awl ve pawh a ni maithei e. Amaherawhchu Pu Speaker, sorkar-a awm tawh thin te chuan an hrethiam viauin ka ring a. Hna, civil works a awm reng rengin, component chi hnih - civil works leh electrical works te a awm a ni. Tuna an han sawi

lai bawr taka kha dik deuh tho si, dik tluantling lo, 'half-truth' kan tih ang hi awm a. Civil works lam thawktu work supervisor te ina an thawh chin an sawi lai bawra kha chu a dik viau a ni. Khang lai bawr kha a lo ni maithei, chungho chuan civil works an thawh hnuin electrical works lamah 7.5 a kal leh tur a ni a, chutiang chuan an han thawk chhunzawm ve leh a ni.

Tin, hna tender reng rengah hian, tender amount hi nuaih 70 ni ta se, chuta tanga 12% chu GST-ah ngei ngeiin cut a ngai a, nichina kan sawi tak 'labour cess' kan tih, tangkai taka kan hmanah khan 1% an cut leh ta a, 7.5% kha electrical-ah a kal leh a, chumi hnuah chuan 2.5% hi department monitoring lam engineer ten an check a, an kalh a, engkim an endikna tura hman tur a ni. A pumpui tender amount atanga 23% hi tax leh thildangah hian a kal tawh hrim hrim a ni. Chuta tang chuan a hnathawhna tak tak tura hi chu a awm a ni. Hetia kan han sawi hian 'sum bo' emaw kha a ang lek lek thin a, helai hi zirtirna himlo a awm palh theih avangin kan sawi lawk a ni.

Pu Speaker, Demand No. 20, School Education kha min sawitui pui khawp hlawm mai a, member 23 ngawtin an sawi a, lawmawm ka ti khawp mai a. Chutih rual chuan kan phu lovin faknate, duhsaknate min han pe hlawm a, *thu ngaihthlak nuamlo* engmah awm lovin kan duh laite kan han inzawtfiah a. Kan bial chhungah sorkar kaltlanga kan thiltih ang chhun chhun te lawmthu kan han sawi diat diat te kha a ropui khawp mai. Min tiphur a, a thawktu zawng zawngte pawh chona nasa tak min pein ka hria a ni. Khang kan han sawi hrang hrangte pawh kha a remchan dan angin kan ziak vek a, nakinah kan la react tho ang a. Chutihrual chuan helaia point thenkhat kan sawite hi ka han sawi tel ang a.

Ni e, member-te khan in sawi ang khan school education department hi Mizoram sorkar department zawng zawng zinga 'department lian ber' kan tihah hian Mizoram sorkara hnathawk zawng zawng 30% hi an awmkhawm a, a nghet leh a nghetlo te nen hian mi 20,000 chuang kan enkawl a ni. Chungah chuan fel deuh deuh te, tlema lo zawmthaw deuh te, House member-te tan pawh mit-tlunglote pawh an awm ngei ang. Amaherawhchu a tlangpuiin kan thawktute an fel a, an inpe tlang a, chungte nen chuan he ram education siamtha turin thahnemngai takin kan thawk mek a ni tih kha kan sawi duh a.

Covid 19 hripui lo leng hi kan department hi a tuar ber kan ni mai ang em aw ka ti a. A chhan chu, school te kan hawng thei lo va, zirlai naupang nuai 3 deuhthaw class kal chak em em class kal thei lovin, a thente phei chu uniform pawh la ha reng reng lo school kal tan tir tur an awm a. Pawl 10 pass hlim Higher Secondary School kal tanna turah class kal mumal lovin college zawm te pawh a ngai dawn tawh a ni. Chuti khawp chuan he hripui hian min nghawng a, min bei a, kan tuar tlang a ni. Chutichung chuan

keini department chuan zirnaah an hnufum lohna turin theihpa tawp kan chhuah a, online class te kan han kalpui a. Vawiiina ICT Minister awm laia an sawi ang khan internet signal that tawklloh avangin online lah chu duhthu a sam baw si lo a ni. A tak takah chuan online-a kan kal hian 50% kan score pha ang em aw tih a ni.

Chutiang harsatna kan nei chung hian department-a thawktute, zirtirtu association hrang hrangte leh office Directorate leh Secretariat-a thawktute inpekna avangin he department hian hmalam panin kan kalpui thei a. School kal hun tur te kan han ruahman ve thin a, amaherawhchu ‘disaster’ a kan puan miau avangin State Executive Authority thu te, District Magistrate thu te kan han nghak a, ‘School i kal tan ang aw’ kan han ti a, kan inkhar leh rup rup mai a, chutiang reng reng chuan kan hun kan hmang a nih kha. Amaherawhchu, chutichung chuan member-te support-na nasa tak kan dawnah khan kan lawm a ni. Hetiang hripui kara kan hmalakna kalah hian a bik takin School Education hnuai hian kan Chief Minister hian ‘Human Resources Board’ min din sak a. HRD Board hi a tangkai em em a, anni nen tangrualin online mumal zawk leh hlawhtling zawka kan kal theih dan tur a tan te, School Authority te, Deptt. Authority te fuih phurna tur atan Webinar te min neihpui a. H/S zirtirtu te, M/S zirtirtu te online-in kawng chi hrang hrang kan HRD Board kaltlangin kan nei thin a ni tih te pawh kha kan sawi duh a ni.

Tin, khatianga school kan kal lo kan tih lai khan kan department hi kan thu thluang mai mai lova. Office lamah in kal chhawk kan ti a, kan Directorate te Secretariat te hian service leh administration lama harsatna nasa tak kan neih thin, kum tam tak headmaster leh principal Primary, Middle, High school leh Higher Secondary tea kan hnawhkhah hleih theih loh kha sorkar lam kha hotu ten hnawhkhah phalna min pe a, class kan kal hleih theihloh lai hian chung ang chu hnawhkhah theih na te kan han nei a. HSS-ah principal post 4 tun kum chhung hian kan pe a, H/S headmaster 47 promotion kan han nei thar baw a, M/S headmaster thar hlak 128 (promotion thar awm reng reng lo) kha kan han dah baw a. Primary School pheih chu 195 kuminah ringawt hian 300 deuhthaw, tun thlahnih emaw lekah promotion posting kan kal tir tawh baw a ni. Chuti khawp chuan he Covid avanga harsatna kan tawh lai pawh hian kan department chuan hmalam kan pan a. MSSB leh MPSC te lam nen kan han buaipui a, kan officer-te an fakawm hle a ni tih kha kan sawi duh baw a ni.

Tin, hemi piah lamah hian Education Television Programme kan nei tel a. DDK leh local vision hrang hrangte nen thawhdunna thuthlung siamin class kan kal hleih theihloh lai pawhin *edu. programme* bik te kan siam a. Chumi hmang chuan inhriattir tul ang te sawihona te kan siamin theih ang tawkin kan buaipui a, chutiang ang chuan hma kan la a. Chung kawngah chuan kan officer-te piah lamah zirtirtu association te kan hmang tangkai hle thin a ni.



Tin, kan department hnuai Adult Edu. Wing kan neih hian nasa takin hma an la a ni. Kumin bikah hian District 4-ah in concentrate-in PLA programme kal tlangin ziaak leh chhiar thiam lo mi 22,800 te kan target a. Chung hote chu ziaak leh chhiar te kan han zirtir a, theih ang tawkin he kum kal laiah pawh hian kan lo bei a ni.

Tin, CSS hnuai atanga kan programme pakhat 'midday meal' kan tih te pawh hi school kal thei lovin han inkharkhip lai pawh khan a thawktute inpekna avangin naupangin chhun chaw tha an dawn theihna turin theitawpin hma kan la a, *midday-meal* kha kan khaih lak reng reng lo a ni. An inah ngei VLTF te, LLTF te leh kan zirtirtu ten hripui avanga kan inkharkhip lai pawh khan naupangte chaw tha dawn tur kha inah kan la pe zat zat thei a ni. Chungte pawh chu a thawktute inpekna hi he House kaltlang hian a chhuanawm em a, ka han sawi duh bawka a ni.

Tin, Samagra Sikhsha Abiyan (SSA) kan tih scheme atang hian zirna In leh zirtirtu te hmun kilkhawr zawkah kan dah a, kan pek belh zel a. Tin, zirlai naupangte a bik takin free uniform hi naupang 90,835 hnenah kan pe a. Zirlai Bu pangngai bakah hei 'braile-book' kan tih ang chi te nena belkhawmin 99,492 a thlawmin kan sem a ni. Chulo lehah chuan, he kan ministry hian tun sorkar kum kal chhovah hian H/S leh HSS eng emaw zat a tharah te pawh Science leh Commerce zirna pek tharna te kan han siam chho a. Vawin demand sawinaah khan lawmthu hrang hrangte an rawn sawi hlawm avangin khang pek tharna hmunte pawh kha kan sawi tawh lo mai ang a. Tin, CSS hindi zirtirtu kan mamawhna te hriain kan Chief Minister hovin hmalak a ni a, central sorkarah kan dil a. Chungah chuan zirtirtu, a hmaa kan chhawr 1305 te min ban tir vek avang khan zirtirtu kan tla bal a ni. Sorkar hmasaah khan 1305 kha an bang a, an khawngaihthlak khawp mai a. Tichuan zirtirtu lak thar kan han dil leh a, min phalsak angin tun kum kal chho-ah hian CSS hnuai High School leh Middle School zirtirtu 806 kan la a ni. Tin, chumi nilo elementary school bikah hian programme pakhat tha deuh mai a awm a, rualbanlote ngaihsak kawngah hianin central atangin programme lokal kan neihte zingah hmeichhia rualbanlo elementary-ah zirlai 1,174 leh secondary level-ah 547 te hnenah hian stipend kan pe bawka a ni.

Tin, kan beng verh em em tur pakhat, vawinaah pawh khan member zahawm tak Pu KT Rokhaw pawhin a rawn sawi a. Vanduaithlak takin kan thenawm Myanmar lam politics buai avangin kan unaute Myanmar lam atangin an rawn tlan thla a, sahimna an rawn zawng a, raltlan eng emaw zat kan nei a, chung ah chuan naupang lehkha zir rual tam tak an awm a. Education chu *universal* a nih avangin, foreigner pawh ni se India Dan angin, keini chuan kan unaute kan tih avangin zirna pek dan tur kan ngaihtuah a, an mahni lo tlanna khuaa kan zirtirtute an inpe em em a. Tin, kan sub-Division leh Division lama kan hotuten monitor bawkin hengah hian a theihna hmun hmunah zirlaite lehkha kan zirtir a. Tin, kan zirlai pawl te pawh hian an theih ang angin an mahniin

ruahmanna neiin an hun awlah zirtirna an pe bawk a. Zirlai 2,526 kan unau rawn raltlante hi school-ah admission kan pe a, zirtirna kan pe a ni. Chung zingah chuan a thente phe chu chawhma lama kan ngaihthlak tawh ang khan matric-ah exam tur 25, higher Secondary-ah 2, a vaiin 27 board exam turin kan ruahman sak a. Dan pangaiah chuan pawl 9 emaw, pawl 11 emaw ah board registration tih a ngai a ni, amaherawhchu kan MLA zahawm tak Pu KT Rokhaw-in hma a rawn la a, MBSE nen thlir hovin kan han ti a, “kan unaute alawm maw le, he harsatnaah hian kan Dan chu kan nam sawi tur a lawm” kan ti a, kum khat chauhin registration kan siam sak a. Chutiang chuan board an exam thei tur te hi kan lawm khawp mai a, kan unaute harsatna kan pui thei hi kan lawm hle tih kha kan sawi duh a ni.

Tin, MBSE kan neih te hi kan hria a, Mizoram Board of School Education khi kum 47 dawna upa a lo ni tawh a, hei hian HSLC, HSSLC te, tin, D. Led leh M. Ted kan tih te exam a buatsaih a, HSS level-a kan zirlai bu turte, tin, curriculum syllabus zawng zawng buaipuitu a ni. Chuvang chuan, a mawhphurhna hi a pawimawh khawp mai a, hei hian vawiina memberte pawhin kan sawi kan education quality te pawh, Hachek bialtu zahawm tak Pu Rindika khan, “kan zirlai bu te pawh hi ennawn a hun lo maw” a rawn tih pawh kha khangah khan SCERT hi a mawhphurtu a ni. National Education Policy, 2020 hnuaiiah hian National Curriculum framework buatsaihna hnuaiiah chung kan kalpui dan tur te pawh nakinah tawi tein kan sawi ang a. Chutiang chuan MBSE hmalakna atang hian vawiiinawh pawh khan member thenkhat khan an rawn sawichhuak a.

Chhuanawm em em pakhat, Mizoram hian tih that em em kan neih ve chu, khawvel, India, Mizoram-ah hripui a leng a, chutah chuan India rama khaw State Board ah mah hian 2020-2021 kumah offline-a exam board dang hi an awm kan hre lo a ni, an lo awm palh a nih pawhin an tam lo viau ang. Amaherawhchu Mizoram-ah hian 2020-21 ah hian Board exam hi offline-in neih theih a ni a, chung kawngah chuan LLTF te, VLTF te, District Administrator te, kan zavaia mipui kan tanrualna avangin hripui karah naupang in online exam ni lo, offline-in an han exam thei a, an quality kha a pangai a ni. Khanga zirlaite pass chhuak theia kan han ti thei hi a chhuanawm a, kuminah pawh hian exam an han nei kal leh mek a, offline-in kan han nei chho leh thei a, hmun dangah chuan University emawa in fate ngei pawh a ni ang, hmun danga kal reng reng chu online-in ralkhatah an exam vek ringawt mai a ni. Amaherawhchu, offline-a exam kan han nei thei hi kan zavaia kan tanrualna vang a ni tih kha ka sawi duh a ni.

Tin, National Education Policy, 2020-a tarlan angin thil chhinchhiahtlak tak mai chu, ‘bilingual text book’ an ti a, zirna hi tawng chi khat chauh nilo, tawng chi hnih tala kan zirtir theih dan tur ruahmanna kan nei a. chutah chuan High School leh Higher Secondary level-ah chuan, “mathematics leh science subject-te hi saptawng ringawta

kan inzirtir hian an thiam ang tur an thiam tawk lova, an man tawk lo” kan ti a ni. Chuvang chuan NEP, 2020 in a rawn remtih leh, a rawn ruahman angin tawng chi hnihin mathematics leh science subject-ah a bul tanna atan Mizo tawng pawha an zir theih turin, a thu pawh saptawnga an han ziah vak ang chi zawng zawng kha Mizo tawngin kan dah vek tel dawn a, chutiang anih chuan mi tam tak, thingtlang kila saptawng thiam tawk loh avanga enge an tih tum ber pawh an hriatloha kha, mahni tawngin mathematics leh science te an zir thei dawn tan tawh a, hengte hi “kan department achievement lian tak a ni” tih kha ka sawi tel duh bawk a ni.

Tin, ‘quality education’ kan ngaipawimawh a, kan group leader Pu Zodintluanga Ralte pawh khan a sawi a, “lawm thu leh kan han inngenna hrang hrang, ‘zirtirtu min pe’ tih piah lamah ‘quality education’ pawh hi a pawimawh tel” a rawn ti a, a thahnemngaihna kha a lawmawm a. Khami kawngah pawh nasa takin hma kan la a, a bik takin kan exam system hi siam danglam a tul a ni kan ti a, ‘scheme of examination’ tiin chutah chuan application level kha kan siam danglam a, zirlaiten *by-heart system* ringawta an chhan chuan textbook knowledge tak tak awm lovin pawl an sawn ngawt ang tih kan hlauh avangin, question-a 40% hi tunah chuan Scheme of Examination hnuaiiah “Application Level with Thought ” tiin anmahni idea a an chhan theih tur, a book knowledge atanga an chhan theih tur hian question hi i bilh tawh ang kan ti a. Chu chuan naupangin *by-heart* ringawt ni lo, book knowledge tak tak an neih tel theihna turin kan bilh tel tawh dawn a ni. Chu chuan kan education quality hi All India Level-ah emaw thildang zelah pawh a tihsan theih kan beisei a ni.

A tawpna lama tan SCERT hian directorate hranin kan nei leh bawk a, Education Department hnuaiiah hian. SCERT hnuaiia kan hotute khian a bikin primary leh middle school lam hi a khawih bik a, chu lamah chuan Academic Authority a ni. An hnathawh chhuan tlak tak mai chu 2022-2023 Academic Session hman turah hian naupang rualbanlo, a bik takin mit chak lote tan hian pawl 1-8 tan textbook hawrawp liana print (large print), naupang mit chaklote tan siam sak a ni dawn a, a bul kan tan dawn a ni.

Tin, NCF leh NEP 2020-in a phal angin ‘Supplementary Reader’ an ti a, zirlai pangngai NCF in a tih bakah khan, a thar dang *supplementary* siam a ni dawn a, pawl 6-8 ten an hmang dawn a, hmanah House-ah pawh ka sawi tawh kha. Mizo Nationalism, ‘Mizo zia’ an hriata, Mizo thil an hriattheihna turin chumi bik atan chuan lehkhahu thar kan siam a, a hmingah pawh ‘Zo-nun’ kan ti a, kan print mek a. He lehkhahuah hian Mizo pasalthate, Mizoram chhunga nungchate, Mizoram chhunga entawn tlak hrang hrangte ziahna tur bik hi pawl 6-8 level-ah zirtirna tha tak tak, an lo thanlena an lo puitling huna sap culture ringawtah an kal loha, an ngaihtuahna siamtuah ‘*Mizonization*’ an neih theihna tur atan zirlaibu thar kumin atanga hman tan turin ruahmanna kan siam a ni tih kha ka sawi tel duh a. Chu chu hmalakna thar pawimawh tak a ni.

Tin, ‘NEP-2020’ kan tih New Education Programme hnuaiiah hian sikul structure duan thar a awm a. Chawhma lamah khan kan MLA zahawm tak Pu L. Thangmawia khan a sawi tawh a. Tunhmaa class-1 atanga kan enkawl tan kha tunah chuan class-III atangin sikul lam zirna hi an hawitir tawh dawn a. Chumiah chuan *Balvatika* (KG ang chi) kha a awm tawh dawn a, ‘pre-school’ kan tih ang hi sikulah khan a bet chho tawh dawn a ni. Chutiang ang syllabus te chu kan han buatsaih a, a bultanna atan sikul 331-ah chutiang pre-school chu kan department hian bul tan tel kan tum dawn a. Kan hmabak a hautak dawn khawp mai. Additional classroom a ngai dawn a, zirtirtu a ngaih belh dawn bawk a. Sum leh paiah kan indaih lo viau a, amaherawhchu, a remchan dan ang angin kan kal ang a. Kan MLA zawng zawngten in bial theuhah puih a ngaihna apiangah fund a ni emaw, a remchan dan angin he kan bultanna turah hian min lo hnatlanpui rawh u tiin ka sawm duh a. Chung KG zirlai bu turah pawh chuan anmahni mil tawkin kan siam a. A hmasa berah chuan ‘Zirtirh Bu’ (kan senior te chu in lung a leng mai thei a) kan siam thar a. Chu bakah chuan ‘Number Bu’ kan tih kha kan siam bawk a. Chumi pahnih chu *Balvatika*, KG level ten an zirlai turte pawh tun kum atangin sikul 331-ah bul tan turin ruahmanna kan siam a ni tih kha ka sawi duh a ni. Chu bakah chuan kan sikul standard te, quality te a that zawkna turin NEP-2020, Para 8.5 (c)-in ‘neih theih ni se’ a tih angin, State School Standard Authority din turin ruahmanna pawh kan siam a.

Tin, Zirlai pawl-te pawhin an ngaih pawimawh leh tula an sawi fo thin, kei pawhin ka sawi thin a, College in assessment team te, PR team te an lo kala “Serchhip College pawh Grade A+ a ni” kan tih ang deuh khan, institution hrang hrangte hi grading pek dan tur tuition fee a ni emaw, admission fee pawh tlemin a tha deuh chu an lo san theihna turin; “hetia a ruala hrut mar put loh dan tur hi i zawng teh ang” kan ti a. Inelna thianghlim a kaltheihna turin “Assessment Board te pawh a awm theihna tur i ruahman teh ang” kan ti a. Chumi atan chuan a bultanna atan State School Standard Authority hi elementary level-ah kan han tan chho phawt dawn a ni tih kha ka sawi duh bawk a ni. Tin, ‘NIPUN Bharat’ kaltlang te leh programme hrang hrang hmangin zirtirtute intuaitharna training te pawh nasa leh zual inpek kan tum bawk a ni.

Thil lawmawm deuh leh changkang tak tur, vawiina kan rual u zawkte tan phei chuan awhawm deuh tawh chu, a bik takin kan primary leh middle school zirlaite tan hian an zirlaibu bikah hian *QR code* kan dah vek dawn a. An zirlaibu chapter tinte kha khami mil zel khan video clip/audio a awm dawn a. Chu chu internet nen an smartphone-ah khan QR code hmangin an han ti ang a, an zirlai puitu tur kha an en theih tur, a lem nena an hmuhtheih tur, tawng nena an hmuh theih tur kha kan introduce thar dawn tih kha ka sawi duh bawk a ni.

Ka sawi hmaih pakhat ka sawi leh duh chu, HRD Board tam takin “SEDP Board te hi sum siamna a ni lo maw” an tih thin kha keinih chuan kan hman tangkai em em

chu, an mahni bultum leh hmalakna thui tak atangin naktip lawka kan Bill putluh tur *Mizoram Language Board Bill* te pawh kha an han ruahman chho a, khangte pawh kha nakinah kan la hmu ang a, a that ziate pawh kan la hmu dawn a ni.

A tawp tlangkawmna lampang turah hian point hrang hrang, (tlang kawmna han tih khan a zo mai dawn lo a nia) in thusawi thenkhat han react-na tur kha a tlangkawmna kan siam ang a.

Member zahawm tak tak tena in rawn sawi Samagra Shiksha (SSA) hnuaiia thawktute, Serlui bialtu leh North-III bialtu bakah Pu Speaker, i veilam atang pawhin member eng emaw zatin an rawn sawi a. SSA zirtirtute kum 20 dawn thawk tawh, hard area a thawk service security nei reng reng lote hi dinhmun tha zawka an din kan vei tlang a ni, kan sawrkar pawhin a vei a. A minister ka ni a, deptt. hotute nen pawn kan sawikhawm tam khawp mai. Tun dinhmunah hian keini Education Deptt. atang chuan heng kan zirtirtu hah tak takte leh SSA hnuaiia thawkte dinhmun tha zawk an din theihna turin DP&AR-ah (service matter thil te a ni a), hnalak kan neih dawn pawhin a bik takin zirtirtu a ni emaw, thildang emaw pawh Education hnuaiia hian a thawktute tan reservation tha tawk siam saka, an mahni chungah competition emaw, seniority base emawa dah luh an nih theihna turin, “an service hi a zahawm a, reservation kan pe tur a ni” tiin DP & AR ah thehluh tawh a ni.

Tin, an hlawh pawh hi a ngaiah an ding rei ta khawp mai, mithiam tak tak an ni a. 5<sup>th</sup> Pay lak lai khan an counterpart-te nen hlawh inhnaih tak khan an awm a, an chhe vak bik chuang lo a ni. Amaherawhchu an counterpart zirtirtute leh thawktu dang te hian 6<sup>th</sup> Pay, 7<sup>th</sup> Pay an enjoy tawh a, hmun thenkhat chuan school-I ah te an thawk hova, an ho a ni. An hlawh hi a insan hleihin a inkalsan ta hle mai a, chung avang chuan Finance Department-ah hian an counterpart-te nen a inhnaih thei ang ber turin heng kan naute, Samagra hnuaiia thawktute lawmman (an hlawh) te pawh hi tihpun a nih theihna turin rawtna mumal tak tunah hian Finance Deptt-ah kan thehluh tawh a ni tih te pawh kan sawi duh a ni.

Tin, MLA zahawm tak tak ten insawi ka han react nghal duh chu, school upgradation chungchang kha a ni. In bial theuhah private school khawtlang dinte “*lump-sum aided*-ah awm thei se” in tih te, khawtlangin MR-a in chhawrte, in buaipui mek lump-sum kum khatah ₹2 - 3 lakh a kan tanpuite hi adhoc-status, adhoc-aided ah awm se kan tih te vawiina adhoc-aided a awmte hi “provincialized-in step-up thei se” kan tihte pawh kha theih ang tawkin deptt. pawhin ruahmanna kan siam a, kan hotute nen pawn kan sawiho thin a, sum dinhmun tlema a ziaawm chhoh chuan eng emaw chen chu kan hotute pawh hian min kalpui thei ang tih beiseina nen kan han sawi thin a. Engpawh ni se, heng hi kan State Finance dinhmun te a ni turah kan ngai a, chutiang tur

chuan deptt. chuan theih tawpin sikul upgradation tur pawh hi hma kan la kan chhawp mek a ni tih hi member ten in sawi tam anih avangin ka han sawi bawka a ni.

Tin, in sawi thenkhat school infrastructure kan neih theihna tur atan in bial theuha school-In thalo sak ngai in tihte, tin, thingtlangah zirtirtu tam tak kan dah te hi an awm nghet hlei thei lo fo hi inluah tur an hmuh loh vang te a ni thin a. Chuvang chuan teachers' quarters atan DPR eng emaw zat siamin Ministry hrang hrangah kan theh thla a, chungah chuan teachers quarters project te kan han siam a, thingtlangah zirtirtu khawi hmun atang pawhin an awm a, in luah tur mumal awmluh avanga harsatna nei tam tak te sut kian tum hian hma kan la a ni. Delhi lam pawh an inhawng chho tan mek a, theih ang tawkin heng te pawh hi beih chho zel kan tum tih kan sawi duh a ni.

Tin, district hrang hrang 8-ah hian DIET kan nei a, a thawktute hian harsatna an tawka nasa khawp mai a. Para Academic staff 69 kan tih te, 2012 hmalama lak tawh DIET a thawktu lecturer tam tak te hi central-in min tanpuina atanga hlauh an pek thin kha an rawn ti tawp deuh rup mai a ni. Chubakah chuan State Treasury atanga chung ang hlauh han pek, mi za tam tak hlauh pek ngai te kan awm ve a, engtin tin emaw kan Finance Deptt. ten min ruahmanpui a kan la kal hram hram a. An ni ho hi nasa lehzuala kan address ngai leh an tana kawng kan kawhhmuh hi a tul hle a ni. Chu bakah chuan waviina member ten thahnem ngaihnaa in sawi kha, sorkar sikul-ah zirlai kan pung ta hle tih hi member ten min hriatpui ka duh a. Kan Ministry-ina hetiang education theih ang tawka kan han kalpuia, zirtirtu MR teacher SEDP atang te, CSS hnuai scheme hrang hrang atang tea rem leh rem lova kan sorkar-in priority a pek tlat avanga lak, a recruitment-ah pawh fair thei ang bera kan tihna hnuai sorkar sikul-ah hian enrollment a pung hle tih hi kan sawi duh a ni. Hun hmasa lamah chuan hmun tina sorkar sikulah zirlai awmluh avangin kan khar a, sikul tam tak sawikhawm ngai khawpin an awm a. Chutianga harsatna kan neih laiin tun Ministry kan kalpuina hnuai hian sawrkar sikul khar rup rup ngai, amalgamate chawp ngai a awm ta meuh lova. Tin, tuna kan thu dawn tam ber chu "naupang kan ngah tawh lutuk a, kan classroom-ah kan leng lo, min extend sak rawh u, additional classroom kan duh" tih hi directorate leh a hminga minister ka nih anga kan dawn tam tak a awm a, a lawmawm khawp mai. Chutiang kawngah chuan deptt. hmalakna tha tak a lo chhuak a ni tih hi ka sawi duh a.

Tin, kohhran lamin education uar takin hma an la mek a, mission-in a thei chin chinah education min kalpui hi kan lawm a, kan welcome a, an niin rawngbawlnaah an ngai a, hetiang education min kalpuina hian rah tha a chhuah kan ring a. Tin, 'private school' kan tih independent school te hi Mizoram education-ah chuan role pawimawh tak luahtute an ni. Naupang pawh tam tak nei an ni a, hripui avang hian kan private school-te hi an harsatna pawh kan thlen nasa khawp mai. 2000 kumah khan "fee 50% bak la suh u, an kal thei si lova" kan ti a, harsa ti tak chungin inluah mante, zirtirtute

hlawhte pek a ngai chungin 50% kan lak tir a. Nikumah khan kan ennawn leh a, “70% bak la suh u, class in la kal mumal thei lo tlat” kan ti leh a, kan control a, thuawih takin sorkar thawhpui leh mipui economy hrethiam chungin an inphah hniam thei zel a ni. Amaherawchu vawiinah hian an ni pawhin an lo hriata tan ka sawi duh chu, Academic Session thar April-ah kan tan dawn a, April atang chuan independent school ho zawng zawng, private school kan tihte hi an mahniin an ruahman angin sorkar control rate pangngai a full-a tution fee an lak kan phalsak tawh dawn a ni. Chu chu kan bial theu, kan vengah pawh lo hria ila. Nu leh pa ten school admission reilo teah kan ti tan dawn a, sorkar school tha tak takah free admission free uniform, free tution min pe dawn a ni. Chutih lain private institution chuan theih ang tawka thain an rawn ti ang a, tution fee an la ve dawn a ni. Private kan thlang anih chuan private-ah tution fee kan chawi dawn tih hria ila, kan duh zawk zawkah kan kal ang, kan duh thlanna hi a pawimawh tih hria ila, a chanve la turah lo inngai lo ula, 70% la turah lo ngai bawh suh u; a full a an lak loh chuan an dam khawchhuak zo dawn tawh bik lo a ni. Chuvang chuan private institution te, vawiina kan ram education-a hmun pawimawh tak changtute hi an dam khawchhuah theihna turin an tan kawng kan hawng dawn a ni tih kha ka sawi leh duh bawh a ni.

Chulo lehah chuan, vawiina member tam tak ten in sawi, “zirtirtu min pe viau tawh chungin, a tawp tlang kawmnaah khan a tlangkir a awm leh deuh tlangpui a, ka bialchhung sikul pali emaw panga emawah hian kan la indaih lo deuh” in ti a. Kan Chief Minster zahawm tak min ruahmanpuina, min remtihpuina leh min phurpuina avangin SEDP Scheme atangin academic session tharah hian High School, Middle School leh Primary School-ah hian SEDP teacher engemawzat kan pe leh dawn che u a ni. Chutah chuan theh chin chinah a khaw mi ngei, a khua institution hotute nena thawktu tur an tualchhung tlangval an rawih theihna turin ruahmanna hna lak pangai kan siam theih hma chuan tih kan tum leh dawn a. In duh khawp zawng zawng chu kan pe thei lo ang che u, amaherawchu in harsatna tam zawk chu rawn sutkian tumin, April thlaa academic session kan tan leh hma hian mahni bialchhung harsatna kha rawn sutkian kan tum a ni.

A tawpna lamah chuan mipui lo thlirtute leh zirtirtu leh zirlai ten an hriat chak em ema chu, Academic Session thar hi April thlaah kan tan leh dawn, thla leh mai atang hian, chutah chuan Zoram mipuiten kan hriat tura tana sawi duh ka neih chu, Pathian-in zah a ngai ang a, hri pawh vawiina kana awm ang hian a kiam lam pan turah ngai ila, April thla atanga school kan tan hunah chuan offline-in sikul kal pangaia kalpui kan tum tawh tih hi ka sawi duh a ni. Chumi tur chuan nu leh pate, zirtirtute leh zirlaite lo inbuatsaih ila, hri a la leng ang, amaherawchu SOP vawng tha chungin SOP tha taka zawm chungin hei hi kalpui kan tum ang. “Hei hi kan Chief Minister nena kan sawi dunna atanga puang thei ka ni” tih pawh ka sawi duh a. Kan Chief Minister-in,

“hmasawn turin kan kal a ngai tawh a, vawiina inkharkhip ringawt mai, naupang sikul kal duh pawh kal tir thei lova kan awm reng mai hi a remchang lo e, offline-a school kalpui ngei tumin i inruahman ang” a tih avangin vawiina education kaihnhawih zawng zawnga lo ngaithla tute pawhin hei hi min lo hriatpui, April thla atanga kan sikul kal turah chuan “offline-in kan kal dawn” tih hi min hriatpui kan duh a ni.

Pu Speaker, tikhan a tlangpui chu ka sawi tawh a, an han sawi duh kan member tena min han zawh kha ka chhang kim chiah lo nangin hun a rei lutuk lohna turin heng ka demand hrang hrangte:

<b>Demand No.</b>	<b>Purpose</b>	<b>Amount (in ₹)</b>
<b>18</b>	Printing & Stationary	12,68,86,000.00
<b>20</b>	School Education	14,93,93,62,000.00
<b>28</b>	Labour, Employment & Skill Development & Entrepreneurship	33,33,41,000.00
<b>TOTAL</b>		<b>15,39,95,89,000.00</b>

hi he House zahawm tak hian min pass pui turin ka rawn ngen e.

**SPEAKER** : Awle, tunah chuan Minister zahawm tak Pu Lalchhandama Ralte in a demand-te –

<b>Demand No.</b>	<b>Purpose</b>	<b>Amount (in ₹)</b>
<b>18</b>	Printing & Stationary	12,68,86,000.00
<b>20</b>	School Education	14,93,93,62,000.00
<b>28</b>	Labour, Employment & Skill Development & Entrepreneurship	33,33,41,000.00
<b>TOTAL</b>		<b>15,39,95,89,000.00</b>

A vaia belhkhawm ₹15,39,95,89,000/- hi House-ah pass a rawn dil a, ‘remti’ a piangin, “remti” ti rawh u le. ‘Remti lo’ kan awm em? Kan awm chuan, ‘remtilo’ ti ula.

Awle, tunah chuan Minister zahawm tak Pu Lalchhandama Ralte a department chan – Demand No. 18, 20 leh 28 te hman tur, a vaia belhkhawm ₹15,39,95,89,000/- chu House-in lungrual takin a pass ta a ni. (**Pu Lalchhandama Ralte, Minister:** Pu Speaker, ka lawm e.)



Awle, tunah chuan Minister zahawm tak Dr. R. Lalthangliana kan sawihona te wind up turin ka sawm ve leh ang a, sawifiah ngai a tihte han sawifiah bawk sela, a demand te House-ah pass rawn dil nghal turin ka sawm e.

**DR. R. LALTHANGLIANA, MINISTER:** Pu Speaker, ka lawm e. A inthlahrunawm tawh khawp mai a, dar 9:15 PM a ni a, amarawhchu helai hi kan rorelna sang ber a ni a, kumkhatah tum khat demand kan sawi a. Chuvang chuan zan khat na nana chu a lo rei deuh anih pawhin hrethiam tlang ila a tha ang e.

A hmasa berin ka department sawitu hi, ‘Commerce & Industry’ han tih hian Geology & Mining a tel ngailo hi a department hi tlemin a ken ve si avang hian a fello deuh thin a. Geology & Mining hi tel ngei ngei tur a ni a, a lo tel lo thin a, pawimawh tak mai nichina kan han sawi department kha a ni. Helaiah hianin member zahawm tak tak 12-te sawiho naah in rawn tel a, Higher & Technical Education-ah hian mi 14 in tel bawk a. Tichuan Health & Family Welfare, Demand No. 24 hi mi 22 laiin min tuipei a, min sawipui a ni. A lawmawm hle mai a, lawmthu ka han sawi hmasa anih chu.

Engtinngge kan tan ang aw ka ti a, Pu Speaker, rang deuha tihdan ngaihtuah tawh a that ka ring a. Chumi hma chuan niminah khan thil pakhat tihsual palh deuh ka nei a. ‘RTPCR’ tih kha *Zawhna & Chhanna* hunah khan kan sawi a, chulaiah chuan Tourist Lodge Lunglei-a khawl pali dah ka tih kha, RTPCR khawl kha chu pakhat a ni a, Truenat pali Civil Hospital-a awm kha kan la chho a, chumi pali zawk chu a ni tih kha i phalnain Pu Speaker, *correction* ka han siam a ni.

Tichuan, Covid test chungchang kha nimin khan kan update hman lutuk lova. January Ni 19 (kumin) atang khan test hi tan a ni a, Ni 28.2.2022 thlenga kan test tawh zawng zawng hi mi 3,729 an ni a, ni khata kan test zah average (chawlhni tiam lovin) hi 106.54 ang a ni. Tichuan, Tourist Lodge-a RTPCR khawl pakhat leh control test khawl pali te test theih zat maximum hi kan han hisap mai mai chuan mi 600-700 inkar vel nikhatah ti thei tura ngaih a ni. Chuvang chuan tun dinhmunah chuan Lunglei lam chu kan zo ve lah lah dawn viau niin kan hria a, kan lawm khawp e.

Tin, chumi chungchangah chuan Pu Mama hi a bul tantu pawh a ni ve a, RTPCR khawl a pek avangin House-ah hian lawmthu kan sawi ang e. RTPCR khawl hi a buaithlak khawp a, sawlai Tourist Lodge-a kan dahin a neuh neuh nena sen a tam khawp mai a. Ka sawi soal maithei a, nuai 100 vel hi chu sen a ngai hrim hrim mai a, hautak viau mahse a pawimawh a. Chuvang chuan, a tawpah chuan kan tihlawhtling thei ta a ni.

Tichuan, member zahawm tak Pu Hlana kha inthlahrung lo se ka duh khawp a, eng emaw kan mamawh, kan bial tana kan pek theih kha churawn thlen ula. Tlem lai deuh pawh khan oxygen concentrator kha Bawngkawn pawh kha hmantir che u kan chak a. Khangah khan member zahawm tak takte, ruling leh opposition pawh a awm chuang lova, hetiang thil covid kan hmachhawna kawngah hian hi chuan tih kha ka sawi duh a ni. Theihtawp chhuahin MLA Fund nen in tang a, in insawr chhuak a, ka lawm takzet a ni.

RTPCR khawl han sawi takah chuan thil lawmawm lam te pawh a awm ve a, Pu Speaker. Tun maiah khan Indian Council of Medical Research-a an hotunu Dr. Kavitha nen kan inbe leh a, hmannah kan inbe tawh a, “RTPCR khawl pariat hi engtikah nge Aizawl i rawn thlen tir dawn” ka zuk ti a, “a pariatin a shipping kan rawn ti ang a, kar leh chuan a rawn thlen theih ka ring” tiin tun maiah khan kan inbe fel tih kha House ka hriattir e.

Tin, hei Pu Duha bial hi a vannei hlein ka hria a, hospital an mamawh khawp mai a, Serchhip hian vanneih thlak takin ‘CSR’ kan tih Power-grid Corporation atangin cheng nuai 2,100 zet a sak thatna tur atan ruahmanna kan nei fel thei a ni tih House ka hriattir duh a ni. tichuan Serchhip vanneihna a kaltluang zel a, NAAC assessment kan neihah khan Aizawl khawpui pawn College/Institution kan neih zingah ‘A’ Grade hmu hmasa ber an ni a, ka lawmpui takzet a, keipawhin citation te ka han hlan ve a ni. Chu chu lawmawm ka ti em mai a kan sawi hrim hrim a ni. Chutihlaiin Kolasib lam khu damlo admit leh inentir an tam em em a, ramri hrula awm hospital lian a lo ni ve bawka, hemi atan hian cheng vaibelchhe 22 lai ruahmanna neih fel a ni tawh tih kha ka sawi leh duh a ni.

Pu Speaker, Pu Sonuwal, Union Minister (Ayush) a ni a, transport nge waterways zawk pawh a keng telin ka hria a, Shipping Minister ni bawk vawiin khan a lo thleng a, kan CM zahawm tak pawh meeting a neih dawn avangin tlai lam session a attend thei lova. Mizoram-a Ayush Hospital sakna tur hmun rukah a rualin min pe dawn niawm takin kan hria a. Nidanga thilpek nen a inang lo deuh hlek a, construction mai nilo, thawktu tur staff pawh an tum dawn a, equipment neuh neuhte pawh an tum deuh vek dawn a. Mizoram sorkar-in kan tum tur awm mang lova, 100% deuh tak tak kha niin, naktukah hian kan hon. Chief Minister leh amah telin a lung (foundation) phumna a ni dawn tih kha House kan hriattir a ni.... (interruption)

**PU LALDUHOMA** : Pu Speaker, Health Minister i nih lai khan Serchhip khi Chief Minister bial a ni bawka a tiin “hospital thar sakna tur kan ngaipawimawh hmasa ber ang” kha i ti a, mahsengin hei, kan nghak rei ta khawp mai a, tunah crore 21 kan han hmu dawn a, session apiangin kan sawi a, kan sorkar chungah leh abikin kan

Health Minister chungah lawmthu ka sawi a. Amaherawhchu, a hmunah khian kan buai ang tih ka hlau khawp mai a, chu chu min hriatpui se ka duh a. NGO Co-ordination Committee leh VC Joint Committee leh Serchhip Thalai Pawl-in duhna hmun lungrual takin an nei a, chulai chu pass lo inpek tum an awm tein minrawn hrilh a. Kan Minister pawh hian Revenue lamah tan min lo lak sak sela, tuten emaw an lo nei leh hman mai ang tih te kha kan hlau a, lawmthu sawi pahin ka han ngen anih chu.

**DR. R. LALTHANGLIANA, MINISTER:** Awle. Kan han kal khan Govt. College-ah khian Science building tha deuh mai kan han hawng pah a, chutah pawh chuan kha lai kha an duh thu an rawn sawi a. Engpawh nisela, lehkha te nen Power Department hmun deuh nia kan hriat avang khan tunah hian file te kan kal tir mek a, kan Power Minister Pu Zira nen pawh tawngka chuan kan inhrilh a, nakinah decision tak tak siamtu pawh an ni turah ka ngai a ni. Engpawh nisela, a lawmawm e.

Chuan, Pu Ngunlianchnunga khan Lunglei bawr vela ICU awm mumal lo deuh a sawi kha a dik a, covid hluar lai tak khan chhim lamin harsatna kan tawk thin a. Tunah chuan ICU khum 4, HDU khum 8, a vaiin khum 12 leh Trauma Centre-a ICU khum 6 dahna tur ruahman fel a ni a, ventilator 9 a awm bawka ni. Reiloteah tuna a awm sa bak hi tlema hnianghnar deuh hlekin Lunglei-ah kan nei dawn tih kha House ka hriattir a ni. Heng bakah Lunglei Civil Hospital compound-ah hian multi-purpose deuha hman theih tur RTPCR khawl mai ni lo blood bank pawh leng, kawng hrang hranga kan hman tangkai theih tur tunah kan buatsaih mek a. Tunhnai maiah khan NEC atangin cheng vaibelchhe 3 deuhthaw kan hmu a, kan seng nual tawh a, nakum kumtir lamah chuan hawn theih kan inbeisei a ni tih, chhim lam bik news atan ka han tarlang ve duh hrim hrim a ni.

Healthcare chungchang kan sawi nasa khawp mai a, Pu Mama pawh khan a ngai pawimawh khawp mai a, a dik a ni. Mahse kan duh dan anga kan tih ngawt theih lohna lai a awm a ni. Healthcare hi ‘Society’ a ni tlat mai a. *Governing Council* a awm a, chutah chuan kan Chief Minister-te, Planning lam te, Finance lam te leh department hrang hrang an awm teuh a, YMA leh MKHC te. Chu rorelna sang ber chuan kan ngaihtuah a ngai a, kan duh dan chu a awm vek mai a, in duh dan kha kan duh dan vek a ni a, liability tam lutuk kha a rit khawp mai a, mahse tunah hian Finance Deptt. lamin (ninin khan kan hon. CM khan a sawi emaw ka hre lova) khawi atangin emaw ruahmanna nei turin hma kan la mek a. Chu chu kan hmuh chuan harsatna awm lutuk lo turah kan ngai a. Ka mawhphurhna chu a ni tak meuh mai a, mahse khami piahlamah khan a kalphung kha a awm ve tlat mai a. ZMC pawh *Governing Board* nei vek a ni a, kan Chief Minister chairman-na hnuaiah kei Vice ka lo ni a, chutiang chan society anga la kal deuh bawka si, government ni deuh bawka si hian kan kal a, final authority chu a *Governing Council* kha a ni tih khawngaih takin min lo hriatsak ula. Theih tawpin tan

kan la ang a, tupawh sorkar sela hei hi chu a tha hrim hrimin ka ring a, “theih tawpa tan kan lakna tur leh mi zawng zawng ten kan chhawr tur a ni” tih kan hre tlang awm e.

Tin, kan sawi ngai loh angreng tak, RIPANS, Zemabawk hi hmannah ka va tlawh a, a lawmawm ka ti khawp mai a. Kan sorkar phat atang khan rilruah hian a lian ve em em a, India hmarchhak state-a mi hoin kan intawm tur ang chi chu a ni ngei mai a, mahse Mizoram-ah a awm miau avangin “kan thu tur a ni a, harsatna a tawh chuan kan sukiang tur a ni” tih ngaihtuahna ka nei ve a. A project cost hi a sang khawp mai a, cheng vaibelchhe 480.12 a ni a. Vanneihthlak takin 2019-a kan sorkar hnu khan eng emaw ti tiin kan innawr chhuak a, phalna Govt. of India, Ministry of Health & Family Welfare atangin. Chutah chuan implementing agency atan pawh HNL Life Care Ltd. work order pek a ni a, January Ni 4, 2021 khan. Hna hi March Ni 1, 2021 khan tan a ni a, an tum dan chuan *scheduled date of completion* hi civil work tam tak a ken tel avangin January Ni 28, 2023 a ni a, kal chak chu a ngai hle dawn a ni. Amaherawhchu hmannah kan va tlawh a, rin aiin thil tam tak an lo ti a. House information atan, hei hi Zirna-In mai a ni lova, tuna a project vaibelchhe 480 khan hospital (100 bedded) a keng dawn a ni. Medical Superintendent Quarter, Resident Doctor Quarter ringawt pawh unit 22 (type-IV) a keng dawn a, Staff Nurse Quarter (type-III) hi unit 18 a keng dawn bawk a, academic classroom 18 awmin, laboratory 32 a keng dawn bawk a ni. Guest House tha tak tunah hian an zo ti tih tawh a, room 10 zet a keng dawn a, general hostel block-ah hian single room ringawt 168 a awm thei dawn a, Indoor Sports Complex and Auditorium (1000 capacity) a keng tel bawk a. Tin, chu mai bakah PG class kan tih ang deuh course thar 7 - MSC Nursing, M. Pharm, MSC. Mlt, MSC. Rt, M. Octometry, Bachelor in Physiotherapy, PG in Diploma in Diebetic & Nutrition tih te a keng dawn a, a *intake capacity* hi kum khatah 128 a ni dawn a. Hei hi development thar tak a ni dawn a ni.

Tin, hna lak tur an nei tam khawp mai a, Professor, Doctor leh Non-Teaching staff-te nen a vaiin 154 tan sanction engkim peih fel a ni tawh a. Hei hi a lawmawm em a, he House zahawm takah hian (kan state sorkar ta chu ni lo mahsela) sawi ka chak ve deuh hlek a, Pu Speaker, i remtihain ka han tarlang lawk a ni.

Hei, harsatna kan tawh a, nichin khan ASHA hlawh chungchang te, tin, in sawiloh lam NHM te hlawh tang kan nei a, Higher & Technical Education-ah Asst. Professor, RUSSA hnuiaia thawkte hlawh tang a rei khawp mai a. Anni phe chu thla 9 deuh thaw a ni tawhin ka hria a, chutiang chuan thil tang hi kan ngah em em mai a. NHM leh ASHA pawh hlawh an lak lohna a rei tawh a, mahse thei tawp kan chhuah a. A tawi zawngin ka han sawi ang a, a technical deuh a. ‘PFMS’ kan ti a, Ministry of Finance, Controller of General Accounts-in an thil duh dan hi a complicate a ni. Tunah pawh hian department tam tak Mizoram sorkar hnuiaiah CSS, a bik takin kan pawisa

hmuh hi duh angin kan hmang zung zung thei tawh miah lo a ni. Chu chu engtin emaw theihtawp chhuah in kan ti a, a thawktu kan officer ten an buaipui a. Nichin maiah khan SNA account chu approval, Ministry lamin an rawn pe tawh tih ka tarlang duh a ni. Chuvang chuan, “pending for approval” kha tunah chuan ‘approved’ a ni tih min rawn hriattir a. Treasury atangin kan account-ah a rawn lut thei dawn tawh turah ngai ila. Tunkar chho velah hi chuan kan inpe hman turah kan NHM thawktute leh ASHA te pawh kan beisei a ni tih kha ka tarlang duh a.

RUSA kha kan sawi chiah lo na a, an khawngaihthlak khawp mai a. Zirtirtu 70 lai mai khan an hlawh an la lo rei lutuk a, mahse tihngaihna a vang khawp mai. Keipawh hian vawi tam ka zu phone a, protocol-a a te ber theihngihlin officer-te nen lam ka zuk phone a. Joint Secretary pheih chu a ning hluin ka ring, ka phone zing khawp a. DO letter vawi tam tak ka ziaa a, a tih hleihtheih lova a buaithlak khawp mai a. Payment System hi Pu Speaker, tun dinhmuna back-log lian tak min siamsaktu a ni tih hi kan hriat ka duh a. Amaherawhchu, “RUSA-ah hian engatinge SMS in dah loh” tih leh ‘state matching share’ tih lai pawh kha thil pakhat chiang lo deuh kan nei a. ‘RUSA-3’ kan ti mai a, a vawi thumna tur decision fel tak hi Government of India hian a siam thei lo reng reng. Helaiah chuan ka zep lova, “Ministry of Human Resources Development” kan tih pawh hi ka dem ve deuh hlek a ni, efficiency a awm lo lutuk a. An nep hi ka ti deuh a, ka han sawi bawng bawng a nih chu. Pu Speaker, vawi tam kan ti a, an thiam ngang lo nge ni. RUSA-3 kan kalpui dawn leh dawn loh kan hriat siloh chuan matching share-a crore tel lo dah kha a finthlak chiah lo deuh a. Chuvang chuan nakin remchangah hei hi an chhunzawm a nih chuan kan dah leh dawn nge tihlai kha chu sorkar-in a la ngaihtuah mai turah ka ngai a ni.

Thildangah ka han peng leh lawk ang a. Lehkhatem te an rawn pelut sup sup a. Member zahawm tak takte thusawi, Pu Duha thil rawn sawi “damdawi tha lo” chungchang kha a tawi zawngin ka han sawi mai ang a. Kan hria a, hma kan la a. Regional Drug Testing Laboratory Gwahati-ah kan thawnthla a. Khatia *challenge* kha an ngai a ni. Chuvang chuan hei hi kan theih ang chinah na takin dan zulzuiin action laka, a manufacturer te pawh question an ngai a. Khatiang khawp khan kan tih a ngai dawn a. Engpawh ni sela, a procedure a la complete lo a ni tih kha ka han sawi mai a nih chu. Tikhan a tawi zawngin ka chhang anih chu. Tunah hian hman loh in Central Medical Store-ah kan dah tawp a ni. (**Pu Lalduhoma:** Damdawi zuar khan an zuar hman lo em ni?) Private Drug Store-ah te pharmacist-ah te an lo dah a, an man vek tawh a. CMS lockup ah tunah kan dah a nih chu. (**Pu Lalduhoma:** Khalai kha chiang deuh a hriat ka duh vang a nia.) CMS-ah kan dah a, tuma khawih chet theihlohin, certification fel tak a awm veleh kan tiral dawn nge tih kha a ni dawn a nih chu. Tikhan ka khan chhang mai ang e, Pu Duha’n min hrethiam mai sela.

A dang lehah chuan Pi Laldinpuii, Serchhip khua chungha thil thleng kha pawikan ti khawp mai a. Eng pawh ni sela, thil a kal mek a, rei lutuk a ni tawh lo turah kan ngai a. Thil tihna turah khan Covid an lo vei ve leh si ah khan kan kal chak theilo tih kha min lo hriatsak ta mai la a tha awm e. Kan la in update zel thei turah ngai teh ang.

Health-ah ka kal laklawh deuh a, thil pakhat 'JICA' kan tih hi tawitein ka han sawi ang a. Hei hi 'Japan International Construction Agency' tihna a ni mai a. Vanneihthlak takin project lian tak, Cancer Super Speciality Hospital kan dinna tura tana kan tih a ni a. Hetah hian zangkhai ang reng deuh hlekin loan ang deuh chu ni tho mah se, a kaltlang tur hi a tam em em mai a, chung zawng zawng chu kan kaltlang fel ta a. DoNER Ministry-in vetting a paltlang a ngai a, Ministry of External Affairs te, Ministry of Finance te, Ministry of Expenditure Govt. of India zawng zawng kha a paltlang vek ta a. Tunah chuan Mizoram sawrkar leh JICA te kut a lo ni ta a. Chu chu Cancer Super Speciality Hospital Zemabawk ami kan dinna tur a ni dawn a, chuang chuan, Central Medical Store pawh hmun dangah kan sawn a ngai dawn a. Hei hi a lian ang reng khawp mai a, single project hospital dinna tur atan chuan a la lian ber mai awm mang e aw ka ti a, cheng vaibelchhe 500 a ni, Pu Speaker. Khum 200 a awm thei ang a, general bed 120, private bed 30, daycare bed 25, ICU bed, ti khan a awm teuh a. Bone marrow transplant bed te, operational room ringawt pawh 4 a awm dawn a, emergency 7, dialysis, ti khan tam tak a awm a ni. OPD hian 14 cubical rooms tih te, neuh neuh thil tam tak a keng a ni.

Tin, a danglamna tur chu, cancer patient enkawlna mai kha a ni ta lova, a hming pawh hi, 'Mizoram State Super Specialty Cancer & Research Centre' tia dah a ni a. Hei hian cancer enkawlna mai bakah cancer natna chungchanga mipui zirtirna (public awareness) a keng tel dawn a. Tin, natna hmuhchhuah hmaa enkawlna hi a keng dawn bawk a, chu chu sap tawngin, 'Early detection and treatment' an ti a. Tin, cancer veite tihnep nana rilru lam thlenga enkawlna hi 'Palliative Care' an ti a, chu bakah cancer vei dam tawhte ngaihtuah zui zelna, 'rehabilitation' te, training leh education khatiang thil tam tak kha a keng a ni. Hei hi kan hlawhtling ta a, ka lawm khawp mai a. Amaherawh chu, Japan nena kan thawh dunnaah hian zopa hmanhmawh ang hian a tih bawrh bawrh theih lova, zawi zawi, time table fel tak, implementing plan fel tak nena tih thlap anih avang erawh chuan kan mizo rilru nen chuan a inmil lo mai thei a. Hei hi development lian tak Aizawl khawpuia kan neih tur a ni. Tin, India Hmarchhakah hian tha ber tur ang te pawhin ka ngai deuh a ni.

Tin, Covid chungchangah hian lawmthu sawi tur tam tak a awm rualin, kan lawmthu sawi hre pha lo tena thil min pek hi a ropui ka ti em a, ka sawi chak ve deuh hlek a. Covid donaa hmanraw hran hran, foreign atang leh India ram chhung atang te pawha kan dawn te a ni a. Health Ministry United Kingdom, Egypt, Kuwait, Indonesia,

Singapore te atang ringawt pawh hian Pu Speaker, oxygen cylinder 966 kan dawng a ni. Oxygen concentrator 1410 ministry atang te, Healthcare te, WHO atang te, Ireland, Switzerland, China, United Way, Amazon, Germany Bosch Project, UNICEF, South Africa, Khalsa, Taiwan, Viba, Japan, khang atang khan kan dawng a ni. Tin, ventilator hi a to viau a, 114, Japan, Canada, Wales, Vietnam, Buddhist Sangha, India Formosa Foundation, Australia te leh Tata atang tein kan dawng bawk a ni. Tin, oxygen *nasal canola* hi 24,800 kan dawng bawk a, WHO, Switzerland leh Czech Republic atang tein a ni. PPE pawh hi Health Ministry atang te, RD Deptt. Mizoram atanga te, WHO, India Formosa Foundation, SBA Foundation, Laltop Operatory atang tein kan dawng bawk a. N95 te leh thil neuh neuh ka sawi lo mai ang a.

Thil pakhat lawmawm deuh chu, Oxygen Generating Plant hi Turkey-in min rawn pe a ni. Amaherawh chu a dahna tur kan la tifel thei lo a, min pekna a rei tawh khawp mai a, Pu RSa bial Vairengte-ah khuan dah mai ila kan han ti a, mahse buaithlak deuh khan an rawn sawi a, engtin nge kan tih dawn ni. Tin damdawi kan tih mai, Oxyлизimat leh Randisevir te USA, Netherland, Bangladesh, Egypt, Gelead leh Switzerland atang tein tam fe kan dawng bawk a. A man chu chhut ila chuan nuai sang tel a ni mai awm mang e aw ka ti a, ‘damdawi man to’ te kan ti a. Tin, ICMR hian nichina ka sawi, PCR khawl min pek bakah hian VRDA Lab min pe bawk a, UNICEF kaltlang nge ni ka hre lova, kha kha kan lawm khawp a. Thil tam tak Kit min pek ho hi chhiar sen a ni lova. Hei hi House-ah kan sawi chhuak ngai lova, sawi ka han chak ve deuh hlek a ni.

Tin, Health & Wellness Centre, ‘HWC’ kan tih mai hi Prime Minister Flagship Scheme Ayushman Bharat hnuai mi a ni a. He programme hmang hian Primary Health Centre, ‘PHC’ kan tih leh sub-Centre te tih changtlunna tur a ni a, kawng hrang hranga upgrade-na tur a ni mai a. PHC kan neih lai mek te hi HWC-ah hlangkai dawn ila manpower lamah danglamna a awm chiah lo naa, Health & Wellness programme hian a ken tel tlat chu physical health te, mental health te, ENT leh Eye-care te, palliative care te NCD hrang hranga enkawlina (medical mi nih loh chuan kan hrethiam lo mai thei a) khangte kha a keng a ni.

Tin, diagnostic, natna hmuhchhuahna lamah hian PHC te, kan sub-centre te hian thil ken a nei ve dawn a. Entirnan, Liver function test, Kidney function test, Lipid Profile lah a dangte hi a hmalakna tur zinga mite kha anni dawn a ni. Tin, sub-centre ah chuan nurse mai nilo kha awmtu tur tihah khan B. Sc (Nursing) kha a ni dawn a ni. Kan lak tawh ho phei chu thla ruk chung training kan pe vek a, chumi hnuah chuan an qualified chauh a ni.

Tin, heng bakah hian Ayush hian Sub-centre eng emaw zatah an rawn thawh ve a. Ayush doctor-in kan sub-centre te an awp hi nakin lawkah chuan 30 bawr vel a ni dawn a ni tih kha ka sawi tel duh a ni.

Chuvang chuan, PHC hian thingtlang kilkhawr, Aizawl khawpui leh District headquarter pawn lampang hi a khawih danglam turah kan beisei a, tih vut vut theih erawh chu a ni lova. Pathian khawngaihna a zarah tuna PHC 57 kan neiha 55 te hi Health & Wellness-ah kan hlangkai a, pahnih chiah kan bak tawh a, reiloteah a vaiin kan hlangkai hman ka ring a.

Tin, ‘Urban Public Health Centre’ kan tih 8 hi tunah hian Health & Wellness-ah hlankai vek a ni tawh a, Sub-centre 275 kan neiha 159 hlankai a ni tawh a, Health & Wellness officer-te chu sub-centre 186-ah dah an ni tawh a ni. Nichin a ka sawi ang khan, Ayush hian sub-centre 38 min luah khah sak dawn a, Health & Wellness hnuai hian Ayush doctor 24 kan dah thei tawh a ni tih kha ka tarlang zawk duh a ni. Pathian khawngaihna zarah tluang taka kan kal thei a nih chuan Financial Year thar 2022-2023 chhung hian Mizoram-a sub-centre zawng zawng leh PHC-ah hian thil danglam thlengin kan hlangkai thei vek dawn niin kan hria a, House ka han hriattir a ni. A lawmawm khawp mai.

Sawi tur a tam a, amaherawhchu, a tawi zawngin ka han ti ang a. Covid chungchangah covid case awmdan hi House hian kan hriachian a pawimawh ka ti a. Kawng lehlamah chuan, “engatinge ava rem thei lo ve” tih ngaihndan a awm a, a dik reng mai a. Amaherawhchu, rin aiin *test* kan ti tha ve tlatin kan hria a ni, test chungchangah hi chuan kan inchhuang ve riau mai a. Tunah hian India ramah hian population criteria-a tehfunga lakin Mizoram hi test ti tha ber niin kan inhria a, a chhan chu, mihring population nuai 14 bawr dawn vel anga inchhut pawhin, a percent mihring tam dana zirin test zat pawh an tam tawh tlat mai a, khatiang kha hmundangah an awm lo niin kan hria a, chu chuan positivity rate pawh a tisang lo thei lova. State tam takin test an tih tawh loh lain keini chuan vawiin thlengin kan la buaipui a, Kan thawkho tha bawk si a, kan thawhpui te nen. Chuvang chuan, IDSP record-ah hian Mizoram hi *ti tha ber*-te zingah min rawn chhut a ni, Pu Speaker. **(Pu Lalduhoma:** ICMR-in “RTPCR hian 70% tal test tur a ni” a tih laiin a figure ka hre lova, 30% vel bak kan khumin ka hre lova. A dang hi chu ‘RAT’ tih leh thildang vek kha rinrawlah inhmang a. A test quantity atang chauhin em ni *a ti tha* leh a *ti chhia* kha an lak? ICMR-in “70% ni rawh se” a tih laia 30% vel chauh kan nih si chuan, engtin nge *ti tha*-ah kan inchhiar theih tih kha min han hrihfiah se.)

Northeast-ah pawh hian RTPCR test vek ang hi chu an zo bik lova, kan capacity-in a tlin chin ang khan a ni. India hmarchhak state hi ka han sawi lawk ang a, Pu Speaker.



Test percentage per population-ah hian 166.61 kan kai a, state dang zawng zawng hi 100 an tling lo vek a. Pahnihna hi Arunachal niin 91.34 an ni a, pathumna Assam niin 90.78 an ni. A dang chu ka sawi zel lo mai ang a. Test-a ti tha lo ber pariatna hi Nagaland a ni a, an test scale hi 23.2 a ni a, test tawh zawng zawng pawh anni chu a beitham khawp mai.

Keini hian ‘vulnerable group’ kan tih hi kan focus avangin kan hmuchhuak tam te pawh a ni mahna. Vawiinah hian theihtawp kan chhuah a, kha khan kan positivity rate a tisang lo theilo a ni tih kha ka sawi duh a.

Tin, chutih mek lai chuan thihna chungchangah hian thil kan hriatte pawh hi a tha ka ti hrim hrim a, a pawimawh tak a nihna lai pawh a awm a. ‘Death analysis’ kan han tih mai hi ZMC-a kan mithiamte hian an rawn nei thin a, 2<sup>nd</sup> March-ah ti hian report an rawn pe a. Tunah hian Covid vanga ZMC-a admit tawh zawng zawng hi 8,246 a ni a, heng zinga damlo 7676 (93%) te chu dam takin an chhuak a ni. An thi vek lova, thi kha 7% vel erawh chu a ni. Tunah hian ZMC-ah damlo kan neih hi 100 bawr vel chauh an ni a, an tam lai chuan 300 an kai a ni. Covid avanga ZMC-a thi tawh zawng zawng hi 474 an ni a, hei hi Mizoram-a thi zawng zawng zinga 72 % an ni. Covid avanga boralte zinga a tam ber 75.3% hi kum 60 chunglam an ni a, 76% te hi mipa an ni. Boralte zingah hian khawpuia cheng an tam zawk a, 67% an ni. Tin, covid vanga boral 81% te hian natna benvawn, ‘chronic illness’ an ti mai a, *co-morbidity* an vei tel a ni. Covid vei lo pawh ni se natna khirkhkan tak an nei a. Thi zingah vaccine full-dose la 30% an awm lain, la lo 58.8% an ni.

ZMC-ah hian *Covid dedicated hospital* kan neih hma khan seat kan dah tam thei lova, khum 150 bawr a awm a, tunah erawh chuan 306 kan nei a ni. Tin, ICU 13 awm thina kha tunah chuan 44 bawr vel a ni a, 100 bedded vertical extension kan tih leh tur hi thla leh hian kan peih hman kan beisei a ni. Chu chu kan peih hman chuan *400-bedded hospital* a ni nghal turah kan ngai a ni. Amaherawhchu, vanduaithlak takin Covid chauh kan dah lotheih siloh avangin OPD service kan ti thei lo hi a pawh pawh kan ti khawp a, hei hian kan hospital quality a effect thei dawnin kan hria a ni. Chuvang chuan, tun thla hian boruak chhia a thleng lem lo anih chuan OPD pawh hmun thenkhatah kan siam a tul dawn a ni.

Medical College hian hospital a ken tel a ngai a, hetah hian non-Covid patient-te kan admit-na tur ang chi hi kan tih a tul dawn a ni. ‘Medical’ anihna lai takah hian tunah hian zirlai mipa 161 leh hmeichhia 210 an awm a, admission tih mek a ni. Tunah hian zirtirtu 142 leh thawktu dang 594, an vaiin staff zawng zawng 736 an awm a ni. Academic building bik leh hospital chhawng tel sawn cheng vaibelchhe 103 zeta sak a ni a, sorkar hmasa hun lai atanga hma lak a ni naa kan la hawng thei rih lova. Tin, Boys

Hostel leh Girls Hostel pakhat ve ve, floor 10 ve vea sak tan leh mek a niin, Paying Cabin pawh vaibelchhe 11.02 vela tih mek a ni.

Tin, Model Rural Health Research Unit pawh sak mek a ni a, kum hnih hnua naupang kan dah theih zat tur hi 500 chuang hret ni thei tura beisei a ni. Tin, Library-ah hian lehkhabu 4,000 chuang kan nei a, lei belh tur a ni bawk a, research project leh unit lian tham hi pasarih kalpui a ni.

Mobile RTPCR lab-ah hian tunah hian Ministry of Science and Technology hnuaiah Bio-technology IPSD nen kan ti tlang ta a, northeast-ah hian kan han en a, Mobile RTPCR Lab, state ta anga nei awmchhun kan ni. Manipur-ah pakhat a awm a, mahse company pakhatin sumdawn nana a rawn dah a ni. Keini chu kan ta a ni dawn a, thawktu pawh pathum min phal sak a, sum senso pawh a tam ve ang reng khawp mai a... (*interuption*)

**PU LALDUHOMA** : Pu Speaker, India Formosa Foundation hian hman deuh tawh khan RTPCR-Van a thlawna min pek an duhthu kan minister zahawm tak office-ah ngei hian an han sawi a, anmahni ngeiin kei pawh min hrilh a. A thlawna dawn mai theih kha engatinge kan lo uksak lova, a dang kan ngaihtuah leh tho si? Kha kha ava uihawm ve maw le?

**DR. R. LALTHANGLIANA, MINISTER:** Khalai kha chu kan uksak lo pawh a ni lova, thil hi sawi mai ang hi a ni lova, tuna mi pawh hi kan buaipui chhung rei deuh mai a ni a, a complicate khawp mai a, a chi dang, awl deuh a nih chuan kawng dang a ni a, tuna mi hi chu a nuai za chuang man a ni a, buaithlak khawp mai a. Engpawhnise, kha kha kan lo dawng sawng lo pawh a ni lo, amarawhchu sawi mai ai hian a lo buaithlak a ni tih ka han sawi mai a nih chu.

Niminah zawhna chhan laia information ka dawn kha tlemin a authenticate lo deuh a, chhim lampang tan news tha deuh mai kan neih a chu, oxygen filling plant hi Pukpui Lunglei thlen dawnah sawn kan buaipui mek a, a lawmawm khawp mai a. Tuna 'PSA plant' kan tih district hospital-a kan dah ang ai mahin, tuna mi hi chu 'filling station' a ni ta a ni. Hei hi Mizoram chhim lampang tana chhen fakawm dawn riauin kan hria a, wawiin niah hian a hlawhtling chho dawn ta a, project cost pawh, housing-ah cheng nuai 6,66,600 a ni a. Tin, Oxygen generating plant hi 173.06, avaiin cheng vaibelchhe 2,40,27,200 a ni a, hei hi hun reilo te chhungin chhim lam hian kan cylinder ruak te silchar-a dah khah ngai tawh lovin saw laiah awlsam tein kan fill thei tawh dawn a ni. Tunah hian Delhi-ah he plant khawl tak hi chu a la awm a, a in kan sak mek avangin kan la la chho thei lova, video conference hmangin kan inbe reng a, reilo teah kan tihhlawhtlin ngei kan beisei a ni.

Higher & Education-ah tawi tein. Kamalanagar College chungchang te pawh kha Dr. BD-a rawn sawi kha a pawimawh khawp mai a. A buaithlakna chu, Lawngtlai College pawh kha a ni tho a, NAAC hi pawngpaw lo hmachhawn theih ngawt a ni lova. Serchhip College pawh an lawmpuiawm em emna chu, an ti tha thawkhat viau a nih loh chuan induhsaka inpek ngawt chi a ni reng reng lova. Chuvang chuan, nichinah ‘Kamalanagar-ah kan mamawh’ tih pawh kha, thil tih tur neuh neuh a awm avangin pawngpaw pek ngawt a theih lohna lai a awm a. Sap tawngin kan sawi mai ang a, “the main reason for long pending of NAAC accreditation for Govt. Kamalanagar College was that the college had face problems in uploading of self-study report” tih a ni a. Complicate deuh niin self-study report kha a tih theihloh a, which is a mandatory prerequisite information for assesment and accreditation of NAAC. However, with the intervention of the concerned officer of NAAC in the Higher & Technical Education Department, the problem has now been solved. Tunah chuan kan ti fel tawh a. Chuvang chuan in upload thei tawh a, nakinah chuan theihtawp kan chhuah ang a, NAAC team ten eng grade emaw ber nge an pek theih tur khan kan inbuatsaih a tul a ni. India kalphung hi a dang tawh a, grading system vek a ni a. Serchhip College pawh khan thil tha deuh deuh in la hmuh ka beisei tlat, hetiang a nih chuan, a grade sang ho tan chuan lawmman hi awm tlat a ni. Building lamah te pawh a ni ang a, duhsakna chi hrang hrang a awm thei tlat mai a. Hei hi Dr. BD Chakma khan ka chhanna-ah min ngaihsak mai se.

Tin, Tuipang lamah, “Tipa-ah college dah ve a va tha ve” kan MLA zahawm tak Pu KT Rokhaw khan a ti a, ka duhsak khawp mai a, kei pawhin. Amaherawhchu tunlaiin National Education Policy-ah hian College neih hi pawngpaw zuam lutuk chi a lo ni mang lova. National Education Policy-ah chuan “zirlai hi a tlem berah 3,000 an awm tur a ni” tih te a ni a, a lian viau mai a. Tunah hian kan Government College ho zawng zawngah leh Pachhunga University College tiam pawhin 3,000 kan tling lo deuh vek maithei. Kan qualify lo naa chu kan ni laklawh tawh a. La ni zel tur tan kha chuan “kan veng a lian deuh alawm, i din ang” tih ngawt kha a kalzelna turah chuan *private* kan ni reng ang a, “sorkar-a leh beiseina kan neilo ang” kan ti a nih chuan kawng dang a ni a. Chuti anih loh chuan kan education policy hian rin ai hian harsatna a siam thei dawnin ka hria a. Chu chu kan MLA zahawm tak Pu KT Rokhaw pawhin min lo hriat sak se. Ka duhsak khawp che a, amaherawhchu a buaithlak deuh a. Tin, college hi sorkar-in a pawng a taka va din kha a theih chiah loh a. A tirah chuan a khuaa mite khan *Managing Committee* dinin chutiang chuan an ti ve phawt ang a, Maanaging Committee leh Board te a han kal ve naw naw a ngai ang a, tichuan an result leh academic record te kan en ang a. Tin, an intake leh admission neih dan kalphung te leh performace zawng zawngte kha tih a ngai hrim hrim a ni tih kan hriat a tha awm e.

Thil danglam deuh hlek tun hnaia kan neih chu, Higher & Technical Education-ah hian college pathumah PG zirna kan han tan ve a, chung college-te chu - Govt.

Aizawl College (Education Department), Govt. Hrangbana College (Commerce Department) leh Govt. Aizawl College (History Department) te an ni. Heihi thil lawmawm tak a ni a, House information-ah ka han tarlang duh a ni. Covid-19 hripui avanga state pawnah zirna chhonzawm theihloh anih avangin 2020 - 2021 chhung khan college leh institution-ah hian zirlai tangkhang an lo tam khawp mai a, zirlai 16,253 admission pek anni hman a ni. 2021 - 2022 academic session-ah pawh khan Govt. institution-ah zirlai 18,063 admission pek anni. Hemi kawngah hian government college-te an insang mar a, theihtawpin rampawna zirlai haw thla thei tawh si lote khan admission an la a. *Special mention* ka pek duh chu, kan university ten theihtawp min chhuahpui a, Vice-Chancellor hnena lehkha ka pek ni tlai ah emergency meeting kovin an seat capacity bakah 15% - 30% in a tipung a, Pachhunga University College-in theihtawp min chhuahpui bawh a. Chutiang chuan eng emaw ti tiin pandemic lai khan zirlai tangkhang tamtakte kan lo buaipui ve a ni tih ka sawi duh a ni. Kum 2021 khan NAAC inspection team ten Govt. T. Romana College te, Govt. J. Buana College leh IASE te hi inspection an nei a, an pathum hian Serchhip College an tluk lo vek a, B-Grade erawh chu pek an ni. Hei hi a lawmawm ve hrim hrim e. Tin, NEC atangin Hindi Library tih changtlun nan Govt. Aizawl Collge, Kamalanagar College leh Mizoram Hindi Training College te cheng nuai 10 theuh pek a ni a, hei hi kan hriat ve a tha awm e.

Tin, hei bakah hian Aizawl khawpui lailia college awm hi a buaithlak em em mai a. Sikulpuikawn-ah Govt. Aizawl College a awm a, a buaithlak a, “a chhawng a tam si a, a safe tawh lo” tih te a ni a. Chuvang chuan Mualpui-a an insawna tur pawh kan peih thawkhat viau tawh a. Tin, Govt. Zirtiri Residential Science College pawh hi *outsirt* deuh, Durtlang lamah tunah chuan an insawn ta a, a lawmawm angreng khawp mai. Tin, tukina kan ngaihthlak ang khan Aizawl West Collge pawh Luangmual lamah, Handloom ramah loh theih lohin kan pe a, chutiang chuan khulamah kan la sawn dawn a ni. Dinthar, Dawrpui Vengthar chho vela a awm khu a buaithlak em em mai a, chutiang chuan kan insenghawi chho tan mek a ni tih kan sawi duh a ni.

RUSA hnuai a Asst. Professor-te hlawh lak theihloh chungchang kha chu nichin khan ka chhang maiah ka ngai a. Tin, lohtheih loha han sawi ka duh chu, MZU Southern Campus hi kum 2020 January thla khan kan han hlawhtling ve nawlh mai a, January Ni 10, 2020 khan Mizoram University Southern Campus Lunglei-a din thar te kha Ministry for Human Resource Department khan ‘yes’ min pe a ni. Sorkar leh MZU ten chak taka an bawhzui thin a ni a, a sakna tur hmun tak lai hi Pukpui VC ten phal takin 344 acres zeta zau min pe a, Land Revenue & Settlement Department pawhin engkim min tihfel sak tawh a ni. Provisional Certificate (land lease) kan tih ang chi hi tunah hian kan hlan tawh a, he mi a nih vele hian MZU hian hma an la ta char char a. A tirah chuan DPR pawh an siam tam angreng khawp mai a, cheng vaiblechhe 400 zet an siam niin ka hria

a. Tukinah Vice Chancellor nen kan inbia a, ‘engnge in thlen chin’ ka ti a. Keini in kan nawr ve lai hi a awm a, amaherawh chu a tak taka MZU Executive Committee in uluk taka an chin an chin a, khulama a kal thlak zel kha a ngai si a. Chu mi kawngah chuan tlemin a kawng bumboh ang chi neuh neuh hi sum involve te a nih avang hian a awm ve hrim hrim a. Engpawh ni sela, tukin zinga Vice Chancellor nen kan inbiak chuan, “hlawhtling turah kan ngai a nia” a ti a. Engnge ni, ka hre chiah lova, Delhi kan kal lohna chin pawh a rei deuh tawh a, kan kal leh hmasak berah kan la bawhzui turah ngai ta ila a that ka ring.

Kan University khu kawng leh lamah chuan, ka portfolio chu ni lo mahsela tunah hi chuan kan thawhona a tha khawp mai a. Central University a lo ni a, April Ni 25, 2000 khan *Act of Parliament* hmanga din kha a ni a. A function ni tak hi July Ni 2, 2001 kha a ni. Tunah chuan India hmar chhak State-ah hian a langsar ber niin, Academic Department 39 lai kan University-ah hian kan lo nei ve tawh a. Under-Graduate College te, Nursing te, Medical, Paramedical leh DIET Institution hrang hrang 35 lai MZU hian kan lo nei tawh a, a lawmawm khawp mai a. Tunah hian zirlai 2,842 awmin Research Scholar ringawt pawh hi an tam tham ve tawh khawp mai. Pachhunga College-ah pawh zirlai kuminah hi chuan 3,099 an ni a. Pu Chama nen kan thawh ve thinna a ni a, Research Scholar pawh 10 lai an lo awm ve ta der mai. A lawmawm khawp mai. Hei hi karawn sawilan sak duh ve hrim hrim a, kan thawhona hi a tha em em mai a ni.

Tin, MZU hi NAAC team ho, a endiktute hian strict takin an han endik a. Kum 2019-a an accreditation-ah chuan A-Grade an pe tlat mai a ni. Hei hi a lawmawm khawp mai a. Tin, MZU hi NIRF ranking, University tha thlanchhuahah hian a tel ve tlat mai a. Tin, a dang leha chuan khawvel University 9,300 zing atanga *ranking* an siamah hian kan University hi 562-na a hauh ve tlat mai a ni. Tin, University Ranking, 2021 (India ram University)-ah 23-na kan hauh pha a, a lawmawm khawp mai a. Chuvang chuan, Southern Campus hi kan neih hunah chuan tlemin a subject pawh hi dang deuh te kan la ti turah ngai ta ila. A bik takin Mizoram-in kan nghahhlelh em em chhim lama kan University tur hi neih theih hun la awm turah beisei ila a tha awm e.

Tichuan, Health Department leh Commerce & Industries nen khan ka pawh fin chho tawh ang a. “Chu mi, kha mi, post ruak a tam lutuk, indaih lo” tih zawng zawng, Lab Tech atanga Health Worker, Nurse te, Doctor te, PHC Lawngpuighat-a kan la function theih lohna chhan te, Pu Papuaia’n “PHC-ah a va la beitham em” a tih pawh huap vekin, PHC thenkhata Doctor kan la dah theihloh pawh tunhnaiah doctor 10 rual kha thlakhat chungah an pension dual a, a buaithlak khawp mai a. Lak phalna hi chu tlema zawng kan hmu a, mahse, pawngpaw lak ngawt kha a theih si lova, MPSC kaltlang kha a ngai si a, chu chuan tunlai tak hian harsatna lian tak min siam a ni.

Tin, Commerce & Industries Department pawh hi a tawi zawngin ka han khaikhawm mai ang a. Sorkar hmasa hun lai khan *amalgamate* kha a lo ni a. Commerce Wing leh Industry kha an han *merge* takah khan eng eng emaw a han kal chhoh kha a lo rei ve leh deuh tawh a. Keini kan han sorkar leh a, rin aiin post hloh a lo tam khawp mai a, tin, post ruak awm si, fill-up loh a tam em em mai bawk a. Pu Speaker, nang pawhin i enkawl tawh kha a ni a, Extension Officer ringawt pawh post 28 nge 29-ah tunah hian 2 chiah kan nei a, district-a dah kha a ngaihna a awm lo reng reng a. Mahse, vanneihthlak takin tunhnaiah 8 nge 9 MSSSD-in min lak sak dawn a, mahse, an bei rei leh khawp a, district hi a collapse dawn a ni. Tin, hetiang anga kan kal chuan Information Department leh department dang thenkhat post ruak fill up thei lova kan kal rei lutuk chuan nakinah collapse hun hi a thleng mai awm mang e aw tih hi a awm thei a ni. Chuvang chuan, uluk takin manpower committee te pawh kan sorkar-in, kan Dy. Chief Minister zahawmtak DP&AR changtu a awm a, theihtawp chhuahin an han din a, chu chuan department hrang hrangte dinhmun a enchho mek a. Chuvangin, heng karah hian hmanhmawh taka han lak bawrh bawrh kha a theihloh deuh a, an kalpui chak viau pawhin ka hria. Kan Dy. Chief Minister-in a hrechiang zawkin ka ring a, keimahni department chauh pawh ni lova.

Tin, “Health Department hi *austerity measure*-ah khan in tel ve meuh lo” tih kha chu tunhnaiah chuan min relax deuhhlekk a, a hma chuan kan tel vek a ni. Dik tak chuan 2019 kan han sorkar chhoh khan kan Chief Minister hian a hrethiam viau mai a, 50 crore kha Health Department-a post ruak 2000 chuang kha fill-up hram a tha ang a kan ti a, kan han in downsize ta a, post 734 fill-up tur kan ti a, mahse kan lak dawn tepah hripuiin min nuai ta a, khang zawng zawng kha kan ti leh thei ta lo a ni. Tunah hian kan boruak hi enge a an zel dawn kan hre lova, engpawh nise hripui kan hmachhawn hian min khawih nasa a, thiltih a har a ni. School Education Department-a “SEDP teacher tih ang deuh te hian kal mai teh ang” tia an inher deuh ang te khan kan kal ve thei ang em maw te kan ti a, chutiang thleng chuan Pu Speaker, kan ngaihtuah a ni.

Commerce & Industries hi chu Pu Speaker, tukin *Question Hour*-ah khan ka sawi teuh tawh a, sawi tur a tam lutuk lova. Pu Speaker, Lunglei lam hian thil puan tur a awm fo mai a, “NEC atangin administrative approval Lunglei super market sakna tur nuai 1403.4 hi ni 25. 2. 2022 khan tihfel a ni e” tih anih hi. Ava lawmawm ve.

Border trade chungchang hi kan bei ngawrh ve khawp mai. India leh Bangladesh nena kan tih ho dan tur meeting pawimawh tak nei turin kan official te vawiinah hian an meeting mek a ni. Pu Nihara a lo lut chiah a, Kawrpuichhuah te kha vawiinah an sawi dawn anih chu, Bangladesh nena kan insumdawn tawna kha. Tin, Silsuri boder-trade kha agenda pawimawh tak mai a ni bawk a. Myanmar nena political boruak la in settle lo hian tlemin harsatna min siam a, Nunsuri, Tuipuibari, Marpara, Silsuri te,

khawthlang lampang hi chu chak taka kalpui kan tum a ni. Tukina ka sawi ang khan Kawrpuichhuah pawh Bangladesh Union Minister Pu Tipu Munshi lokal tura inbiak fel vek tawh anih lain harsatna kan neih deuh avangin a lokal thei ta lova.... (Aw, hei hi anih hi Lunglei Super Market sakna tur order chu, helaiah hian a lo awm reng a nih hi.)

Geology & Mining hi dik tak chuan kan lam ri khat lutuk a, Minister portfolio-ah pawh hian, ‘Commerce & Industries’ tihah hian tawp mai tawh lovin ‘Commerce & Industries and Geology & Mining’ ti zel tawh ila. Directorate hran ang hian kan awm ve bawk si a, kan hmaih ziah mai a. Pawisa thawh tam thei ber an ni a, mihring ngah lo ber an nih ka ring a, post pakhat pek belh pawh hi a har em em mai si a. Chuvang chuan kan thilphal pawh hi ava ngai em ka ti a ni. A revenue earning report pawh update ka nei chiah lo na a, hei hi nakinah ka la pe ang che u ang a, rin ai hian an thawk tha khawp a ni tih hi ka sawi duh a ni.

Indo-Myanmar lamah pawh hian kan Sorkar hi kan phur khawp mai a, theihtawp kan chhuah tak meuh a. Tunah pawh hian Saisihchhuah lamah te tan kan la la reng a. Mahse tunah hian Burma lam hi dawr tur mumal an awm lova, India sorkar lamah chuan kan zuk ti reng a, anni pawhin tih an duh a ni, Mizoram-in kan duh bawkin. A boruak hian ala ken loh hrim hrim laiah hian wind-up naah hian sawi thui lutuk kha a theihloh turah ka ngai deuh a.

Engpawhnise Union Minister of State, Health lam changtu a lo kal a, niminah khan a haw leh ta a. A hnenah khan kan mamawh hi kan thlen tam ang reng khawp mai a. Eng pawh ni sela, “Prime Minister tirh ka ni kha i ti bawk a, kan sawi teuh dawn nia” ka ti a ka pe teuh mai a, hlawhtling tak ang maw, ka hre lova. Hei, Champhai hi Vice Chairman awmna anih vang pawh nilovin, (Amah hi a awm lo a ni maw?) A pawimawh riauna lai a awm a, a district rau rauah khian. A chhan chu khawchhak lama kan khawpui a ni a, chuvang chuan kan hospital pawh rinaiin a lun a, tin, mihring pawh rin aiin lut leh chhuak an tam a. Chuvang chuan *100-bedded hospital*-a dah pawh kan duh khawp mai a. Tin, vertical extention, a building a tha bawk a, dah a tha viau lawm ni, Pu Sangte? ICU pawh Lunglei neih zah zet an nei ve der tawh a. Tin, RTPCR khawl pawh a bungrua chu kan chah thleng kim deuh vek tawh e an ti a, reilo teah a function thuai kan beisei tih kha mut tituia tan Champhai lampang tan ka han sawi ve hrim hrim a ni. Kan hmalakna chihrang hrang chu ka sawi tawhlo mai teh ang, tlai kan ti lutuk palh ang e.

Handloom & Handicraft-a kan hmalakna-ah hian loh theih loha sawi ka chak a awm a. Pu Mathlana bial pawh kha an tangkai viau a, hand sanitizer siam tih velah khan. Tun covid chho vel hi eng emaw ti kawng zawng tak chuan kan tangkaipui ve riauna chu “Committee for Promotion of Locally Manufacture Protective Gears” tih hi din a

ni a. Hei hi a tha ve riau mai a, puanthua eizawngte chhawmdawl na kha kan hmalakna pakhtah kan han ti ta a, chutah chuanin covid eng emaw lai khan a bul atangin mask an thui char char a, an thui tam hman khawp mai a, 1,42,525 lai mai an thui hman a, puanthui thiam tam fe kha eizawna kan pe hman tlat mai a ni. Mahse a daih rei lutuk thei lova khatih chung khan kan awl vak lo tih te kha kan sawi duh a. Tin, PPE suit hi Commerce & Industry lam pawhin an rawn dah a, set 21,600 lai kan ti hman niin ka hria a, a lawmawm ve hrim hrim a ni.

Tin, Covid bakah hian kan market neih 22-te hi tangkai takin kan han kalpui a, staff indaihlohna nasa mahse chuti chung chuan revenue kan hmuh theih ang angte harsatna tam tak karah kan han lakhawm ve zel a. Tin, kan buaina em em pakhat chu, tlemlai deuh, nikum hmasa lam khan ‘Aizawl New Market’ kan tih mai tunhma MNF sorkar laia kan sak tho kha niin ka hria a, a building alo upat deuh tawh avangin sorkar hmasa hun laia an lo ngaihtuah ve deuh tho kha a awm a, ‘foreign lane’ kan tih mai awmna hmunah khan building sak kan han tan chho ta a. Amaherawhchu pandemic avangin kan kal chak theilo khawp mai a. Heta tan hian sum pawh 3641.59 lakh lai mai kan dah a ni a. Hei hi kan hmanhmawh tawh khawp mai a, chutih mek lai chuan kan Hon. Deputy Chief Minister enkawl mekna, UD & PA-in, nimin lama kan ngaihtlak tawh ang khan smart city limited sum sengin Aizawl New Market thiahna atan cheng 3,400 lakh ruahmanna siamin DPR pawh zawh tawh a ni a, tender pawh chhuah mai an tum tawh te kha a lawmawm khawp mai. He building pahnih hi kan zawh chuan eizawna sang eng emaw zah tel dawrkai chihrang hrangte sawilaiah sawn kan siamsak thei dawn niin kan hria a, kan lawm khawp mai. Tin, Lunglei-ah sawn market lian ve tak mai pakhat tunah hian 270 lakh-a sak kan zo tep a, kumin kumtawp lamah te hi chuan zo hman turah kan ngai a ni tih te kan sawi duh bawk a ni.

Tin, bamboo hi ka han sawi lawk teh ang. Bamboo Development Agency (BDA) kan ti a. Helaiah hian tunah hma kan han la ve a, “Establishment of Processing Unit of Value Addition of Bamboo” kan ti a. Govt. Sector atan hian BZ Bamboo Trading Society, Ramhlun North leh Gilgal Bamboo Processing Society, Chaltlang Dawrkawn te hi Zuangtui Industrial Estate, Zuangtui-ah hian *round agarbati stick* siamchhuak tura hma la turin BDA hian a thlanchhuah te an ni a, hei hi November Ni 26 khan kan va hawng nghe nghe a ni. A department anga kalpui vak lova PPP mode ang deuh hleka kan kal hi a finthlakin kan hre deuh a. Tin, Bamboo Technology Park Sairang ami leh Industrial Estate Zuangtui amite unit khat ve ve a awm tawh a, tihpun pawh kan la tum chho zel dawn a, financial year tharah chak zawka hmalak hi kan tum ve hle a ni tih kha ka tarlang duh bawk a ni.

Pu Speaker, ka duh tawk ve mai teh ang.



**PU K.T. ROKHAW** : Pu Speaker, khawngaih takin. Tipa-ah doctor tunah kan nei lova, Siaha District-ah chuan Tipa hi khawpui ber pahnihna a ni a. Engpawh ni se doctor hi min lo dah sak hram se tih ka lo ngen a ni e.

**PU B.D. CHAKMA** : Pu Speaker, i phalnain he House atang hian, Mizoram mipuite hriata tan a pawimawhin ka hria a.

Hei Industry hnuaiia siam hmaituamna (face mask) hi kan hmang anih chuan ‘a him tawk em’ tih kha ka ngaihtuahnaah a awm a. Mizoram-ah hian uluk tak leh medical staff-te taima taka an thawh pawha Covid case a la hniam hlei theihlohna chhan hi hetiang *handmade mask* kan hmang nasat lutuk vang a ni thei em tih ka ngaihtuahnaah a awm a. Chuvangin, industrial handmade mask te chu *medically*-a tha, khatiang standard kha ni thei se a va tha ve.

**DR. VANLALTHLANA** : Pu Speaker, RUSA chungchanga post 72, Cabinet Memorandum pawh awm tawh tun thlenga la lak loh chungchang kha min rawn react sak se la.

**DR. R. LALTHANGLIANA, MINISTER:** Pu Speaker, RUSA chungchang hi a buaithlak ang reng khawp a. Theihtawp chhuahin tan kan han la dawn a, mahse Court-ah hian an lokal lak lawh tlat mai a, ‘subjudice’ kan tih ang khan. Chu chuan member zahawm takin a han sawia kha han lak dawn khan min ti lai deuh a. Chulai te chu engtin emaw thil a awm anih chuan kawng dang ni se la.

Ni e, doctor awm lohna member zahawm tak Pu Rokhaw han sawi kha, tunah hian kan Home Minister bialah pawh PG zirin doctor paruk a rualin an chhuak thawt mai a, MBBS, PHC-a awm te kha anni si a, chu chuan harsatna min siam ta a. Chutih mek lai chuan doctor hi 10 chuang PG zira chhuak nilo, pension hrim hrim kan han nei rual a, chu chuan harsatna lian deuh min han siam a, a pawi khawp mai a. Engpawh ni se la, ngaih pawimawhah kan nei ang a. Saw laia kan dah pawh kha i recommend kha a ni nghe nghein ka hria, a ni ti raw? Kha nula te kha a fel a ni ang, PG kha a zir dawn ta tlat mai a, a lawmpuiawm ve bawk si a. Engpawh ni sela kan hria a, doctor awmlo PHC kha chu a rem lo lutuk tlat mai a, ngaihtuahna kan lo seng a.

Tin, mask vuah chungchang Pu BD-a sawi kha, Mizo siama kha i tihna em ni? (**Pu BD Chakma:** Aw, local-made kha ka en a, a him tawk ang em aw tih kha ngaihtuahnaah a awm a.) Awle, a him turah ngai teh ang aw, midang pawh hian an bun ve tho mai a. Covid vei tawh tamna atanga teh a thi percent lakah hian 0.31 kan ni a keini min dawttu hi chu khitah an ni chho daih mai a, chu chu India ramah hian *thi*-ah hi chuan 600 chuang emaw kan lo nih mek lai hian kan la tlem ber tih hi member ten

hre ta ila. Tin, vaccine kan administered chungchangah hian thil lawmawm ve deuh chu, 15 - 17 years of age-ah hian North-East State zingah pakhatna kan ni ve mek a, a pumpuiah North-East-a ti tha ber dawttu kan ni a, Sikkim hi kan dawtah hian an awm a ni. Kan ti tha ve viauin ka hria. Dose la tawh zawng zawng hi mi nuai 14,85,123 lai kan ni ve a, 1<sup>st</sup> dose la hi 97% kan tling tawh a, 2<sup>nd</sup> dose la hi 81.1% kan ni. Chutiang chuan rin ai hian helamah hian hma kan la tha ve riau a. District-wise ang hian a sawi theih chiah lova, CMO-wise ang zawngin sawi ta ila; Aizawl West hi pakhatna an ni a, kum 18 chung lam dose lakah hian 110% an achieve a, a pathumna hi Siaha District leh Lunglei District an ni. A lawmawm e, Serchhip pawh 90% a ni a, Kolasib 92%, Lawngtlai 91%, Mamit pawh kan han hniam viau thin naa, 75% ah tunah chuan kan up chho ve dawrh ta mai. Report ka han haichhuak ve hrim hrim a nih hi.

Tichuan Primary, Health Care kha kan dil mai dawn a, kha kha kan ngai pawimawh a. World Bank nena kan thawhhonaah khan cheng vaibelchhe 280 tunah hian kan kalpui tan tawh a. Tun atanga kum li velah chuan hmel thar tam tak thingtlang bikah hian heng hmang hian kan hmuh kan beisei a ni.

Tichuan Pu Speaker, vawiinah ka Demand-te –

Demand No.	Purpose	Amount (in ₹)
21	Higher & Technical Education	2,64,80,96,000.00
24	Health & Family Welfare	7,20,63,59,000.00
40	Commerce & Industries	63,59,63,000.00
<b>TOTAL</b>		<b>10,49,04,18,000.00</b>

te hi he House-in min pawmpuia min pass pui turin ka rawn thlen e.

**SPEAKER** : Awle, Minister zahawmtak Dr. R. Lalthangliana'n a Demand-te: -

Demand No.	Purpose	Amount (in ₹)
21	Higher & Technical Education	2,64,80,96,000.00
24	Health & Family Welfare	7,20,63,59,000.00
40	Commerce & Industries	63,59,63,000.00
<b>TOTAL</b>		<b>10,49,04,18,000.00</b>

House-ah pass a rawn dil a. Remti apiangin, 'Remti' ti rawh u le. (*Memberte: Remti.*) Rem tilo kan awm chuan, 'Remtilo' ti ula. (*Remtilo an awm lo*).

Awle, Minister zahawmtak Dr. R. Lalthangliana department chante-

<b>Demand No.</b>	<b>Purpose</b>	<b>Amount (in ₹)</b>
<b>21</b>	Higher & Technical Education	2,64,80,96,000.00
<b>24</b>	Health & Family Welfare	7,20,63,59,000.00
<b>40</b>	Commerce & Industries	63,59,63,000.00
<b>TOTAL</b>		<b>10,49,04,18,000.00</b>

House-in lungrual takin a pass ta a ni. (**Dr. R. Lalthangliana, Minister:** Pu Speaker, ka lawm e.)

**SPEAKER** : Awle, vawiina kan tih tur kan business chu kan zo leh ta a, kan chawl ang a, naktuk Dt.3.3.2022 (Ningani) chawhma dar 10:30 AM-ah kan thukhawm leh dawn nia.

*Sitting is adjourned. (10:35 PM)*